

BIBLIOTECA NAZIONALE

XXV*


A

34


NAPOLI

F
6.





CERTAMINA
L I T T E R A R I A.



M

CERTAMINA LITTERARIA
AB ACADEMICIS
SEMINARII PATAVINI

INSTITUTA, ET HABITA...

PRÆCEPTORE

PETRO FACCILOLO,

IPSOQUE PRIMA ORATIONE PRÆEUNTE,
ADDITIS AD CALCEM

DUABUS ALIIS

EJUSDEM ORATIONIBUS,




ENETIIS,

Apud GUILLELMUM ZERLETTI:

MDCCLXVII.

SUPERIORUM PERMISSU, AC PRIVILEGI.



JACOBO ADEODATO PAPAFAVA
PATRITIO VENETO

ADOLESCENTULO NOBILISSIMO
PETRUS FACCIOLUS PRÆCEPTOR
S. P. D.

HORTOS Tibi recludo, ADEODATE
dulcissime, (patere tantisper ut
nunquam nobilitatis, sublimisque
conditionis oblitus tuæ, ea Te
voce compellem, quam meus in Te abri-
pit amor, alias reiiceret honor) amœni-
simos hortos recludo Tibi, dum e Gram-
maticorum vepribus, atque dumetis extri-
catum Te ante limen Musarum constituo,
ubi bene-Suada Sapientia qua soluta, qua
ligata numeris sedem posuit, quæ non mo-
do delectat cultores suos sed etiam sine
fatieta oblectat. Quod dictitabam Tibi
prope quotidie futurum, ut grammatici
studii fastidium molestiamque voluptas ma-
xima atque jucunditas consequeretur, id
jam jam per me, citoque cognosces. Om-
nium Artium initia suas habent salebras,
suas difficultates, quæ solent ipsarum stu-
diis

diis initiandos pueros non leviter deterre-
 re; ut sapissime & Parentum, & Præce-
 ptorum constantia opus sit, ad eos in of-
 ficio continendos. Tu vero, Adeodate ca-
 riissime, ex asperioribus hiſce anfractibus,
 ambagibusque jam emerſiſti, per commo-
 diores ſemitas progredi: ſentes atque
 rubos ſuperſtaſti, in mollioribus graminibus
 herbiſque recumbes: radicum amarioreſ
 ſuccoſ exſorbuiſti, venuſtoſ flores colli-
 ges, dulceſ fruſtus deguſtabiſ. Ad eſdum
 mecum, quoniam e calamo excidere flo-
 reſ, fruſtuſque. Contemplare deliciãſ, uti-
 litateſque in Hortiſ, Agriſque tuiſ para-
 taſ Tibi per Matrem, quæ non ſolum ani-
 mum tuum virtutibuſ, atque doſtriniſ ex-
 cultum concupiſcit, & ut excolatur om-
 ni ope nititur, omni ratione curat, omni
 tempore invigilat, ſed quia ad uſum, de-
 cuſque vitæ pro cuiuſque conditione quæ-
 ri oportet neceſſaria, tua illa providentiſ-
 ſima Mater in tuo, tuique gratia perpe-
 tuo victu, atque cultu expenſiſ proriuſ inu-
 tilibuſ abſtinens, quaſ tamen non ſolum
 uſuſ, ſed etiam Gentiſ tuæ dignitaſ poſtu-
 lat, omneſ facienſ & cenſum tuum ipſa
 met induſtria ſua non minimum auxit,
 ad utendum fruſtibuſ, & Hortum tuum
 (quem

(quem si possent laudandum suscipere qui Alcinoi, & Hesperidum hortos memorant, non viderentur fortasse magnopere uti poetica licentia, si hunc illis præferrent) antehac injuria temporis prope squalidum Hortum tuum, & in deterius ruentem restauravit, ornavit, amœnissimum reddidit, ad fruendum deliciis. Sed, ut eo redeamus, unde casu digredi ipse Orationis cursus admonuit, contemplare & flores, & fructus domi tuæ: illi visum, isti gustum oblectant. Unde hæc jucunditas, & suavitas tanta, nisi e radicibus amarulentis? Sic Tu ex injucunda adhuc studiorum tuorum tanquam radice brevi fructus dulcissimos capies. Neque ego id eo disputo quasi eorum Tibi tantum potiundum sit, & non laborandum: *nil sine magno vita labore dedit mortalibus*. Sed præterquamquod minuitur exercitatione labor, discendi voluptate in dies magis ac magis augescente ita minuitur, ut tandem nihil sentiat. Jam Tibi per me patent Eloquentiæ, & Poeseos limina, quæ prætergrediens subibis hortos illos honestarum voluptatum referatissimos, quos antea commemoraveram. An ego hic Poeticæ, & Oratoriæ artis laudes Tibi contexam, quæ licet valerent

ad excitandum Te, ut earum cupiditate inflammatus libentius avidiusque ad eam gloriam adspirares, tamen immensæ illæ cum sint, & sublimiore stylo efferendæ, in epistolam ex se ingentem rerum copiam, & elatius dicendi genus respuentem ineptissime caderent? Has Tibi privatim potius, quantum oportuerit, recensebo, & quæ de Eloquentiæ cum Poesi conjunctione viginti ab hinc annis publice disputavi, per otium communicabo, fortasse publicæ quoque luci una cum aliis bene multis, quæ hoc animo seposita teneo, si quæ nunc typis profero studiosis Adolescentibus non displicuerint, commissurus. Interea præsto quod promiseram, cum P. Virgilium planiorem per me factum tuo nomine inscriberem, diceremque me datum & alia, quæ sperarem Tibi jucunda fore, & Adolescentibus ad Litterarum laudem condescendentibus non inutilia. Quamquam omnium præstantissimos, & aliorum Magistros Oratores ad imitandum, quod est ex Præceptoris officio, Tibi proponam, artem eorum virtutesque explicabo, tamen ut me ducentem libentius sequare, meisque vestigiis alacrius insistas, tres Orationes meas, levidensæ tametsi munus, Tibi in præsens offe-

offerō, quo quid, quantumcumque sit illud, quod in illorum lectione, & commentatione profecerim, cognoscendo per hunc quasi inferiorem gradum ad superiorem adscendas. Immo, ut molliorem facilioremque adscensum Tibi substernam, meorum olim Auditorum specimina tum Oratoria, tum Poetica legenda meditare exhibeo, ut cogites quantum alii Duce me profecerunt, & velis Tu quoque eodem Duce tantumdem, atque adeo magis proficere. Sed de hoc pluribus inter nos: non juvat modo detinere Te pluribus. Vale & disce libens. Φιλαμάδης, ἑὸν καὶ ποσὺ μαθήης.

L E C T O R I.

NOVUM tibi affero, Lector benevole, nihil tamen afferens novi. Quæcumque enim hoc exiguo volumine continentur vel Oratorio, vel Poetico stylo conscripta sunt. Quid autem omni ætate vulgatum frequentius, cum & Bibliothecas onerent libri huiusmodi multitudine, & in Librariorum cancellis præcopia stipati jaceant, & (ut omittam qui ad disperrienda inter paginas varii coloris fila femellis inserviunt: indignor enim eos referre, qui ad pharmacopolas, & balsamentarios deferuntur) tam multi in dies typis exaudantur? Nihilo tamen secius cum lucubrationes huiusmodi omnes sint auctorum suorum, singulæ singulorum, nec ab aliis aliæ fluentes, & cum aliis colligatae, ab uno, tanquam capite, ducta origine, id hic tibi

bi novi proponitur per hæc Litteraria Certamina a meis Auditoribus instituta, ut a me habeas scriptiones non meas, & ita singulorum singulas, ut aliæ pendeant ab aliis, ad alias referantur, aliisve respondeant, quæ tamen omnes a me uno profluxerint. Patere, quo planius intelligas, ut aliquanto altius rem deducam. B. Gregorius Barbadicus, nostrorum temporum cum sanctitate, tum litteratura singulare decus atque ornamentum, quem quoties nomino, sentio me affectu animi dulcissimo commoveri, inter cæteras bonarum Artium Scholas in Patavino Seminario suo constitutas, Academicam instituit, h. e. cœtum eorum Adolescentum, qui ingenio ad ea studia, quæ ab Humanitate sibi nomen vindicant, apto supra cæteros excellere, cui Scholæ non alium Magistrum, quam studiorum Præfectum attribuendum sanxit; ratione sane probabili, ut qui cæteris Alumnis ingenio præstarent, eos Auditores haberet is, qui cæteris Præceptoribus humaniorum litterarum cognitione præiret. Verum cum ad hoc circiter tempus nunquam defuerint, qui possent æque atque Studiorum Præfectus Juvenes sollertiores Musarum lacte, atque adeo litterario solidiore cibo nutrire, cumque extra ordinem, & supra officium alia insuper provincia Præfecto Studiorum demandata fuerit, alii Præceptori Adolescentes in disciplinam traditi sunt. Video avidum te, amice Lector, narrationis explicationis. Tuæ ut obsequar cupiditati paullulum Orationis filum interrompam, quamquam extra chorum non saltabo. Joannes Georgius Cornelius Episcopus Patavinus, S. R. E. Cardinalis re Eminentissimus, alter Seminarii Parens munificentissimus, qui tanto rectius, atque gloriosius futurum regimen suum arbitratus est, quanto fidelius, ac religiosius B. Gregorii Barbadici vestigia secutus fuisset, probe intelligens quantæ futurum esset universæ Rei litterariæ utilitati, ipsique Seminario celebritati, ac nominis prædicationi, in sententiam venit Jacobi Facciolati per ea tempora Studiorum Præfecti, de Latina Lingua meritissimi, nulla mea commendatione indigentis, quem jamdudum vulgata monumenta sua satis superque com-
men-

mendant, ut Latinum Lexicon expurgatum, & auctum
 quanto ocyus Seminarii typis ederetur, illudque onus
 nimvero gravissimum ipsi Facciolato latinitatis scientissimo
 imposuit, Ex eo factum est, ut Academicorum institutio
 in Præceptorem alium transferretur. Quid autem cau-
 sæ fuerit cur deinceps etiam citra opus illud Præfecti
 provincia divisa permaneret quærere si juvaret, non va-
 caret solum Orationis longius producere. Verum nihil
 refert, cum quod intererat Adolefcentum rationibus non
 defuerit, Studiorum Præfecto, & Academiæ Professore
 ita conjunctis, ut, si res ferret, alter alterius vices su-
 biret; quod aliquando contigit, & anno 1760. maxime,
 quo Præfectus Studiorum Academicam artem pro me
 facitavit, & pro eodem ego in solenni Studiorum in-
 stauratone proludi, quam prolusionem ad calcem hujus
 operis videsis. Sed tempus est ut ad Discipulos Acade-
 micos (est enim id quod agimus) revertamur. Institutum
 loci est, ut Academici sex per annum Certamina
 Litteraria committant. Ut intelligas, quod superius di-
 xeram, hic exhiberi tibi Scriptiones non meas, eas ta-
 men omnes a me profectas, habe qua ego ratione hæc
 Certamina paranda putavi, Proponebam primo Audito-
 ribus meis argumentum universum, sive problemma,
 tum peculiare thema suum singulis, ita tamen ut om-
 nia sive opposita, sive alia ab aliis deducta in unum
 collinearent, præcipientemque quo cuique scribendi ge-
 nere in sua explenda parte utendum esset. Tum vero,
 cum omnes saltem in disserendi ratione, & veri, ac
 falsi judicandi scientia versati essent, in scribendo an-
 tea exerceri soliti materia a Magistro tradita, ut eos
 proprio Marte invenire assueffacerem, jubebam quem-
 que excogitare quid ad rem suam aptum putarent,
 quæque excogitassent omnia tanquam in silvam confer-
 rent. Has ego silvas legendo percurreram. Si probanda
 videbantur quæ invenissent, quod accidit persæpe, ani-
 mos dabam, ut disponerent, & expolirent: si quid de-
 trahendum, aut addendum occurrisset, id ego præsta-
 bam, quo eos in recta via constituerem, quam tenen-
 tes sine adminiculis ipsi per se ulterius progredierentur,

Ita

Ita indicato rerum dicendarum fonte, & ordine, utgebatur quisque opus suum, pensumque absolvebat: postremo censuræ meæ subiiciebantur omnia, ut expenderem quæ castiganda, quæ probanda, ubi litura, ubi lima opus esset. Hic ego ut tibi, Lector candide, debeo veraciter dicere, nec meo, qui semper fuit sollicitus ac patrius in discipulos, amore ductus falsas meis tributas laudes tibi obtrudere, sic nec veritus ne suspiceris fictas, iis debeo veras detrahere. Fateor: non omnium ingenia paria fuerunt, neque omnium lucubrationes laude dignæ pari. At prima sequentem honestum est in secundis, tertiisque consistere. Ne te morer, quæ leges comprehensa versibus, præter id quod antea dixi, de meo vix quidquam audies. In Orationibus autem seu longioribus, seu brevioribus multa sunt e Discipulorum deprompta penu, sed quia Oratorius ad aurium mensuram numerus atque modus longiorem exercitationem & usum postulat, quam quantum expectare ab Adolescente possis, sæpe verborum circuitum equidem mutavi, sæpe humiliora, vel aliquando jejuniora ad plenioris nobilioris stylo dictionem extuli. Quod si inter legendum deprehendenti quæ tibi placeant, suboritur aliqua dubitatio, num tantum Adolescentes perficere poterint, quantum perfectum esse tibi forte visum fuerit, præsertim cum ubique locorum hujusmodi certamina ab ipsis magistris omnino parata & instructa puerorum, atque etiam adolescentum, quasi picarum, ore proferantur, tibi persuadeas velim in Seminario Patavino ab Academicæ Scholæ principio ad extremum usque, discipulos, duce certe & adjutore Magistro, a se elucubrata recitasse. Dubitas adhuc? Age sis. Quanta famæ celebritate floruerit Seminarium Patavinum, non est cur ego dicam; tu ipse noveris, nisi plane hospes ac peregrinus sis: quamquam quænam est tam remota ex cultis Natio, quis locus, nisi prorsus barbarus, a nobis ita sejunctus, quo non pervaserit Seminarii Patavini cum laude nomen? Unde tu id ortum putes? A præstantia & copia Præceptorum, & ingenti fructu Discipulorum. Illos satis per se laudatos ac notos pro ratio-

ratione temporis silentio prætereamus, in re, quæ præ manibus est, hæreamus. Quot ibidem, præter Academicam, bonarum Artium ludi fuerint, quot sint, opinor, nesci. Ac cæteri quidem Auditores, qui in iis cursum cucurrerunt, certe non simul ac ex iis prodire, ad artis laudem quique suæ pertinuerunt: quantum enim illas Artes percurrendo proficere potuerunt id est, ut per se discere didicerint, &, ut dicitur, sine cortice nare, quo vel sibi relictæ tundendo incudem in arte sua progressu temporis præstare possent. Ad Academicos autem quod attinet, nonne se ipsa comprobatum est vel per id ipsum temporis, quo Auditores erant, sæpissime rogatos poetica edenda typis scripsisse, & ubi Academica rude donati sunt, illico Præceptores factos non solum Poeticæ, sed etiam Oratoriæ Scriptio- nis exempla aliis dictare consuevisse? Et quidem, si annales Seminarienses evolvas, reperiæ admodum paucos ad docendum selectos, non ex Academico Ludo desumptos; quippe ad humaniores litteras apta ingenia ad omnes liberales artes tradendas idonea experientia inventa sunt, quodque mirere magis, omnium tamen indidem hominum cognitione notum, ad eas ipsas quas ab aliis non acceperint, sed per se ipsi arripuerint. Quid? Alia Seminaria non solum in nostris Urbibus, verum etiam in exteris, quantum adjumenti, & incrementi in re litteraria acceptum referunt Academicæ Seminariensi Patavinæ? Nam annuo Studiorum cursu peracto quotannis adhuc aliunde per certos homines conquistum est, quinam ex iis, qui totum studiorum curriculum confecerant, viderentur aptiores ad litterarum gustum eo transferendum, quo optimis conditionibus invitarentur. Recense, si lubet, singulos hinc alio traductos. Invenias enimvero paucos non ex hac Academia. Sed obvios interroga in celebritate nominis & gloria versantes, eos dico, qui in Seminario Patavino alti educatique fuerint, non dicam omnino omnes, sed plerosque certe, ac fere omnes audies Accademicis studiis operam ibidem dedisse. Persuaderi ne tandem potes, sublata omni dubitatione, Præceptoris quidem
qu-

ductu, uti dicebam, & ope modica Auditores ipsos hæc certamina proprio Marte commisisse? De hoc satis: ad alia propero exitum spectans. Multos ego annos hoc docendi munus exercui. Academicas disputationes a me propositas, & ab Auditoribus absolutas collegi quidem, non tamen ea semper cura fuit, ut colligerem omnes, immo neque omnes singularum partes, atque adeo neque habui in animo collectas diligentissime custodire. Tum enim cum huic provincie præessem, quantum propemodum Cælum a Terra distat, tantum equidem aberam ab ea cogitatione futurum aliquando, ut deliberarem has commissiones publice habitas publici juris per typos facere. Sed meæ in eo negligentie præcipue pœnitet, quod singulis poeticis, oratoriisque opusculis Auctoris nomen non inscripserim, epigrammata græca pauca repetiverim, pauciora servarim, cantiones autem hebraicas mihi traditorum nullas postularim. Atque in his quidem, præter argumentum, ac sensa nihil mihi juris arrogo. Erat enim peculiaris Linguarum Orientalium Schola, a B. Gregorio Barbadico, magno animi ardore inducta; multisque suffulta præfidiis per ingentes factas characteribus ejus generis comparandis impensas, e qua Schola aliquis latina carmina a me proposita, ab earum Linguarum Professore hebraice reddita pronunciabat. Nihilominus si prævidissem statuendum mihi hæc literaria certamina in lucem emittere, ad complementum operis, neque hebraica, saltem tanquam Scholæ reliquias, prætermissem. Jam enim Schola una cum Professore eruditissimo, magnique in iis studiis nominis Antonio Zanolino & decubuit, & occubuit. Græca vero epigrammata etsi aliquot habeo, quia tamen plura defunt, non puto pretium operæ alias Commissiones hoc ornamentum præferre, quo plures careant. Unum do, quod ad tem arbitror, Certamine primo, ubi Linguarum Orientalium Musa præses exultat, Gregorio Barbadico Beatorum fastis primum adscripto, ut, Orientali mihi per imprudentiam in præsens deficiente Musa, Græca saltem ejus amica & affinis partes agat. Il-

Iud enimvero ante omnia fero gravate, quod non adfervatis Auctorum nominibus, singulorum merita nota facere nullo modo possum. Et si enim multos memoria teneo, plurium tamen in mentem mihi non venit: ea est enim longioris temporis recordatio, iique in varia, ac remotiora loca dispersi cum sint, infinitum opus esset omnes per litteras consulere, & quæ ad quemque scripta pertineant, absentes interrogando secernere. Quorsum autem aliorum nomen tibi subiiciam, aliorum non subiiciam? nullius, si minus omnium, puto consultius. Si in illorum manus hoc volumen venerit, noscent ipsi se. Quamquam quod necessitate cogor ut faciam, illis aut omnibus, aut aliquibus acciderit forte non ingratum. Cum enim illi jam modo grandiores nati, & in his humanioribus disciplinis longe exercitiores, & in hominum oculis positi magna litteraturæ gloria fruuntur, fortasse, si olim Tullius querebatur, se puero, aut adolescente (sub annum scilicet ætatis vicesimum) ex commentariolis suis inchoata ac rudia excidisse, vix ea ætate digna, eoque usu, quem ex canis, quas dixerat, consecutus fuerat, non dissimilem querelam Auditores antehac mei hoc tempore fortasse usurpaverint. Tutum igitur silentium adhuc est. Superest singulorum certaminum ratio, causaque explicanda. Si legendo attentius mentem intenderis ipse per te quantum satis erit conicies. Nolo te in vestibulo longiore sermone delassare. Vale, nos nostraque amato, si potes, sin minus, æqui bonique facito.

CERTAMINUM INDEX.

<i>De B. Gregorio Barbadico certamen primum .</i>	pag. x
<i>De eodem certamen alterum .</i>	35
<i>De eodem certamen tertium .</i>	63
<i>De Clemente XIII. Summo Pontif. recens creato .</i>	86
<i>De B. V. Maria sine labe Concepta .</i>	116.
<i>De eadem Dolenta .</i>	140.
<i>De D. Philippo Nerio certamen primum?</i>	164.
<i>De eodem, certamen alterum .</i>	190
<i>Utrum Ingenium Iudicio, an iudicium ingenio præstet .</i>	
211.	
<i>Utrum Homini magis usui sensus fit, an Intelligen-</i>	
<i>tia .</i>	234
<i>De Sancte Veronesio Episcopo Patavino recens creato .</i>	
<i>Oratio .</i>	259
<i>De Lingua Græca . Oratio .</i>	275

Quæ oculos errata fefellerint, vide in postrema
Pagina.



D E
GREGORIO BARBADICO
BEATORUM
FASTIS ADSCRIPTO.

O R A T I O.



UM universam Christianam Republicam jam altero ab hinc anno ingenti gaudio, gestientique lætitia compleverit Beatorum fastis meritis-
simo adscriptus Patavinæ Diocesis quondam Episcopus sanctissimus, S. R. E. Cardinalis non dignitate modo, sed & virtute Eminentissimus, hujus Seminarii Conditor, Institutor, Pater, munificentissimus, sapientissimus, amantissimus, GREGORIUS BARBADICUS, (o nomen amabile, nomen suavissimum, dulcissimum nomen, quod ipsum per se unum infusum auribus intimos sensus percellit inusitata pietatis vehementia, totam præ novo gaudio commovet animam, & ipsamet concutit exultatione

A

ne

ne medullas!) Jamdudum, inquam, ad Beatorum religionem venerationemque Barbadicus consecratus cum sit, mirabitur fortasse quispiam ecquid nos in communi commotione animorum, in tanta celebritate, in tam diuturna gaudii significatione, inter plausus ubique excitatos, resonantesque ubique cantus, tam diuturno silentio usi fuerimus, ut quos officium supra ceteros admonebat, & omnium principes ad præferendum, atque adeo ostentandum triumphum esse jubebat, ii omnium postremi tandem, quasi e somno excitati prodierimus ad nostram occultatam adhuc, sed vere maximam voluptatem ex intimis sensibus eliciendam? Auditione accepimus quam magnifice splendide ornate, quam hilariter læte jucunde primo institutum Gregorii nomine festum diem agitaverit illa Roma, quæ superbissimis olim illis suis adfuenta triumphis, ex iis nullum hoc ornatiorem, ac lætiorem egit: Et quasi elingues accepimus. Delatum est ad nos nullis impensis Bergomenes pepercisse, omnium animos in hilaritatem, linguas in bona verba, ingenia in laudes effusa fuisse, quo gratum in sanctum ipsorum olim Pastorem animum, & ex ejus recenti gloria exultantem testatum facerent: Et taciti audivimus. Venetiis, quæ in certamine honoris, magnificentiæ, dignitatis cedere non solent ullis, in Civis sui honorem admirabilia facta prope vidimus: & silentes vidimus. Incurrerunt nobis non modo in oculos, sed in aures etiam hic in Patria pompæ, apparatusque, in quibus cum sumtu elegantia certabat, effusæ veluti triumphantium voces, sacri cantus, quasi Angelorum ex eadem causa in Cælo plausibus occincentes: & tamen oculis, auribusque hausimus obmutescentes. Admonuerunt tandem nos officii nostri Curia omnes Urbanae, Rusticaeque, tum reliquæ Sacrae Aedes, quæ omnes qualiacumque potuerunt, festivitatis

tis argumenta dedere. Jam expletus est omnium civium effervescens alacritate animus; & nos votorum damnati, in Aris posito Barbadico, quod jamdudum ardentissime expectabamus, hætenus quasi sensu carentes in torpore jacuimus? Vere ut dicam, ita casus tulit, nec aliter temporis accommodanda erat rerum nostrarum ratio. Verumtamen accidit peropportune, ut, quia noster animus expleri gaudio non potest, locum prius daremus ijs, quorum expleri poterat, & cum illi desiscent, tum nos, quasi fractis repagulis, quibus, velut aquæ aggeribus, continebamur, nostram de B. Viro testari jucunditatem, & in ejus præconia excurrere inciperemus, nunquam in posterum desituri. Cum igitur in apparatus magnificentiæ, ornamentorum copia, impensarum multitudinē, pro rerum nostrarum præ aliis tenuitate, facere non potuerimus, quantumcumque fecerimus, quin vinceremur, vincemus in hoc, quod præ nobis ferimus lætandum esse nobis impendio magis, quam cæteris, cum plus quam cæteri Barbadico debeamus, & rite pollicemur, sancteque recipimus, ejus merita, meritumque laudes nos in omnem posteritatem celebraturos. Atque ita, cum cæteri profusa lætitia torrentes imitati fuerint, qui exultantes aquarum immensam vim rapido impetu cum devolverint, brevi exonerati deficiunt, nos contenti erimus, si videbimur fontes imitati, tenues illos quidem & exiguis undis sensim defluentes, at nunquam intermisso lapsu perennes.

Si quanto quisque amplioribus affectus est beneficiis, quantoque certioribus amoris & charitatis argumentis devinctus, tanto quemque ex delatis munifico, amantique Patrono honoribus plus gaudii suscipere grati animi officium compellit, tanto, jam modo publicæ venerationi proposito Barbadico, nos plus cæteris triumphare gaudio, exultare lætitia par

est, quanto ejus in nos benefacta quamlibet in quoslibet benevolentiae significationem magis superarunt. Fateantur alii, sibi que fatendo placeant, atque adeo prædicent summis se ex Gregorii vigilantia, studio, liberalitate, pietate obstrictos fuisse beneficiorum, benevolentiaeque vinculis: vera dixerint, quantacumque dixerint, nec satis ad veritatem unquam, sed minora meritis usque dixerint. Non illa equidem imminuam, quod nefas fuerit, neque nostris conferam, quod temerarium. Verum quæ quantaque fuerint ejus in nos collata munera, promerita, & studii, amoris, charitatisque signa cum retulero, comparisonem cum aliis instituendam tacitis judiciis vestris relinquam. Expendite quæso, num quid cuiquam majus deberi possit. Nos per Barbadicum sumus, qui non eramus. Verba nec pauciora proferri possunt, nec significantiora. Nulli alteri tantum debent, quantum Parenti Liberi. Cum vero omnia Parenti Liberi debeant, possunt ne illi majus quidpiam dicere, quam *per Te sumus*? id enim unum complectitur omnia. Quid ego aut vobis ante oculos ponam veteres Loci angustias, quas vix ad Seminarii nomen aptas cum accepisset Gregorius, easque nec satis esse ad adumbrandum, immo nec ad vestigium, quod Græci dicunt *ὑπογραπία*, ponendum cum judicasset, Vir immensi animi aggressus opus a multis ingentes, ac fere regiones sumtus ad id perficiendum necessarios obiicientibus, tum, cum deliberaretur, desperatum, absolvit ære suo, sua quoque opinione celerius? & ita absolvit, ut simul atque extitit, magnum fuerit. Aut quid in memoriam revocem Alumnorum paucitatem, quos illius temporis homines numerare desierint, numerare cum cæperint? At vix ampla ad habitandum parata domo, confluere undique non modo e nostris, sed etiam ab exteris vicinis, remotisque regionibus Pueri, & ado-

& adolescentes, permotis illorum Parentibus illustri nomine, & fama vulgatissima Patavini Antistitis. Aut quid ego referam annonæ tenuitatem, quam vix ullam fuisse evincit Seminarii census, qui totus dicitur Gregorianus? Properare meum gestientem animum innumera, & mira omnia parturientem retardat ea cogitatio, in contentione gloriæ, quam instituere solent oppida, & Urbes de Conditoribus suis, Seminarii Patavini Conditorem vicisse. Jactent alii generis claritatem, venditent alii militarem virtutem, alii superbiant Originis antiquitate, decora quælibet ornamentaque ostendent omnes: ne longum faciam alias Barbadici illustriores opponendo laudes, ecquis eorum opibus suis, & non alienis, sedem condidit, aut conditam ad incolarum conservationem fructuum subsidiis, & affluentibus copiis, vel detractis vitæ suæ necessariis locupletavit? Nempe Barbadicus Seminarii non tam conditor, quam Pater fuit: vere Pater, qui non solum commodas ædes filiis magna auri copia comparavit, non solum redditus ad firmandas stabilivit, sed etiam quæritabat undique egenos pueros optima indole, & perspicaci ingenio in Seminario suis aliis præterea sumtibus instituendos, quorum aliis pro tenui re familiari promoveri ad Sacerdotium prohibitis patrimonium constitueret, alios ad mensæ Gregorianæ titulum sacris initiaret: tam sollicitus Pater, ne quid domestica res nostra detrimenti caperet, ut, qui alienos plurimos alebat hoc in loco pecunia sua, Nepotes Fratris filios nulla alia nisi paterna alendos in Seminaristicam disciplinam tradiderit: non mirandum in eo, qui dicere consuesceret, Seminarii Alumnos sibi esse filios, suumque æs in filios erogandum. Quamquam piget memorare quid vivens fecerit, quoties quod fecit moriens reminiscor. O rem prædicandam, quam nulla obliviscatur posteritas!

tas! Cum e tenebris, ac vinculis corporis in lucem, libertatemque vocaretur, promissam piis omnibus hæreditatem aditurus, supremis tabulis Seminarium, non ullum de Gente sua, hæredem ex Asse scripsit: quo postremo pignore charitatis, quæ Ecclesiæ fuæ germina in ejus spem, & commodum succrescentia complectebatur amantissimus Pater, ecquod luculentius postulatis? Atqui amavit ille suos, quantum rectus animus potens est amoris. Ad Te nobilissima Barbatica Gens pertinet heroicum illud Gentilis tui: *multa vobis relinquam moriens, propterea quod nihil omnino relinquam.* quo divitias, honores, opes eum tibi prædixisse huc usque eventus probavit, nunc autem patet explicatius promissum tunc temporis subobscurum. Non poterat ita naturam superare, ita a carne & sanguine abstrahi, nisi Heros Beatorum cætibus inferendus, mortalium religioni sacrandus. En quid tibi reliquerit, Barbatica Gens, cum nihil reliquit. Totus Christianus Orbis prostratus adorât, & Beatorum cultu veneratur Gentilem tuum. Ad tua innumerabilia præclarissima decora, quæ enarrare tempore impediôr, multitudine prohibeor, magnitudine deterreor, hoc certe gloriosissimum, tamquam maximus cumulus, jam modo accessit, ut Prognati tui Sanctitas Te conspicuam fecerit Nationibus omnibus; ejusdem vero charitas, quæ Te nobiscum, nos Tecum hæredum, & posterorum nomine copulavit, effecerit, ne in communi hac mortalis caducæque naturæ conditione, quamdiu Seminarium exstiterit, Barbaticorum nomen unquam intercizat, quippe e Barbatica Gente gloriabimur nos esse, qui non eramus. Interim vero, dum ex hac immortalis vestra gloria, & ex hoc vestri Nominis triumpho superbire vos æquum est, mirifico jucunditatis fructu nos efferri liceat, cum ad tantam gloriam evectum illum videamus, cujus nos hæ-

hæredes nominamur, & sumus. Si Affem species, tenuis fuit ille quidem; nec poterat esse alius, postquam partim in pauperes, partim in nos, ad ventris usque fraudem (o Patrem jejunii patientem, ne filioli esuriant!) omnino omnia effudit, nihil ut sibi reliquum fecerit. Sed illa ipsa parva supellex, quæ vel corpori tegendo, vel sacris operandis, vel doctrina excultissimi hominis studiis recolendis necessaria ita erat, ut ea nequaquam spoliari nisi post mortem posset, illa ipsa nobis præ immensis copiis pretiosissima est, non auro, non gemmis commutanda; quam perpetuo feremus in oculis, habebimus in deliciis, &, ut sacra, pio animi sensu exosculabimur. Cum itaque habuerimus quæcumque habemus ab ipso, dum viveret, quæcumque supererant ad usum suum nobis ille reliquerit, unum non reliquit: Cadaver. scilicet, quod ipse unum negligebat, ac prope oderat. Ne expectetis ut referam, quibus cruciatibus corpus exerceret, quibus flagellis terga caderet, quibus setis pectus, dorsumque torqueret, quibus hamatis catenis lumbos adstringeret, ut corpus, & quidem a pueritia innocens, atque impollutum in servitutem redigeret, ac tanquam hostem debellaret: Neque enim par est hoc triumpho tempore misera commemorare, & affici eo confecto tormentis corpore, quod a corruptione ipsa tormenta fervarunt; quo pretioso thesauro Patavina latatur Ecclesia. Gaudeat Ecclesia Princeps sacri pignoris custos, & sanctis, honoratisque exuviis immortaliter gaudeat. Verumtamen si Gregorius cadaver suum nobis supereffe neglexit, spiritum apud nos servandum curavit. Nunc enim vero elatiore voce jactare me liceat, atque exultantem animi affectum præ impatienti hilaritate erupturum sonantius expromere. Vivit, vivit Barbadicus inter nos, cujus spiritus, atque adeo vox in monumentis ad nostram

institutionem conscriptis nunquam defectura exauditur; monumentis perennibus ejus invictæ sollicitudinibus, acerrimi studii, infatigabilis charitatis, quibus morum disciplinam, & doctrinarum ad probitatem adminiculum in hunc locum ipse invexit, ipse aluit, ipse excoluit, ipse, quod dici potest ad Hominis gloriam, in admirabilem integritatis, atque excellentiæ gradum extulit. Quæ quibus anteferam, & angustiis temporis prohibitus multa dicere, quæ dicam, quæ missa faciam, vastissimo quasi rerum dicendarum invectus mari? Si satis dicere non vacat, fatius est nihil, quam pauca dicere, præsertim ea notissima omnibus cum sint omnia. Omitto in provincia sua pro Episcopi munere perlustranda, quam anxie Puerorum indolem, ingeniumque exploraret, ut eos demum in Seminarium reciperet, in quibus & divinæ gloriæ, & cum sua alienæ salutis aliquando procurandæ spes eluceret. Omitto contentiones, labores, impensas in evocandis undique probitate, & scientia præcellentibus viris, qui bonarum, & maxime divinarum rerum cognitionibus eos, tanquam liquoribus beneolentibus vascula, primum imbuerent: Omitto Bibliothecam utilissimis ad quamlibet disciplinam libris instructam, dicatamque perpetuo Seminariensium usui, ne ullum ad fovenda litterarum studia, artesque bonas addiscendas subsidii genus desiderarent. Omitto..... sed ne tempus teram, dicendo, quæ omittere polliceor, illud non omitto, quod cum pueris in pietate, & litteris instituendis probatissimos præfecisset, de quibus, quia suo quique muneri satisfacerent, dubitare haudquam posset, non contentus aliena fide, & vigilantia, ventitabat huc frequentissime, ceu Pastor suas invisurus oves. Enumerat singulas parvulas, atque grandiores Pastor, ut num qua stabulo, Gregorius, num qua officio desit, recognoscat. Explorat ille,

num

num salubri pabulo nutriantur, atque pinguescant : adest hic prælegendibus, disputantibus, colloquentibus, ut & doctrinæ sanitatem, & discipulorum progressum expendat. Ille aberrantes ire viam viridi hibisco, & gravioribus herbis compellit : hic mansuetæ pro natura sua vocis dulcedine revocat, & ad studiorum iter persequendum incitat. Ille tandem, ubi omnia respondere votis deprehendit, pabulantes per prata (semel concedatur locus Poetæ) *arundineo carmine mulcet oves* : hic verbis laudibusque quovis Lyræ sono suavioribus animos addit. Verum enim vero ea præcipua erat cura, atque investigatio, num teneri adolescentium animi ad solidæ pietatis, atque virtutis culturam informarentur. Nullus horti custos tam sedulus invigilat, ne quæ malæ, aut inutilis herbæ succrescant, tam multis aquarum derivationibus solum fecundat, tam avidè flores, & fructus expectat, & fragranti per hortum undique odore tantopere oblectatur, quam studiosus, & anxius erat Gregorius, ne quid vitii in hoc quasi cultissimo vireto suo foveretur, ne quid erumperet ; quam copiosis hic a se confitas tenellas plantas doctrinarum imbribus irrigabat ; quanto animi ardore contendebat, ut virtus effloresceret, ac maturitatem assequeretur ; quantopere concupiscebatur, ut hic halaret Christi bonus odor. Res illa fuerit perjucunda visu, videre virum principem ad Puerorum quasi familiaritatem se demittere, eosque erecto esse animo jubere ; videre Hominem quin ex communi opinione Angelum, aut Carolum Borromæum inter mortales versantem Pueris amanter arridere, suaviter blandiri, eosdemque hilare amplecti, ac tantum non, decore ægre vetante, osculari : videre Parentem filiorum corona stipatum pia miscere colloquia, & verbis charitate plenissimis ad virtutem, atque officia religionis accendere, res fuerit jucunda visu ;
 sed

sed illa & jucunda, & admirabilis, hominem in tam sublimi dignitatis gradu collocatum magistrorum tanquam hypodidascalum, ministrorum tanquam Vicarium partes obire. Ingredimur tecum in scholas, Auditores; res est enim ad commemorandum tam grata, quam quæ gratissima. Non in Professoris subfelliis, sed in Auditorum sediculis sedet Episcopus; quasi factus parvulus cum Apostolo, in medio eorum, & tanquam si nutrix foveret filios suos, eos doctrinæ lacte, quasi modo genitos infantes enutrit, atque ad pueriles tricas pro Puerorum utilitate descendere non dedignatur. Hic est ille Episcopus, quem honoribus, qui Beatis debentur, nunc primum prosequimur, itaque nos, quod majores nostri futurum pro certo sperarunt, fortunate beateque consecuti sumus. Nonne in rei eventu, quæ longe lateque sinceram solidamque animi oblectationem disseminavit, majus quam pro virili parte gaudium debet esse nostrum? Sed ne avertamus oculos a Gregorio in Seminario versante, ubi tam frequens erat, ut Episcopalem Sedem huc transulisse videretur, cui illam dederat dignitas, istam amor. Qui vero avertas oculos a tam dulci spectaculo hominis divinæ gloriæ amore flagrantis, de pietatis incremento admirabilem in modum solliciti? Cum modo quotidianæ rerum divinarum commentationi, ad quam facile obeundam certas præceptiones ipse tradiderat, Alumnis vacantibus adest, & quem quisque fructum caperit, sedulo exquirat; modo Angelorum panem, illum panem, quo cum vesceretur, quasi igni e pectore exæstuante ejus accensa facies scintillas emittere videbatur, suamet manu, (o rem non sine dulcissimis lacrymis commemorandam!) suamet ipse manu pueris distribuit; modo ad orandum, meditandumque mane, ad nocturnas preces, atque intimum sensum discutiendum vespere, omnium

nium primus, ut aliis esset exemplo, in locum, quem Asceterium dicimus, se se confert. Non raro enim hic dies, noctesque agitabat; & ne quid temporis inutiliter laberetur, accumbenti, neque enim dicam vescenti (tanta erat ciborum, & quidem plebejorum parcitas) illud pabulum gratissimum erat, ut quæstiones de rebus morum, aut e Sacris litteris depromptæ agitantur, quo & quantum quisque scientiæ in suo fundo haberet, deprehenderet, & ubi solum esset aliquid aridum, tanquam *imbres mitteret eloquia sapientiæ suæ*. Vidistis adhuc Pastorem, vidistis Horti cultorem, videte nunc paullisper agri messorem, & quia bis quotannis colligendis fructibus operam dabat, si vultis etiam vinitorem. Generalibus igitur Adolescentum examinibus, cæteris omissis, quanquam non omissis, sed pro sua vigilantia expeditus curis, ipse assiduus præerat, de uniuscujusque ingenio, & progressu experimentum facturus; & quanta animadversione horas perstabat sedens interrogantes, & respondentes audiendo! ut illum ne tantillum quidem temporis alio mentis cogitationem avertere manifeste appareret: nisi si quando pro consuetudine quidquid ageret, cogitaretve ad divinam gloriam referendi, extra sensus in Deum, unicum amorem suum, quasi furtim abriperetur. Quia tamen agebat, quod agendum, animo, sive animi ea facultate, quæ voluntas dicitur, a bonorum omnium Auctore nunquam abstracta, ad se, & ad negotium præsens cito redibat. Nec audiebat modo, sed ut quanti quisque esset intus & in cute cognosceret, interrogabat tanta, non ostentatione, quod studiosissime vitabat, sed præstantia doctrinæ quod vere inerat, ut Doctorum Doctor judicaretur. Vidisses Villicum in ventilando, cernendo, cribrando, metendo occupatissimum, ut quanta colligeretur frugum copia, & an sementi responderet messis, intelli-

telligeret: Vidisses maturefcentibus fructibus mirifice delectari, & cum aviditate maturos seponere, qui aliorum usibus inservirent. Sed quem in Academia vidisses, in Templo collocatum jam modo vidisses, a Cathedra ad Aram translatum, & qui brevi abire solebat in via dilecti sui, nunc in ejus sinu æternum conquiescit, quique nos doctrinæ suæ ubertate lactabat, eum suis precibus meritisque cælestium donorum nectar ad nos demittere jam antea credebamus, nunc certa fide comperimus. Lætitia nostræ quis possit esse modus, dicite Vos, per fidem vestram, dicite. At redeamus ad amantissimum adhuc Patremfamilias. Optime noverat arcum semper intendi non oportere: cessandum aliquando ab opere, quo possit utilius urgeri. Æquissimus Pater non abnuebat. Sed nunquam major (Ricchinii, quoniam tam polite de Barbadico scripsit, ut in rebus Ecclesiasticis latine scribendis, proponi, meo quidem judicio, possit, velut exemplar, verba ipsissima libet pro re nata honoris gratia referre)

„ nunquam major ejus animum cura pulsabat, quam
 „ cum Autumnalibus feriis e Seminario, & Urbe
 „ facta esset Alumnis discedendi potestas. Timebat
 „ enim vero, ne sub liberiore cælo, remissione disciplinæ, juvenili licentiæ laxarentur habenæ, ne
 „ qua labes hæreret moribus, ne studiis torpor, &
 „ languor pietati. Rus itaque concessuros Diœcesanis
 „ Pastoribus, & Regionis Vicariis veluti carissima
 „ Ecclesiæ suæ pignora peramanter commendabat,
 „ ut eorum consuetudinem sedulo observarent, caverentque ne a susceptis institutionibus
 „ vel minimum deflecterent, atque aberrarent; curarent in primis ut Ecclesiasticam Catechesim,
 „ & Sacramenta frequenter obirent, Laicorum ac
 „ Feminarum consortia vitarent, in incessu demum,
 „ habitu, statu, ac cæteris actibus suis nihil admit-

„ te-

„terent, quod ab Ecclesiastica honestate, gravitate-
 „que abhorreret. “ Hæc Ricchinius. Satis mihi
 videbar dixisse, si Gregorium Seminariensium Pa-
 trem appellassem. Verum quæ majore prosequitur
 anxietate mater abeuntem filium, aut magis solli-
 cita quaque eunti pericula timet, aut magis officio-
 sa moras facientem quorumcumque potest tutelæ
 concredit? quamquam non raro evenit, ut mater
 melioris conditionis futura, pro natura ad commo-
 ditatem, atque excellentiam prona, fortunæ suæ fi-
 lios posthabeat: & si quæ sua sorte contentæ esse
 malint quam illos deferere, ecqua Mater, ne a fi-
 liis procul viveret, tantas opes, tantamque digni-
 tatem repudiavit, quantam Barbadicus, ne abes-
 set a nobis, (quid dicam?) plus quam filiis? Non
 semel, sed iterum, ac præsertim tertio oblatam,
 atque occurrentem sibi summam, & unam in terris
 Deo proximam dignitatem propulsavit; immo per-
 diu adnitentibus obfirmata sententia suffragatoribus
 ad Summum Ecclesiæ imperium Barbadicum expo-
 scentibus, omnes vires intendit, omnemque lapidem
 movit, ut aditum sibi omnem ad celsissimum so-
 lium illud obstrueret. Mirentur alii signa quæ fecit,
 mirentur profusam in pauperes liberalitatem, in ad-
 versarios beneficentiam, in se asperitatem; miren-
 tur Pastoralem sollicitudinem, Religionis cultum,
 doctrinam, sapientiam; mirentur miranda omnia
 (ecquid enim Gregorio defuit, quod in sanctissimo
 Antistite possit esse admirandum?) ego nihil ita
 miror, quam gloriam illam, & honorem calcare po-
 tuisse. Cum autem reputo Seminarii præcipue amo-
 re, præcipue, inquam; heroicam enim ejus virtū-
 tem, quam dicunt, *Humilitatem*, satis novi; sed
 præcipue Seminariensium amore ab illa sede revoca-
 tum esse cum reputo, idque illi ad obtinendum in-
 ter Beatos locum, recusato loco longe sublimiorem,
 im-

immo nisi injuria comparandum, facilius iter expedivisse cum video, propemodum mihi succenseo verba ad profundendam, quanta quanta perfunditur animus, voluptatem non habenti. Vos autem finite pace vestra iterum a me dici, ornatissimi cives mei; ab illo supremo dignitatis, & amplitudinis gradu Barbadicum Seminarium præcipue revocavit, Seminarium, Barbadiçi cordis Cor. Fortunatissima Patavina Provincia Barbadico fuisti cor. Noluit manere Romæ, quia non poterat a corde divelli, aut potius cor a se divellere non poterat. Hinc tanta constantia in subterfugiendo, defugiendoque illo humanæ dignitatis fastigio: hinc ille ex vero animi sensu expressæ assidue ad Deum preces ut Fautoribus ad se Pontificem Max. creandum conspirantibus aliam mentem iniiceret; hinc alio renuntiato Pontifice, illa hominis e Comitibus, ceu e tempestatis fluctibus emergentis tranquillitas: hinc cum ægre in Urbe ineluctabili auctoritate retineretur, illa impatiens ad Gregem suum redeundi cupiditas. Quid tamen tute tibi volebas, nostrum Pater, mater, nutrix, Magister, Princeps, omnia, hac inutitata, dicendi forma, hac plenissima sententiarum sententia, cum Seminarium dictitares tui cordis cor? An, cum tibi pro corde Patavinus Grex esset, quia omnium carissimus, Seminarium erat tui cordis cor, quia quantum præ omnibus Patavinam Ecclesiam amabas, tantum Seminarium Patavinæ Ecclesiæ portionem præ reliquis ejusdem partibus diligebas? Ita sane. Nam cum in universa Provinciæ suæ administratione pro humanarum virium natura, ex assiduis, immensisque laboribus tandem delassaretur, eas sibi a gravissimis occupationibus fumebat ferias, ita se ab illa defatigatione recipiebat, reficiebatque, ut in Seminario totus esset, perinde ac si nihil egisset aliud, aliud sibi nihil agendum foret; dicere so-

li.

lito, quam alii animi relaxationem ex otio experiuntur, eam se in Seminaristico negotio reperire. Cur non sentiretur labor ecquid in causa erat, nisi amor? Ita tamen erat amor iste præcipuus, ut minime esset reliquis ovibus invidendus. Etenim Seminarium bonum non hisce parietibus continetur, sed ad universam Dioecesim redundat; quemadmodum in pectore animantis cor non ideo est, ut unum sibi sufficiat, sed ut toti corpori vitam largiatur. Et quidem quot viri doctrina, & religione Principes ad humanarum, divinarumque rerum cognitionem late fundendam ex hoc loco, tanquam ex equo Trojano prodierint, malo a vobis, qui satis nostis, sponte subiici, quam a me quoquo modo commemorari. Hunc itaque locum Barbadicus tanquam cor Gregis sua vita carioris respiciebat; & quia Gregem aliquando sibi ademptum iri cogitabat, ad eam saluturam faciendam, quam ferre non potuit summum Imperii gradum ascensurus, æquo animo se comparabat, humanæ conditioni divinæque voluntati obtemperaturus, contentus satis, quia Seminarium superstitum, cor, vitæ fons, non erat dilectissimo GREGI suo defuturum. *Sicut Sol refulgens*, (aptissimum est Simonis Sacerdotis magni, Oniæ filii præconium) *Sicut Sol refulgens, sic iste effulsit in Templo Dei*, qui suæ lucis radios, suæ flammæ ardores super nostras hæc Patavinas terras cum uberrimo fructu diffundebat; Sol tamen aliquando perpetua nube obtegendus. Nihilominus, quemadmodum Sol, obteſto nubibus cælo, lucem infra nubes quidem proferre definit, attamen in orbe suo fulgoris, atque ardoris fontem, virtutemque continet, ita Gregorius hoc in loco fonticulum custodiebat claritatis, opportune dispartientiæ, ubi clausis ipse oculis Provinciam suam illuſcere desiisset. Eo pervenit Oratio mea, ubi libenter aliis dicendi locum concederem.

Cur

Cur tamen detrahā meritæ Patris laudi, veritus ne quid Filiis jactantiæ afferam? Tota ista Gregorii laus est, qui hic opimum & fertilem agrum diligenter subegit, atque excoluit, ubi plantæ utilissimæ aliæ aliis succrescerent, aliæ ex aliis continenter propagarentur, non ad suæ unius vineæ utilitatem. Vastus enim, atque immensus Viri animus non hujus quantumvis latæ Diœcesis finibus arctabatur. Quid spectaret satis ostendit, cum Hibernos, Gallos, Britannos hoc in loco suis sumtibus aleret, ut hic edocti, tum ad Patriam reversi Fidem Catholicam validius tuerentur; Ostendit cum Orientales linguas incredibili labore, & impensa huc induxit, ut hinc existerent, qui earum callidi *Propagandæ Fidei* Præsidibus Romæ se se offerrent, quod fecere ex iis nonnulli, ad Satanæ tenebras in Orientis regionibus late grassantes, Christianæ veritatis luce disiciendas; ostendit, cum Typographiam factis magnam ingenti ære suo fundavit, in qua perutiles libri ederentur, ad doctrinæ, Religionisque incrementum. Quibus factis tanta hic locus cito potitus est nominis celebritate, ut ab aliarum Provinciarum Episcopis, nec Italicarum modo, sed a Galliis usque missi ad nos fuerint, qui rationem regiminis intellerent, & in sua Seminaria traducerent. Quod si plurimi institutam a Barbadico studiorum, ac Disciplinæ formam e scriptis desumerunt, non pauciores, & fortasse plures per nostros homines ad se transferendam curarunt. Exultare mea posset Oratio enarrando, quanto ubique fuerint ad litterarum, pietatisque laudem, emolumento e nostris ii plurimi, qui non exiguis semper invitati, & expetiti præmiis e Barbadici segete optima desumta semina, hinc alio deducti, hac & illac spargere non destiterunt, si quam vera, tam probanda propria laus esset. En quantus animus Barbadico fuerit, qui Pa-

tavi-

tavinæ in Ecclesiæ sinu Seminarium cum posuit , non Gregis sui modo , sed alienarum quoque Ovium , ac , si potuisset , omnium Gentium utilitatem sibi proposuit . Tantus est is , quo Auctore gloriamur . Eo vero ad divinos in terris honores sublato , quanta nobis facta est accessio gloriæ ! Hujusmodi decus unum adhuc , quod quidem noverim , Mediolanense Seminarium jactavit . Jam quantum illud Borromæo , tantum hoc se se licet esset Barromæi ad vivum exprimente imaginem Barbadiæo . O diem lætabilem hunc , non lapillo , sed auro signandum ! O præclarum , nobilemque triumphum ! O fortunatos nos ! fortunatiores majoribus nostris iis ipsis , quibus Barbadiçi præsentia frui licuit . Felices illi , quibus Patrem verba vitæ super mel & favum dulciora fundentem contigit suismet auribus audire ! Nos illa cum legimus documenta , quæ scripto nobis reliquit , intelligimus non mortalem in terris , sed perpetuo in Cælis beate viventem nobiscum loqui . Ejus adspectus cum morum suavitate temperans majestatem , perpetua illa animi æquabilitas , atque tranquillitas , ex diffusa in ejus corde per spiritum Sanctum charitate efflorescens , miram quamdam ex ore , oculis , vultu , gestu emisit jucunditatem , quæ spectantes incredibiliter exhilararet . Si illorum oculos trahebat dulcis majestas , perstringit nostros divinus fulgor , cum illum gloriæ radiis totum circumdatum mente conspiciamus . Illi tamen laborantem videbant , nos laborum præmio , & quo præmio ? fruentem : Nec poterant illi non aliquid aliquando tristitiæ fuscipere ; quoties nempe gratum animum aut verbis , aut scriptis , aut aliis monumentis ostendere prohibebantur , nacti hominem quam dignum laudibus tam ab omni laude abhorrentem : nobis affertur illa tristitia , quod non satis pro meritis hominem , cum maxime liceat laudare

B

possi-

possimus. Illud vero majoribus nostris longe acerbissimum, cum sanctum hominem tam bene de omnibus merentem molestiis, atque adeo obtreccionibus, maledictis, calumniis sæpissime vexari viderent, præstat missum facere; quoniam quia *acceptus erat Deo necesse fuit, ut tentatio probaret illum*; eumque hæc ipsa tentatio per arduum virtutis iter, ad sublime sanctitatis fastigium manu veluti duxit, & cælestibus tandem in terra honoribus dignum reddidit; ex quo tantus in nos jucunditatis fructus redundat, ut eum sentire totum possimus, verbis consequi vix ullam partem possimus. Felices utcumque illi, quibus vitam, moresque hominis ex propinquo intuentibus, verba, & acta humanissima, eaque omnia sanctimoniam admirabilem redolentia excipientibus suavis quidam odor afflaretur necesse fuit, qui, nisi consuetudine, atque convictu, quasi fricatu, percipi non potest: Fruebantur tamen illi bono non dato, sed commodato, quod certo sciebant aliquando sibi defuturum. Defuit. Fletus, gemitus, ejulatus, ululatus, comploratus consecutos injurii simus felicitati nostræ si commemoremus. Non contigit nobis ope sensuum tuo, Pater, perpetuo future Pater, amabili adspectu perfrui, vocibusque tuis charitate plus quam patria redundantibus excitari. At certissima fides erigit aures, oculosque mentis, quibus Te ex alto in intimos sensus illabentem sentimus, quibus Carolo, & Philippo, quos dedisti Patronos, additum Te æterna felicitate fruentem suspicimus. Quantum sperare jubes, ex Parente factus Patronus, ubi Te duraturas æternum Bonitatis divitias contecuto, nactus est centrum suum tuus Paternus amor, & ingressa est Potestatis Oceanum tua benefaciendi voluntas. Omnibus interim lætitiis læti sumus, & semper erimus ex hoc torrente, sed nunquam exhauriendo voluptatis tuæ, & quia augere tibi illam non

non possumus, agemus pro viribus omnia, quæ agi cum in Terris esses, concupiscenti animo flagitabas, quæque acta ubi fuerant, inexplicabili Te voluptate perfundebant. Te vero, Clemens, totius Christiani Imperii moderator, & arbiter, quibus verbis alloquar, Te fortunæ, Te gloriæ, Te gaudii nostri fontem, atque originem? Tu in hac Patavina, olim Barbadici Sede collocatus, per multos annos erga nos Patris vices gessisti, & ædibus nostris magnifice amplificandis, & nostris Barbadici legibus ad bonarum Artium, & Christianarum, Ecclesiasticarumque virtutum culturam fidelissime custodiendis; Tu ad longe altiora vocatus cum nobis loco tuo dedisti Virum, cujus paterna sollicitudine, studio, benevolentia absentia tuæ dolorem non sentiremus; cum interea nobis eximium addas decus, atque ornamentum illud, ut qui noster peculiaris princeps eras, meritis tuis modo sis universi Christiani Orbis Princeps. Eam ob rem, si licet opinari, unus rerum omnium dominator Dominus, qui Barbadici precibus, ne ad eum, quem Tu possides, locum eveheretur, non perseveranter abnuit, refutavit constanter tuas, ut Barbadici nomen in Beatorum album referres: quo facto eam nobis lætitiā perpetuam attulisti, ut & ipsi insatiabili oblectatione nobis gaudeamus, & Institutori nostro Beatitudinem lætanti ac percito animo gratulemur, & ex utroque habeant alii felicitatem nobis jure gratulari. Quas igitur Tibi pro tantis meritis habebimus gratias? Cum ad illam nullos habituram terminos Beatitudinem, qua Barbadicus fruitur, ipse quoque ingentes gradus per Te facias, optamus Tibi, & enixis a Deo precibus petimus longissimum vitæ spatium, quo, augeſcentibus in dies meritis, aliquando, sero tamen, Barbadico confociatus, parem cum ipso immortalitatis coronam consequaris. Videmur ne vo-

bis, Auditores, lætandi causam nos aliis habere majorem? Damnandi profecto essemus, ac tantum non devovendi diris, si ingentem quantumvis omnium lætitiā nostra non longe multumque superaret. Efflerantur igitur, gestiant, exultent lætitiis omnibus Musæ nostræ, hic sedem per Gregorium nactæ, quæ si dantes omen in posterum numerorum varietate levissimum specimen dabunt, reputate Vos, pro vestra sapiētia, Aud. Musarum esse, sicut Cantorum, atque Fidicinum, antequam temperatis acutis sonis cum gravioribus ad harmoniam canant, submissis vocibus, modisque paucis proludere. Dixi.

Habita est anno 1762. Mense Novembri.

De horum carminum auctoribus vide Præf. ad Lectorem.

GREGORIO BARBADICO

Beatorum Fastis adscripto

Theologiæ Musa Præses exultat.

Hinc procul, o Fontes Aganippidos Hippocrenes,
Hinc procul, o Pindi juga Sacra, Heliconis & alta
Culmina: proh humiles mihi nunc terraque jacentes!
Altius ire paro, Cali per inane volatu,
Præpetibusque lubens scindentibus aera pennis,
Alma ad caelestem Sionis deferor urbem.
Ecce propinquant Stellis jam rominus aurea
Tecta micant aternæ Urbis, radiataque baccis
Limina, & ardentes stellato cardine postes:
Jam stratas adamante vias, opibusque superbis
Mœnia conspicio; rutilis variata pyropis
Atria collucent, gemmatis nixa columnis.
Jamque hilari spatia ingredior vastissima gressu,
Dulcis ubi aeternum perflat sine nubibus aer,
Et circum fragrans suaves emittit odores.

Hi

Hic mihi spiritibus mixtus caelestibus alma
 Undique luce nitens, se se spectabilis offert,
 Qui pulchram, dum vita fuit, mihi tradidit Ædem,
 Acri ubi mente potens Artes consevit honestas.
 Plausus ubique ingens, & multifono modulatu,
 Gens variis operata choris, nova Carmina pangit.
 Fulgentes dum mille chori candore nivali,
 Aut roseo circum plexi diademate crines,
 Gregorio adplaudunt festivis vocibus omnes,
 Interea lustrare datur mihi singula visu,
 Qua, mihi Gregorii dum iussa capessere fas est,
 Mira arcana Dei puerorum instillo per aures.
 At clare ut videam, liceatque ut visa referre,
 Æternum sine labe micans mea proluit ignis
 Labra, sacro de fonte liquor mea lumina terget.
 Hic Pulchri, Verique simul, mirabile visu!
 Immensique Boni fas diam cernere formam.
 Qui mare, qui Terras, qui Calum numine complet,
 Cuncta movens, stabilisque manens, qui prodigus implet,
 Et satiat sensus animorum, & fonte perenni,
 Fonte voluptatum non deficiente Beatos
 Felix ipse beat, caelesti & nectare pascit,
 Ipse videndus adest: patet hic Natura Creatrix,
 Et patet ex nihilo ut capit splendescere mundus,
 Atque ut immenso soboles immensa Parente
 Effluit, & simili Genitor sibi pignore gaudet.
 Scilicet in se aciem dum colligit, & sua cernit
 Ora Pater, sat nota sibi, sat prompta videri,
 Et propriam visu faciem pulcherrimus haurit,
 Nec se se adspectu cessat lustrare profundo,
 Illius arcana finisque & originis experts
 Filius egreditur mente, aqualis Genitori,
 Omnipotens aque, sapiens, atque optimus aque.
 En Patris, & Nati cerno concurrere vultus:
 En Pater, & Soboles alterna incendia flamma
 Miscet, & alternis redamando expirat Amorem

Et Patris, & Nati similem, mediumque per ambos
 Currentem, Natoque Patrem, Natumque Parenti,
 Fœdere nectentem, spirabile Numen Amoris;
 Æquævum, immensum, natura dives eadem,
 Ambobus geniale bonum Natoque Patrique.
 Nec quia tam pleno toties exuberat æstu
 Sinceri natura boni, tranquilla voluptas,
 Numinis ubertas, augetur turba Deorum.
 Unum numen idem tribus est, tribus una potestas,
 Una tribus natura Dei, tribus una voluntas.
 Tum parte ex alia flammis rutilantibus Orbem,
 Atque invisâ viris mortalibus abdita cerno:
 Patris ut aterni Natus de lumine lumen
 Descendens de Patre Deus, nec honoribus illi
 Nec Regni splendore minor demissus ab alto
 Humanum corpus, mortales corporis artus
 Induerit sponte, & nostris habitat in oris,
 Pauperis & casto latitarit carcere matris,
 Coram prospicio. Mirum! fert pondera mater
 Auctorem complexa suum, gestatur in alvo
 Materni Faber ipse sinus; pars arctior orbis
 Numen habet; capiturque loco qui laxior omni
 Cuncta capit. Deus, ecce Deus, lux maxima mundi,
 Obscura regione latet, sedemque requirit
 Mens immensa vicens, cunctis antiquior annis
 Nasçitur, atque sui primordia supputat ævi.
 Vos quoque cerno, Dei celeres fideique ministri:
 Omnibus athereum formæ decus, omnibus ardor
 Igneus, & volucres pennis pernicibus ala,
 Præcingensque caput radiatæ flamma corona,
 Gaudia, divinusque favor, succensus amoris
 Æstus, & aternæ felicia pignora vitæ,
 Oraque supremum cantu resonantia Numen.
 Vos hæc, vos doceo, Juvenes: at lumine claro
 Barbadicus ovans videt hæc, visisque potitur.
 Proh nunc quanta meum pertentant gaudia pectus!
 San-

*Sanctorum quoque grande decus, dios & honores
Una ego Vos doceo. Reboans mea buccina cantu,
Sublimi cantu, referet venerabile nomen;
Atque his egrediens angustis finibus, omnes
Gentes, Barbadice, tuas educet ad Aras.*

Ethices Musa.

*Cedite, quæ colitis sacra hæc loca, cedite, Musa,
Gaudeo Gregorii maxima pars anima.
Cedite, vos inter Regina incedo, quot estis
Omnes, sub nostro vivitis imperio.
Cedite, privata hic vos ævum degitis umbra;
Omnibus assidue limina nostra patent.
Cedite, Gregorius (tanta est mea gloria) quondam
Ipse Artes proprio tradidit ore meas.
Cedite; namque illum virtutibus immortalem
Tandem Ego Divorum catibus inserui.*

Jurisprudentiæ Musa.

*Astræ quondam me tuli in Æthera,
Terris relictis, criminibus Virum;
Me Sanctus in Terras relictas
Gregorius revocavit astris,
Sedesque tutas hoc dedit in loco:
Hic quando rectum justitiæ decus,
Legesque docto ex fonte cordis
Ipse sui eliciens locavit.
Juris coruscis illum ego honoribus,
Rectique puro lumine fulgidum
Optata tandem vixi ad astra,
Addidi & Ordinibus Beatis.
Magnus Sacerdos, qui triplici caput
Cinctus corona sceptrâ Petri tenet,
Nutuque divino gubernat,
Gregorium revocavit astris*

*Terras in imas. O pueri intimo
 Ex corde tandem promite gaudia,
 En vester est, fulgetque vestris
 Gregorius venerandus Aris.*

Philosophiæ Musa.

*Proh quantum niteo! qui me pulcherrimus ambit
 Collucens rutilo lumine ubique decor!
 Et color, & placeo; sed me vix noverit ullus,
 Quantuntvis formæ flagret amore mea.
 Quam pulchra incedam innato spectanda decore,
 Cum paucis didicit noscere Gregorius.
 Me potuit lynceo pervadere lumine, & intus
 Auctorem docta mente videre Deum.
 Spectat humum, variisque ornatum fructibus orbem;
 Divinum interius gliscere cernit opus.
 Oceanum spectat, spectat quæ ad littora mittit
 Oceanus, diam prospicit ille manum.
 Personat horrendis agitated flatibus aer;
 Ille Creatorem providet usque suum.
 Tam bene compositas volvens sua lumina Terræ
 Per partes, vasti per freta tanta maris,
 Crescite, clamabat, rediretque crescite formæ;
 Per vos æterni vis micet Artificis.
 Pandite formosa, formosum pandite lumen,
 Luminis immensi semina pulchra micent.
 O qua per ramos hinc luditis hincque volucres,
 Et liquido blandum funditis ore sonum,
 Agnosco cantus, dulcissima carmina nosco;
 Factori argutum ducitis ore melos.
 Aura, qua levibus percurritis aera pennis,
 Et strepitis grato per nemora alta sono,
 Una austerque Eurysque fremens & lene susurrans
 Jucundi Zephyri spiritus, & Boreas,
 Vos superum canitis Dominum, vos flamine vestro
 Excelsi laudes dicitis Artificis,*

Lam.

*Lampades aurata, fulgentia sidera Cali
Et vaga, & in certis condita limitibus,
Vos quoque adorando vos carmina lata Tonanti
Dicitis, atque hilares ducitis alta choros.
Sive alto Oceano deducis in aera currus,
Seu vasto pelagi gurgite condis equos,
Das laudes, das digna tuo Sol carmina Regi,
Divinumque jubar Lux tua sola refert.
Divas opum Tellus, & divitis ubere gleba,
Exornata tuum floribus alma sinum,
Fructibus exundans qua te altam hic tollis, & illic
Ima jaces, condens antra, sinus, latebras,
Tu quoque subridens ridenti blandula vultu,
Ex imo emittis carmina dia sinu.
Velivolum tandem mare, fluctus, flumina, fontes,
Pisces, bruta, & oves, arbor, & herba, & apis,
Cuncta Creatoris mihi sacrum afflatis amorem,
Cuncta mihi Dominum dicitis esse Deum.
Gregorii fuit ista mei studiosa voluntas,
Sic nostrum potuit noscere mente decus.
Nox erat, & puro radiabant sidera calo:
Tolle oculos dixi, Gregori, ad alta tuos.
Aspicias, ut rutilum demittant sidera lumen,
Altus ut ostentat lucida signa Polus?
Hac ego: at is palmas ad calum tendit utrasque,
Sentit & ardentes intima ad ossa faces.
Exardet, penitusque sacro jam percitus igni,
O quam, clamabat, pulchrius intus erit!
Unum inhians Deum humo se se cum corpore tollit,
Et saepe athereas tentat mire vias.
O quater, & quoties non est numerare, beatum
Te! qui nunc pulchrum quod lateat intus, habes.*

Historiæ Sacræ Musa.

*Mambre, Gad, Seboim, Botrique valles,
 Carmeli, Libani, Thaborque colles,
 Jordanis, Silo, Geonque fontes,
 Et vos, o Cithara, fidesque Vatum,
 Vatum, queis licuit futura sacris
 Semper veridica explicare lingua,
 Gaudete, & nimis ac nimis venustam,
 Signandam niveis diem lapillis,
 Qua nondum melior, beatiorque
 Exorta est, agite hanc diem canamus.
 Proh tellus Chanaam misella! fontes
 Haud pellucidulis aquis susurrant,
 Sed pleni horrida silent arena;
 Exuti platanis, cedrisque colles;
 Deserta arboribus jacentque valles;
 Nec Tellus resonat beata cantu.
 Illam deserui, meosque honores
 Tutantur populi beatiores.*

*Sed me Gregorius magis benigno,
 Dux, Auctorque dedit sedere regno,
 Ubi delicias meas locavi.
 Hic memet beo: rivulos nitentes,
 Colles frugiferos, coluntque valles
 Hic Vatum mihi filii meorum.*

*Salve ergo mihi ter, quaterque fausta
 Salve sancta dies: novosque plausus
 Valles frigidula, editique colles,
 Dent plausus hilares novosque fontes.
 Mi quæ pectoribus salit voluptas!
 Quod quis me hoc dederit sedere regno,
 Promissa sedeatur Beatus ora.*

Histo.

Historiæ Ecclesiasticæ Musa.

*Ille ego, quæ quondam monumentis eruta priscis
 Sanctorum posui promere facta Patrum;
 Pontificum decora alta aternis tradere chartis,
 Quis pulchrum Mater percipit alma decus,
 Sancta hominum Mater, Christi Sponsa, & rapit unde
 Exemplum fidis utile filiis,
 Latitæ ipsa nova perfundor nectare; namque
 Barbadiçe, decus presidiumque meum,
 Qui nunc æternum caelesti in pace quiescis,
 Ampla mihi fueris Tu seges Historia.*

Matheos Musa.

*Ipsa jactabam levis Archimedem,
 Qui nova miram dedit arte spheram,
 Plurium certis ubi circulatorum
 Motibus ibat
 Ordinem servans simulatus Orbis,
 Lunaque adspectu vario redibat,
 Atque mentitus proprios agebat
 Signifer annos.
 Ipsa jactabam Samium renatum.
 Ille terrenis, superisque rebus,
 Esse concentum, & numeros docebat,
 Harmoniamque;
 Quæ simul se se ratione servant
 Corpora interno sociata nexu,
 Et suis circum numeris agatur
 Machina Mundi.
 Intimos at Gregorius coercens,
 Et regens recta ratione motus,
 Machinam movit, melius suammet
 Intus & extra,*

Ille

*Ille virtutum reperit sagaci
Mente concentum, superum peritus
Calites aures retinere, cantu
Gratius omni.
Cedite, o Prisci, decus hoc Recentis:
Nec mihi posthac, memorate vestrum
Vitream mundum, numerosve inanes,
Harmoniamque.*

Linguarum Orientalium Musa.

Τ' ἡλὺ ἔληψα πάλαι καλὰ ἄλσια Σιών,
Νόματι Γρηγορίου τοῖς γε μελῦσα τόποις.
Καὶ δὴ Γρηγορίου φήμην μενῶ πᾶσαι ἐπ' αἶαν
Ἐσκιδίνην, πολλοῖς ὕψι βοῶσα λόγοις.
Αὐτὰρ τιμὴ ἔλν' νῦν δ' Οὐλύμποιο θρόνοισιν,
Αὐτὸς παμφανόων ἐστὶν ἔμοιγε κλέος.

*Deserui excelsi quondam nemora inclyta Sion;
Gregorii hunc nutu jussa subire locum.
Gregorii nomen, fama resonante, per Orbem
Diffudi, late multiloquo ore tonans.
Huic decus ipsa fui; nunc Cali sedibus altis
Undique collucens est decus ipse mihi.*

Ecloga inter Corydonem & Melibæum.

Corydon pro Eloquentia; Melibæus pro Poesi.

*C. Sat lacrymis, Melibæe, datum, justoque dolori;
Nostra satis longo rorantur lumina fletu.
Vos coryli nobis, nobis vos flumina testes,
Cum flebam extinctum crudeli funere Daphnin,
Daphnin per silvas, Daphin super athera notum.
Me saepe oblitum sera decedere nocti
Sol abiens vidit plorantem, vidit & idem*

Sol

- Sol rediens longos ducentem pectore questus.
 Qualis frondiferos lustrans orbata recessus,
 Queritat huc illuc amissum bucula fetum;
 Illum per silvas, illum per inhospita saxa,
 Et quo rapiat amor, mater sequiturque vocatque,
 Et natum silvas, natum gemebunda videtur
 Antra suum, montesque amissum exposcere natum;
 Sic ego crudeli transfixus vulnere pectus,
 Plorabam Daphnin, Daphnin per rura vocabam.
 At nunc & lacrymis finis, finisque querelis.*
- M.** *Certe luctifico nunquam mea tibia versu
 Cessavit, nunquam cessarunt lumina fletu.
 Nam postquam nobis rapuit mors invida Daphnin,
 Semper ego nemorum secessus inter opacos
 Solus amem miseram lacrymis consumere vitam.
 Ceu Turtur dulces mœrens sua pignora fœtus,
 Infida traxit, quos durus ab arbore Pastor;
 Non illam irrigui fontes, non roscida prata,
 Stellatæ novis delectant floribus agri;
 Flet noctem, atque diem (posses cognoscere matrem)
 Et miserabilibus late loca questibus implet.
 Sæpe dolore amens, curaque infixus acerba,
 Ad circumstantes vertens mea brachia silvas,
 Ceu possent silvæ raptum mihi reddere Daphnin,
 Daphnida clamabam; sed sola in montibus imis,
 Ceu fletus nostri, nostri miserata doloris,
 Echo reflexo repetebat nomine Daphnin.
 At quanam est, Corydon, ponendi causa doloris?*
- C.** *Jam Daphnis cæli superans revolubilis orbes,
 Purpurei rutilo Solis ceu tectus amictu,
 Et fulgens late per pulchra volumina Cæli
 Enavit, summoque volans successit Olympo,
 Unde obitus varios astrorum cernit, & ortus,
 Sub pedibusque videt nubes, & sidera, & imbras,
 Unde novum nobis lucefcit sidus ab alto.*
- M.** *Denis ergo manus ornemus, tempora fertis,*
Ja-

*Jaetatisque vias velemus floribus, omnis,
 Omnis nunc resonet festo vicinia cantu;
 Omnes nunc lato dicamus carmine Daphnin:
 Daphnis erat nostri decus & solatia Ruris,
 Daphnis amet nostro tantum nunc carmine dici:
 Daphnida si canimus, sint carmina Daphnide digna.*

*C. Palmiferi colles, lati consurgite colles,
 Vos silvæ ramis capita accurve reflexis;
 Vos etiam fontes, quos olim fletibus auxi,
 Nunc strepite, & vestros per saxa iterate susurros,
 Daphnida nunc canimus, responent Daphnida colles,
 Daphnin Pastores, & silvæ dicite Daphnin.*

*M. Silva o sola meis quæ quondam fletibus apta
 Audisti gemitus, & nostras saepe querelas,
 Dum flerem nostro subreptum Daphnida Ruri,
 Nunc lato circum resonabis carmine, latas
 Nunc repetes cordis testantes gaudia voces.
 Tu quoque, quæ nostri dudum comes una doloris,
 Echo reflexas geminabas mæsta querelas,
 Nunc latos repetes plausus, & carmina lata.
 Daphnin Pastores, & silvæ dicite Daphnin.*

*C. Hanc Silvam, magnum quæ se se plurima in orbem
 Circumagit, Daphnis, dum viveret, ipse tenebat:
 In medio Silvæ pulchrum hunc consererat hortum,
 Et variis illum plantis ditavit: & omnis
 Ridet flore suo revivescens planta quotannis.
 Ipse novos videas semper turgescere ramos,
 Et multos curva pendere ex arbore fructus.*

*M. Hunc hortum Daphnis sibi sedulus ipse colebat,
 Gaudebaturque suas persæpe invisere plantas,
 Illi dulcis erat labor iste, hæc grata voluptas.
 Cum vero Autumnus pomis ornatus, & uvæ
 Tempora, purpureum pulchris caput extulit arvis,
 Tunc letus tantorum operum latusque laborum,
 Hos plenis fructus manibus tandem ipse legebat.*

*C. Horto autem in medio duo fontes murmure blando
 Cur-*

Currentes, molli dulcique humore tenellas
 Irrorant plantas, in fibras qui diffusus omnes,
 Imbutos mira reddit dulcedine fructus,
 Et pulchro varioque aspersos inde colore.
 Daphnin Pastores, & silvæ dicite Daphnin.

M. Aspicias illos serpenti ludere lymphæ.
 Hic multos miscent alternos orbibus orbes;
 Hic varios agitant cursus, variosque recursus;
 Usque adeo culto latantur Daphnidis horto.
 Daphnin Pastores, & silvæ dicite Daphnin.

C. Qui bibit ex illo, sacro tum Numine plenus
 Ille, regens animos, blandis modo pectora dictis
 Permulcet, modo terribili ceu fulmine lingua
 Deterret, modo sollicitat, modo temperat iras,
 Nutantesque modo huc animos, modo pertrahit illuc,
 Et quocumque volet, flectit, quacumque reflectit.

M. Qui bibit ex isto, divina percitus aura,
 Jucundo fundit jam non sua carmina plectro,
 Excelsis rigidas deducens montibus ornos,
 Saxa movens, silvasque trahens unde unde sequentes,
 Flexanimi raptas mira dulcedine cantus,
 Et cursum revoluta suum obliviscitur unda.

C. Indomitos cultu, & dictis formabat Agrestes;
 Pastores inter ponens certamina lingua,
 Victori, victoque dabat sua premia Daphnis.

M. Daphnis Pastores, & silvas Daphnis amabat;
 Ille dabat calamis animam, cantusque movebat,
 Illi & erant calami, & cantus, & carmina cura.

C. Daphnis Pastores, & carmina Daphnis amabat:
 Sæpe etenim viridi prostratus margine ripæ,
 Quam placidus vitrea lambebat rivulus unda,
 Carmina gaudebat Pastorum audire, periti
 Seu calamis essent, seu vocem inflectere cantu:
 Daphnin Pastores, & silvæ dicite Daphnin.

M. Quin etiam, pecudes donec per florea prata
 Tondebant, tenero crescentia gramina morsu,
 Dul-

- Dulcia jucunda fundebat carmina voce.
O quam dulcis erat vox Daphnidis! ipsa ferarum,
Ipsa etiam poterant sensim mansuescere corda.
Daphnin Pastores, & silva dicite Daphnin.*
- C.** *Est dulcis, qui mane novo delabitur, humor
Roscidus, & placide sitientes excitat herbas,
Languidulum & flores tenerum caput inclinantes.
Est dulcis, molles facies ubi verna tepores
Rettulit, & roseo depinxit lumine campos;
Grata comes veris placidi levis aura Favoni,
Floriferis blande cum circum lusat alis
Prata per, & variis depictos floribus hortos.
Dulcior at nostri fuerat vox Daphnidis: illa
Jucundo suavis mellis conspersa lepore,
Mira irrorabat victos dulcedine sensus.*
- M.** *Nec fons lucidulus, qui roscida gramina lambens
Somnifero strepit irriguus per saxa susurro,
Dulce viatori longo in sudore lavamen,
Tam placide suadet crepitanti murmure somnum,
Nec tam dulce canens viridi philomela sub umbra,
Jucundis Dryadum permulcet cantibus aures,
Cum vitreo teneras gemmantes rore per herbas,
Collucent rutili trepidantia lumina Solis,
Quam dulcis, quam blanda fuit vox Daphnidis; ipsa
Tangebatur blando nutantia pectora sensu,
Dulcior ambrosia, & suavi mage nectare dulcis.*
- C.** *Quantum se se effert inter viburna cupressus,
Tantum Pastores Daphnis se se extulit inter.*
- M.** *Ut pulchros flores superat rosa pulchra decore,
Sic alios unus Daphnis superaverat omnes.*
- C.** *Dum vivam ipse, canent semper mea carmina Daphnin,
Silvasque & montes Daphnin resonare docebo.*
- M.** *Dum volucres Calum dum pisces aquora amabunt,
Daphnidis aternas haec dicet fistula laudes.*
- C.** *Nunc tibi, Daphni, aras, tibi cernis surgere templa,
Auratisque tholis ingentia munera pendent.*

M.

- M. *Jamque Arabes sua thura ferent, sua thura Sabai;
Ara, Daphni, novo semper tibi thure calebunt.*
- C. *Hoc nemus, has valles, hæc flumina Daphnis amabat;
Hoc nemus, has valles, hæc flumina respice Daphni.*
- M. *Has quoque dilectas quondam tibi respice plantas;
Tu face ut in viridi pubescant arbore fructus.*
- C. *Tu face neu Soles illas, neu frigora ladant,
Neu ladant imbres, neu sævo turbine grando;
Omnes nomen habent inscriptum in cortice, Daphnis.*
- M. *Nos quoque Pastores simus licet, aspice Daphni.
Et Tu Pastor eras, Pastores respice Pastor;
Nobis numen eris, nostri Tu gloria Ruris.*

Conclusio.

- O qui per campos, formosæque frugibus arva,
Medoace hinc, illinc sæcundo laberis amne,
Altum attolle caput, magnos visurus honores.
Euganei colles, subiecti & collibus agri
Latitia accincti, nunc o consurgite, lata
Nunc læta ingeminant resonantes carmina rupes,
Et Barbadicum tellus, atque insonet æther.
- Salve o Calicolis decus addite, gloria nostri
Magna Soli, salve o tua nomina compellabo,
Submissoque genu latus tua numina poscam.
Tu nunc stelliferi rutilantia limina Cali
Incolis, & celeres mundi septemplex orbis.
- Ut tua corporeis tandem mens libera vinculis,
Jam se se major, jam Numine læta reperto,
Exultans penitus se nunc effundit, & illo
Gaudens, optato felix requiescit amore!
Qualis qui variis erravit flexibus amnis
Prata per, & vernis balantes floribus agros,
Tandem defessas multis erroribus undas,
In pelagus magno procurrens impete desert,
Hic se se sistit, pelagoque positur aperto.
- Jam nunc Urbs Patavi, quam vivens ipse beasti,
C Alme,

*Alme, tuo adspectu, nunc & magis omnibus unam
 Jucundam placidus propiori lumine cernis,
 Thura tibi, tibi festa, tibi persolvit honores.
 Jamque tibi statuent alii de marmore Tempia,
 Et pulchris pretiosa tholis tibi munera figent.
 Ah Pater, alme Pater cali e regione serena
 Aspice nos, Nati sumus, ah precor insere præsens
 Pectoribus dulcem Patriæ celestis amorem.
 Parvi parva damus, tibi semper carmina grati
 Solvemus, laudesque tuas tollemus ad astra.
 Nostris interea votis assuesce vocari.*



B. GRE-

B. GREGORIUS BARBADICUS

ALTER SUI TEMPORIS

D. CAROLUS BORROMÆUS.

O R A T I O.

Fidem solvimus. Cum primum Gregorio Barbado ad Beatorum venerationem paullo ante consecrato, exultantem animi nostri, gaudioque gestientem sensum publice significavimus, publice quoque professi sumus, expletis cæterorum animis in lætitiā, præconiaque effusis, voluptatem nostram nullo unquam tempore desituram, ejus laudes in omnem nos ætatem celebraturos. Æquum certe est nos, qui Barbadii beneficiis perpetuo fruimur, perpetuo memores esse beneficiorum. Licuerit aliis ventorum modo, qui in ipso ortu vehementissimi spirant, quo tamen longius feruntur, eo magis debilitantur, ac progressu demum deficiunt; sic illum arreptum illico ingentem ardorem sensim imminuentibus tandem defervescente; nos enimvero decet fluvios imitari qui qualescumque a fonte sint, ulterius fluentes auferunt magis, & amplioribus feruntur alveis, quo a capite longius recesserunt. Ecquid igitur potissimum ad dicendum sumamus, quod & B. Patris prædicationi, & gratō Filiorum animo, & purgatis sapientissimorum Auditorum animis pro merito, pro officio, pro dignitate respondeat? Non est cur longius conquisturi evagemur. Cum vel ingredientibus in Ædes nostras D. Caroli Borromæi occurrat imago, quam Barbadicus loco sui stemmatis in limine poni jussit, & amoto in sui commendationem disticho eam inscriptionem subiici; *Disci-*

plina tua ipsa nos docebit; cum animadvertimus quas leges Carolus ab se conditis Seminariis constituerat, iisdem nos ex Gregorii institutione regi, atque gubernari; cum intelligimus in Caroli tutelam a Gregorio ita traditis, ut illo auspice, ac Patrono principe utamur; cum auditione accipimus festo D. Caroli die in hunc locum se Gregorium conferre consuevisse, ut in ejus memoriam, atque honorem Alumnos sacratissimi Dominici Corporis participes sua manu faceret, nihil prius, neque tam primum, neque tam obvium cogitantibus nobis se se offert, quam, quod vivente Gregorio ubique vulgo jactabatur, Caroli spiritum in Gregorium migrasse: tanta erat utriusque morum similitudo, vitæque consensio. Una erat illa omnium vox Barbadicum Episcopum, & Cardinalem sanctissimum vivam esse Caroli imaginem, tamquam colore, ac similitudine prorsus expressam, eratque illa opinio Italicorum omnium, immo & exterorum, atque adeo vel Hæreticorum, qui, tametsi nostris pro more institutoque insensui sunt, tamen quia virtus id habet, ut amabilis sit, admirabilisque etiam carentibus, non poterant, quin tributam Gregorio communi fama laudem concederent, & prædicarent. En quod suamet sponte sine ulla investigandi argumenti cura oblatum nobis est, in quo tota nostra hæc versetur disputatio, B. Gregorium Barbadicum fuisse alterum sui temporis D. Carolum Borromæum.

Unde vero initium ducam? Num a Generis claritate? ea in utroque patria fuit, & par. num a Parentibus? Æque illi fuere pii, æque de Liberorum optima institutione solliciti. a pueritia? Utriusque pariter studiis dedita, atque pietati. a dignitatis exordio? Utrique paria merita viam munierant, utrumque modestia eadem retrahebat. Ne hæreamus in litore, sed explicatis orationis velis in altum proveha-

vehamur. Non omnia ordine exponam, sed velut per tranſennam prætereuntibus conſtructam rerum copiam ſubiiciam. Pono vobis ante oculos utrumque ab Episcopatus initio. Qui Mediolanenſis Antiftitis doctrinæ, & ſanctitatis tum prope recenti fama eminentiſſimi exempla, virtutes, inſtituta ſimul, atque Episcopus renuntiatus eſt, æmulanda ſibi propoſuit, ſuſcepta vineæ ſuæ procuratione, eandem ſterilitatem, eandem nocentium herbarum luxuriam eoſdem vepres, ſentesque, eadem mala deprehendit, quæ naſtus in ſua fuerat Borromæus. Corrupti mores, proſtigata diſciplina, miſeranda ignorantia decretam utrique provinciam oppleverant; quaſi imitari cupienti imitandi facultatem ipſa calamitas ſuppeditaverit. Non Pictor exemplari propoſito opacitatem, umbram, claritatem, lumen, vultus argutias, capilli elegantiam, oris venuſtatem, deſinentis picturæ modum, totius ſymmetriam tam exacte deſcribit, quam fideliter Gregorius ſingulas Caroli virtutes in ſe tranſtulit, cujus vitæ lector aſſiduus erat, quam iter quoque faciens in ſinu geſtabat, cujus anagnoſtem inter cænandum quotidie adhibebat, ut omnia ſanctiſſimi Præſulis dicta, facta, eventa omnino ſibi familiaria ad imitandum faceret. Qua igitur ratione tantis Provinciæ ſuæ malis occuriſſe Barbadicum putetis? eadem plane, quam Borromæus iniit. Propitiato primum multis precibus Divino Numine, a quo vires ad bene feliciterque regendum aptas acciperet, a ſemetipſo incipiendum ſtatuit, ut talem ſe omnibus exhiberet, quales fieri omnes concupiſceret. Uterque Antiftes optime didicerat ab Apoſtolo *iu omnibus ſe ipſum præbere exemplum bonorum operum*; uterque nimirum cum eodem veritus, *ne cum aliis prædicaverit, ipſe reprobus efficeretur*; uterque probe intelligens eam fore tutiſſimam viam, ſi Chriſti veſtigiis inſiſteret, Chriſti, qui *capit fa-*
C 3
cere,

ere, deinde *docere*. Cogitabat uterque non exundaturas ad irrigandum hortum aquas, nisi prius vas, unde exiliant, ipsum plenum fuerit, & ut flumina de ventre fluant aquæ vivæ, oportere in ipsis fieri fontem salientis aquæ. Non vacat referre orandi jube studium, secessus annuos ad vacandum facilius, deposita tantisper publicæ procurationis sarcina, rebus suis, longas noctis vigiliæ, molesta jejunia, asperas corporis castigationes, cæterasque suimet exercitationes, quæ si in ambobus eadem fuere, easdem ab aliis discere potuerunt. Illud peculiare Caroli, cujus Gregorius æmulus singularis, ut cum ad perfectam normam uterque viveret, cum in neutro nihil nisi laudandum imitandumque dignosci posset, uterque tamen sibi Monitores constituit, qui attentissime ipsorum gesta inspectarent, & si quid in ipsis animadvertissent, quod vel leviter peccatum esset, cum libertate reprehenderent. Hoc enimvero in insita cuique sui æstimatione, in naturali reprehensiones audientium ægritudine, atque indignatione, præsertim eminenti fulgentium dignitate ab inferioribus, hoc inter cætera ita miror, ut omnia penes me superet admiranda; sed nimirum id eorum est, qui a reprehensione longissime absunt, qui autem magis ad reprehensionem accedunt, magis refugiunt, & averfantur. Hoc primum, quod omnium potissimum censuit, constituto, Carolus ad Familiam suam certo vivendi ordine componendam animum adjecit. Dicebam, Carolus, quippe ita audio a Giuffano, Gregorius, ut dicam, moneor a Ricchinio. Neque vero difficile fuit præeuntis sive Caroli dicas, sive Gregorii vestigia Domesticos libenter sequi. Sua enim sponte a capite, atque corde in membra spiritus, vigorque diffunditur, motaque rota prima, facere non possunt cæteræ quin sequantur. Ea erat utriusque Viri sanctissimi, nec fallebantur, opi-

nio,

nō, secundum suum, suorum exemplum fore vel bonum ad virtutes, vel malum ad vitia in cæterorum animos inferenda potentissimum. Obversabantur scilicet Episcopis prudentissimis non prætorum modo, sed & suorum temporum deploranda nimis exempla, unde cognoscerent quantum detrimenti in bonum publicum Aulicorum perversitas importaret. Hinc utriusque antequam ullum in suam familiam admitteret, diligentissima illa perquisitio, quibus quisque moribus, & qua indole præditus esset; illa perspicax, nequaquam communis vigilantia, num quis probitatis, pietatis, religionis simulatione (quis enim aperte fallere, aut peccare iis Episcopis ausus esset?) quidquam diceret, aut ageret; illa constantissima voluntas ordinis in Christianæ vitæ officiis a familiaribus omnibus perpetuo, atque una servandi. Utriusque votis, curisque respondit eventus. Utriusque enim familia non Aulicorum societas, cujuscumque non defuerunt unquam, nec deerunt, sed Religiosorum hominum cœtus (prodigium hac ætate non usitatum) cœtus inquam hominum Religiosorum probitate, modestia, continentia, integritate, pietate, omnibusque virtutibus florentissimus utriusque familia videbatur. Non est hic locus enarrandi quantum inde utilitatis in commune bonum redundavit, nec quanta aut Carolus, aut Gregorius fecerit, cum fecerit uterque quod eximie sanctitatis Episcopi facere consueverunt, Christi horti cultores diligentissimi, ut virtutes omnes ferebant, vitia quæque eradicarent. Satis est ut ostendam quemadmodum a Carolo Gregorius in se transcripsit exemplum. Revocate animos vestros ad Mediolanensem provinciam, inspicite hominem totum deditum animarum saluti. Sive privatim loquatur ille, sive publice, ita flexanimis utitur verbis ex imo pectore charitatis plenissimo erumpentibus, ut

quoscumque quo velit, impellat, unde autem velit deducat. Sacris voluminibus legendis vacat, & in Prophetarum libris attentius inhæret, ex quibus opportuniora in concionum, & exhortationum suarum usum hauriat, atque derivet: quos autem voce, & ore pascere non potest, atque erudire, eos in redigenda ad exactam regulam vita pro sua conditione quosque instituit scriptis, & quibus scriptis! quæ cum extent adhuc ad posterorum utilitatem, quam etiam prospiciebat studiosissimus Pastor, & cujusque oculis subiecta cum sint, non est cur ullius præconio, nedum nostro commendentur. Jam illum videre licet Patribus familias ex suo instituto certis diebus convocatis domesticæ institutionis præcepta diserte explicare, quo ipsi Parentes familiam suam ad Dei cultum, & Christianam disciplinam recte erudirent. Sed in puerorum cœtu, tanquam in regno suo potissimum sollicitus, libensque versatur, christianam Catechesim per se ubi potest, per sedulos ministros, ubi non potest, tradendam curat. Ecquod illud spectaculum quam jucundum, & præ dulcedine spiritus lacrymas eliciens circumstantium, videre hic Virum Principem super pueros, ut illum Jobum, *stillantem eloquium suum*, & hinc pueros *os suum aperientes, quasi ad imbrem serotinum*? Sed hæc leviora. Quid? quos labores subiit, quæ incommoda toleravit, quæ pericula adiit in lustranda provincia sua, quo universum gregem inspiceret, Cleri, populique mores cognosceret investigaretque, num quæ vitia, num quæ corruptelæ irrepsissent, num qui odiis, inimiciis, aliisve flagitiis impliciti essent, num a sacris jamdudum alieni, num alia subessent, quæ Episcopi cognitionem, & medicinam postularent? quod si spirituali totius gregis sui emolumento intentissimus erat, an putetis humanæ vitæ necessitatibus consulere neglexisse? Enim vero
quam

quam libenter Orationis laxarem, ut ita dicam, habenas, ad amplissimum campum excurrendum in explicanda beneficentia, & profusa in pauperes liberalitate, si quam multa suppetit dicendi seges, tam multum etiam temporis ad dicendum concessum esset. Inhibere cursum invitus licet cogor, interim tamen minime dubitans, quin vos, cum hæc de Borromæo loquerer, Barbadicum designari cum vestris animis reputaveritis; immo taciti alii alia vobiscum subiicitis, & ut dicantur, expectatis. Ego vero, si quæ dicenda suppetunt, dicam omnia, quem finem dicendi faciam? Vitam D. Caroli legitote, B. Gregorium deprehendetis; Gregorii vitam in manus sumite, Carolum, recognoscetis. Liceat ergo innumera vobis jam cognita missa facere, mihi tamen illud non libet omittere, quod, si divina arcana investigare licet, videtur divino quodam consilio evenisse, ut Carolum in cælis regnantem in terris adhuc militare in Gregorio homines sibi persuaderent. Quid enim manifestius divina providentia factum, cum, ut paria utriusque Antistitis merita essent, uterque obiiciatur pares ob causas paribus fere confictatus molestiis, laceffitus injuriis, controversiis vexatus, ad necem quæsitus? Euge Pater optime, id age, ut gregis mores componas, revoces ad bonam frugem, ad pietatis officia perducas, disciplinam restituas, jura Ecclesiæ tuearis. Vexillum tibi præbet strenue sequenti antesignanus inclytus Borromæus. Adversarios offendes, non ignoro, multorum invidiam subibis, obtrectiones devorabis, famæ quoque vitæque ipsius insidias non effugies. At si quæ iniit Carolus, tibi quoque inunda sunt certamina, ea quæ Carolum, Te quoque manent amplissima præmia. Tibi felix, tibi florens, tibi beatus videris, si magistri virtutes assequeris; eas ut assequaris in eadem conspirante fato

(si

(si licet uti verbo) abriperis insidias, periculaque. Pro sexcentis, Auditores, fatis unum sit. Quamquam quæ præteriere, & jamdudum in hominum mentibus infedere solent paullatim de horrore semper aliquid amittere, tamen quod dicturus sum non possum sine horribili gelidaque formidine quadam referre. Eo pervenit nefarii nescio cuius hominis impietas atque furor, ut execrandum ceperit de integerrimo perdendo Episcopo consilium; quod perficere brevioris, ut ajunt, sclopi ictu paricida, teterrimus aggressus est. An ut Carolum Gregorius repræsentaret, id quoque necesse erat, ut ignea glande, quemadmodum Carolus, pereretur? Vi'etur ita sane: nam & eventus utriusque similis fuit, utrinque in irritum cadente ictu. Attamen ad tam scelestum facinus quis non commoveatur? quis non sacrilegum hominis monstrum exterminandum putet? Omnes putant, præter Gregorium. In omnium perturbatione immotus, ac plane tranquillus ad ulciscendum paratos coercet; id facturus pro sua virtute, quod ab ipso divino Pastore hauserat, sed profecto eo quoque contentus, quod ad Caroli exemplar, ad quod se omnino referre, atque componere sibi proposuerat, hoc pacto magis atque magis accederet. Qui ultro vos paullo ante ad Mediolanum mente & cogitatione converteram, videor ipse a vobis eodem revocari, ubi jam modo spectaculis nescio quibus lætissima tota Civitas, gaudio repente in luctum converso, præ lue epidemica ingruente, consternata mentis oculis obiicitur. Ibi video Carolum concursare sedulo vias, ægrotantes invisere, jubere quoscumque obvios laborantibus opitulari, & ipsum quoque per se omnia officia ad miserorum salutem, aut levamen præstare, & in primis niti, ne subsidia ad æternam salutem miseri desiderarent, & animam suam positurum pro ovibus suis, dummodo

modo morbo affectis opem ferret, se in apertissimum vitæ discrimen committere. Non evenit id aut Bergomensi, aut Patavino Episcopo Barbadico, quo sui temporis Borromæum hac in parte se se exhiberet. Verumtamen etli avertit malum hujusmodi pro sua bonitate Deus O. M. a Bergomensi, Patavinaque Provincia, tamen non defuit quo Carolum hac quoque parte se ostenderet. *Irvaserat enim finitimas Italiæ Provincias epidemica lues, ac Patavio impendebat ejusmodi calamitatis periculum. Id sedulo reputans amantissimus Pastor, Caroli Borromæi charitatem in omnem mali impendentis eventum amulari constituit.* Ita scribit Ricchinius, narratque; ut ille se ad suspicionem morbi comparaverit, pro animorum, corporumque salute eadem, quæ Carolus, perfecturus, ut appareat, si defuit occasio, voluntatem non defuisse. Sed revera jam ante quam Episcopus esset Gregorius se Carolum gessit. Illius temporis vobis veniat in mentem, cum ille Summi Pontificis Domesticus Præsul, grassante Romæ lethali lue, ad id mali propulsandum Transiberinæ regioni præfectus est. Quæ Mediolani a Carolo facta recensui; eadem Romæ plane confecit Gregorius, ut sive Bergomi, sive Patavii, sive Romæ, ubique Carolus videatur. Non ego minuta persequar, veluti suscepta ad Sanctorum mortales exuvias rite colendas itinera, induendi se vel privatim, vel publice rationem, cibi potusque parcissimum modum; hæreditatem addictam aliis, quam Genti suæ, tenuem sui funeris apparatus testamento præscriptum, & alia plurima, quæ si eo magis ad unguem imitandi formam commonstrant, habere locum non videntur, ubi missa sunt innumera longe maxima. Jam enim eo sua sponte delabitur Oratio mea, ut si Carolo Gregorius similis, omninoque par ea ætate viventibus videbatur, ostendam paucis ea monumenta perpetua futu-

futura ambos reliquisse, ut posteris ætatis discrimen non cogitantibus gemelli videantur. Ingens Caroli animus non traditarum sibi ovium cura contentus erat; sed quemadmodum serunt arbores Agricola, quæ alteri sæculo profint, ita Pastor providentissimus ad futuram deinceps sobolem in omne tempus animum intendit. Testes sunt, quin potius edita voce conclamant instituta ab eo Seminaria, in quibus cum lego qua se ille ratione gesserit, mirifice delector, cum mihi videar Barbadii in condendis Seminariis acta vel minora relegere. Quod ad Concilii Tridentini leges Patavii excitatum jam olim Seminarium erat, an tenue nimis visum Gregorio est, & ab eo quod necessitas postulabat longissime remotum? Tale intelligo visum Carolo Seminarium per Ormanettum coeptum. Ingentem pecuniæ vim Patavinus (liceat mihi dicere) Carolus in eam rem impendit, suisque bonis abdicatis, proventus in perpetuum addixit? Id ante fecerat Mediolanensis. Domesticæ rei angustia impeditos pueros, quominus bonis artibus instrui possent, suis sumptibus alendos non ex urbe modo, sed e rure etiam, atque e montibus in Seminarium admitti jubebat, ubi exploratis moribus, exploratoque ingenio utiles Ecclesiæ fore prævidisset? Hæc fuerat ipsissima Caroli consuetudo. De regiminis forma, atque institutione nihil præterea dicam, quam quæ initio commemoravi, eam esse nostram, quam Mediolanensis Archiepiscopus tradiderat: nisi quod peculiarem quamdam studiorum methodum Gregorius addidit, quam pro sua in omnibus eruditione ipse conscripsit. Anteverterat nimirum Carolus multa scribendo ad Ecclesiæ suæ utilitatem, quæ in suæ bonum Gregorius transtulit; non omisit tamen Magistri exemplum etiam scribendo, ut & visus sit Carolus Caroli instituta servando, & ad exemplum Caroli memoriæ posterorum

rum utilia prodendo. Quamquam neuter humanarum vicissitudinum ignarus erat, sed prævidebat uterque a se constituta vel temporum mutabilitate, vel hominum libidine non eo, quo constituta fuissent modo constantia fore. Ad me tamen id unum attinet ostendisse parem quoque fuisse in utroque providentiam futurorum, cum id mihi muneris in præsentia demandatum sit probare B. Greg. Barbadicum fuisse alterum sui temporis D. Carolum Borromæum. In id argumenti quod proposui ingresso mihi accidit quod solet Oceanum primo ingredientibus, qui quo ulterius provehuntur, immensa vastitate deprehensa, eo minus se ad extremum litus pervenire posse confidunt. Quocirca vela contraham, & indicata licet potius quam demonstrata omnimoda inter Carolum, & Gregorium similitudine, ad exitum Orationem deducam. Cum admirabilis appareat Divina Sapientia, non modo in infinita rerum varietate condenda, sed maxime in unis hominibus, quos omnes cum similes fecerit, facies tamen omnium dissimiles sunt, immo totidem pene reperias etiam ingeniorum, quot corporum formas, non minus se admirabilem prodidit in hominibus virtute, atque sanctitate exornandis. Vere *mirabilis Deus in Sanctis suis*, quos cum omnes Sanctos effecerit, ita tamen effecit, ut de unoquoque dici possit, *non est inventus similis illi*, quia unusquisque peculiari excelluit aliquo genere sanctitatis. Inventus est temporibus nostris similis Carolo, & ita virtute, atque sanctitate par, ut videatur alter idem, quemadmodum lilio collatum lilium, globus globo, adamas adamanti, aut potius Iris Iridi, quæ diverso tempore cum appareat videtur alia, quam tamen melius dixeris eandem. In lucem venit alia ætate Gregorius, cujus cum decora sint innumera, illud supra cætera prædicetur, quod sopitam cum morte Caroli vir-

virtutem ita excitavit , quemadmodum flammæ ,
quæ absumptis lignis refederant , contracto in pru-
nas calore toto , quis excusso cinere , quo prunæ
contactæ latent , additisque lignis , easdem rursus
exuscitat ,

IN D. CAROLO BORROMÆO,

E T

B. GREGORIO BARBADICO

Virtutes fuere pares .

Fides .

*Quid mihi terrifica , quæ Perseus agide quondam
Grandia patravit facta , Poeta , refers ?
Ut findens victor tranantibus æra pennis
Anguicomæ retulit Gorgonis exuvias ?
Ut dura immerito pendentem e rupe Puellam
E rabidis monstri morsibus eripuit ?
Carolus horrendum & non enarrabile monstrum
Perdidit , inferni quod vomuere lacus .
Carolus Hæreseos Christi per Ovile pererrans ,
Et miserum crucians nocte dieque pecus ,
Dat letho monstrum , domitumque in Tartara mittit ;
Dein simili extirpat vulnere Gregorius
Hydram de veteri sensim radice renatam .
Nil mirum : namque una Ægis utrique fuit .*

Religio .

*Dic mihi Musa , quis hic , sancto qui totus amore
Ardens , & se se sensibus eripiens*

Sa-

*Sacra Aris facit? est hic, inquit, Carolus. Illum
 Jamdudum nobis mors fera surripuit,
 Et Sanctos inter tenet astra. est Carolus, inquit,
 Dicitur ast alio nomine Gregorius.
 Post fata Hippolytum quondam sub nomine Virbii
 Vixisse, in vanum est fabula ficta jocum.
 Hoc credam potius, fuerat qui Carolus, esse
 Jam modo mutato nomine Gregorium.*

Spes.

*Qualis, calenti dum furit impete
 Ardens ab alto Sirius athere,
 Atque urit agros, inquietus
 Sollicito memora alta cervus
 Cursu pererrat, viscera fervido
 Correptus aestu, nunc petit anxius
 Excelsa montis, nunc ab altis
 Verticibus petit ima vallis;
 Donec fluentem murmure blandulo
 Offendat amnem, quo sitis igneos
 Expellat ardores, rigetque
 Frigidulis sua labra lymphis;
 Sic impotenti, quo intus adurit,
 Flagratque totus Gregorius Dei
 Amore, in unum arrectus alta
 Spe rapitur, sequiturque anhelans
 Unum inquietus Gregorius Deum,
 Unumque, seu Sol exeat equore,
 Pontive submergatur undis,
 Queritat unum, inhiatque Numen.
 Terrena an illum commoda pertrahant,
 Quem suaviores delicia attrahunt,
 Quas omne mansuras per ævum
 Calicolum domus alta pandit?*

Con-

Contemnit aurum; quin generosior
 Tumultuosum traderet in mare
 Portare ventis, & procellis
 Divitias operosiores,
 Tardaret illum ni pietas sua,
 Et juncta cordi pauperies foret,
 Qua altum ingemiscens, parce, clamat,
 Proposito, Pater alme, parce.
 Non vana rerum nomina inanium,
 Non illum honores, claraque purpura,
 Non ducta ab Heroo moratur
 Sangine nobilitas, decusque.
 Non illum avorum factaque grandia,
 Affixa & aureis stemmata postibus,
 Non fama tantis clara rebus
 Mente queunt solida movere.
 Quin universus non valet illius
 Regendus Orbis nutibus, ipsaque
 Prostrata majestas potentum
 Ante pedes tetigisse regum.
 Seclatur illum copia divite
 Referta cornu, subsequitur decus:
 Terris relictis celsiora
 Ingreditur generosus Heros.
 Ceu, quando pleno gurgite volvitur
 Lapsis ab alto grandior imbribus,
 Silvas per, & campos recurrens
 Sternit humi sata cuncta torrens,
 Nec ripa multo gramine detinet,
 Nec sparsa pulchris prata coloribus,
 Sed liber, & cursu citato
 Effugit aquoreas ad undas:
 Inire summas jam propius vias
 Anhelat, arces scandere & igneas;
 Queis ante praeceps quiescit
 Carolus omne sequens in avum.

Hanc

*Hanc metam eandem tangere nobilem
Inter Beatos, Te quoque Gregori,
Spes una suadet, speque eadem
Sufficiente animos eosdem.*

Charitas.

*Ceu quondam Soli nubes objecta micanti,
Lucis ubi immensæ constitit ante jubar,
Percussa adversi reflexo luminis ictu,
Aere stans simili fulgida luce micat,
Et geminos late Soles stupet inscius imis
Suspiciens calo fulgere Pastor agris;
Sic hinc Gregorius, sic fulget Carolus illine:
Illos forma eadem vix sinit esse duos.
Fallor; purpureo Solis radiata nitore est
Hæc nubes, Solis lumine pulchra micat.
At late proprio lucet rutilantis ad instar
Solis, & equali lumine Gregorius:
Ut speculo oppositum radios reflectit eosdem
Par speculum, & simili lumine utrumque nitet;
Aut ceu cum longo fornax incanduit æstu
Fornaci similis, par furit ignis edax.
Fortunati ambo, celestis victima Amoris!
Ambos flamma eadem dulciter excruciat.
Ardet uterque sacro, atque alios sacro urit uterque
Igne, pari crescit flamma in utroque gradu.
Ac velut in densa surgens vis ignea silva,
Cum decertantes incubuere Noti,
Ilicet undantes calum occuluere favilla,
Fertur & ardenti vortice flamma vorax,
Quoque magis victor vestigia promovet ignis,
Crescit eundo, suas & magis auget opes,
Gliscit inexpletis flammis, populatur agrestes
Acer opes, flammis cuncta perusta jacent;*
D *Haud*

Haud aliter dium diffundit Carolus ignem,
 Ætherei flammis luminis ipse nitens.
 Haud aliter dii flammās diffundit Amoris
 Intima torrentes pectora Gregorius.
 Carolus est ignis, scintillant lumina amore;
 Est amor in vultu, verba ministrat Amor.
 An quis bile tumet? subito stillantia amorem
 Caroli at aspiciens lumina, mitis erit.
 An quis probra jacit? casti verba aurea Amantis
 Audiat, & discet purius inde loqui.
 Non ullus tanto potis est obsistere amori,
 Obstitit ut nullus viribus ignis obex.
 Sed non disparibus flammis accendit amoris
 Gregorius, cui par viscera adurit amor.
 Quidquid agit passim divinum spirat amorem,
 Verbaque caelesti missa ab amore fluunt.
 Ille domo egreditur: late comitatur euntem,
 Et flores toto tramite spargit Amor.
 Jam Tempia invisit: quos concipit ebria amore
 Mens sensus! quales mittit ab ore preces!
 Tollitur alta petens nimio jam percita ab igni,
 Languet, & invento gaudet Amore anima.
 Spectat humum, montesque videt cum vallibus altoa.
 Ardendi causas mille ministrat Amor.
 Rupe sub exesa dulci cum marmure rivi
 Decurrit placido vitrea lympha pede,
 Hic lati exurgunt per roseida gramina flores,
 Hic violæ molles, hic hyacinthus olet,
 Protinus exardens caelestes concipit ignes,
 Et dulci fervens vulnere pectus hiat.
 Vos o, quæ rapidas librat in aere pennas,
 Funditis & tenui gutture carmen Aves,
 Et vos, quæ zephyris impulsæ lenibus aura,
 Aut strepitis rauco per nemora alta sono,
 Sacrum Gregorio res cunctæ afflatis amorem,
 Vos castam exardenti uritis igne animam.

*Ast ut saepe novos ardentibus ignibus ignes
 Addit aqua, & robur concipit inde magis
 Flamma vorax, sic ille magis succenditur astu,
 Si cui forte Dei in pectore friget amor.
 Carolus hoc simili quondam succensus amore
 Languebat simili vulnere amoris amans.
 Salvete o pulchra Caelestis victima Amoris:
 Nunc ambo aeterno pascite amore animam.*

Prudentia & Justitia.

DIALOGUS.

- P. Puro splendida lumine
 Do formam reliquis una sororibus.
 J. Me non ditior altera,
 Quae vasto socias contineo sinu.
 P. Nitent frondibus arbores,
 Herbis prata nitent, floribus hortuli.
 Flores, gramina, & arbores
 Iisdem ast unus aquis rivulus irrigat.
 J. Vis mentis viget insita,
 Subfultat gremio cor, oculi vident,
 Vrivunt brachia, & ambulant
 Pedes; idem animat spiritus omnia.
 P. Ex me suscipiunt decus
 Virtutes, radiis & rutilant meis;
 Certis tempero legibus
 Sorores, medium ut contineant iter.
 J. Per me ingens colitur Deus,
 Servantur sociis fœdera amantibus,
 Majori obsequium datur,
 Aëris subsidium, & cuique venit suum.
 P. Donec Carolus extitit,
 Prodigam rutilo fidere pulchrior.

- J. Donec Gregorius fuit,
Indææ vigui Rege opulentior.
- P. Iisdem luminibus micans
Ipsa in Gregorii pectore florui.
- J. Iisdem divitiis potens
Ipsa olim vigui in pectore Caroli.
- P. Uno nomine differunt
Calorum ista duo fulgida lumina.
- J. Sed & tempore differunt
Calorum ista duo fulgida lumina.
- P. Hora, & nomine differunt
Vesper lucidus, & Lucifer aureus;
(Ambæ) At Sol enitet unicus.
- J. Alter purpureus mane oritur novo,
Sero alter rubet occidens.
- (Ambæ) At semper radians unicus enitet.

Fortitudo.

Qua tenero haud pridem ludebas blandula versu,
Ponere jam citharas, jam dulcia ponere plectra,
Altisonasque instare tubas, & grandia tempus
Facta sequi, mea Musa. Virum celebrare canendo
Constantem aggredior, qui possit temnere mortem.

Jamque catervatim pallentia monstra figuris
Horrificis, vultuque truci metuenda pericla,
Quæ graviora facit stygia malus arbiter aula;
Unum oppugnant, circumstantque unum undique mille,
Perniciem ingentem, subitosque minantia casus;
Nec non insomnes, spectra horrida tetra, labores,
Turba Acherontæis quondam eructata tenebris,
Adsunt confecti macie, & pallore supremo,
Difficili addentes operi noctemque, diemque,
Grandibus atque Virum nituntur sistere cæptis.

Ac velut annoso consurgens robore quercus,
Quam tremulo celsas pulsantem vertice nubes,
Una

*Una Eurisque, Notusque feris horrenda gerentes
Prælia turbinibus nequidquam vellere tentant,
Illa solo fixa inconcusso stipite savos
Luctatur contra ventos, ac mole sua stat,
Vrvida Gregorii sic stat radicibus hærens
Immotis virtus, hostiliaque arma retundit.*

*Interea teneris implent balatibus agni
Aerios montes, & inhospita saxa, vagique
Pastorem hac, quaruntque illac, ut vivere tuti
Possint savitia Urforum, & feritate Leonum;
Quandoquidem immanes errant in montibus Ursi,
Fulmineoque necem fundentes ore Leones.
Impiger ille sibi commissum lustrat ovile,
Saxaque, inaccessibleque vias, spernitque ruinas.
Ah rupes quæso, & saxa invia, prætereunti
Parcite Gregorio, furibundi ah parcite venti,
Parcite & ardentes æstivo tempore Soles.*

*Fortis inquit quo raptat amor, quoque anxia cura
Solliciti Pastoris agit; non invia terrent
Gressibus humanis loca, non hunc silva moratur
Antiquis inculta rubis, non fervidus æstus
Sistit, damnosos quamvis contorqueat ignes
Sirius ex alto, sitientiaque arva perurat.
Caras lustrat oves, & dulcia pabula præbet
Pervigil, inspicens quacumque, virentia ne quis
Improbis inficiat lethali præta veneno
Anguis, & invidia ne quisquam falce novellas
Incidat vites, aut parvos fascinet agnos,
Quos illi non unda rapax, nec flamma, nec hostis
Nudato possit sevis arvellere ferro.*

*Sed majora canam. Sedes horrenda relinquit
Tartareas turbata oculos, & scissa capillos
Anguineos, secunda malis discordia, jactans
Terrificam de more facem, qua jurgia mille,
Mille nocendi artes, fraudesque, & noxia bella,
Litesque, insidiasque serit, rixasque, dolosque*

Ingerit illa animis, & saevis hortatibus iras
 Suscitât, impellitque in turbida praelia Cives.
 Da modo terribilem gravior mea buccina cantum.
 Divinis ardens stimulis, sacroque furore,
 Proripitur medios Heros generosus in hostes
 Solus, & impavido venientes excipit ictus
 Pectore; consilioque potens, & viribus acres
 Jam solus lites, civesque sibi atra moventes
 Praelia compefcit. filet ipsa Licentia forti
 Debellata manu, rursusque attollere tentans
 Triste caput, graviore cadit perculsa ruina.
 Justum, constantemque virum, probat ignis ut aurum,
 Sic adversa probant. telluris inutile pondus
 Marmora in obscuris latitarent usque latebris
 Nec tua, Sancte Pater, fulgerent templa, tuamque
 Haud insculptam hospes demisso poplite in aris
 Effigiem coleret, nisi ex imis eruta terra
 Visceribus, scalpbrisque diu concisa peritis
 Nobilis Alcimedon spirantia fingeret ora.
 Scilicet eximium suffecit pectore robur
 Carolus, & duros docuit superare labores.
 Gregorius didicit sortem exaequare Magistrum
 Pectore. Sic ramus dura de matre recisus,
 Fixus humi viret, & longo post tempore matrâ
 Æmulus assurgens Aquilonum despiciit iras.
 Ausus Tu primum, circum maria aspera oberrans
 Tot casus inter, tot, Carole, saeva pericla,
 Incolumem tandem duxisti ad litora puppim.
 Tuque age, care Pater, monstrata per aquora cursum
 Dirige: de portu palmas tibi tendit utrasque
 Carolus, & facilis venientem suscipit ultro,
 Gratatursque lubens, cupidisque amplectitur ulnis.

Castitas.

Meum Gregorium, meum illum ocellum,
Meum praesidium, meum Patronum,
Cui dicam similem? tenella qualis
Huic infantia, talis & juventa;
Qualis flos viridis fuit juventa,
Talis Gregorii virilis atas;
Qualis Gregorii virilis atas,
Talis Gregorii fuit senectas;
Totus candidus, integerque totus,
Et totus magis innocens columba;
Pectus lacteolum, venustulumque,
Mens purissima, luce plena tota.
Meum Gregorium, meum illum ocellum,
Cui dicam similem? Angelo beato?
Mores Angelici, Angelique certe
Puritas nivea, Angelique vultus.
Io! Gregorium, meum Patronum,
Magis suspicio, magisque miror.
Splendent facibus Angeli carentes,
Verum & pondere corporum carentes
Haud possunt maculis coinquinari.
Meum Gregorium, meum illum ocellum,
Carola similem fuisse dicam.
Idem carnis onus fuit molestum
Carolo, & tamen usque & usque fuit
Totus candidus, integerque totus.
Salvete o mihi plena Christi odore
Vasa, o nectare plena sanctitatis.
Nam mos corpora vestra vasa fecit
Sancta purior, integerque totus.
At vos queis similes? nivi ne dicam,
Qua celsos tegit, obruitque colles,
Dum saevit rigidis hyems procellis?

*An lacti niveo, quod a tenellis
 Vix pressum uberibus recens nitefcit?
 Albis floribus hortulo e venusto?
 Qui pulchro calathi nitent honore,
 Et cum Aurora diem sinu rubenti
 Portat candida, rore noctis halant.
 Pulchra lilia, lilia o decora!
 Quæ nunc in superum micatis horto.
 In flores pueri feruntur olim
 Mutati, an potius putem micantes
 Versa lilia in Angelos beatos?
 Ast hi sunt lepidi joci Poeta.
 Olim consilium senile fecit
 Illos e pueris senes sagaces,
 At nunc e senibus pudor puellor
 Fecit, candidos eos puellos,
 Quæis cali usque fores patent beata.*

APOTHEOSIS.

Ecloga, cui nomen Daphnis, inter Corydonem Patavinum, & Mopsum Mediolanensem, Pastores. Daphnidis nomine venit Barbadicus; Thyrsidis autem, Borromæus.

- C. Cur huc, Mopse, pedes, quamam te causa coegit
 Dilectæ fines Patriæ, & tua linguere rura,
 Et petere has silvas, nostrosque invisere colles?
 M. Scilicet & Patriæ fines, & rura reliqui
 Abreptus fama solius Daphnidis; ipsa
 Nam multa ad nostras de Daphnide pertulit aures.
 C. Venisses cum festa novo celebravimus ante
 Astorum Civi! vidisses gaudia nostra.
 Cur autem post festa huc, & post gaudia Mopse?
 M. Discipulum nostri culturus Daphnida Thyrsis.
 C. Felix, qui talem voluisti, Daphni, Magistrum!

M.

- M. *Felix, Discipulum qui talem, Thyrsi, docebas.*
 C. *Ut vites ulmis decori sunt, vitibus ulmi,
 Sic Thyrsi est Daphnis, sic Daphni est Thyrsis honori.*
 M. *Non tam purpureus formoso natus in horto
 Flos terram exornat, quæ nutrit & educat illum,
 Daphnida quam Thyrsis, quamq; ornat Thyrsida Daphnis.*
 C. *Felices ambo! tandem hæc discrimina vitæ
 Linquentes, latique æterna pace potiti,
 Felices nunquam periturum degitis ævum,
 Vera ubi in immensum pleno torrente redundant
 Gaudia, nec fines novit diffusa voluptas.*
 M. *Felices ambo! scisso modo nubis amictu,
 Qui nostras hebetat morituro in corpore mentes,
 Pascitis æternum divino lumina visu,
 Spectantum mentes qui sacro nectaris imbre
 Irrorat, miraque beat dulcedine pectus.*
 C. *Felices! omnes nunc vestra hic facta recensent,
 Et gaudent omnes vestras modo pangere laudes.*
 M. *Ipse equidem aut vitreas prostratus fontis ad undas,
 Aut viridi recubans altæ sub tegmine fagi,
 Te cecini, Te Thyrsi canam, dum vita manebit.*
 C. *Hinc colles, nostræ repetent hinc Daphnida silvæ.
 Illius incipiunt jam nunc ediscere nomen,
 Et Daphnin vestro inscribam nunc cortice, planta,
 Dnm vos crescetis, Daphnis quoque gloria crescet.*
 M. *Nunc igitur, Corydon, Daphnis nunc carmine laudes
 Dicamus, meruit dici jam carmine Daphnis.*
 C. *Daphnidis altus honos tantum se tollit Olympo,
 E terra magnus quantum se tollit Olympus.*
 M. *Dum referam Daphnis, referam quoq; nomina Thyrsis:
 Thyrsida Pastores dicetis, Daphnida silvæ;
 Vos Daphnin silvæ, ac Thyrsin, vos dicite utrumque
 Pastores, meruit fieri sibi talia uterque.*
 C. *Euganei colles, illum qui sæpe canentem
 Audistis, quæ sacram olim Jordanis ad undam
 Isacides cithara Pastor cantabat eburna,*

Vos

- Vos etiam silvæ, quas viveus ipse colebat,
Plaudite nunc illi, illius nunc dicite nomen.*
- M.** *Sapius hi posthac colles, & collibus istis
Adjunctæ silvæ resonabunt nomina Daphnis;
Ast, alia hinc etiam silvæ atque alia addita silvis
Antra, & vicini repetent hæc nomina colles.*
- C.** *Interea rutilus Tu nunc fulgentia stellis
Templa tenens, magnum insuetus miraris Olympum.
Thyrsida habes: Helicen dederas Tu Thyrsida nobis,
Tu vero posthac Cynosura vocabere nostris.*
- M.** *O quæ tum calo vidisti, & qualia, Daphni,
Cum pulchro auricomi ceu tectus solis amictu,
Per calî tractus, liquidique per aeris oras
Enabas, summique petebas limen Olympi!*
- C.** *Quam pulchrum vasti spatiosa volumina Calî
Cernere, distinctos stellis rutilantibus orbes,
Et magni late fulgentem lampada Solis,
Et tacito subter labentia sidera motu,
Et quidquid formosi in se se continet æther!*
- M.** *Tum vero Aligeri juvenes plaudentibus alis
Aera per liquidum Te sectabantur ovariantem,
Et laudes, nomenque tuum, & tua facta canebant.
Tum Daphni late nubes, auræque sonabant,
Et Daphnin lato resonabat murmure Celum.*
- C.** *O quos amplexus! o quæ tum gaudia Thyrsis!*
- M.** *Dulce foret Daphnin, Thyrsinque audire canentes;
Eximiasque Dei referentes carmine laudes.
Carmina namque canet modo Thyrsis, carmina Thyrsis
Ingeminans repetet Daphnis, modo concinet alter,
Alter quæ cecinit, modo junctis vocibus ambo
Æterno laudes dicent, & carmina Regi.*
- C.** *Ut cum quis dulci modulatur carmina avena
Per silvas, eadem repetentem carmina gaudet
Audire in solis habitantem vallibus eecho;
Sic vos, immo magis, persundunt gaudia longe,
Dum vestra alterno geminatis carmina cantu.*
- M.**

- M. Non tam quisque suum latatur cernere vultum,
A speculo, aut vitrea reflexum fontis ab unda,
Quam vos, alterius dum carmina canticit alter,
Alter & alterius conjungit carmina voci.
- C. Felices ambo! (M.) illius vos dicite nomen,
Qui vestras beat aeterna dulcedine mentes.
- C. Ut fons, qui variis huc flexibus erret, & illuc
Prata per, & roseis gemmatos floribus hortos,
Præpropere cursu exultans, & fluminis alveo,
In mare devolvit fessas erroribus undas,
Tam latum, Daphni o! post hac incommoda vite,
Te tandem optati nunc cepit Regia cali.
Nunc tua limitibus mens indignata teneri,
Libera disruptis vinclis erupit, & illum
Noctes, atque dies, quem pectore suspirabas,
Tandem invenit amans, dulcique potiur amore.
- M. Non hospes, Patria qui longe a finibus absens,
Longinquas oras, longinquas viderit urbes,
Tam latus dulcem patriam, & sua rostra revisit,
Navita nec ventos, varios perpeßus & imbres,
Tam letus plenis portus subit ostia velis,
Quam latus stollata Poli Tu templa petebas,
Vera ubi pax, ubi vera quies, ubi vera voluptas.
- C. In terris Te Daphni, omnes venerantur, & omnes
Laudes, Daphni, tuas gaudent, & facta referre.
- M. Jam tibi consurgunt ara, pretiosaque templa,
Affusique aris tua votis numina poscunt.
- C. Nos certe roseis ornati tempora fertis,
Istis rite tuum festum celebrabimus agris.
- M. Nos quoque, Daphni, tuos semper referemus honores,
Et Thyrsis fieri gaudebit talia Daphni.
- C. Ut vites agris decori sunt, vitibus uva,
Floribus ut rigui fontes, ut fontibus umbra,
Tu decus omne tuis, nostri Tu gloria Ruris.
- M. Fructus ut arboribus decori est, ut collibus arbor,
 Sic

Sic nobis Thyrsis, vobis sic Daphnis honori est.

C. *Dum volucres aer (M.) Dum pascent aquora pisces;*

C. *Et dum flumen aquas (M.) Dum campus habebit aristas;*

C. & M. *Immortalis erit nostro tua gloria Ruri*

C. *Daphnida Pastores, (M.) Pastores Thyrsida dicent.*

C. *Ipsa Te valles, (M.) ipsa hac arbusa loquuntur;*

C. *Ipse tuas blando fons garrit murmure laudes.*

M. *Omnia, Daphni, tuum gaudent modo discere nomen.*

C. *Vos silvae Daphnin posthac resonare docebo.*

Felices silvae! Daphnis vos saepe colebat,

Vosque novis semper plantis ditabat, & ille

Vobis gratus erat, vos illi grata voluptas.

M. *Tu vero ante omnes fortunatissime silvas,*

Hortule, delictum Domini, corque, hortule, Daphnis

Precipuo coluit te sedulus ipse labore,

Gaudebatque tuos persaepe invisere fructus.

C. *Hoc nemus, hos fontes, hunc hortum vivus amabas,*

Hoc nemus, hos fontes, hunc hortum respice, Daphni.

M. *Et nemus, & fontes, atque hic pulcherrimus hortus*

Nunc referunt, & dein referent tua nomina, Daphni.

C. *At nunc stelligeri quoniam Te Regia cali*

Daphni tenet, nostrum ne dedigneris amorem:

Accipe vota, quibus jam nunc Te vite vocamus,

Et quae Te posthac, persaepe vocabimus ultro.

M. *Nunc etiam nos Thyrsis amat, quos vivus amabat,*

Atque ita damnamur nostris saepissime votis.

Et vos precipuos, quondam quos vivus amavit,

Nunc quoque Daphnis amat, vos posthac Daphnis amabit,

Et sic vota simul, simul & dignatur amorem

C. *Hac igitur precor o! Daphni o! nostra accipe vota.*

In Te quandoquidem nobis spes una relicta est,

Hortum hunc servato; tuus est hic parvulus hortus.

Conclusio.

*Urbs una ante alias fortunatissima salve,
 Borromæo olim facta superba tuo.
 Tu dudum exemplar, tu fortunata dedisti;
 Vix alium Heroem protulit ulla parem.
 Nunc tandem equiparat divinos amula honores,
 Urbs Antenoreis condita relliquiis.
 Angelum & ista olim viventem in corpore vidit,
 Et Borromæo nunc habet ipsa parem.
 Silicet ut Phœnix, exuta in morte senecta,
 Ipsa suo sensim nascitur e cinere,
 Quæ, si dissimilis discrimen tollitur ævi,
 Illa eadem Phœnix, quæ fuit ante, manet,
 Sic in Gregorio illius, me iudice, vixit
 Spiritus, & dispar nil nisi tempus erat.
 Fortunatæ urbes, similes nunc jungite honores,
 Inque vicem Sancto solveite vota Patri.
 At Tu Gregorii salve o venerabilis umbra;
 Quæ mihi perpetuo Numinis instar eris:
 Salve o corporeo jamdudum carcere liber:
 Sub pedibus longe nubila, & astra videns
 Incedis per regna, tuo Duce junctus, Olympi,
 O Pater, atque Dei pascaris intuitu.
 Sæpe etiam veterem servans in pectore amorem,
 Dilectam hanc urbem ex æthere prospiciens,
 Proh quoties facili aure preces, & servida vota
 Accipis, & procul hinc sæva pericla fugas!
 Et quoties dum sæpe tuum istum despicias hortum,
 Cor Tibi viventi deliciasque tuas,
 Gaudia corde foves, coluit quem Carolus alter,
 Quoque colente virens germina, ut ante, dedit.
 Tu, precor o! nostri fulgentem sæculi honorem,
 Euganei quondam spemque, decusque Soli,*

Cle-

*Clementem, rapiens quem nobis invida Roma
 Orbis ad immensum tranſtulit Imperium,
 Ah! dudum ſerva. tua nunc exempla ſequetur;
 Mox exempla aliis Paſtor & ille dabit.*

Anno 1763. Menſe Auguſto.



B. GRE.

B. GREGORIUS BARBADICUS

ACTIVAM CUM CONTEMPLATIVA

VITA CONJUNXIT.

PRÆFATIO.

EXultantem lætitiā, ac gesticientis cum ratione animi elationem, qua abripiebamur simul atque Gregorium Barbadicum ad Beatorum cultum ac religionem consecratum esse accepimus, quia semel publice fatis effundere minime potueramus, iterum Beati Viri præconiis celebrandis anno superiore testati sumus, testati, inquam, ex animi voto, non pro concupiscentis animi voluntate. Ea nos ratio permovet, ut in præsentia experiremur tertio, num facere nostræ tam probabili cupiditati possemus fatis, quam etsi explere non liceat, tamen minus molesta supererit dicendi fitis, quo magis aliis, atque aliis dicendis fuerit imminuta. Ne igitur verbis inanibus detineam vos, sine mora rem aggrediamur.

Beatum hominem, totamque ejus factorum feriem mihi uno intuitu, quasi aulæis improvise re motis totam scenam, simul spectanti, occurrunt plurima re distincta, specie diversa, numero prope infinita, quæ tamen omnia, ut in scena multiplices rerum imagines genus unum fabulæ, ita unum vitæ institutum in Barbadico præcipuum exhibeant, toto facto ad agendum, & ad aliorum salutem procurandam, ut in illo Sanctimonix genere, quod ad vitam, ut ajunt, Activam pertinet, inter primos excelluisse videatur. Miror tamen, si ita homines comparati natura sunt, docente (6. mor. c. 28.) Gre-

gorio, cui nomen Magno, ac (2. 2. q. 182. ar. 4.) D. Thoma, ut quos fervor, atque impetus animi ad actionem impellit, ii minus sint apti ad contemplationem, quorum autem quietæ otiosæque mentes ad cogitationem suapte sponte feruntur, ii cedant oneri, si laboris occupatione excipiantur, miror, inquam, Barbadicum gravius profecto laborantem, si a laboribus vacasset, in rerum divinarum contemplatione tantum progredi potuisse, ut qui Martha omnibus satagens *circa frequens ministerium*, videbatur, idem clam omnibus, sui que ex gaudio nescius, ut Magdalena federet *secus pedes Domini*, & *audiret verba de ore ejus*. Eminuit in viro sanctissimo laboriosissimæ, & de aliorum bono studiosissimæ vitæ ratio, quæ exterior cum sit, latere non potest vel ex remoto loco intuentes: Inerat homini in Deum sæpe suspenso, atque æternæ dulcedinis gaudia degustanti perspicuæ veritatis jucunda admiratio, vix internoscenda, aut conjectura potius assequenda prope inspectantibus. Sic lucet, & ardet ignis: at lucentem vel longe prospicias, ardentem nisi prope non sentias. Habetis de quo dicturi sumus, non quidem Academicorum more patrio contra quidquid alter dixerit disputantium, sed ita distributas agemus partes, ut invicem assentientes, alii in eo vitæ genere explicando occupentur, quo Gregorius ad aliorum bonum illuxit, alii in eo, quo ipsemet Divino igni intus exarsit.

IN ACTIVA VITA ADMIRABILIS.

I. ORATIUNCULA.

Si unquam dicturum alias uberrimam quantumvis segetem præ manibus habentem *inopem me copia fecit*, nunc certe præclara eaque innumera B. Grego-

III

rii gesta in aliorum utilitatem suscepta, consecrataque persecuturus *magnas* mihi videor *inter opes inops*, cum in tanta rerum admirandarum multitudine, quarum vix minimam partem angusto ad dicendum præfinito tempore liceat attingere, quid prætermitti fas sit, quid potissimum perstringi præliet prorsus ignorem. quamquam eam beati hominis sollicitudinem, illustria illa merita, illa celebrata adhuc, & celebranda in posterum ab omnibus acta, quæ ad Seminarium pertinent, Seminarium, simul atque ab eo conditum, magnum factum, & ad eminentem gloriam ab eodem elatum, ea, quoniam primum quocumque modo nobis complectentibus audistis, omnia præterire sine piaculo in præsentia possumus. Satis itaque sit vel leviter intueri Gregorium altearius (*Hom. 14. sup. Ezech.*) Gregorii de activa Vitæ documenta sectantem, occupatumque totum in eo, ut *panem esurienti tribueret, verbo sapientia nescientem doceret; & quæ singulis quibusque expediunt, dispenseret.* Non possum sine dulcissimo animi sensu memoria repetere, & mentis oculis obicere imaginem hominis opulenti, & apprime divitis, tamen aut paucis exsiccatae uvæ acinis, aut oleribus, ac leguminibus, interdum uno ovo, aliquando viliore pisce, vires ne dicam corporis instaurantis, an necessitatem naturæ fallentis? quodcumque paullo exquisitius ferculum reiicientis, induentis interiores vestes attritas obsoletasque ea una de causa, ut aliorum miseræ inopique vitæ adjumenta ferret; Pastorem Divinum imitatus, qui *cum esset dives, propter nos egenus factus est, ut illius inopia divites essemus.* Non me latet memoria vetera atque adeo recentia quoque revocantem fuisse quam plurimos, qui vere disperferunt; dederuntque pauperibus, quorum pecunias in cælestes thesauros manus pauperum deportarunt, qui tamen egenos seipsis cariores habe-

E

rent,

rent, qui rerum sibi necessariarum dispendio fuble-
 vandas aliorum misérias putarent, ut nonnullos mi-
 hi persuadeo fuisse Barbádico pares, ita neminem
 arbitror superiorem. Dies me deficiat si in eo ge-
 nere charitatis singula persequar benefacta, & singu-
 los benefaciendi, admirabilesque modos, quorum si-
 milia vix ulla (ut equidem judico) certe pauca Hi-
 storia tota litteris consignata servat. Quæ quia vo-
 bis æque atque mihi notissima sunt ab alimentis
 corporis ad illa cælestis sapientiæ pabula mea se se
 convertat Oratio, quibus animos bonus Pastor aluit,
 atque educavit; præsertim cum eam curam potio-
 rem duxerit, ut si qui in Divinæ legis, ac Religio-
 nis ignoratione versarentur, eos prius divinis præ-
 ceptis erudiri juberet, quam stipem acciperent. Sed
 amabo vos, inspicite hominem eminentissima ful-
 gentem dignitate, nec bruma, nec æstu deterritum,
 horis incommodissimis adeuntem puerorum cœtus,
 ubi Catechesis Christianæ regulæ traderentur. Non
 vos detineat jucundissimum spectaculum Viri Prin-
 cipis? qui quasi parvulus inter parvulos, aut potius
 nutrix inter filiolos versatur, purissimæ doctrinæ la-
 cte ut enutriat; rudes pueros de Fidei elementis in-
 terrogat, patienter audit, animos addit, diligentes
 laudat, sæcordes excitat, munusculis allicit, ad cu-
 jusque captum accommodatæ pro ætate, ingenioque
 rerum notitia divinarum imbuat, & omnia veluti
 mansa in os inferit. Me tamen alio major revocat
 admiratio, & ad eum suggestum cogitatio deducit,
 unde studiosissimus Pastor non *in persuasibilibus hu-
 manæ sapientiæ verbis*, sed *in ostensione spiritus ac vir-
 tutis* ad populum sæpissime concionem habebat. In-
 structissimus erat ille omnibus bonis artibus, ac lau-
 dabilibus disciplinis, adeo ut cum sui temporis lit-
 teratissimis contendere de præstantia posset, alienis-
 simus tamen ab usitata nimis jactatione, atque com-
 mu-

muni, exquisitam eruditionem suam, atque doctrinam minime ostentabat. Sed inde exhausto succo quodam, ac sanguine, unde dicendi vis, roburque existeret, effundebat ex imo pectore inflammatas charitate voces divino spiritu, ex assidua cum Deo consuetudine, sensuque plenissimas, sive ad vitiorum odium incitaret, sive ad virtutum amorem audientes accenderet. Caelestem sapientiam ex Homini, quo de loquimur, ore fluentem deprehendit aliquando concionantem audiens Episcopus ille Eporediensis, qui admiratione obstupescens pronuntiavit, atque adeo ad amicum suum quemdam Principem Eminentissimum scripsit, putare se non alia ratione Apostolos, ubi Pentecostes tempore acceperant Spiritum S. ad Judæos ac Gentes verba fecisse. Est mihi testimonium satis id unum, plura non quero, nec alia vobis commemoranda censeo, ut intelligatis quantopere Barbadicus sapientiæ verbis commissum sibi populum imbuerit; & ad eam vos, opinor, non invitos Activæ Vitæ partem citius deduco, qua Vir sanctissimus omnibus omnia factus quæ quibusque erant pro conditione accommodata studiosissime suppeditabat. Verum mihi ad exitum properanti quam latus se se aperit ad dicendum campus, in quo vix, ac ne vix quidem exordientis Oratio satis libere, pro temporis brevitate posset excurrere! quocirca cum res explicare nequeam, singulasque inspiciendas sensim exhibere, rerum copiam coacervatam, quasi per transfennam prætereuntibus, strictim aspiciendam subiiciam. Episcopi munus hominum regendorum discrimine, officiorum varietate, rerum administrandarum multitudine infinitum est, onus unius hominis humeris non sustinendum. Non haberet mehercule fidem Historia tantam rerum, quas Barbadicus confecit, molem complexa, nisi recens esset, & adhuc oculati testes existerent;

qui si faciunt ut tam mira credamus, non rationem ostendunt quamobrem credibilia esse intelligamus, nisi quod Christianæ vires charitatis ab alto acceptas, immensas esse probe cognoscimus. Diffusa in corde suo charitate Gregorius sufficit tot tantisque rebus agendis, semper intentus omnibus, quasi singulis, operamque suam aliis aliam, cuique hominum generi congruentem, qua verbo, qua scripto, qua exemplo navat. Quot quantasque curas intenderit ad Ecclesiastici Ordinis disciplinam promovendam, quantopere eorum, qui sacræ militiæ nomen darent, mores atque doctrinam exploraret, num illi spem satis bonam promitterent, num ista gradibus conscendendis responderet, quæ experimenta quamque accurata faceret de illorum scientia, probitate, prudentia; quibus aliorum æterna salus committenda esset, satis sit vobis ea scientibus meminisse. Nec me remoretur restituta, atque aucta Sacrarum Virginum disciplina, occupationis atque molestiæ plenissima procuratio, in qua ea vigilantia ac sedulitate versatus est, quasi id unum munus obiret: certe alium hominem illa gubernatio totum occupasset, præsertim cum incommoda quædam tempora incidissent. Vos, vos mea spectat Oratio, Patresfamilias, quos ut ad paternæ curæ officia compelleret, ad liberorum optimam institutionem excitarer, ad suscipiendam de familiarium salute sollicitudinem admoneret, ad fovendam domi pacem, concordiam, charitatemque doceret, nullum non lapidem Barbadicus movit. Vos appello ex morbo decumbentes lecto, ac præsertim in discrimine vitæ versantes, de quorum incommoda salute admoneri volebat, ut vos ne vocatus quidem inviseret, & morituris charitatis officia, atque adjumenta salutis afferret, minime retardatus aut morborum contagione, aut odorum foeditate, aut pauperiorum for-
dibus,

dibus, quin omnibus pro singulorum statu suppetias ferret, morti autem proximos sacramentorum subsidio, sanctissimis monitis, constitutis ad vitæ exitum precibus communiret. Vos miseras adolescentulas alloquor, quarum alias a liberiore cum viris agendi licentia revocandas omni ratione curavit, alias ex propinquorum negligentia insidiis obnoxias e Parentum manibus abductas in tuto collocavit; alias ex angusta re domestica in periculo constitutas ære suo alendas instituendasque lectissimis scæminis tradidit. Quid cum scæmiis misere voluptatum cœno involutis ageret, malo in opihione vestra relinquere, quam ego verbis explicare: Et quidem ad clesydram verba faciens cogor Orationis filum abrumperre. Finem facio. Reputate hoc unum vos, ex quo intelligatis quanta sanctitate in Activa Vita Barbadicus præstiterit, cujus istæ erant usitatæ voces: *Episcopi vitam sitam esse debere in agendo: Episcopum decet pro Ecclesia laborantem mori.*

ADMIRABILIS

IN VITA CONTEMPLATIVA

II. ORATIUNCULA.

Occupatissimæ vitæ ratio, quam Gregorius Barbadicus in regenda sua administrandaque provincia constanter ad extremum usque servavit, incurrit plane una primum in oculos, defixosque in sui admiratione ita tenet, ut in secretiora Eminentissimi Episcopi opera mentem intendere non patiatur. Sic ædificiorum frontes ac fastigia spectantur, latent fundamenta. Adestum tamen parumper mecum. Intuere orantem ad multam noctem, aut mane ante Solis ortum duabus horis, interdiu vero

quantum ab officii episcopalis munere temporis superesset. Si minus intus inferre oculos concessum est, externum habitum corporis, vultusque circumspice. Hæret ille immobilis ita, atque usu sensuum destitutus, ut non hominem, sed hominis imaginem facile arbitrare. Ecquid isthuc esse putes? Divina quædam lux ejus animum suavissime pervadens, animi facultates illustrans, atque inflammans in sensus corporis interiores redundat, quos inexplicabili dulcedine perfusos, suspensos detinet in Deum, quem ipsa Divina lux, clarius quam Fides communis soleat, contemplandum exhibet. Interiores autem sensus in animæ, ut ita dicam, centrum receptos externi quoque, nescio cujus concentus illecebra, aut unguentorum odore quodam jucundissimo pellecti sua sponte repente sequuntur, apum more, quæ in aliquem locum volatu contendentes, aut cymbalorum tinnitu, aut noto herbarum succo de medio cursu retrahuntur, & *ipse confidunt medicatis sedibus, ipse intima more suo se se in cunabula condunt*. Si hujusmodi Barbadiçi, quod minime verear dicere, simulacrum os habet, & non loquitur, oculos habet, & non videt, aures habet, & non audit, manus habet, & non palpat, nares habet, & non odorat, neque clamat in gutture suo, fortunate beateque sibi torpens, & iners est; quippe non opus manuum hominum, sed Omnipotentis manus. Quamquam perpetua non est illa hominis immoti quies, neque integrum plane illud silentium, cum aliquando concutiantur latera, cubiti collidantur, & quidam non satis distincti gemitus exaudiantur. Equidem hanc orandi rationem minime expertus in sola rei admiratione confisterem, nec verbum ullum proferrem, nisi religiosissimi, doctissimique Magistri præirent, qui experientia comperta traderunt. Hanc nimirum illi amoris vocant ebrietatem,

tem. Ex illo enim amoris gaudio, quasi ex vini fortitudine (*S. Bonav. process. 7. c. 15.*) *servor Spiritus Sancti sic hilarescit, ut se intra se cohibere non possit.* Cum igitur orantem tremere aliquando videam, & haudquaquam posse se intra se prorsus tacitum continere cum audiam, satis intelligo Barbadicum divino amore per sublimem contemplationis gradum *inebriari.* Quod si non gestus inusitados, non impetus immodicos, non saltus specie inconcinnos in eo deprehendas, quos non raro legimus in Viris sanctimonia præcellentibus visos fuisse, vide sis ne ex hoc reputes Barbadicum in imo hujus beatissimæ ebrietatis gradu consistere. Immo vero ea demum est perfectissima ebrietas, quam non sensus prodit, sed ratio continet, quæ non corporis, sed animi facultates impellit, & commovet, cuius non tyrones in hac divini Amoris militia sed stipendia emeriti porticipes sunt, quam denique ebrietatem non mustum, ut ita dicam, sed vinum parit. Neque id temere dico. Si ad ea Jobi: *en venter meus, quasi mustum absque spiraculo, quod lacunculas novas dirumpit, Doctor, qui a Seraphim nomen duxit, novas, inquit, non veteres, vel quia veteribus cordibus non infunditur talis devotio, sed novas, scilicet in novitate vitæ ambulantibus: vel novas, quia talis fervor spiritus novis & nondum exercitatis mentibus nuper infusus minus valet se cohibere quin erumpat; sic novum vinum in vase ebullit, quod inveteratum quiescit.* Quid tamen disputo coniiciendo, quod evincere possum plane videndo? Video flammis accendi faciem, video caput radiis circumdari, video ex uno Clavo, quo sacratissimum Christi corpus confixum fuerat, emanantem lucem per medium illustratum aerem in Barbadici vultum impingere, jamque ita auctam & circumfusam, ut, quasi Solis imagine in nube percussis radiis Solem alterum referente, Cla-

vus a vultu, vultus a Clavo secerni amplius non possit. Jam Moyſis mihi venit in mentem, jam Franciſci Aſſiſinatis reminiſcor, jam Philippi Neri... ſed multitudine obruor eorum, quorum radiis coruſcantium ſubit recordatio, nec tam refert exempla ſimilia perſequi, quam cujus rei ea ſint argumenta intelligentia complecti. Audio ab iis, qui myſticam doctrinam callent, hæc iis ſolere contingere, qui ad ſummum contemplationis gradum pervenerint, quorum mens divini Amoris incendio undique circumdata, intime perſuſa, undequaue inflammata ſe ipſam penitus exuit, divinum quemdam affectum induit, quo in eum, quem diligit, transformatur, verbo, eorum hæc propria ſunt, quorum adhærentium Deo unus ſpiritus eſt. O beatam hominis conditionem in terra divinam vitam viventis, ſi perpetuam, propriamque poſſet obtinere! At non pigeat e Paradifo voluptatis egredi, id poſtulante Domini gloria, & aliorum ſalute flagitante, in ſuaviſſimum iterum Dei ſinum rediturum. Totus eſt Barbadicus in aliorum commodis procurandis, dies, noctes, totam vitam ad aliorum utilitatem impendit. Dies tamen aliquot ſingulis annis ſibi ſumit, quos, depoſita aliarum curarum ſarcina, integros Dei colloquio, atque conſuetudini tribuat. Ito, Gregori, quo tuus te ſpiritus fert, ut liberius liceat ingenti, quo exæſtuas, amor indulgere, ac deliciis, quibus ſolet divinus Amor ſui amantes replere, diutius frui. Jam ille aliquando ſuus, remotis arbitris, negotiis ſepoſitis quibuſcumque aliis, præſtolatur *cum ſilentio ſalutare Dei*; præſtolatur, & illapſa luce deſuper veniente, quæ mentem illuſtret, cor inflamet, attonitus id unum, quod vere eſt, quia unum ex ſe eſt, ſpectat, cæterorum oblitus, & ſui quoque neſcius; niſi quod guſtat, & videt *quoniam ſuavis eſt Dominus*, eo ſuavior quo peculiari modo propin-

pinquior, atque præsentior. Nunc vero cum inven-
 venerit quem diligit anima ejus, ecquis mihi refe-
 rat aut hominum aut Angelorum (siquidem Ange-
 licæ potius quam humanæ mentis est talia intelli-
 gere) quis mihi quid nunc intus agat Gregorii Spi-
 ritus significabit? Immota mens in Deo est, cujus
 bonitatis, sapientiæ, pulchritudinis divitias, qua
 mensura datur, contemplata admiratione corripitur
 longe majore, quam si quis natus cæcus admirati-
 dum hoc universæ naturæ spectaculum visu repente
 donatus adspiceret. Inspecta pulchritudine tanta au-
 dire mihi videor, & quidem crediderim Beatorum
 simili quodam modo, identidem repetentem *dilectus
 meus mihi & ego illi*: mihi videor illum videre in-
 ter amantis amplexus, atque oscula: illos am-
 plexus, quos sibi Sponsa aliquando promiserat;
dextera illius amplexabitur me; illa oscula, quæ
 tantopere concupiscebatur; *osculetur me osculo oris sui*.
 Intueor mentis oculis *sub urabra illius, quem de-
 sideraverat* sedentem, & fructum gutturi suo dul-
 cem plene gustantem. Nunc alienis cogitationi-
 bus, quibuscumque remotis, sollicitis quorumcum-
 que affectuum motibus sedatis, ille ipse, qui remo-
 vit, atque sedavit amantissimus sanctarum anima-
 rum sponsus *declinavit super eum fluxum pacis*. En
 ille in sinu Dei sui, velut in centro lapis, aut un-
 da in mari, aut in orbe suo ignis, aliquando con-
 quiescit. Ex illa quiete, velut ex fonte, dulcissimi
 latices illi esiliunt, qui aucti non interrupte animi
 primum facultates, tum interiores, tandem exte-
 riores sensus hominis beatissime irrigant, & somnum
 quemdam spiritus afferunt, quo in amabili Dei sui
 sinu sopitus obdormit, ita tamen obdormit, ut eo-
 dem tempore cor ejus vigilet. Crudelis mihi vide-
 rer, si suscitarem, & *evigilare facerem* dilectam ani-
 mam, quoad usque ipsa divino somno frui velit.

Qua-

Quare libenter conticesco, & inenarrabili Divini
soporis gaudio fruentem relinquo. Ex illo enim re-
fectus somno alacrior, aptiorque ad laborandum ad
aliorum utilitatem opportune evigilabit.

I. Operatio Virtutum.

*Hostis avernalis ferro vastabat, & igni
Pinguia rura, boves, prata, vireta, gregem.
Hac ubi Gregorius vidit, quid cede triumphas
Perfide? ait; colla terenda dabis.
Aspiceres illum vicina strage paventem,
Versantemque imo tristitia multa animo.
Pastor abit. mille iste vias, artesque nocendi
Cogitat, extremum quo ferat exitum.
Post cava saxa latet; valido dehinc impete saxum
Vellit, de summo precipitatque jugo.
Heu pietas! capiti jam jam saxum imminet ingens:
Heu fugito, heu nimium Pastor ovilis amans.
Ille nihil; dextram tantum cum lumine tollit:
Mirum! saxum alia parte repente ruit.
Quid faciet totis cum invadet viribus hostem?
Jam potes inferno, dire, latere specu.*

II. Donum Intelligentiæ.

*Heu qua præripuit mihi nubes invida lucem?
(Gregorius queritur; questus amoris erit.)
Lux quid amica fugis? pro quis caliginis horror
Incubat! & medio in lumine lumen abest?
Qui pote? si aerios radianti lumine colles
Arduus, & rutila lampade lustrat humum
Sol, vallesque humiles, tumidique ingentia Ponti
Æquora, Gregorio nox tegit atra oculos?
Stultus ego nimis ah rerum inscius arcanarum!
Gregorio in tenebris candida quanta micat,*
Pura-

Puraque lux, rutilum superans lux fulgida solem,
 Cum medio flammæ evomit axe suas?
 Attamen in nivea caligo plurima luce est:
 Quo magis ista nitet, hoc magis illa riget.
 Talis ab ætherio lux fulgentissima calo
 Labitur, humanis invia luminibus;
 Lux quæ nigranti rerum in caligine monstrat
 Quod nostris non est cernere fas oculis.
 Incertus possis nebulosam dicere lucem,
 An nubem, quæ albo lumine operta nitet.
 Spiritus ipse lubens subit in præcordia Sanctus
 Gregorii, & mentem pertrahit ulterius,
 Ulteriusque Deum infinita in luce tuendo;
 Sed tandem ulterius mens penetrare nequit.
 Illius en oculis candenti luce coruscat
 Flammanti residens imperiosa Throno
 Majestas, totoque nitet pulcherrima vultu.
 Gregorius secum, haud est, ait, iste Deus
 Atque simul varios hominum quæ dirigit actus
 Adstat, centenis prædita luminibus
 Conscia ventura penitus Prudentia sortis.
 Gregorius secum, haud est, ait, iste Deus.
 Hinc adstant vires, dextramque Potentia tollens,
 At Deus est major; conditus ille latet.
 Sic quoque, dum medio fulget Sol aureus orbe,
 Obrutus oppositis nubibus ille subest:
 Nec tamen ignores qua Cali parte coruscans
 Splendeat, elucens nam fluit inde jubar.
 Haud secus in dubiis speculatur sedulus umbris
 Gregorius superi Numinis effigiem;
 Atque illam intento speculatur lumine sensim,
 Et videt obductum non procul esse Deum.
 Quod videt haud visum, cupit hoc, hoc conspicit unum;
 Illius ingenti flagrat amore animus.
 Ardet amans, mira quæ hilavis dulcedine gestit:
 Quin acres illi subdit Amor faculas.

Hinc

*Hinc magis ardet amans, dulcique in amore liquefcit,
 Nulla hinc pax animo, nec datur ulla quies.
 Sed magis atque magis flagranti exaefuat igni,
 Senfim illabi fcntit amore animam.
 Splendidus ipfe micat, puraque in luce refulget,
 Menfque nitet rutilis amula fideribus.
 Ille per aetherias volitat nitidiffimus auras,
 Despiciens terras arduus & maria;
 Inviaque aterni penetrat fecreta Tonantis,
 Et gaudet fuperas tranfiliffe domos.
 Candidulas Amor ipfe alas, pennasque volantes
 Præbet, queis tutum dirigit altus iter.
 Ac veluti liquidas volucrum regina per auras
 Solis in ardenti lumine fixa manet,
 Gregorius fic ante Deum confiftit, & haurit
 Intuitu humanis non referenda modis.
 Sed tamen umbra manet, circum levis ingruit horror,
 Et quem querit amans abditus ille latet.
 Hinc magis ardet amans, magis & quo diftat ab illo,
 Hoc magis ardet amans. fubdit Amor faculas.
 Atque o parce, ait, alme Pater, pro qualia cerno!
 Qualia fufpenfum cor animumque tenent!
 Parce, precor, rutilamque tuam vel fubtrahe lucem,
 Vel da te totum cernere poffe, Deus.
 Interea latatur Amor, ridetque querentem.
 Atque meum eft, gaudens concinit, iftud opus.*

I. Gratia Sanitatum.

*Ceu turba agreflum campos ingreffa patentes
 Incurvam circum longo rotat ordine falcem,
 Herbasque, & teneros nullo difcrimine flores
 Sternit humi, haud aliter non exorabilis ensem
 Fulmineum rotat irato mors horrida vultu,
 Et pariter fenibus, puerisque extrema minatur,*

*Funera. Sed nostrum caloque ereboque potentem
 Gregorium adspiciens, vires oblita priores
 Miraturque, stupetque, simulque trementibus ense
 Proiicit e manibus, meditataque funera linguens,
 Sape tuens retro fugit indignata sub umbras.
 Ah fuge terrificum procul hinc in tartara monstrum,
 Ah fuge: Gregorius, rerum cui maximus auctor
 Concessit solitas natura invertere leges,
 Semianimique procul tristes depellere morbos
 Corpore, & optatam revocare in membra salutem,
 Sic jubet: ante illum subito febrisque, luesque
 Tabida, mille atro liventia vulnera tabo,
 Et morbi fugiunt, nec non genus omne malorum.
 Ut cum mane novo rutilanti luce corruscam
 Sol faciem roseis ostendit ab aquoris undis,
 Nigrantes umbræ, caligantesque tenebræ
 Diffugiunt, lux pura nitet, nidoque loquaces
 Profiliunt volucres, iterantes gutture cantus,
 Ægri ita profiliunt stratis, & carmine lato
 Incolumes patrem, servatoremque salutans.
 Salve, o magne Pater, calo gratissime salve,
 Quem mors ipsa timet, sequitur quem vita salusque,
 Vive diu, charamque tibi ne desere gentem.
 Quid memorem ut mulier, cui mortifer intima cancer
 Viscera corrodens multis pascebat ab annis
 Olli debuerit subito servata salutem?
 Accurrit fidens, chlamydem modo praterantis
 Illius arripuit furtim, morboque latenti
 Applicuit, mordax extemplo evanuit ulcus,
 Signaque nulla manent sanato in pectore morbi.
 Scire piget post tale decus, vestigia claudis
 Consolidata pedum, curataque vulnera, & agros
 Ereptos toties medio de limine mortis.
 Cum tot vivus adhuc miranda peregerit ille,
 Quid mirum, superum si nunc in Sede locatus
 Grandia tantarum peragit miracula rerum?*

Vos

Vos meministis enim, vos & memorare potestis
Ipsa immo memorare potes, potes optima Virgo
Sacra Deo, ut quondam saxo percussa jacebas.
Ecce repente ruens tecto descendit ab alto
Saxum ingens, vulnusque ferens, mortemque nefandam,
Incidit in caput, & cranium perfregit; at ipsa
Volveris exanimis, multus fuit undique sanguis,
Et dispersa jacent infracti frustra cerebri.
Plorantes lapsam referunt in tecta sorores;
Undique fit gemitus, restat spes nulla salutis.
Nil medica potuere manus, herbaque potentes,
Sed summis munita sacris, defletaque morti
Proxima, vix animam jam jam moritura trahebas.
At cum plena fide supplex in vota vocasses
Gregorium miseris solitum donare salutem,
Protinus incolumis, stratoque repente relicto
Mirantum turba circum stipante sororum
Incedis gaudens, te te prosternis ad aram,
Humidaque ad Patrem convertis lumina, sed nec
Lumina, nec poterant expleri corda tuendo.
Gaudia ubique, stuporque simul, simul alta novarum
Undique Gregorii resonant praconia laudum.
Eja agite o properate viri, juvenesque, senesque,
Quos tenet ulla lues, animatque in servida vota
Pura fides; nam posse graves cohibere dolores
Gregorium, sacras quae plurima pendet ad aras
Picta tabella docet: monumenta aeterna salutis.

II. Donum Sapientiae.

Jam videt, & visis fruitur stupefactus, amansque
Gregorius, Lux o deliciis animam
Pervadens totam, totam exundantibus (unde
Nescio quod nectar, nescio quive sapor
Ignotus terris, notus caelestibus oris,
Egeritur, praesens quo cito Numen adest.)

Hoc.

Hocce tuum totum, *Lux o clarissima, munus;*
Per te Gregorius prospicit, & fruitur.
 Ecce silent extra sensus, intusque quiescunt:
Interiori Animæ jam Deus, ecce Deus
Infidet: illa sui gremio requiescit Amantis:
Ætherio totam melle sed iste rigat.
 Gaudia Gregorio nemo ab sua rumpat amanti,
Gustet quod cernit Numen, ametque diu.
 Ah quis Gregorii mihi nunc nova gaudia narret,
Quidque gravi abreptus corpore prospiciat?
 En videt ille Dei pulchra sub imagine formam
Harrens, qua non est altera candidior.
 Atque simul Bonitas illi se pandit amico
Lumine, qua non est altera amabilior.
 Et videt... at quali tactus dulcedine gessit,
Et cor angelicum possidet ecquis amor?
 Qualis mellistuo pectus torrente voluptas
Mulcet, languidulam, qua fovet usque animam?
 Gregorius languet, caelesti languet amore;
Quin cupit exardens tali ab amore mori.
 Hoc quid, quod tacite tam dulcia suscitât intus
Gaudia, quæ totum corque, animumque beant?
 Vos o Caestes Animæ, gens incola Cali,
Queis est ista datum gaudia posse sequi,
 Vos quæ stelligerasque domos, & candida pacis
Regna, inter latantum agmina Calicolum,
 Æternum colitis, vos gaudia dicite amantis
Gregorii, & sanctas dicite delicias.
 Ille creatarum cernit miro ordine rerum
Congeriem, & dulcem percipit harmoniam,
 Concentumque inhians circumvolventis Olympi
Obstupet, atque avida combibit aure sonum;
 Cunctaque perpetuo resonantia carmine laudes
Audit, & Artificem concelebrare suum.
 Hinc sonat haud cunctis nota dulcedine celum;
Jucundum repetit lataque terra sonum.

Hinc

Hinc sonat Æquor aquis, circum & latantibus undis
 Nescio quid suavi murmure dulce fremit.
 Sum pulcher, medio fulgens nitidissimus orbe
 Sol ait, & repetunt sidera, pulchra sumus.
 Nos pulchra volucres, pulchro nos culmine montes,
 Nos pulchri flores, gramina pulchra sumus;
 Pulchrior, at clamant, pulchri Regnator Olympi
 Est Deus: ex illo defluit iste decor.
 En quæ Gregorii lætas circumsonat aures
 Harmonia, ardentem quæ rapit ipsi animam.
 Jam modo Gregorius divinum sentit odorem:
 Pro quis præsentis Numine spirat odor!
 Blandus odor, superans conjuncta opobalsama amomo,
 Thuraque cum grato & cinnama mixta croco.
 Gregorius castos avide sectatur odores,
 Adproperans sanctum Numinis in gremium.
 Scilicet atherias sumens Sapientia flammæ,
 Balsama, & in flammæ cinnama mixta jacet.
 Ambrosius flammis suffitus tollitur. usque hic,
 Gregorius, nostrum cor requiescat, ait.
 Gregori, erit alias æterna hæc gloria Thabor;
 Calvariæ sed adhuc culmen adire juvat.

DIÆCESIS LUSTRATIO

Mœris Activæ, Ægon senior contemplativæ vitæ
 partes persequitur.

M. Fallor? an ille Senex formosi gloria ruris,
 Quem nemora, & silvæ multos videre per annos
 Pascentem pecus, ac toties sensere canentem,
 Nunc atate gravis linquentes pascua sero
 Vespere mulget oves; tum pura coagula miscens
 Lac densare novum, gyroque astringere gaudet,
 Ille Ægon venit huc? Ægon dulcissime salve:
 Quæ causa has iterum cogit te invisere silvas?

E.

Æ. Huc, o Mæri, feror ferventi languidus astu,
 Ut corylos inter, quæ sole abeunte susurrat
 Suavius adspirans artus mihi recreet aura.
 O silvæ, queis me dudum procul abstinet atas,
 Ut vos nunc inviso lubens! salvete recessus,
 Salvete, o sagi, o coryli; ut crevistis, ut altos
 Circum jactatis ramos! tamen ipse recordor
 Cum Daphnis, qui nunc felix tenet ardua Olympi,
 Sevit humo teneras. (M.) O sacrum & amabile nomen!
 Quam dulcis menti species se Daphnidis offert!
 Nunc memini illius quæ olim mihi grandia facta
 Narrabat genitor, cum mente futura revolvens,
 Mæri o, dicebat, Daphnin coluisse memento;
 Ille cito nostris positus vota audiet aris.

Æ. At mihi quæ vidi, nunc inclyta Daphnidis acta
 Hæ menti revocant silvæ, jam nunc subit ipsa
 Oris amabilitas, subeunt dulcissima verba,
 Quamquam prima genas mihi vix lanugo tegebat.
 Sed quoniam hæc jucunda tibi audivisse voluptas,
 Dulce tibi fuerit vel nunc audita referre.

M. Pro quali hæc silvæ quondam squallore rigeant,
 Et circum quantis horrebant pascua dumis!
 (Narrabat genitor) secuit mala gramina Daphnis,
 Et dedit arboribus, dedit & florere salubri
 Gramine; tum horridos turbare cubilibus angues,
 Immanesque lupos, urfosque arcere nocentes
 Non timuit; Daphnis vivos inducere pratis
 Instituit primus, primusque subegit aratro,
 Non ferro, aut ullis prius arva exercita rastris.

Æ. Et quales tolerasse putas, quantosque labores?

M. Qualis ubi carum morbi vis effera natum
 Corripuit, mater tristi mæstissima lecto
 Assidet usque vigil, nescitque recedere, semper
 Prompta Parens, æger si quid cupiatve, petatve,
 Nunc validi succi, aut insuavia pharmaca tentat,
 Si qua ferant nato forte opportuna levamen;

¶

Talis

Talis is inter oves; ut morbo si qua latentis
 Forte gravaretur, valido medicamine diram
 Sedulus agrote pellat de corpore pestem.
 Et quoties magnis dum lustrat ovilia curis,
 Ille trahit longas somni sine munere noctes?
 Quid quod, ut inculti colles horrentiaque arva
 Induerent formam posito squallore nitentem,
 Adstitit usque vigil Daphnis? jamque invia saxa,
 Jamque cavernosis circum nemora horrida lustris
 Impavidus penetrat, silvas & circumit omnes;
 Quacumque incedit steriles divellit avenas,
 Pro filice, & nocuis dominantibus undique lappis,
 Fructiferas oleas; atque hordea grandia ponit.
 Non imbres illum, non servens detinet astus.

Æ. Parcite vos imbres, tu servens parcito & astus.

M. At Deus, ecce Deus: mens Daphnidis ecce repente
 Lumine caelesti divinitus irradiata
 Grandia amabilibus aperit mysteria verbis.
 Huc o Pastores omnes accurrite, adeste,
 Daphnidis attentæ documenta infigite menti.
 Ecce docet quæ cura ovibus sit habenda regendis,
 Quo succo arcenda pestes, quam arte cavendum,
 Ne teneros furtim sætus populentur ovina
 Tecti pelle lupi; sed quæ o dulcedine sensim
 Pastorum quacumque libes cor versat, agitque!
 O fortunatos nimium, quibus aurea verba
 Fas audire fuit, vultumque videre loquentis,
 Luminæque æternum semper spirantia amorem!
 Felices pecudes, quas ipse ad pascua duxit,
 Felices! vocem, atque manus sentire medentis.

Æ. Sic, ubi vere novo sonuere tonitrua calo,
 Nuncia vicini pratis sisientibus imbris,
 Exultat Natura; sinuque latentia terra
 Semina fecundans molli loca germine vestit,
 Ut mihi, Mœri, tuo nunc carmine dulciter intus
 Cor gestit, visisque iterum mens excita rebus

Mi-

- Miraturque, stupetque lubens, majoraque dictis
 Daphnidis acta gravi gliscit super addere cantu.
- M. Sic dii prospiciant dextro te lumine: da qua
 Ipse tuis oculis vidisti in Daphnide. (Æ.) vidi
 Vidi ego divino Daphnim splendescere honore,
 Et radiis, & multo lumine circumfufum.
 Sape ille occultam Natura vim omniparentis,
 Atque creatarum spectans miracula rerum,
 Ecce repente velut rapidis super athera pennis
 Mente volat, Numenque, opera omnia ubique potenti
 Quod creat imperio, pulchroque sub ordine servat,
 Ingens, immensum attonitus miratur, & heret.
 Vos herbae, & plantae, vos colles, flumina, & amnes
 Vos rapida ventorum animae, vos sidera cali,
 Et genus omne avium, & genera omnia quadrupedantum
 Quaeque suam certo speciem servantia satum
 Daphnidi Factoris cuncta afflabatis amorem:
 Et quoties per vos, quasi per vestigia, sensim
 Natura Auctorem se se attollebat ad ipsum,
 Noscebatque Deum! referebant omnipotentis
 Numinis immensas circum olli opera omnia dotes.
- M. At qui terrena miracula materiai
 Contemplans poterat mortali impervia menti
 Nosse arcana Dei? qui atra caligine mersus,
 Qui nec materia, nec terra mole gravatus
 Ignotusque latens sub sensus ire recusat?
- Æ. Haud mens se sistit mortali in imagine, visis
 Vix rebus, fugit hinc, tranans liquidi aeris oras
 Immensum cali vestigat in ardua lumen.
 Ut pila, qua nisu ludentium in aera jacta
 Sape huc pulsa cito ruit impete, & inde repulsa
 Itque, reditque viam, si forte aut longior illa,
 Aut brevior veniens ludentis brachia fallat,
 Decidit in terram, subitoque celerrima saltu
 Illico subsiliens ludenti aptissima surgit;
 Sic mens aeternum cupiens deprehendere Numen,
- F 2
- Quid.

*Quidquid habet tellus, mare, quidquid maximus Æther,
Lustrat, ubique Dei inveniens vestigia dextra :
Mox hæc linquit, & assurgens rapidissima calo
Defigit cupidos mage grata in imagine visus.*

M. At formam cernit : forma Deus abstinet omni.

*Æ. Et si se nitidis spectans Narcissus in undis
Flaveolos crines, atque oris amabile lumen,
Fallacem speciem, quam limpidus exhibet amnis,
Aspicit admirans, oculisque stupentibus hæret,
Cogitat in ficta veram mens lucida formam,
Gaudet, gestit, amat, placet, & sibi plaudit in illa ;
Sic dum corporei mortales undique formas
Aspiciunt oculi, mentis vis insita ad illum,
Omnia qui fecit, per quem stant omnia, fertur
Illico, & obtutus in amato lumine pascit.*

*M. Si rerum adspectus sensuque animaque carentunt
Ad cæli Daphnin poterat rapere ardua ; quid cum
Dilectas spectaret oves, quid fecerit ? (Æ.) audi.
Daphnidis ut vocem audierant, & sibila nota,
Illico oves aderant oblita gramina, & illum
Auribus intentis stabant longo ordine circum.
Ast ego (namque aderam) Pastorem tempore eodem
Numen ad optatum mentemque animumque ferentem
Vidi aliqua ardentis solatia querere flamma.
Vertebant ut Oves ejus se ad sibila nota,
Utque trahuntur acus, & acumina convertentes
Ignotis lapidi compulsæ viribus hærent
Tum, cum magnetem in medio sensere jacentem,
Sic Daphnin sensus, imoque in corde latentes
Affectus dulci rapiebant vinculo amoris
Interiora animæ revocatum ad gaudia, amantum
Queis divinus Amans intus cor suaviter urit.*

*M. Haud equidem video supra ut mortalia raptus
Et gustare Deum, simul & mortalia posset
Cernere, & externis curas intendere rebus.*

Æ. Nuper ego Codrum verbis affabar amicis,

Et

*Et simul attenda alterius verba aure recepi.
Aspice, tibicen chordas ut pollice tentat,
Percurritque notas oculis, simul ehibit auro
Harmoniam, pedibus metitur labile tempus.*

*M. Eja age festivo celebremus carmine Daphnin.
Tu cane divina secreta incendia flamma,
Illius innumeros dicet mea Musa labores:
Jam resonent late silvæ, & vaga flumina Daphnin.
Æ. Desine plura, alias dicemus Daphnidis acta:
Sol cadit, en noctis gelida de montibus umbra
Surgunt, & satura redeunt ad ovilia capra.*

Conclusio.

*O Tu, cui vel in hac tenebrosa valle moranti,
Qua nos huc illuc decepti ambage viarum
Erramus miseri, calo lux tanta sereno
Fulsit, ut ipse gradu posses insistere recto,
Atque Ovibus monstrare viam Pater optime, quando
Lucem nunc habitas, & luce habitaris ab ipsa,
Per, quo nos olim complectebaris, amorem,
Si fit purus amor longe perfectior illic,
Et magis, atque magis modo nos Tu diligis omnes,
Ah precor, alme Pater, vera de luce coruscum
Emittas radium, qui nos erroribus actos,
Ceu rutilo igne nitens obscura in nocte Columna,
Dirigat, & faciles demonstret lumine calles,
Ut tandem tecum stellata in Sede recepti,
Quo nos ipse vocas, communi luce micantes
Felicem aeterno ducamus tempore vitam.
Ite Hora, properate cita: Pater oscula Natis
Miscebit, Patri ah! miscebunt oscula Nati.*

Anno 1764. Mense Augusto.

UTRUM CLEMENTIS XIII

SUMMUS PONTIFICATUS

Patavina Civitati justior sit mœroris, an gaudii causa.

PRÆFATIO.

QUod quindecim ab hinc annis hoc ipso in loco, hoc tempore, simili corona stipati, multis etiam ex vobismet ipsis audientibus, novo Pastore CAROLO REZZONICO ad Patavinæ Ecclesiæ regimen jam jam adventante (*vid. fin. hujus cert.*) ominati sumus, quodque tribus fere ab hinc mensibus eodem ad Romanam Sedem accedente, præfensione aliqua publicæ, non sine quadam animi perturbatione suspicati eramus fore, ut ad cellissimum illum dignitatis locum, quo in terris nullus est sublimior, eveheretur, id manifesto Divino consilio, sapientissimo Purpuratorum Senatus judicio, ingenti omnium bonorum desiderio, exultanti totius Christianæ Reip. gaudio, certo Ecclesiæ Catholicæ bono, fortunato Venetorum auspicio, peculiari autem nostræ Civitatis ornamento, paullo ante evenit; evenit, & nobis gaudeamus, vobis, Audit. ornatiss. gratulamur. Quid ego inter tot plausus, acclamationes, vociferationes, inter tot sonitus, cantus, strepitusque festivos, inter tot divinas laudes, sacras gratiarum actiones, supplicationes, inter tot præstantium Oratorum, Poetarumque præconia, inter tot arte laboratos ignes, & nocturnas faces in viis omnibus magna celebritate accensas, inter tot, tamque diuturna communis hilaritatis indicia, in hac, prope dixerim, evulsione
to-

totius Civitatis in lætitiã effusissimæ, quid summam animi mei voluptatem verbis apud vos testari desiderem, qui, quemadmodum ego de vestra, ita & vos de mea probe, planeque persuasi estis? Mutua potius gratulatione fruamur, quos in omnium Regnorum, omnium Rerumpublicarum, omnium Populorum, omnium Civitatum lætitiã supra cæteros lætari par est. Quamquam, ne dissimulem, hilaris vultus obtegit infixum animo dolorem, lætæ voces comprimunt querelas e pectore erupturas, ac tota externa species, ex intimo quidem producta gaudio, intimum tamen doloris sensum obnubit; ut admirabile videatur, duos contrarios affectus ex uno eodem fonte manare. Atqui quod ipse in memet experior, etiam in familiari sermone Cives vulgo minime clam habent, & Poetæ typis testantur, & in publicis Concionibus Oratores dixerunt. At quemadmodum certum est tantæ rei in humanis omnium maximæ nuntium & lætitiã repente gestientem, & eodem ictu temporis illabentem tacite in animum tristitiã attulisse, ita illud ambiguum est in his duobus adversantibus invicem animi motibus cujus causa justior extiterit. Velitis, jubeatis Audit. ornatiss. id ut disciplemus? Licet: quippe & absentis singularis modestia non prohibet nos excurrere per ejus laudes, & præsentium in Clementem XIII. studiosissima voluntas inflammat.

JUSTIOR EST MÆRORIS CAUSA.

I. ORATIUNCULA.

Vereor ne inepta, atque adeo injuria huic temporis mea videatur Oratio, si in communi tantaque lætitiã mœroris causas conquiram, quæ ex omnium in terris maximo alterius bono, & celsissima excel-

hissimi Viri, dignitate, atque gloria, si minus invidia, *φιλαυρίας* certe, honesto cuique improbandæ, suspicionem iniiciant. Dicam tamen quod sentio. Æquissimum est nos ex recenti felicissimo nuntio ita gaudere, ut, si apud nos Carolus Rezzonicus adhuc esset, & per nos liceret, e Patavina Cathedra non modo votis, sed ipsismet nostris manibus, atque humeris in Romanam esset exultantibus animis, ac lætissimis vocibus inferendus. At vero cum ipsi nos officio demus quod justum est, quis interim ita inhumanus erit, qui erepto nobis parente optimo, quem quantopere, quanto amore, quantoque studio profecuta sit, prosequaturque Patavina Civitas malo in tacito iudicio vestro relinquere, quam in Oratione mea ponere; ecquis non ferat nos gestientes aliquin ex ejus gloria, atque impotentes præ lætitia, si in hoc diffidio orbitas nobis accidit intolerabilis, cum neque meminisse, neque oculos vertere, neque gressum facere, nec tandem in hominum congressus prodire, communisque omnium sermones audire possimus, quin nos illum amisisse vehementer doleamus? Recurrit animo secum tacite cogitanti adspectus ille suavissimus, ea vultus hilaritas, ea intuitus benignitas, quæ una omnes, qui adspexissent, non secus atque aeris serenitas, recreabat, exhilarabat, bebat. Recurrit illa nativa & minime fucata elocutio ex ejus virtutis, ac sapientiæ fonte profluens, qua se tantum supra ceteros efferebat, quantum honore, dignitate, omnisque laudis genere præstabat; cum publice Audientes tum ad calamitates expiatione scelerum deprecandas, tum ad amplexandas virtutes, tum ad divinas concinendas laudes, & agendas pro beneficiis supremo Numini gratias, ille pro singulari sua & in Deum religione, & in nos benevolentia, nostræque utilitatis cupiditate ardentissime, amantissimeque incitaret. Recurrit illa eximia comi-

mitate condita gravitas, illa composita in dignitate tanta, facilisque natura, qua accedentes quosque excipiebat, afflictis solatium, nutantibus consilium, recta euntibus calcar, errantibus receptui signum, quibuscumque tandem levamen, auxiliumque liberrissime præbebat. Hoc ipsum tempus quo loquimur, hic ipse locus, quem sua præsentia honestare solebat, in mentem revocat, quoties nos intra hosce domesticos parietes inviseret, quanta humanitate Musis nostris interesset, quanto favore industriam nostram excitaret, quantopere animos nitentibus adderet, tardioribus stimulos subderet, ad pietatis vero, ac disciplinæ cultum quam impense omnes alliceret, atque inflammaret. Tantum igitur in summa potestate modum, tam incredibilem sapientiam, ac prope divinam, tam inusitatam humanitatis suavitatem sine ardentissimo illius desiderio, maximoque ex ejus absentia dolore possumus meminisse? Excitabis, opinor, me domo ut exeam, quo spectaculis ubique se obiectantibus, & resonantibus undique festivis vocibus a mœrore ad hilaritatem traducar. qua, fodes, iter suscipiam, quam viam ineam, quod forum adeam, quam semitam, quem callem, quem tramitem, quam, pene dixerim, domum subeam, ubi non præteritorum talis excitetur memoria, quæ Præsulis desiderium non acerbum efficiat? Hac, & illac, & quacumque ego euntem, & redeuntem memini sæpe sub specie panis latentem Deum tanquam unum e populo, admirando pietatis documento, nulla aeris incommodi ratione habita sectantem, in omnium sine discrimine & Nobilium ædes, & Tenuiorum domunculas pedem inferentem, consolaturum laborantes morbo, fausta precaturum, divinam opem imploraturum, humanam opem pro indigentia allaturum. Memini per hæc easdem vias cibi potusque, ac tantum non sui oblitum pomeridianis ho-

horis labori importunissimis puerulos conquiſiſſe, & quanta ſedulitate! ad cæleſtis doctrinæ pabulum deduxiſſe, & quam libenti voluntate! prima Fidei rudimenta tradidiſſe, & quanta charitate! quod proſecto facinus ex ſuamet demiffione magnificis triumphis nobilius quemadmodum ſpectantibus gaudii lacrymas eliciebat, ita nunc non poteſt doloris lacrymas non elicere recordantibus. Quæramus ſi quid uſquam oculis obſiciatur, quod, ſopita tantisper, quibus caremus, rerum memoria, ſuperſtite beneficio, dolorem leniat. Ingredior Templum dignitate princeps. Lætor, cum video magnificam molem ad tantam amplitudinem frequentibus, ingentibuſque ejus, de quo loquimur, largitionibus educam: voluptate perfundor, cum inſpicio pretioſa peripetaſmata, intertextas auro veſtes, argenteos tum penſiles, tum ſtantes immanes lychnuchos: cum vero conſeſſum illum Canonikorum longe nobiliſſimum, quo neque hæc, neque cæteræ Civitates noſtræ parem habent, nedum illuſtriorem, ex quo (liceat uti proverbio) tamquam ex equo Trojano innumeri Viri omni Romana dignitate principes, prodire, cum hunc Cœtum ſacris operantem adſpecto, recenſia ornamenta dignitatis, & decora cum jucunditate ſuſpicio: niſi, quod in eam partem incidentibus oculis, ubi ille ſedebat, ille, qui tam ſplendida ornamenta attulit, & donaria contulit tam magnifica, date veniam, ille abeſt, hoc unum memini, cætera oblivifcor. Exeamus hinc, ne mœſtitia noſtra ſacros cantus contaminemus. Vix exeunti ſe ſe offerunt illæ Ædes, ubi habitabat. Quod ſilentium! qui ſqualor! quæ ſolitudo! Hæ ne ſunt Ædes illæ, quo tantus erat paullo ante omnium ordinum, cujuſcumque conditionis concurſus? quæ patebant aſſidue tanquam Delphi conſulentibus, tanquam Aræ miſeris, tanquam Portus periclitantibus? Nimis multa unus hic lo-

locus in mentem revocat, ut gratissima ante, cum aderant, ita nunc cum defunt, molestissima. Nihil uspiam solatii reperienti liceat per te mihi, unde evocaras, redire domum, ubi dolorem meum saltem communis non augeat. Ac per te quidem licet; non licet per remorantes obvios, quorum cum lætis vocibus circumsonant aures meæ, in vultu tamen luctum, & intimum doloris sensum perspicio; & si libet in pauperum tabernas divertere, vel cœnacula adscendere, qui gemitus, bone Deus, obstrepunt auribus! Cohibeat lacrymas ad has querimonias, si quis potest, equidem cohibere non possum. Intelligitis, vel me tacente, quæ causa sit querelarum. Abrumpenda est enim mihi Oratio, & innumera doloris argumenta missa facienda, pro angustiis temporis. Unum dicam: nullum esse in Urbe angulum, nullum extra Urbem locum, qui, quemadmodum beneficentiæ, vigilantia, humanitatis, suavitaris, patientiæ, sapientiæ, charitatis, omniumque virtutum singularem & mirum in modum in Viro Principe elucescentium admonet, ita absentis desiderium acerbissimum non commoveat. Ego vero ne domi quidem latere sine gravi animi sensu, atque dolore possum, cum perpetuo versetur ante oculos Ædificium ita magnificum, ut non modo cives, verum etiam externos, & peregrinos pertrahat in admirationem sui: quod tamen consideranti mihi cum abiisse nullo unquam tempore rediturum, qui extruendum curaverit, vertitur in mœstitiæ monumentum. Recensui quas potui pro brevitate temporis doloris causas: Tu lætitiæ recensebis. Eæ mihi notissimæ sunt, nec tamen in comparisonem revoco, quod neque juvat, neque vacat. Ut ut illæ sint maximæ, certe neque meam, neque Civium ægritudinem possunt extinguere. Quod si in tanta Parentis optimi gloria, in totius Christiani Orbis lætitia,

in

in mœstitia esse peccatum est , ignoscite , Auditores ornatissimi , filiis ex amore peccantibus .

JUSTIOR EST CAUSA GAUDII.

II. ORATIUNCULA.

Si humanum sensum , quem reiicere homo nisi rejecta humanitate non potest , in hac nostrum omnium studiosissimi Pastoris , amantissimique Parentis distractione perspicimus , equidem fateor tam juste ac merito dolorem nostrum esse susceptum , ut nostrum ipsi videremur obliti , eximiae ejus virtuti injurii , maximis beneficiis ingrati , si ejus praesentia , virtute , munificentia sine ullo animi sensu ac dolore carere possemus . Verum si illam , quæ in homine regina sedet , quæque una dominari , & imperare debet , rationem dico , spectemus , ecquis ita luctu conficiatur , ut non latetur magis , & , æqua licet existente mœroris causa , non tantam eodem tempore capiat voluptatem , ut cunctas mœroris causas voluptas tollat , ac prorsus auferat ? Multa quidem inter breves hujusce temporis angustias oratione attingisti , cum tamen multo major rerum seges tibi suppeteret , ubi latius expatiari potuisses ; illa scilicet commemoratione dignissima facta leviter perstringendo , quorum recordatione ea subit animum molestissima cogitatio , hæc aliquando fuisse , nunc abiisse cum illo , & defecisse . Sed nimirum sensu semper duce se se tua effudit Oratio ; & ex objectis ante oculos , auditisque exasperata præteritorum memoria , incerta futurorum , nullum , ut visus es , dedisti rationi locum . Ecquid igitur non advertis quanto majora Pontificis Max. fuere in nos merita , tanto se præstitisse digniorem , ut ad supremum honoris culmen eveheretur , & quanto dignius celsissimum

finum illum apicem conscendit, tanto nos majore
 oportere lætitia perfundi? Præmium stare virtuti
 æquum est; indoli par munus offerri necessum; op-
 tate bonum benefacienti grati animi est; ejus qui
 amaverit gaudere gloria diligentis est: benefici &
 amantis bono, gloriaque cum suo etiam detrimento
 lætari, hoc vere grati est, vere amantis. Ego me-
 hercule quoties mihi videor illum videre triplici dia-
 demate fulgentem, insignibus longe quam antea in-
 signioribus decoratum, in Solio omnium quotquot
 in terris sunt nobilissimo auro, gemmisque mican-
 tem, virtutibus tamen suis Solium ipsum ornantem
 magis, dare jura universo Terrarum Orbi, Reges,
 & viros Principes adoratorios ad pedes excipere, Pur-
 puratorum caterva stipari, omnium obsequiis coli,
 incredibili obruor voluptate, reputans hunc esse eum-
 dem illum, quem paucis ab hinc mensibus videba-
 mus tanta humanitate affari quosque, tam demisse
 ad humiliores descendere, tam magno animo spolia-
 re se rebus, & ornamentis suis, quo miserorum in-
 fortunis suppetias ferret; & cum reputo Deum, fe-
 cisse pro promissis, ut *exaltentur humiles*, summo-
 pere gestio vicem nostram Deum ipsum obiisse, re-
 pendendo pro meritis, quod nullo nos modo, ne
 minima quidem ex parte facere poteramus. Quid
 conqueramur si e Prosdocimi Sede ad Sedem Petri
 divino consilio, atque decreto translatus est? Am-
 plus erat hic dignitatis locus, sed longe amplior
 tantum virum decebat. Messis quidem hæc non exi-
 gua, at multo maximam ejus vires animi postula-
 bant: satis spatiosus per se erat hic ejus virtuti cam-
 pus, sed tanta est ejus virtus, ut terram totam pos-
 sit excurrere: lucebat ille in hoc cælo nostro tan-
 quam sidus, pulchrum quidem illud, attamen pro
 brevi spatio sidus; eum tanquam Solem toto Orbe
 illucescere oportebat. Quorsum doleamus? Iniqui pro-
 fecto

fecto sumus, si virtutem aptam, natamque ad gratia exiguis cancellis coarctemus; invidi, si tantum totius Ecclesiæ bonum nostro postponamus. Certum mihi exploratumque est id nolle te, immo mecum & una cum omnibus vehementer gratularis Pontifici dignitatem, Ecclesiæ felicitatem. Quæ Te, & quanta incrementa, quam uberes fructus, quam ingentes utilitates manent, Christiana Resp. tanto Auspice, tanto Duce, tanto Principe! Ejus pietas Divinum Numen, cujus fungitur vice, tibi reddet, conservabitque placatum: Charitas cælestes thesauros, quibus aperiendis claves unus habet, perpetuo recludet: Sapientia, cujus ab ipso fonte bibit, purissimos lacus derivabit: Integritas ad omnium virtutum genus exemplo præbit: Constantia vitia expurgabit, vitiorum semina extinguet, radices evellat; Vigilantia tuæ studebit securitati; Fortitudo hostes arcebit, molientes aliquid coercebit; Ejus tandem ipsa natura tam præstans, tam suavis, tam humana, tam recte composita, tantis munita præfidiis, & ornata virtutibus, Tibi pacem, tranquillitatem, omnia felicia & fortunata in præsens, & in posterum pollicetur. Non hæc sunt omina adulantis, aut optantis somnia. Certa est hæc spes, atque adeo explorata faciendorum cognitio, exitu nixa jam ante factorum. Vos, vos, Auditores, appello testes, quin immo judices, quibus facilius est uno intuitu præclara Viri Principis facinora recognoscere, quam mihi verbis enarrare. Per hæc tria lustra, quibus Patavinam Provinciam superis bene juvantibus susceptam, incredibili nostro bono administravit, quæ specimina qua verbis, qua factis (& quibus factis!) qua laboribus, qua consiliis, qua divinis suppliciis (& quam ferventibus!) qua humanis subsidiis (& quam abundantibus!) quæ, inquam, per hosce annos virtutum omnium documenta dedit! quam non obscuro

obscurè significavit ea se præditum indole, quæ non uni Urbi, sed universo Orbi regendo apta videretur! Magna gessit, & admiranda nobis, sibi exigua, ac porro minima, cujus animus angustis terminis circumscriptus suas non poterat vires exerere. Jam tandem exeret; & quam late patet Christiana Respublica sentiet bono magno, & ingenti consolatione experietur. Ullus ne ex communi felicitate tanta redundare luctus in nos potest, in nos, quibus ea potior est exultandi ratio, quod apud nos ille se idoneum reddidit, dignumque Imperio summo? In nostra hac palæstra ille se exercuit, nostrum hoc stadium percurrit, hoc nostro in campo quasi præpilatis ensibus dimicavit, eamque adeptus est virtutem, quæ arenam tam amplam, quam Terram totam requireret. Glorietur Patavina Civitas de fortuna sua, & jure glorietur, in cujus sinu Vir tam admirandus brevi succreverit; quæ ei ad dignitatem omnium sine comparatione maximam, viam munierit; quæ eum ad Ecclesiam totam regendam, tuendamque adornarit; ad subeundas Divini Numinis vices instruxerit; tantoque magis glorietur, quod per tot Sæculorum decursum ætati nostræ hoc decus, & ornamentum superi reservarunt, ut Patavinam Cathedram Episcopus cum Romana nunc primum, quod ego sciam, commutaret. Intanta gloriandi ac triumphandi causa ullus ne potest esse dolori locus? & si qua jactura ex hac Pastoris a Grege disjunctione privatim ad nos pertineret, nonne tam magnum commune bonum, tam singulare nostrum decus posset jactura qualibet libenter permutari? At qua tandem jactura, amabo te, qua jactura? Unum perdidimus: ejus adspæctum; hoc est jucunditatis nostræ uberrimum fontem; at Charitatem, ingentem bonorum nostrorum thesaurum, non perdidimus, immo auctiorem indipiscimur. Amavit ille nos mirifice, & incredibili-

biliter, charosque semper ita habuit, ut qui maxime: Amoris autem qui altas radices egerit, ea est indoles, atque natura, ut ex amantium separatione ipso desiderio augeatur. Nihil, mihi crede (Tecum loquor, Patria mihi carissima) nihil amiseris, a Parente quidem diffita, non orbata. Vivit ille, & beatissimus vivit, & amantissimus tui, idque ipse per litteras significavit. Ne Te sollicitam habeat longinquitas, amara alioquin illa, ea tamen quæ Patri facultatem suppeditat parandi tibi majora & ornamenta, & adjumenta. O præclaras spes minime dubias, quin exploratas in posterum tibi propositas! Infidet ille sublimi Solio te longe prospectans; splendore suo Terras omnes illustrat; ac cæteras, ut Sol Stellæ, Te, ut Lunam, quam Sol tum scilicet lumine complet, cum in eam radios proiicit a se longe remotam. In omnes Mundi partes semina ex alto loco diffundet, e quibus Civitates educi fructus uberes locupletent. Sed quemadmodum omnium procreator Sol omnes plagas tepefacit, & percoquit, ita tamen ut aliæ pretiosioribus, quam aliæ, proventibus abundant, ita cum cæteris Pater munificus Clemens fuerit, in Te divitias sui amoris veluti effundet. Ecquis igitur e tuis Civibus tam fortunatum, tam gloriosum, tam magnificum triumphum mœrore prosequendum putet? Video tamen per Urbem eos, quibus curta domi supellex est, (& innumeri sunt,) qui liberalissimi Principis stipe victitant, dejectos animo, nec tanta omnium felicitate, tanto communi bono plane posse gaudere. Sumite animos lectissima Christi Gregis portio, deliciæ Pastoris Sanctissimi supra delicias dulcissimæ, ne quis timor subeat, ne qua suspicio, qui ærumnarum vestrarum ita, ut nollis, semper misertus est, qui sibi parcus fuit, ut in vos esset liberalis, qui divitiarum contemptor, habere tamen divitias eo tantum animo opta-

optavit, ut in sinum vestrum effunderet, qui discedere hinc non potuit, quin vobis tanquam domesticis, ac familiaribus promos condos relinqueret, qui vos quasi filios unicos adamavit, eum nolite putare passurum gloriam suam, quæ omnibus summo gaudio fuit, vobis unis unquam esse dolori.

*I. Sponsus absens Sponsa dolori est.*¹

Patavina Ecclesia loquitur.

*Quis mihi Te caris rapuit complexibus? ah quis
Eripuit dulci Te mihi, Sponse, sinu?
Nunc heu largifluis rorantia fletibus ora
Spargite, & humentes, lumina nostra, genas.
Ergo ego tam durum potui sperare dolorem,
Delicii & tanti flebile discidium,
Ut mihi perpetuo, mihi Te, dulcissime, ademptum,
Heu nimium felix! Terra aliena ferat?
Ah quodnam facinus, quod mi scelus obsuit ingens,
Quonam sum vilis crimine facta tibi,
Quo me Tu posthac nunquam visurus abires?
Nec me, Sponse, tuum recreet alloquium,
Alloquium aethereo persundens pectora rore,
Jucundum dulci mi magis ambrosia?
Ecquid agam infelix? qua me spe soler inani?
Dehinc luctus agram, dehinc fera fata manent,
Et jam desolata, gravi & confecta dolore,
Heu cogor lacrymas combibere ipsa meas.
Ad me longinquis veniet peregrinus ab oris,
Et passis cernens crinibus indecorem,
Quo tuus ille abiit, Sponsa o maerissimum, dicet,
Dilectus? fausto quo cubat ille situ?
At me crudelis mæroris transiget ensis,
Hæc, totidem fuerint specula, verba mihi.*

Reddite septeni Sponsum mihi, reddite colles;
 Esse mihi haud dulcis hoc sine vita potest.
 Quod te, Sponse, refert subito mihi Numen amicum?
 En nota ante oculos errat imago meos.
 Jam mihi jam late resonant tua verba per aures,
 Et tactum subito pectus amore trahunt.
 Jam datur optatos iterum nunc cernere vultus,
 Qui mi cor, agram mi exhilarant animam.
 Ut tua blanda micant caelesti lumina flamma!
 Ut pura comis gratia fronte sedet!
 O qualis, quantusque pates! me haud altera pulchrum
 Sponsa unquam melius subriget alta caput.
 Quid loquor? heu umbras, & inania gaudia fingo!
 Heu misera! heu vanis ludor imaginibus!
 Perpetuum heu longis nimium disjungimur oris!
 Proh dolor! is dempto fine carendus abest,
 Quo sine nec letum quidquam, nec amabile quidquam:
 Quem fore, dum nostrum vivet uterque, meum
 Sperabam, & pariter me habiturum tempus in omne
 Illum, dum nostrum vivet uterque, suam.
 Vivit, nec meus est. nunquam mihi fata dedissent,
 Debuerat nostro qui procul esse sinu.
 Sæpe quid ingratos cogis dolor edere questus?
 Unde mihi tantum hoc excidit ore nefas?
 Vos mi eritis dulces anni, solesque beati,
 Queis una quondam vivere posse datum est.
 At nunc largifluis rorantia fletibus ora
 Spargite, & humentes, lumina nostra, genas,
 Ille meos habuit primum qui Sponsus amores,
 Distillans dulci qui mihi melle savus,
 Et rorans fuerat caelesti rivulus imbre,
 Cui campi quondam flos ego pulcher eram;
 Qui mihi condito præbebat pocula vino,
 Punica fundebat divite poma manu;
 Qui mihi mel supra, qui nectare dulcior ipso,
 Est myrrha sacculus, fasciculusque aloes.

Quo-

*Quocumque adspicio populi latantur oantes,
 Miratur subitum totaque Terra decus:
 Fletu sola meo communia gaudia rumpo,
 Et mihi de Sponso nil nisi luctus adest.
 Reddite septeni Sponsum mihi, reddite colles,
 Esse mihi haud dulcis hoc sine vita potest.
 Desine fata Deum flecli sperare precando
 Demens! Sponsa habet hunc altera nobilior.
 Neu vos septeni Sponsum, neu reddite colles;
 Is modo sit felix, ipsa fruatur lacrymis.*

II. Ornatus gaudio Sponsæ est.

*Parce o flavescentes digitis abscindere crines
 Sponsa, & formosas ungue notare genas.
 Quin nova Tu potius solemni gaudia pompa
 Testare, & meritis munera redde Deis.
 Namque honor absentis Sponsi tua gloria, Sponsa, est;
 In partem tanti luminis ipsa venis.
 Debueras antehac siquidem formosa videri,
 Ut nuptam tali convenit esse viro.
 At tua cum multis communis gloria: Teque
 Tancquam unam e reliquis respiciebat humus.
 Unica nunc cunctas inter formosa videris,
 Et tua præ cunctis nomina Terra colit.
 Clementis Sponsam totus Te suspicit Orbis,
 Totaque Terra opibus dicitur aucta tuis.
 O sic amisso Sponsa ornatissima Sponso!
 Quanto jactura clarior ipsa tua es!*

I. Hortus sine Cultore tristitiam præfert.

*Felix Hortule, dives hortulorum,
 Dives Hortule, pulcher hortulorum,
 Cum te neclareo modo liquore,
 Adspetuque modo beabat uno,
 Cultor ille tuus, tuusque Custos,*

Qui te plus oculis amabat ipsis.
 Tum nascente die, & die cadente
 Phœbus lumine pulchriore fulsit;
 Et lenem strepitum per emicantes
 Argutus Zephyrus ciebat herbas;
 Ridens semihiantē acanthus ore,
 Narcissusque sibi placebat aureus;
 Et molles viola, rosæque pulchræ,
 Vinci flore hyacinthino dolentes,
 Certatim patulum sinum exerebant.
 Tum belle pede mobili susurrans
 Obliquo trepidabat unda rivo,
 Dum circum undique garrulæ volucres
 Lato dulce dabant ab ore carmen,
 Quale deficiens olor suave
 Amœna ad vada concinit Caystri;
 Et cinctæ variis comam corollis
 Pulchros Naiades choros agebant.
 Tum laurus sacra, & hospitalis alnus,
 Alba populus, & decora myrtus,
 Et plures aliæ arbores tenellæ
 Honestum caput invicem explicabant.
 Virebant aliæ modo daturæ
 Flosculos vario colore pictos;
 Florebant aliæ modo daturæ
 Ipso nectare dulciora poma,
 Dum grata interea sedens in umbra,
 Crescite, inquit Herus micante corde,
 Crescite, o ter amabiles quaterque,
 Quis nil carius est, beatiusque,
 Plangit floridulæ, arbores virentes,
 Mox amplum mage deferenda in hortum.
 At quo deliciæ, decusque fugit?
 Non, quæ sola homines beat Deosque,
 Pennis lætitiæ aureis veniens,
 Mala at tristities, malusque pallor.

Nunc

*Nunc circumvolitat modo hac, modo illac,
Inscribitque suum usquequaque nomen.*

Nunc Phœbus caput aureum recondeus

Cogi sollicitas finit tenebras;

Et gravi Zephyrus dolore tactus

Triste compositis quiescit alis.

Jamque pallidulo colore sparsam

Demittunt viola, roseque frontem;

Et rivus pede languido moratur,

Dum circum querula canunt volucres,

Ut Turtur patula canit sub ulmo,

Dum luget sociam sibi peremptum.

Nunc crines male fulgidos solute

Imis Naiades dolent sub undis,

Et mœstæ simul arbores queruntur.

Arescunt aliæ modo daturæ

Flavescentes magis flosculos aristis;

Flavescent aliæ modo daturæ

Vel primo viduos decore ramos.

Nempe cultor Herus recessit. ergo

Dolete, o Zephyri, dolete o flores,

Et vos languiduli dolete fontes;

Dolete o volucres, dolete Nymphæ,

Et vos aridulæ dolete plantæ.

In umbra recubans silente, vestro

Miscebo lacrymas meas dolori.

II. VENERABILIS BARBADICUS

CLEMENTE XIII. PONTIFICE MAX.

Spem lætam portendit.

Nuntius æterni fati, vocisque supernæ

Lucis ab infando pelago, quo nobile Divum

Concilium vocat igniferi Deus arbiter axis,

G 3

Lit-

*Litora Medoaci, magnamque Antenoris Urbem
 Advenio, pacemque ferens, & rore recenti
 Latitiæ Euganeos persundens undique colles.
 Nam cum divina Vatem me spiritus aura
 Alatis raptasset equis per inania celi
 Ætherias lustrare domos, aulamque beatam,
 Insolito ridentem auro, gemmisque micantem,
 En mihi Calicolas inter, distinctaque pulchre
 Agmina, quæque suis habitantia sedibus, una
 Carolus, & Nerijs, casta & Ferrantia proles,
 Et Barbadicus se se fert obvijs Heros.
 Demiror, si sacra tribus jam altaria fumant,
 Cur nondum pariter postremo altaria fument.
 Dumque hæc immotis oculis, tacitusque, stupensque
 Mecum corde puto, volat ecce par aurea dulcis
 Ævia vox, superum fremitu sublata secundo.
 Barbadicus io! capiet tum thuris honores,
 Quos olli arabica candenti texere gyro
 Certabunt nubes, tum cernet Sanctus ab aris
 Pastor adorantes curvato poplite Gentes,
 Cum longo affini deductus sanguine & alte
 Astrum Adriæ fulgens, & Rezzonica incrementum,
 Carolus, augustum Gentis nomenque perenne,
 Carolus in Solio mundi Pater emicet alto,
 Qua Sol divinus terreno in pulvere possit
 Irradiare animas, nigroque reducere Averno,
 Postquam virtutum vario diademate cinctam
 Gregorii Sedem tria lustra implevit eandem.
 Hoc erat in fatis. Solium jam Carolus altum
 Scandit, Gregorii quo fugit scandere virtus.
 At si hic elusit dignus, si Carolus illud
 Dignus & ipse subit, stat dispar gratia factio,
 Non laus; ille facit quia celi lumen amicum
 Spirat, & obsequitur, divinaque vota secundat:
 Iste negat, quia fata vetant, legesque Tonantis.
 Regnat io! regnat Clemens, & Roma triumphat,
 Et*

Et nos, & lati flammantia moenia mundi,
 Perque operum illius vestigia lucida, cuique
 Pulchra spes roseo fulgentes oro renident.
 Jam jam Gregorium sacri venerabimur aris:
 Exultant jam Templi novo letantia Divo,
 Æraque pulsa sonant, & festis ignibus Urbes
 Undique collucent, jam plausibus atheris alti
 Terrestres certant plausus, & dædala chordis
 Carmina dulcifluis simul undique pectora mulcent.
 Felix Urbs Patavi! tua gloria fulgurat ardens
 Instar Apollineæ lustrantis lampados Orbem.
 Sume agedum fastus, aeternum sume decorem.
 At tu, Musarum sacros quæ pascis Alumnos,
 Alma domus Sophiæ, propriis quam condidit olim
 Gregorius manibus, firmata & sede locavit,
 Dilexitque animo semper magis omnibus unam,
 Tu latere magis, quam Clemens diligit & nunc
 Omnia Gregorio similis magis omnibus unam.
 Dicite io! Pueri. geminos dedit ille Patronos,
 Cum Borromæus prædulcia pignora Pastor,
 Et Neri sacris nos excepere sub alis.
 Ponet & iste duos: unum, jam tradidit ante,
 Gonzagam nempe, Angelicis de cœtibus unum,
 Et mox Gregorium nobis dabit ille secundum.
 Dicite io, Pueri ter io! exultate canentes.
 At tu Dive Neri, Gonzaga, & Carole, Tuque
 Barbadiæ Pater, facite ut felicia Clemens
 Tempora agat, vivatque diu, meritisque gravatam
 Serus ad optatos cœlestis navita portus
 Appellat puppim, serus post terga volantes
 Rideat is fluctus, tempestatesque sonoras.
 Tunc illum, o Divi, tunc vos adscribite lætum
 Ordinibus, vestrisque choris. Sed quale repente
 Lumen inextincto mortales robore visus
 Collustrat, cæcoque potens in vortice mersas
 Res mi. aperit? cerno, jam cerno impervia eunclis

*Fatorum arcana. O nimium felicia sæcla!
Clemens nunc Sedem hanc celfo de vertice honoris
Comiter aspiciet, quintus post fata Patronus.*

E C L O G A

Tityrus, & Corydon.

- T. Hic gelidi fontes, hic flore rubentia prata
Quondam, hic juniperus, hic conifera Cyparissi,
Hic serpens raris antrum labrusca racemis
Ornat, mixtique hedera pallente Corymbi:
Hoc quondam recubans Thyrsis formosus in antro,
Sole sub ardenti frigus captabat, & umbras.
Tunc leve concusso resonabat vertice pinus,
Tunc apium, & florem subter bene olentis anethi
Roscida fundebat tellus casiamque, crocumque,
Tunc circum roseo ridebat lumine Cælum.
Heu nemora! heu colles! heu prisco exuta decore
Prata! heu! vix Thyrsis pubescens deseruit Rus,
Arescunt campis herbae, flos languet in hortis,
Pro segete aurata, pro suave rubentibus uvis,
Lappæque, tribulique rigent, sentesque cruenti.*
- C. Tityre dum lati quatiunt cava cymbala circum
Pastores, resonant silvestribus arva cicutis,
Dum flore exornant, fertisque recentibus ulmos
Quique suas, summis lucent magalibus ignes,
Undique sublustris rutilis pluit æthra favillis,
Tu corylos inter luctu confectus inani,
Montibus, & silvis hæc Tu suspiria jactas?*
- T. O Corydon, Thyrsis queruli mihi causa doloris,
Thyrsis, quem croceis vinctum fortasse corollis
Najades, aut minio pictæ rapuere Napææ,
Et nunc aut silvis, muscoso aut fonte morantur.*
- C. Najades haud illum, haud pictæ rapuere Napææ.
Euganeas Thyrsis valles, saltusque relinquens,
Qua*

*Qua caput umbrosa præcinctus arundine Tibris
In mare purpureum auratis devolvitur undis,
Tarpeja arce sedens, Pastorum gloria, vivit.
Illum Amaryllis habet; ter felix o Amarylli!
Nunc pro glande tibi quercus ferat aurea mala,
Flumina lacte fluant, dumis florescat amomum.*

T. *Tyrrhena, memini, rediens huc valle Menalcas
Nuper plus solito latam esse Amaryllida dixit,
Et flavos viola, ac narcissi flore capillos
Comptam inter Nymphas hilares agitare choreas.
Hæc mihi narrabat Thuscus tum forte Menalcas,
Cum gemini rubro delapsi ex æthere cycni
Medoaci in ripis nive candidioribus alis
Lusere, & lati augurium, cantusque dedere.
Tunc equidem tantos præsenſi pectore luctus.
Thyrsis tunc aberat; ipsa Te, Thyrsi, capella
Ipsa hæc mugitu in pratis armenta vocabant.*

C. *Ergo silvicola ferimus solennia Pani
Sacra, arisque novo spumantia cymbia lacte
Ponimus, & canam mactamus quisque bidentem;
Quod parili secum Thyrsin dignatus honore est.
Aspice selectam hanc nostris ab ovilibus agnam,
Vellere ut albescit niveo, utque est corpore pingui.
Illa mihi binos fœtus dulci ubere alebat,
Illa suo sparget fumantes sanguine tadas.*

T. *Quam vellem Ausonia Thyrsis nunc Urbæ rediret!
Non ego tunc albam mactarem rite bidentem:
Taurum hunc mactarem niveum, cui pulla nigrescit
Fronte nota haud domito, cui cornua vertice surgunt,
Qualia mense novo, noctis ridentibus astris,
Nascenti primum resplendent cornua Luna;
Huic ego florigeris ornarem colla corollis,
Funderem & e patera media inter cornua vinum,
Tuque preces Domini, Taure, & pia vota secundans
Obtruncanda sacro præberes guttura ferro
Ultro, sanguineisque genu prolapsus in herbis,*
Lu-

- Lumina demittens reduci pro Thyrside obires.*
C. *Tityre, mitte licet fecunda in pabula Taurum.
 Nescis quæ retulit formosus munera Thyrsis?
 Illum Antenoreis cum rustica montibus olim
 Auricomo captum malo Galatea tenebat,
 Nec pecoris dives nimium, nec lactis abundans,
 Paucas saxosis pascebat vallibus agnas,
 Verbenisque tegens caput, umbrosoque oleastro,
 Vestitum molli baculum gestabat acantho.
 Nunc illi centum niveis cum matribus hædi
 Saltibus in vacuis pascunt, & plena secundum
 Flumina nunc centum replent mulctralia vacca;
 Nunc ebore, atque auro sceptrum gerit, atque capillis
 Imponit triplicem gemmis, auroque coronam.*
T. *Ut neque Pavonum stellis depicta coruscis
 Cauda nigros decet apricantes arbore corvos,
 Sic neque Pastorem e gemmis, auroque corona.*
C. *Inter aves, interque feras velut aureaserta
 Reginsque Aquilæ gestant, regesque Leones,
 Sertata ita Pastores inter gerit aurea Thyrsis.*
T. *Non Aquilas vidi gestare, aut sceptrata Leones,
 Aurea Pastorem nec vidi sceptrata gerentem.*
C. *Pastor & Isacides (referunt, si rite recorder)
 Pavit oves, baculumque invertit in aurea sceptrata.*
T. *Tunc ergo his silvis aberis, dulcissime, semper?
 Nunc pallor violis pereat, candorque ligustris,
 Sanguineis nunc & moris nigror, & rubor uvis.
 Incipe lugubres mærens mea tibia versus.*
C. *Murice nunc Aries in pratis suave rubenti,
 Nunc croceo mutant agni sua vellera luto.
 Incipe festivos hilaris mea fistula versus.*
T. *Flatibus ut primis spirare nigerrimus Auster
 Cum incipit, horrescit pelagus, fluctusque tumescunt,
 Intus sic densa turbantur pectora luctu.
 Incipe lugubres mærens mea tibia versus.*
C. *Ut cum Sol radiis crispantes verberat undas*
Ma-

*Mane novo, splendet tremulo sub lumine Pontus,
Latitia sic pectoribus cor emicat intus,
Incipe festivos hilaris mea fistula versus.*

T. *Nunc tu pallidior letho, deformior orco,
Horridior setoso Apro, Galatea videris.
Incipe lugubres mærens mea tibia versus.*

C. *Nunc tu floridior prato, formosior horto,
Candidior lacte, & nivibus, Amarilli, videris.
Incipe festivos hilaris mea fistula versus.*

T. *Heu platani foliis, foliis viduantur & orni,
Heu lacrymans frondes effendit sola cupressus!
Fronde, Cupresse, tua fuscis suspiria pennis
Ad nos densa ruunt stimulis pungentia amaris.
Incipe lugubres mærens mea tibia versus.*

C. *In silvis pinus, quercus in montibus altis,
Vos lauri in rivis, in litore crescite myrti,
Fronde nova vitreas ornare ad Tibridis undas
Thyrsin, silvarum communia gaudia Thyrsin.
Incipe festivos hilaris mea fistula versus.*

T. *Aspice ut inculto mærens hyacinthus in horto,
Expressit luctum foliis, & clamat, hei! hei!
Incipe lugubres mærens mea tibia versus.*

C. *Aspice per colles ut hiantia lilia rident.
An rosa io! foliis, & io! scripsere amaranthi?
Incipe festivos hilaris mea fistula versus.*

T. *Populea nuper resonans Philomela sub umbra,
Auritas dulci mulcebas carmine rupes,
Et chorus alituum e pratis plaudebat & hortis,
Nunc ulula arboribus tristis, nunc noctua stridet.
Incipe lugubres mærens mea tibia versus.*

C. *Nunc viridis tecto confidens Psittacus alto,
Humanam simulat vocem, linguaque rubenti
Te, Thyrsi, edoctus iterumque iterumque salutat.
Pieria & recinunt arguta voce volucres.
Incipe festivos hilaris mea fistula versus.*

T. *Ipse boves haustum ducens simasque capellas,*

Ver-

*Vorticibus mediis tristi se attollere vultu
Medoacum, viridesque comis avellere cannas
Prospexi, atque oculis lacrymas profundere glaucis;
Incipe lugubres mœrens mea tibia versus.*

- C.** *Ipse oculis vidi, picto cum sorte phaselo
Fluctivagos pisces caperem, exultare sub undis
Agmina, & auratis ostendere lucida squamis
Terga, amnemque suum florenti verrere cauda.
Incipe festivos hilaris mea fistula versus.*

- T.** *Hortis æternum Tu vivas Thyrsi, Latinis.
At nos seu vitem incidemus falce novellam,
Seu frondes, pastum pecori, carpemus ab ulmo,
Textilibus seu cogemus lac molle canistris,
Flebimus, Euganeis Te flebimus usque sub antris.
Incipe lugubres mœrens mea tibia versus.*

- C.** *Tityre lugubres tandem deponere querelas:
Discito spem nostram: Thyrsis jam mittet Amyntam.
Ipsi jam montes, ipsa jam carmina rupes,
Ipsa sonant orbusta: tuis sis dexter Amynta.*

- T.** *Ille ne, qui semper cum Thyrside fidus Amyntas
Consilii consors semper, mentisque latentis
Pascebat teneras per florea prata capellas?*

- C.** *Ille, ille: Euganeis Thyrsis jam consulit oris.
Exorere o, roseusque novam duc Phosphore lucem,
Qua nostris Pastor silvis succedat Amyntas.*

- T.** *Adveniant hæc fausta; tamen, Thyrsi, ipse venito.*

- C.** *Hoc jam fata vetant. (T.) Thyrsi ergo (C. & T.)
Suffice Amyntam.*

Decisio.

Quoniam ea mihi demandata provincia est, ut
cui parti accedam suffragio meo in commune pro-
feram, definiam paucis. Mœroris causam, mea qui-
dem sententia, justiore efficit æquitas, gaudii ju-
stio rem honestas. Magno enim bono privari mise-
rum

rum est: domesticam (~~ita~~ loqui fas sit) dignitatem augeri, gloriosum. Quamquam quorsum isthæc investigatio, utra justior causa sit, cum iustissima utraque sit, neutra minus ei, cuius causa mœremus, lætamurque gloriosa? Igitur qua cuique libet, quantaque libet animi affectione moveatur quisque per me licet, dum interim mihi quoque per vos liceat ex intimo nostro sensu vocem expromere.....

Ite pia lacrymæ, justique recedite luctus;

*Gaudia iusta magis. seror ah seror altus in auras,
Lætitiæ, & rapidi pennis subvectus amoris,
Romanisque levis super arcibus arduus adflo.*

*Jan sacri adspicio Capitoli immobile saxum,
Temporis omnivori quod nec corrodere dentes,
Tetrave Tartareis monstra erumpentia portis
Frangere, fatalive queant de sede movere.
Hoc innixa Fides Solio solemniter alto
(O sacrum, aeternumque mihi venerabile nomen!)
Clementem locat. O manibus date lilia plenis,
Pegæsides, mulcete, rogo, liquidum æra cantu,
Aonioque sacram conspergite nectare frontem.*

*Te ne ergo adspicio? hæc facies tua ne illa verenda
Majestate nitens? hæne, hæ, queis poplite flexo,
Pronaque adorantes dent Reges oscula, planta?
Hæne manus, queis cura stat, & custodia clavi,
Unde procellosum Petri imperterrita Pontum
Puppis, raucifonosque secet tutissima fluctus?
Quæ nova majestas? quantum in Te Numinis instar?
Tantorum impatiens radiorum avertere cogor
Vultus, & nimia metuentia lumina lucis.
Fallor? an & tanta sub majestate resulget,
Atque gravi facilis subridet gratia vultu,
Cernere & antiquum dat tanto in Principe Patrem?
Perge, Pater, quamquam graviorem pectore curam
Nunc premis, & vasti Pater adstas maximus Orbis;
Ne tamen ex animo natorum cura priorum*

Exc-

210 DE CLEMENTE XIII.

*Excidat, aut veteris subeant oblivia Sponsæ.
Et quæ cara Tibi placido mitissimus ore
Carolus excepisti, ne despice pignora Clemens.*

Anno 1758. prid. Id. Augusti.

Facta est mentio in Præfatione præfagientis animi nostri, atque ominantis Carolo Rezzonico Summum Ecclesiæ Catholicæ Imperium. Primum id fecimus anno 1743. pridie Idus Augusti. Cum enim publice proposita Academica quæstione, *Utrum ad morum institutionem Philosophi magis conferant, an Poetæ*, fausti nuntii de paterna Rezzonici, jam tum Episcopi Patavini creati, in Seminarium benevolentia venissent, præpropere Eclogam concinnavimus, & tanquam Academicæ disputationis mantissam habuimus, cujus clausula illud, quod supra indicavimus, omen continet. Iterum fecimus anno 1758. Solenni D. Philippi Nerii die, VII. Cal. Jun. Nam cum Eminentissimus Princeps Carolus Rezzonico paucis ante diebus Romam perrexisset ad habenda comitia Summo Pontifici in locum Benedicti XIV. sufficiendo, celebratis laudibus D. Philippi Nerii antequam Auditores dimitteremus, ab ingressu ejus in cælum a nobis descripto, mens nostra ad Carolum ingredientem Urbem Romam avolavit, & præfensionem quamdam futuri Summi Pontificis significavit. Sic itaque celebrandis D. Philippi laudibus finem fecimus.

*Humanis simul ac spoliis exutus, & imum
Linquens sub pedibus Telluris Nerus Orbem,
Flammiferas nitidi Sedes penetravit Olympi;
Quis (dixere) novus modo nostris advenit hospes
Sedibus? anne alius caelestibus appulit oris
Dignior, eximisque magis virtutibus auctus?
Attulit hinc abiens plausum hunc novus incola Cælo
Nerus; in terris sed enim gravis obruit, eheu!
Cura suos, & corda premens dolor intus adurit.
Quæ mihi, quæ ante oculos mentis venit obvia imago?
Tri-*

*Tristes nos etiam heu liquit Pater alta revisens
 Mœnia Romulidum. Ille subit, studiisque faventum
 Excipitur: mirata Virum clamore secundo
 Urbs fremit, atque omnis plausu circumsonat ather.
 Quid superest? melius urget agens, sovet intima nos spes.
 Vellemus reducem; vellemus honoribus auctum;
 Mens foliis levior nunc huc, nunc fluctuat illuc.
 Neri, qui placido nos despicias athere ab alto
 Lumine, solve animos curis, atque omine fausto
 Perfice, ut in terris quamcumque habitaverit Urbem
 Carolus, o felix vivat, vivatque diu, & nos
 Prospiciat, ceu oculis natos Pater aspicit aquis.*

Modo Eclogam habeto.

Damon Romanus, Tityrus Patavinus, Pastores.

- D.** *Tityre tam doctos Tellus alit ista Colonos?
 Nec solos vestra hæc resonat vel Phyllidis ignes
 Silva, vel ingrata tristes Amaryllidis iras?
 Quin se se nemorum Vates felicibus ausis
 Altius attollunt, cumque ipsis prælia miscent
 Philosophis dubiam facientia carmine palmam?*
- T.** *Talia nimirum nostra melioribus annis,
 Et fato debent præsentì commoda silva.
 Agrestis incultum modulari carmen avena,
 Et latum celebrare nemus, tenuisque myricas
 Gloria nostrorum fuerat præclara Parentum;
 Ad sacra nunc avidas Sophia penetralia mentes
 Intendunt, animosque ausi graviora Nepotes.*
- D.** *Felix o nimium Tellus, cui dextera tales
 Numina Pastores tulerunt! gaudete beata
 Medoaci ripæ, solas ego Tibridis undas
 Sola coli doctis rebar Pastoribus arva.*
- T.** *At quoniam expertos possunt quid utrique vicissim
 Pastores audis, & adhuc sub iudice lis est,
 Vates, anne Sophos palmæ dignaris honore?*

D.

- D.** *Non nostrum hos inter tantas componere lites.
Thyrsis silvarum, Pastorum gloria Thyrsis,
Cujus sæpe melos Tiberis bibit auribus, ille
Thyrsis, quem Cirrha sacris aluere sub antris
Pierides, juvenemque suis cinxere coronis,
Et cui crescenti fugienda, sequendaque pandit,
Præceptisque animum Pallas formavit amicis,
Hic unus tantas posset componere lites.
Cedite Philosophi, Pastori, cedite Vates.*
- T.** *At quæ te patrios linquentem causa penates,
Eque tuo penitus divulsum Thyrside rura
Vexit ad hæc tanto terrarum diffusa tractu?*
- D.** *Lata canam; gratare tibi, gratare colonis,
Quæis vitam superi dederunt hoc degere Calo.
Non procul hinc Thyrsis, Dux hic, hic Tityre, Pastor
Medoaci nuper felicibus obtigit oris;
Hunc sequor, hæc patrios linquendi causa penates.*
- T.** *Hic ergo luctum sublatis tollet Iola,
Quem terræ (nonus Trivia nunc vertitur orbis)
Condidimus, fertisque sacram conteximus urnam?
Tempus io! jam tempus adest, quo nube serenos
Curarum pulsa videam procedere Soles.
At primis quoniam Thyrsis tibi cognitus annis,
Quis, memora, & quantis se se virtutibus effert.*
- D.** *Ocyus Ægæo steriles in litore arenas,
Ocyus umbrosas per vasta Ceraunia frondes,
Ocyus Hesperie numerem telluris aristas,
Quam laudes æquo complecti Tityre cantu
Illius, & magnæ possim decora incluta mentis.
Ardua qua sacram fixit Sapientia sedem,
Ad celsum non lenta serens vestigia clivum,
Quas illi non unda rapax, nec flamma, nec hostis
Nudato possit sævus divellere ferro,
Eximias congeffit opes. Vos numina testor
Arcadiæ, teneris vos est veneratus ab annis,
Quot nullis illic unquam peritura diebus*

Iusti-

Iustitia, Fideique tenax monumenta reliquit!

T. *Excipite hac animis, & spes hinc discite vestras,
Pastores focii; magnarum nuncia rerum*

Fama ruat, circum plausu nemus omne resulet.

D. *Sexcenti quamvis tollant in montibus olli
Mugitum tauri, balatum in vallibus agni,
Non tumido hunc tollit vesana superbia fastu:
Hunc pietatis amor, damnosa hunc neustria fraudis
Simplicitas, & magna gravis constantia mentis,
Hauitque praeclaro decorat cum sanguine virtus.*

T. *Qua colitis montes, & stagna liquentia Nymphae,
Pastori varios venienti fundite flores.*

D. *Hoc duce quæ vestris nascentur sæcula Terris!
Illius auspiciis quos o vos surgere cernam!*

*Scilicet hanc silvis silvam magis omnibus unam
(Haud incerta loquor) miro complexus amore
Innocuas curabit oves, oviumque magistros.*

*Hanc sæpe invisens sedem, dulcesque recessus,
Præclara ambigui dirimet certamina cantus,
Et magnos ponet, pretium virtutis, honores.*

T. *Aurea jam redeunt divini tempora (*) Mopsi,
Quem nostro ereptum Ruri celeberrima Olympo
Inseruit pridem pietas, vestigia Mopsi
Heres virtutum, præclari muneris hæres,
Thyrsi legens nos, nostra pari servabis amore.*

D. *Hic amor illius Mopsi, cum viveret, oris
Intulit externis nomen, post fata perenni
Optandum voto nomen producit in ævum.
Proximus huic, longo non proximus intervallo
Mæris erat; nota hæc longinquis Tityre nobis.
Mærios, & Mopsi revocatum in Thyrside amorem
Sentiet & præsens, & potera concinet atas.*

T. *At quænam cupidis optatum Thyrsiæ nobis
Adferat, & nostrum lux unquam explebit amorem?*

H

D.

(*) Mopsi nomine venit Gregorius Barbadicus, alias a nobis dictus Daphnis: Mærios autem, Cornelius.

- D. *Mox aderit. (T.) Læta fruges, & ferta parentur
Spicea, & Assyrii venienti thuris odores.*
- D. *Non ille aut fruges, aut thuris munera curat.
Innocuos curat mores, & candida curat
Pectora, & ingenuas Musarum exculta per artes;
Ne malus inficiat lethali prata veneno
Anguis, & invidia ne quisquam falce novellas
Incidat vites, aut parvos fascinet agnos,
Maxima curarum cura est hæc Thyrsidis una.*
- T. *Ergo siens quid adhuc viridi mea fistula lauro
Pendens? magnorum quamvis insueta virorum
Laudibus, haud tantas fileas mea fistula laudes.*
- D. *Tiyyre Pastorem ne ladas forte caveto,
Ampla satis merces virtus; si carmina curat,
Carmina amat, spernit laudantia carmina, & odit.*
- T. *Donec erit virtus, virtuti haud carmina deerunt:
Incipe tu Damon, festivos incipe cantus.*
- D. *Ut lata Arcadiæ subter placidissimus arva
Perfluit Alpheus, labentesque occulit undas,
Sic quascumque dedit natura, arsque amula dotes
Excelsa prudens occultat pectore Thyrsis.*
- T. *Ut mage curvatur quo pluribus arbor abundat
Fructibus, & prono contingit pondere terram,
Sic humili magis ille animo, quo pluribus illum
Præ reliquis superi magnis virtutibus ornant.*
- D. *Quantum Roma alias inter caput extulit urbes,
Pastores tantum Thyrsis supereminet omnes.*
- T. *Doctior Urbs Patavi quantum est magis omnibus una,
Pastores tantum doctrina hic anteit omnes.*
- D. *Qualis per noctem frondosa Turtur ab ulmo
Nequidquam queritur raptos mæstissima sætus,
Sic nostra erepto lugebit Thyrside Tellus.*
- T. *Qualis populeas inter latissima frondes
Vere novo geminat dulces Acredula cantus,
Sic nostra oblato latatur Thyrside Tellus.*
- D. *Dum noster tumidum Tiberis decurrat ad aquor,
Dum*

- Dum rabidi abruptis errent in montibus apri,
Optimus in nostris Pastor celebrabitur oris.*
- T.** *Dum vaga circumagat convexus sidera Olympus,
Dum cita pinniferos concludant flumina pisces,
Optimus Euganeis Pastor celebrabitur oris.*
- D.** *Ante feret gelidum rapidis mare pabula flammis,
Humentemque ignis progignet fervidus undam,
Quam nostras hujus capiant oblivia silvas.*
- T.** *Ante minax unco findetur vomere Pontus,
Arduaue imbelles tranabunt nubila cervi,
Hujus quam Euganeas capiant oblivia silvas.*
- D.** *Romani saltus, patriique valete Penates.
Euganeos Thyrsis donec bonus incolet agros,
Euganeis Damon nunquam discedet ab agris.*
- T.** *Muscosi quoties viridanti in margine fontis
Alternis meditata magis cecinisse juvabit
Carmina, quæ læta servant in cortice fagi!*
- D.** *Crescetis fagi, vobiscum carmina crescent,
Carmina, quæ feri cupiant legisse Nepotes.*
- T.** *Quando erit illa dies, nobis quæ denique Thyrsis
Optatus veniat? nostra o quid gaudia differt?*
- D.** *Mox aderit, visetque suos cupidissimus agnos.
Interea, socium quem Pastor fecit, Amyntas,
Agricolis etiam Romanis notus Amyntas,
Is desiderium Domini lenibit. (T.) amorem
Quis nostrum non sensit adhuc, non sentit Amyntæ?
Sed tamen huc properes votis optate tuorum,
O Pastor, Te ipsa valles, pinusque loquaces,*
- D.** *Te fontes, Te prata vocant. (T.) Pia numina nobis
Servent, dentque tibi quales cornicibus annos.*
- D.** *(*) Vobis ante suos quid si satum auferat annos?*
- T.** *Omen abesto procul. (D.) prope felix omen adesto,
Fors iterum Romanus erit. (T.) Si grandia nobis
Hunc merita eripiant, patimur. (D.T.) Di vota secundent.*

H 2

DE

(*) Obscure Damon præfigit, ut statim Tisyros non intelligat, quod e vestigio Damon explicat-

B. VIRGINE MARIA

SINE LABE CONCEPTA.

O R A T I O.

INcontaminatam B. V. Mariæ conceptionem ,
 quam recurrente ejus die celebrari quotannis Au-
 ctore, perpetuoque Auspice Ven. Gregorio Barbadico
 consuevimus, tam varia elapsis temporibus, tamque
 firma rationum momenta probarunt, & sapientissi-
 morum hominum confirmavit auctoritas, ut jure ac
 merito verendum censeam, ne pietati vestræ diffi-
 dere videar, si, quod vetamur veteri proverbio,
 acta agam. Licuerit fortasse id aliquando in disce-
 ptationem vocare; tum ut pium nonnullorum erga
 Mariam fervensque obsequium, patefieret, quam ob
 causam ipsa apud Birgittam testatum aperte reli-
 quit, se prægrande mysterium hoc occultum diutius
 voluisse; tum ut magis magisque, quod fieri in dis-
 putatione solet, limaretur veritas, quæ præfinito
 tempore eluceret. Nunc vero postquam piorum
 hominum studium, quod jamdiu latuit, in apri-
 cum protulit, disputare non minimum impruden-
 tis, dubitare vero prorsus impudentis esset. Qua-
 propter dubitatione qualibet penitus sublata, omni-
 que differendi via penitus interclusa, nil:il reliquum
 præterea est, quam ut talis tantique decoris ampli-
 tudinem, quale post homines natos nulli unquam
 mortalium contigit, admiremur. Quid autem in
 tanta gratiarum copia, & prodigiorum asiluentia
 præcipue admirabimur? Mihi quidem cæteris qui-
 bus decoratur titulis, quorum singuli longam depo-
 sce.

ſcèrent Orationem; omiſſis, eo præcipue nomine mirari lubet, quod peculiare illud fuerit, & uni Mariæ conceſſum munus, ut in ipſo conceptionis articulo communis maculæ expers eſſet; admirari, inquam, lubet, quod probari minime reſert. quotus enim quiſque eſt, qui, ut ſibi in animum inducat credere, mortalium neminem unum aut extitiſſe adhuc, aut in poſterum futurum, qui commune contagium ipſo momento conceptionis ignoret, præter Mariam, argumenta requirat? quantum vero id ipſum ſit illi uni huiusmodi beneficium peculiare fuiſſe, ea qua par eſt admiratione inveſtigabimus, ſperantes quidquid ad B. Virginem pertinet non magis nobis pro tenuitate noſtra dicentibus, quam vobis pro veſtra pietate audientibus jucundum fore.

Una igitur ex omni ſæculorum memoria Mariæ exitit, quam originis labeſ a primo humani generis Parente in poſteros univerſos & ſingulos derivata ne tantillum quidem inſecerit; quam ab infinito tempore (ſi tamen ullum fuiſſe tempus dici poteſt, nullum cum tempus eſſet) Deus non ſolum ex mortalium turba; & colluvione ſuſtulit, ſed ex omnibus, quotquot religionis, pietatis, caſtimoniæ, cætarumque virtutum gloria floruerunt, florent; & in poſterum florebut, elegit; *elegit*; verbo, *ex omni carne*. Non tanti fecit integerrimos Abeliſ mores, non ſanctiſſimum Melchisedechi ſacerdotium, non eximiam Abrahami obtemperationem, non admirabilem Joſephi æquabilitatem, illibatamque conſtantiam, non diuturnos ac nunquam intermiſſos Moſis labores; non incredibilem Jobi in rebus arduis perfeſſionem, non ſingularem Davidis pietatem, non bellicam Machabæorum virtutem, non incitatum Prophetarum ſtudium, non præclara Apoſtolorum trophæa, non inviolatam Virginum caſtimoniam, non Virorum Principum ſceptra imperiaque reſ-

puentium magnanimitatem, non eorum fortitudinem, qui a Parentum amplexu, ab amicorum societate penitus avulsi vel in latebras se se coniecerunt, ut ab humanarum rerum strepitu remoti, divinoque cultui mancipati facilius animum ad cælestia erigerent, vel pio longe lateque disseminandæ Fidei ardore succensi in Ethnicorum pertinaciam, Hæreticorum perfidiam, Christianorum flagitia arma intulerunt, eaque de caussa sanguinem, animamque profuderunt. Non hæc & alia innumera jam ante ab omni æternitate prospecta Deus tanti fecit, ut eorum quempiam a communi contagione eximeret; unam exemit Mariam, in quam non modo illæ omnes, quæ singulæ singulis contigerant gratiæ, Bonaventura teste, ita excurrerent, ut omnia se se in mare devolvunt flumina, sed etiam quæ, utpote specialis & propria, supra universos simul conjunctos eam unam extolleret. Magnam quidem lacrymarum vim mortalium cæteri in hanc lucem prodeuntes emittant, & in ipso, ut ita dicam, vitæ vestibulo acceptam a majoribus scelerum hæreditatem luctu prosequantur: transmissum ad se se per traducem scelus deploret David, indeque flagitiorum fomitem agnoscat: miseræ se addictum Jobus conditioni lamentetur, eamque laxatis doloris habenis devoveat & excretur noctem, ex qua sibi fatale ærumnarum initium extitit. *Pereat nox illa, in qua dictum est; conceptus est homo; noctem illam tenebrosus turbo possideat; sit nox illa solitaria, nec laude digna.* Tuam ego mihi, ac mortalibus reliquis communem doleo calamitatem, Vir patientissime, & ultro iis, quas intimus dolor elicit lamentationibus, ac diris facile ignosco. Fatalis omnibus illa nox est, quæ ejusmodi nos caligine obruit, ut a recta virtutis via identidem aberremus, & effrænatas libidines, præviosque animi motus, quibuscum intestinum perpetuum-

petuumque nobis bellum esset, tanquam hostes intra domesticos parietes, intra nos ipsos conclusit. Nullo igitur ea nox collustretur stellarum lumine, nullum videat surgentis adventum Auroræ, nullo unquam excitetur hominum sermone, effluat ex animis, non numeretur in mensibus, ex dierum albo expungatur. Ii vere sint, & habeantur dies, quibus olim post circumcisionem, multoque magis nunc post Baptismum teterrima illa ab animis deterfa lues est, quamquam ex infectis radicibus infecta quandoque germina pullulant, sed tamen ii vere nobis & sint, & habeantur dies. Ad Deiparam vero Virginem quod attinet, illa ipsa nox, cæteris non laude digna, eximiiis celebretur præconiis, ex qua neque ullæ ingentis cupiditates ejus ortus nobilitati caliginem offundere potuerunt. Gestias igitur ac tibi plaudas Virgo; hujus gloriæ, quæ tibi divinitus oblata est, socium habes neminem. Tu una illud, *mea nox obscurum non habet*, usurpare merito potes, si quidem nox appellari, non vero lux, aut lucis origo, ac parens debet. Ex quo annui cursus alternis dierum, noctiumque vicibus conficiuntur, diem unum, eundemque primum ex Augustino, ejusque eximio interprete, Beda dico, intelligimus sine noctis interruptione fulsisse; quippe cum originem inde ducturus Sol esset, *oportebat* (rationem addit Basilus) *creaturam omnium lucidissimam non ortum ducere a tam obscuro Parente, quales sunt tenebræ*. Si sensum ille dies, animumque habuisset, quantam putetis ejus voluptatem futuram fuisse, ubi se unum tanto dignatum honore inter cæteros conspexisset? At merito lætitia exultet, triumphet gaudio B. Virgo, lux, quippe oportebat (dicam ego) Solem Justitiæ non ortum ducere a tam obscuro parente, quales sunt tenebræ, lux prima, lux una; prima scilicet & una sine labe concepta. Quamquam si sua felicitate

tate delectatur cum ; cæteris omnibus peccati forde pollutis , unam se toram pulchram & sine macula videat ; tamen cæterorum calamitate , nequaquam oblectatur . Quapropter illud , quo efferri hac de causa potest , gaudium missum faciamus , & ad id festinemus , quod fuit & ipsi honorificum , & maximum divini erga eam amoris argumentum . Beneficium quodlibet & accipientem honore afficere , & concedentis amorem patefacere , tantoque magis , quanto paucioribus impertitur , in immensum vero amplificari augerique , si cæteris omnibus posthabitis uni conferatur , ecquis est qui ignoret ? quam eximius Abrahamo honos ille fuit ; quam perspicuum divini erga Abrahamum amoris argumentum illud , cum ejus posteris diuturnam captivitatem vaticinatus Deus , *Tu autem , inquit , ibis ad Patres tuos in pace ? Tu* (ita Riccardum interpretantem audio) *Tu , quem præ ceteris præveni , quem præ ceteris illuminavi , tu ibis ad Patres tuos in pace , immunis ab omni indigne & dura servitutis oppressione .* Quam eximius Esther honos , quam perspicuum Assueri erga Esther amoris argumentum illud , cum terribili promulgato scito ; lataque sententia , ut nulla sexus , nulla originis , nulla ætatis ratione habita , Judæi omnes de medio tollerentur , *non morieris , inquit , Regina Esther : non enim propter te , sed propter omnes hæc lex constituta est ?* Quam eximius Rahab honos , quam perspicuum Josue erga Rahab amoris argumentum , cum buccinarum clangore capta ab Israelitis Jericho , in communi omnium clade , *sola Rahab vivat* , uno eodemque temporis momento totus exercitus iussu Ducis conclamavit ? Quod si nec illis quidquam honorificentius evenire , nec hos commodius amorem prodere potuisse arbitramur , quanto & Mariæ major honos , & majus divini erga eam amoris indicium nobis illud censendum erit ; cum illam ,

illam, non ut Abrahamum ex ejus feminis captivitate, sed ex fœdissima totius humani generis servitute vindicavit; non ut Esther Assuerus ex sancito adversus tantum Judæos edicto, sed ex luctuosissimo mortis supplicio omnibus constituto exemit; non ut Josue Rhaab ex unius urbis excidio, sed ex communi omnium cæde eripuit? eripuit e cæde, ab edicto mortis exemit, a captivitate vindicavit: at qua id ratione fecerit animadvertite. Paterna in omnes miseratione permotus sui pretio sanguinis ad servitutis vincula dissolvenda viam aperuit, mortis effugium demonstravit, vulneris medicinam instituit; Mariæ vero libertatem servari voluit, non amissam restituere, peccati sordes avertere, non eluere, vulnus ne infligeretur prohibere, non inflicto mederi. Quocirca Mariæ quoque Redemptor dicatur Christus; at ea prorsus ratione, qua Sangar Israelis servator; non quod, ut egregie rem totam nobis aperit Augustinus, *nocuerit hostis aliquis, sed ne permetteretur nocere*. Redempta, etsi nemo redimi, nisi captivus possit; dicatur Virgo, dummodo Josiæ ea sit captivitas, qui referente Matthæo genuit Jechoniam, & fratres ejus in transmigratione Babylonis, etsi nunquam, ut nobis eruditissimus testatur Liranus, Josias transmigraverit. Sed nimirum iccirco mentio transmigrationis incidit, quod Hebræus cum esset in eam pervenire captivitatem debuerat, quam peculiari beneficio divinitus effugit. Hujus itaque, quod de loquimur, beneficii quanta sit magnitudo vel me tacente intelligitis, Auditores, tum ex eo quod multo præstantius est, ut mihi Scottus quoque assentitur, malum imminens propulsare, quam illato remedium quærere, tum ex eo quod uni huic Virgini collatum fuerit. Quibus igitur divinum ejus præconiis, aut titulis decus efferam? Jesseam ne virgam dixerō? mecum Damianus facit. *Germinat, inquit, Vir-*

Virgo Jesse de tortuosa humani generis radice, & de Patriarcharum arbore in altitudinem erumpens foliorum tenebras nescit. Nubem ne lucidam, ejus similem, quæ fugientibus olim Israelitis tramitem aperiens ex Ægyptiorum manibus incolumes eduxit? Subscribit Origenes. Ecce Dominus sedet in nube non habente aliquam peccati gravedinem. Palmam ne Cades? Suffragatur Riccardus, qui Cades sanctam, translatam, mutatamque interpretatus, exaltatam Virginem inter illos, qui de malo ad bonum translati sunt, fuisse ait; quod, cum cæteri ex conceptione ad vitam commigrantes ex peccato ad gratiam ope Baptismi commigrent, illa de bono ad bonum, de gratia ad gratiam, de impolluta conceptione ad integerrimam vitam translata fuerit. Vitem ne odoris suavitatem efflantem? Calculum adiicit Patavinus Antonius, Quemadmodum enim aliis arboribus illa citius radices agit, & se se altius condit in terræ sinu, ita & altius Maria Deo cæteris adhæsit, & citius, quæ Jeremiam quoque ac Joannem, post conceptionem in Parentis utero divina gratia præditos prævertens jucundissimum jam ante sanctitatis odorem emisit. Virentem ne Sionis Cypressum? rationem subdit Isidorus; quod instar cupressus vehementi corticis odore angues quosdam ab se avertentis, teterrimum Serpentem ab se depulerit, ac virus in eam evomere cupientem fugaverit. Egregie adhuc omnes: illustria præconia. Aptius tamen Divinus Sponsus; illustrius de sua Sponsa præconium illud; una est perfecta mea, una est. Magnum profecto beneficium esset originis labem non contraxisse, quo perfecta vere diceretur, & esset, tametsi cum aliis illud commune foret; maximum vero est, quod nemini præterea concessum. Quare quid Aaronis virga, quod Noemitica navis, quid speciosa, sive ut ad rem meam aptius alii, specialis oliva, quid voluptatis Paradisus mysterii

sterii præ se ferrent, jam modo non obscure percipio. Duodecim ex duodecim Tribubus translatis a Mose in Tabernaculum virgis, unam Aaronis *in domo Levi* frondescentem, gemmisque turgentibus emittentem flores invenio. Erumpentibus jam cælo nimbis, se seque fluctibus in altum attollentibus, totam quanta quanta est immensa aquarum mole obrui tellurem video, montium juga cooperiri, animalia opprimi, omnia tandem deformari, unam vero Noë navim fartam tectam hac & illac excurrere, non copia imbrium submergi, non ventorum impetu jactari, non vi procellarum elidi. Cum ita in immensum ultrices aquæ excrevissent, & quaque versus excurrentes omnia late pervasissent, ab uno Terrestris Paradisi loco (audio id quippe ex gravissimis Ecclesiæ Patribus) prope lunarem globum sito vim suam cohibuerunt. Ubi vero decrecentibus paullatim undis ipsa detegi terræ superficies cœpit, neque ulla esset camporum facies, nulla pratorum amœnitas, nulla arborum viriditas, sola, etsi cum cæteris confita arboribus, frondescentium ramorum viriditatem oliva retinuit. En igitur quod Canticorum Sponso diu, noctuque urbem circumeunti, passimque, *cui assimilabo te?* percunctanti satisfaciat. Cui delicias tuas apte conferre possis, sciscitaris? Aptè Aaronis virgæ conferas, quæ una flores emisit: aptè Noemitiæ navi, quæ ex communi naufragio una evasit; aptè speciali Olivæ, quæ frondium jacturam una non sensit; aptè voluptatis Paradiso, ad quem unum immanes undæ non accesserunt. In hunc itaque voluptatis hortum, tanquam in domicilium sibi debitum pedem Maria inferat, ibique se unam jure quodam suo commorari glorietur, quod illud scelus ad se unam non pervenerit, quod olim in causa fuit, cur primi humani generis Auctores ab illo omnibus affluenti deliciis loco excluderentur. Nec iis tantum
fe

se se contineat finibus, sed ipsius prætergressa Lunæ orbem cælo se se inferat, ad illud cælestium spirituum concilium, cœtumque proficiscatur. Hic humani generis Parentes, illic Cælestes Spiritus eduxit e nihilo Deus. Tum vero utrosque originis iustitia, sanctificante gratia, infusus virtutibus exornavit, distinxit, instruxit. Verumtamen cum ab ipsis præpotentis Dei manibus tum prodirent, proindeque nulla conditionis culpa obstringerentur, nulla Parentum fœdarentur nequitia, nulla notarentur infamia, nullis legibus damnarentur, nulli crimini obnoxii forent, non est cur magnopere miremur pulcherrimos, omnisque maculæ immunes simul atque extiterunt apparuisse. At promulgato jam æque in omnes mortis edicto, quod sanctum neminem unum excipiebat, at ipsis avernalibus furiis in ipso vitæ aditu prædæ inhiantibus, at ineluctabili, quod omnes irretierat, archissimeque devinxerat, objecto scelestis vinculo, liberam intemeratamque, vel ipso quo primum cœpit esse momento, extitisse Virginem, hoc enimvero novum, hoc inauditum, hoc unum, hoc admiratione plausuque maxime dignum. quid quod ea gratiæ lux, quam primi terræ, cælorumque accolæ fortiti sunt, ut egregie scripsit Idelphunfus, inultoque jam ante luctuosissimus confirmavit exitus, *ante firmitatem labens, ante stabilitatem ruens; ante robur titubans fuit*; nec proinde cum vehemētissimo ejus gratiæ splendore conferenda, quæ in ipsa Conceptione Virgini obvenit, quippe quæ altissimis defixa radicibus nulla vi unquam evelli, nullo tempore imminui, amittique potuit. Ac mihi quidem ejus naturam attente perpendenti tanto cæterorum gratiæ videtur præstare, quanto astris Sol ipse antecellit, non modo radiorum copia, verum etiam perpetuitate atque constantia, quod æque semper fulgeat, nec unquam luminis imminutionem, aut

jaclu-

jacturam patiatur. Quapropter nunc tandem intelligo quam incite Sponsum, *cui assimilabo te?* clamantem monuerim, cui conferre Virginem posset, cum ipse electam ut Solem aptissime dixerit. Quemadmodum enim si ex omnibus astris, sideribusque, quæ vel cælo infixæ hærent, ac perpetua manent, vel immutabilibus spatiis ab ortu ad occasum commeantia circulos suos orbisque conficiunt, facienda esset electio, ea in Solem caderet, itaque caderet, ut non collatus cum cæteris, sed ut singularis exciperetur, ita non ut una ex multis, sed unica & singularis ad hanc dignitatem electa Virgo pervenit. Electa igitur, dicam iterum iterumque, electa est Maria, electa ut Sol; quia non solum rebus creatis omnibus, quotquot in terra sunt, quotquot in cælo nobilior est (ita enim compararetur cum aliis) sed singularis est, nemini conferenda. Qui enim *reperit in Angelis pravitatem*, tota, inquit, *pulchra es, & macula non est in te*. Sed eo me progressum intelligo, Auditores, ut hujusce lucis non meam modo, quæ sentio quam sit infirma & hebes, sed acrem cujuslibet mentis aciem perstringentis vim sustinere nequeam, nec ulterius sine periculo me progressurum existimem. Cum igitur tantam gratiæ amplitudinem neque amplius contemplando persequi me posse sperem nec oratione complecti ulterius confidam, illud a B. Virgine enixe petendum mihi video, ut cum ipsa nostra calamitas atque indignitas ejus singularem gratiam, & eximium decus magis ac magis demonstret, nostri miseratione permota incommotis, quæ inde contraximus, suppætiis ferat.

Dominator Domine ex omni silva Terræ , & omnibus arboribus ejus elegisti tibi vineam unicam .

Esd. 4. 5.

*Arboribus densis, tristisque horrenda recessu,
Tollitur implexis aspera silva rubis.
Heu Boreas late silvam spoliavit honore!
Heu nulla arboreis decidit umbra comis!
Prata suum amisere decus morientibus herbis,
Arida non ullo germine vernat humus.
Ipsa heu deserta est vitiatis vinea ramis,
Vinea præ cunctis fructibus utilior.
Heu tibi commissæ vitis male provide custos!
Omnis, Adam, clades de capite orta tuo.
Noxius in mæstas Aquilo furit impete silvas,
Lenis ubi quondam perstrepuist Zephyrus.
Valles, atque agros, & amœnos demetit hortos,
Et nemora, & celsis robora nata jugis.
Narcissi, casia, viola, æternique amaranthi,
Et quacumque novo e germine planta viret,
Pestifero afflatu tantum contacta decorum
Demittit subito lurida facta caput.
Pro quibus incautos læsura aconita legentes,
Toxicæque admirans non sua Terra parit.
Sol Pater avertitque facem, currusque volantes,
Nec rutila ingrata lampade vestit humum;
Sed circumvolitans nigricantibus incubat alis,
Invisum tenebris nox adoperta caput.
Servat atroci aditum vultu mors pallida, & altus
Horror inaccessas excubat ante fores.
Crebra ferit, ramosque ruens pice nigrior imber
Disiicit; horrifico murmure silva fremit.
Sed florete iterum silvæ, plantæque virete
Jam melior custos arva, nemusque colet.*

Non

Non hic restituet primævæ ætatis honorem :
Divina exitium sed reparabit ope .
Non illam Boreas , non illam diruet imber :
Imperat & ventis , imperat & fluviis
Qui vitem hanc servat , cui noxia qualibet arcet ;
Hac ope divina hac unica vitis eget .
Jam videor cultos Engaddi errare per agros ,
Vitis ubi agresti sepe recincta viret .
Tolluntur platani hanc circum , & virides Cyparissi ,
Frondesque levis permovet aura comas .
Huc huc quando diem surgens Aurora reducit ,
Purpureoque udam lumine vestit humum ,
Cælestis properat cultor vitem undique lustrans ,
Illi ne vepres , neve fera noceant .
Submittit varios tellus formosa colores ,
Quo flectit teneros Vinitor ille gradus .
Gramina consurgunt passim , tangique beato
Certatim gestit qualibet herba pede .
At suavem late diffundit vitis odorem ,
Quo silva , & densum fragrat ubique nemus .
Fragrat ubique nemus diffuso vitis odore , &
Serpens florentis vitis odore fugit .
Quam pulchre assurgit , sæcundasque undique ramos
Extendit ! quibus o fructibus illa tumet !
Fortunata nimis , multo & felicior illa ,
Qua ternis visa est surgere palmitibus
Ægypti Regis famulo , quamque omne plenam
Venturi Joseph præsciis exposuit .
Unius vitam portenderat illa ministri ,
Humani vitam prædocet hac generis .
O felix botrus ! botro felicior illo ,
Quem prædives opum Cypria terra tulit .
Redde tuos citius vitis pulcherrima fructus :
Augenda est ingens fructibus ara tuis .
Redde merum ; nostro fundemus pocula Regi .
O puris utinam faucibus inde bibam !

Ex

Ex omni terra Orbis elegisti tibi foveam unam.

Ibidem.

Nidis loquaces arboreis aves

Feraque vestris eja cubilibus

Defendite anguem, quem cruenta

In teneros rapit ira factus.

Heu! qualis anguis! lurida qua lues!

Non tale tellus protulit Africa

Monstrum, sed hujus lucis hostem

Tartarea vomuere sedes.

Ille ore nidis, atque cubilibus

Adstans hianti protinus arripit

Partus voraturus recentes:

Heu! misera prohibete matres.

Quin & maligno fœdus anhelitu

Spargit veneno progeniem sinu

Matris latentem. ah! si potestis,

Perniciem prohibete matres.

Frustra ah! remotas queritis arbutos,

Occulta terræ viscera queritis

Heu frustra! ubique urget locorum

Sanguineo metuendus ore.

Impune nidos, atque cubilia

Devastet anguis? quis caput atterat?

In orbe quis tutus recessus

Alitibus fuerit, ferisque?

Est una in Edom, est fovea unica,

Quam bile tollens colla tumentia,

Fundensque tetrum virus ore,

At metuit coluber, fugitque.

O ter beatam dicite Virgines,

Terram beatam dicite Puberes:

Abscessit anguis. Judæ ibidem

Nempe Leo posuit cubile,

Ex

Ex omnibus floribus Orbis elegisti tibi Liliū unum.

Ibidem.

Hortus adest. titulus; Procul hinc, procul este Profani:

Hic Amor est. aliis invius hortus adest.

Vatibus at sacris fas est Duce Numine inire:

Nulla mora, ingredior: dux mihi sanctus Amor.

Quæ mihi se rerum facies pulcherrima pandit,

Perstringensque oculos quæ nova forma meos?

Monstrat Amor flores dextra, lævaque, hyacinthos,

Serpillum, Cassiam, Lilia cana, Rosas.

Hic engaddi uvæ, hic Libani de vertice Cedri,

Cupressusque Sion, Palmaque pulchra Cades.

Florent hic fulvæ stillantia Cinnama myrrham,

Et pallens suavi nectare Nardus olet.

At alios inter pulcherrima Lilia flores

Aspice, Virginei signa pudoris, ait.

Sanguinis hæc vides per candida Lilia guttas?

Lilia virgineo sanguine tincta vides.

Advolat Aligerum circum pictis chorus alis,

Deproperant pulchra lilia sumpta manu.

Et certamen habent, florum decora alta recensent,

Et poni cupiunt omnibus ante suum.

At alio incedens tacito pede reflectebat

Letitia, atque Jocus, Gratiæque alma præit;

Liliū & ostendit, quo non formosius ullum

Edidit, aut edet Hortus amabilius.

Ut beat aspectu! quam non mortale videtur

Germen! ut exsurgit celsius illud humo!

Hoc sibi sanctus Amor, qui lilia pascitur inter,

Elegit, electum ex millibus illud amat.

Nec pudet aut molli lymphas deducere clivo,

Vicinisve umbram texere viminibus.

I

Hic

Hic ver perpetuum est, hic ludit lucidus aer,
 Regnat Amor, visus dicere, regnat Amor.
 At mihi jam tacitum pertentant gaudia pectus,
 Impulsuque aura barbitos ista sonat.
 Floscule, amor Domini, pulcherrime Floscule, salve;
 Lacte, atque intactis candidior nivibus.
 Tangere non audent gelida te nocte pruina,
 Lucidulo plenum sed tibi rore caput.
 Vicino haud tangunt Galaad de monte capella;
 Non anguis turpi gutture commaculat.
 Vitalis tibi succus inest, cunctisque salubris,
 Officit adspectus anguibus ipse tuus.
 Ut platano coryli cedunt, ut floribus herba,
 Florum sic cedit tota cæterva tibi.
 Vertice curvantur myrthi super impendentes,
 Atque tuos spargunt flore cadente sinus.
 Parcite, quem custodit Amor, vos lædere florem,
 Frigora, tu radios comprime Phœbe, tuos.
 Discite vos spirare leves jucundius Aura,
 Ducere nectareas discite Rivuli aquas.
 Mirantur Nympha, Zephyri mirantur, Olympus
 Nescius exultat, nescia gaudet humus.
 Nam meliora latent: Amor at plus cernit, & intus
 Plus aliquid flos hic, quod mage ametur, habet.
 De radice ejus flos nempe ascendet, eumque
 Desuper incumbet, & requiescet Amor.
 Scilicet hæc Virgo est, electa ex millibus una
 Quot sunt, aut fuerunt inelyta Virginibus.
 Dicebam: sed Amor foliis se se abdidit imis.
 Ite leves venti, dicite adesse diem.
 E foliis nostras vox reddita fertur ad aures,
 Ite leves venti, dicite adesse diem.

Ex omnibus abyffis maris elegifti tibi rivum unum.

Ibidem.

O qui lucidula refertus unda
 Blando Rivule defluis fufurro,
 Sic fons perpetuam miniftret undam,
 Nec te Sol nimio perurat aftu;
 Dum tuas meditor referre laudes,
 Murmur comprimito, remitte curfum.
 Salve, o Rivule; fluminum ocelle,
 Salve amor superum, decusque terræ.
 Te non Oceanus, nec auxit imber,
 Deus nectareo fed auxit imbre,
 Et pura dedit effe puriorem
 Gemma huc Æthiopum relata ab Orbe.
 Te non anguis anhelitu; nec ore
 Aut fera nemorum, aut agri capellæ,
 Nec frons arboribus cadens, nec ullus
 Turbavit pede, faxulifve Paftor.
 At ripæ vario nitent colore,
 Sæpe, ut in speculo, decenter herbæ
 Adfpectant in aquis, caputque tollunt:
 Ludunt cum Zephyris aquæ, adque curfum
 Paffu illos tremulo incitare gaudent:
 Sanctus quin Amor, ut columba, gaudet
 Has super placidis volare pennis
 Perfæpe, & cupido attigiffe roftro.
 Quid Jordanis ovans revolvit undam
 Cunctis fluminibus fuperbiorem?
 Te te Rivulus hic honore vincit.
 Hic eft fluminis hic origo rivus,
 Cujus recreet impetus Dei Urbem.
 Hic aquam unus habet fuaviorem
 Suavi nectare, quam aridis labellis

*Quicumque ebibit, is repente fœdo
Ab sinu excutit incubantem amorem,
Cælestique animum perustus igne,
Terræ turbidulos lacus relinquit.*

*O queis cor nimis & nimis cremarunt
Flammæ sordidulæ, venite ad undas;
Undæ frigidulæ levate flammæ,
Flammæ sordidulæ perite ad undas.
At te perpetuo colam, atque amabo,
Dulcis Rivule; fabulosus usque
Vilescet mihi Pegasejus amnis;
Te venam mihi porrigente, de te,
Seu lucem tenebris fugabit Hesper,
Luce seu tenebras dies fugabit,
Versus condiderim elegantiores;
Non quos molliculos Catullus, at quos
Castos Rex cecinit Propheta, eroque
Tanto maximus omnium Poeta,
Quanto es maximus ipse rivulorum.*

*Ex omnibus ædificatis Civitatibus sanctificasti
tibi metipsum Sion.*

Ibid.

*Colle super, placidis quem proximus alluit undis
Jordanis, Calum quem dulci nectare pascit,
Urbs ingens, augusta (Sion ab origine prima
Impositum jam nunc servat per sæcula nomen)
Qua nihil in terris complectitur altius æther,
Sublime erigitur, cui non par altera surget,
Ipsa licet natura & ars conjuret amice:
Atque per ingentes suspensis molibus arcus,
Quales haud unquam Ægyptus, vel corniger Ammon,
Aut juvenum lacrymis vidit celebratus Osiris,
Æreos nectit tractus, propiusque revisit.*

So-

Solem flammifera lustrantem lampade terras.
 Quid primum memorem, aut medium, quo fine quiescam?
 Singula cum poscant dias in carmina vires.
 Mœnia num dicam? solidis horrentia pinnis,
 Turritaque arces, & inexpugnabile vallum,
 Quo nunquam potuere hostes succedere muro.
 An genus armorum referam, instrumentaque belli,
 Non hominum calata manu? Mavortis in antro
 Mulciber arma alius fudit, longasque sarissas,
 Fatiferosque enses, galeasque ex ære rigentes,
 Corytosque leves, incisæque scata colubris.
 Quid quæ sublimes tectis regalibus ades,
 Et libyco fulgent angusta palatia saxo,
 Septenisque patent maculosis sulcata columnis
 Atria, compositis interlucentia gemmis,
 Atque auri, quod lambit ebur, distincta figuris?
 Quis strepitus, clamorque virum, clangorque tubarum
 Abrupit vocem? quæ vox pervenit ad aures?
 Arma parate citi, muros conscendite Civas,
 Ultima fata vocant, venienti opponite pectus
 Hosti, ne victrix alias captiva Tyranno
 Pareat angusta Urbs, manibusque ad terga revinctis
 Virgineos laniata sinus, lacerata capillos,
 Pulvere & immundo faciem polluta superbos
 Victoris fastus videat, pompasque Triumphi.
 Illa tamen quamvis tot monstra immania certent
 Expugnare armis, penitusque evertere ab imo,
 Inconcussa manet veluti Marpesia cautes,
 Frontibus adversis cum miscent prælia venti,
 Atque cient nimbos, tempestatesque sonoras.
 Ante fores victi nigrum vomuere cruorem
 Indignati hostes, Stygis & fugere sub umbras.
 Alma Urbs ante alias fortunatissima, & una
 Ante alias Urbes superum gratissima Regi,
 Quam solam incolumem voluit, neque sortis acerba
 Participem, olim contra omnes effusus in iras;

*Salve Urbs ante alias fortunatissima, & una
 Ante alias Urbes superum gratissima Regi,
 Salve, perpetuo tibi prospera secula currant.
 Quid loquor? ambiguis tandem velamine dempto
 Res pateat, Virgo genus alto a sanguine Juda,
 Quam Deus, ut primæ fugeret fera vincula culpa,
 Expertem labis materno in ventre beavit,
 Et contra incassum tendentem contudit hostem,
 Virgo salus hominum, per quam data visio pacis,
 Quam voces veterum, & sancti cecinere Propheta,
 Instauraturam caelestia fœdera pacis,
 Vera est illa Sion. Fortunatissima Virgo,
 Per te si cunctis reclusa est janua Celi.
 Ne frustra reclusa mihi sit janua Celi.*

Ex omnibus volatilibus elegisti tibi columbam unam,

Ibidem,

*Ubique sunt pericula,
 Ubique circumstant doli,
 Venator alijs montibus,
 Silvisque prædatur feras;
 Piscator alijs retia
 Tendit sub undis piscibus;
 Crudelis Ales improbo
 Rostro timendus alites
 Sectatur uncis unguibus,
 Una at Columba candida,
 Quæ lacte puro purior,
 Magisque pura liliq,
 Flocci hostis atros æstimet
 Ungues madentes sanguine,
 Nam fontis illa vitrei
 Puras aquas supervolat:
 Hic se ipsa spectans inspicit*

Ho-

*Hostem ruentem, & illico
Tutas in undas mergitur.
Virgo una vitales prius
Quam hauriret auras ætheris,
Divini Amoris lucidum
Mirata fontem, subdolum
Delusit hostem, & aridas
Frustrata fauces improbi.*

*Salve Columba candida,
Quæ lacte puro purior,
Magisque pura lilio,
Da nostra queso candido
Certare lacti pectora.*

*O Virgo Salve, candidum
O puritatis lilium,
Tu queso nostra pectora
Amoris icta vulnere,
Virgo, irriga dulcissimo
Divini Amoris nectare,
Ut colliquecant dulcibus
Divini Amoris ignibus,
Illumque semper quaritant,
Illumque semper diligant,
Qui vera lux amantium.*

*At quem tibi non edita
Uni videre contigit,
Post fata saltem perfice
Nos Te precante cernere,*

*Ex omnibus plasmatis pecoribus providisti tibi
ovem unam.*

Ibid.

*Felices montes, & montibus addita silva,
Et Galaad oculis rura decora meis,*

I 4

Et

Et qui dum prono præceps te vertice volvens
 Fers Jeboc magno magna tributa mari,
 Pulchre intertextas cernis circum undique ripis
 Ludere mille rosas, lilia mille tuis,
 Dicite quo amne bibat, vel quo pascatur in agro
 Molle gerens tergo candida vellus Ovis,
 Agni mater Ovis, qui humanum sanguine solvat
 Mortis ab infausta conditione genus.
 Felices montes, voluit queis ipse supernus
 Ipse suas Pastor credere delicias;
 Cum veltus rapidis pavidum super æthera ventis,
 Irataque vibrans fulmina sæva manu
 (Heu commune nefas! quanti stetit una voluntas!
 Orta mala hinc nobis, ut bona ducta forent.)
 Ah pereat, dixit, pereat sub vindice dextra
 Una omne; ingratum si fuit omne, pecus.
 Quando ego dicebam, puro bibite amne capella,
 Tunc ex immundo nempe bibere lacu.
 Quando ego dicebam, cytisum depascitor agna,
 Tunc es pasta malos pro cytiso agna rubos.
 Quando ego dicebam, astivis fuge ab ignibus Hædæ,
 Tumque sub astivis ignibus hædus erat.
 Quid juvit lavisse tuis, Jordanis, in undis,
 Plena domum ut ferrent ubera lactis oves?
 Quidve hædis conspersa novo dare gramina rore,
 Vellera ut inficeret docta rubore Tyros?
 Nulla tamen presso spumavit ab ubere mulctra,
 Vellera & infecit nulla rubore Tyros.
 Ah ergo ingratum pereat sub vindice dextra
 Omne una, ingratum nam fuit omne, pecus.
 Igne febris, viru serpens, & dentibus acer
 Incustoditum perdat ovile Lupus.
 (Heu commune nefas! quanti stetit una voluntas!
 Unus quod voluit, posteritas voluit.)
 Una tamen vacua mihi Ovis servetur ovili:
 Digna una est, Pastor quam sibi servet Ovem.
 Illa

*Illa mihi maculas referens in vellere nullas,
 Vellere hyperborea candidiore nive,
 Pascatur, Galaad sinuoso ubi flumine colles,
 Et variis Jeboc flexibus arva rigat,
 Ejus caelesti vellus dum rore lique scat,
 Quem gravido nubes mittet amica sinu.
 Seu puras rivi leviter libaverit undas,
 Tum rivi felix dulcius unda flue:
 Seu campi virides leviter gustaverit herbas,
 Campi extolle caput latius herba tuum.
 Frustra illam viridi, pendentem e rupe veneno,
 Lethiferaque anguis spargere tentat aqua.
 Intentis custodit Amor Caelestis ocellis:
 Hac cubat? Is vigilat. pascitur? advolitat.
 Non perit: Pastor gaudet; gaudebit at idem,
 Si me, quæ perii, Pastor ovem inveniar.*

Ex omnibus multiplicatis populis acquisivisti Tibi
 populum unum.

Ibid.

*Maria sumus in fide
 Puella, & pueri integri:
 Mariam pueri integri
 Puellaque canamus.
 Salve, o decus aetheris,
 Salve, gloria calitum,
 O Regina, propaginis
 Jesseæ inclita Virga.
 Communi voluit Deus
 Te unam crimine liberam
 Æternum edere Filium,
 Absque labe pudoris;
 Ut dux Virginibus fores
 Mater Virgo sequentibus.*

Ma-

Mariam pueri integri,
 Puellaque canamus.
 Pro mirum! numerat suos
 Humanum omne genus Patres,
 Ætas nomina qualibet
 Gaudet nescere Avorum:
 At turba inclyta Virginum
 Pares haud numerat Patres,
 At per se sine traduce
 Longum vivit in ævum.
 Præclarum o populum! sibi
 Quem sacrum voluit Deus.
 Mariam Pueri integri,
 Puellaque canamus,
 Hac est Virginei Chori
 Princeps, hac duce Virgines
 Adducentur Olympio
 Dantes lilia Regi.
 Illa & Virginibus Deo
 Fuit charior omnibus;
 Namque huic munera gratiæ
 Dedit Matris in alvo,
 Maria sumus in fide,
 Puella, & Pueri integri.
 Mariam Pueri integri,
 Puellaque canamus,

Conclusio,

O nova Progenies, o formosissima rerum,
 O Virgo, o nova lux, o sine labe anima!
 Et cui sorte datum, ne tot de millibus unam
 Antiqui sceleris laderet atra lues;
 Sive refers Vitem, seu Florem, sive Columbam;
 Sive Sion, Fovea, aut diceris Amnis, Ovis;
 O qua-

*O quacumque venis sub imagine, candida tota,
 Candida lacte magis, candida luce magis;
 Si Te Dius Amor celestibus inserit astris,
 Non commune genus dissimulare potes.
 Sed luctu est nobis, Tibi qui fuit ortus honori;
 Ergo cognati sanguinis esto memor.
 Occidit una domus, sed nos pressere ruina;
 Ergo cognati sanguinis esto memor.
 Mergitur una ratis, sed nos tantum obruit unda;
 Ergo cognati sanguinis esto memor.
 Esto memor Virgo, & longum miserata laborem,
 Si Tibi honor Dominae est, cor quoque Matris habe.*

Anni incerta memoria.



DE

D E I P A R A D O L E N T E .

P R Æ F A T I O .

DEliberantibus nobis in communi per id temporis omnium bonorum tristitia luctuosissimam Passionis Christi memoriam revocare, debitam quamdam mœroris nostri significationem exhibituris, imparem dolori animum atque identidem deficientem afflixit, atque adeo perculit tam acerba recordatio, ut, quantum pietas ad eam contemplandam hortabatur, tantum ab ea retraheret miseratio. In hac utrinque distracti animi lucta statuimus, omissa morientis Filii meditatione, in dolentis Matris angustiis mentem cogitationemque defigere, rati susceptam animi curam molestiamque minorem fore. Minorem? Immo in hoc intendentes animum experti fumus etiam majorem. Cum enim ex eo fonte Mariæ dolores omnes profluxerint, non isti proponi nobis ante oculos potuerunt, quin Christi quoque acerba calamitas, & perpeffio longe gravissima occurreret, ut propterea in conditione Filii plusquam satis per se miseranda mœrorem nobis auxerit materni doloris cogitatio. Ecquod tam luctuosum, tam triste, tam tragicum depingi unquam exemplum potest, quam quod una hæc infelicissima Mater per se nobis obtulit, cum Simeonis futuras Filii arumnas prædicentis Oraculo sibi animam tanquam gladio transfigi sensit; cum conquistum ad necem puerum Angeli jussu in remotissimas regiones celeri fuga transferendum audiit; cum illo Jerosolymis amisso per tres dies ac noctes lacrymarum vim quærens anxie sollicitæque profudit; cum pati debuit Filium, &
hujus-

hujusmodi Filium indignissimam subiturum mortem a se divelli; cum ab impia turba pertrahi crudelissime vidit; cum Cruci affixo astitit inter duos latrones infanda cum ignominia expiranti; cum in Cadavere e Cruce deposito vibices, vulnera, laniatus contemplata est? O tempora tibi aspera! o dies atro! o amantissimæ Matris angustias! Tu quoque transeuntes per viam, per me licet, interroges, ut attendant, videantque, *si est dolor similis sicut dolor tuus*. Quæ tanta potest unquam existeret ubertas ingenii, quod materiæ par genus Orationis, quo quisquam complecti omnia dicendo possit? quis interim adeo omnem abjecerit humanitatem, ut hæc cogitando non commoveatur, non ploret, non ingemiscat, ac tantam pelagi vastitatem e litore prospiciens turbulentissimis angustiarum tempestatibus, quasque fluctibus non exhorrescat? Sed quoniam e portu solvimus, vela facienda sunt, veniendumque in eam altitudinem maris, in qua Mariam tempestas demersit. In hoc porro argumento, relicta veteri Academicorum in contrariam partem disputandi consuetudine, singulos dolores pro virili singuli dicendo prosequemur, non alium alio probando graviolem, sed unumquemque exponendo gravissimum, vobis non solum pro humanitate vestra faventibus, sed etiam nihilo plus quam quantum a mæsto turbatoque ingenio præstari potest pro æquitate postulantibus.

Ecce hic positus est in signum cui contradicetur, & tuam ipsius animam doloris pertransibit gladius.

ORATIUNCULA.

Eam statuit natura legem hominibus vere humanis, ut funestum quidpiam nuntiare si debeant, molissimis verbis utantur, audientisque animum artificioso

ciofo Orationis circuitu pertentent, ut si minus vulnus declinari potest, non tam alte tamen telum ipsum infigatur, levioꛛe quasi brachio contortum. Quo uti cum omnibus homines sciunt temperamento doloris, hoc cum Virgine adhibitum minime video, ut cujus Filius Vir dolorum dicendus erat, ipsa dolorum Mulier jure posset appellari. Ingrediamur Jerosolymæ templum. Ibi Simeon Sanctissimum Puerum sinu complexus, totumque lacrymis rigans quid tandem Matri prædicat, quo modo prædicat, audiamus. *Ecce hic positus est in signum, cui contradicetur, & tuam ipsius animam doloris pertransibit gladius.* Tuam, Mater amans, tuam, Mater dolens, hoc ipso dolens, quia Mater, & amans. Num verborum lenitas, aut dicendi quæsitæ formulæ, quibus Mætris ægritudo elevaretur, aut obtunderetur? quid ferri aciem Mætris animam transfixuri prænuntias? Sermo ipse, Simeon, tuus penetrabilior omni gladio ancipiti, pertingens usque ad divisionem animæ, & spiritus. Omnia enim quæ postea Christus perpeſsus est atrocita atque crudelia in propheticis verbis expicta, expressaque Mater prævidit, prævidendoque uno velut ictu omnia dolorum vulnera excepit. Jam tum impiæ infantium Judæorum voces resonabant illi in auribus, quibus tanquam feditiosus homo, & falsarum opinionum seminator (ille veræ Sapientiæ fator, & fons) traduci debebat: istæ voces vulnus erant. Jam tum Sacerdotum invidiam, Phariseorum machinationes ejus doctrinam damnantium, & Principum inter se dissentientium in ejus mortem coſpirationem, atque consensum intuebatur: omnia hæc vulnus erant. Jam tu Petri perjurium (sit verbo venia, fortunatissimum Pœnitentium exemplar, Sanctissime Apostolorum Princeps, sit venia) Judæ proditionem, reliquorum fugam Apostolorum mente complectebatur: Juda proditor, Petrus perjurus, de-

fer.

fertores reliqui vulnus erant. En contradictiones in illud signum intentæ, & dolentis Matris animo, ex quo Oraculum audiit, occurrentes. En ut ferrum pertransiit animam ejus; cui tota simul futurorum tormentorum series se se aperuit, seque clarissime videndam obtulit. Ipsam ex eo tempore excruciabat Filii hac & illac irrisionibus traducti, verberibus proscissi, spinis perterebrati, funesta Golgothæ juga scandentis, de Cruce pendentis, ultimumque spiritum exhalantis intuitus. Quam acerbum existimemus dolorem illum, quem simul omnia, quæ Christus perpeffus est, Virgini pepererunt? Nempe tum cum singula suo tempore re perfici conspiciebat, amarissimum veluti dolorum poculum guttatim degustabat; ebibit vero totum, & usque ad faciem exhaustit, quo tempore Simeonis verba mœstissima Mater audiit, omnemque malorum molem innocenti capiti impendentem suspexit. O voces, Simeon, tuas, quæ semel auditæ ex animo nunquam Virginis defluerunt! O gladium, Simeon, tuum, cujus acies nullo temporis decursu est hebetata! o vulnera doloris & mœstitiæ nulla voluptatis contemplatione; aut contrectatione, tanquam fomento, lenienda! Neque enim erat in illius potestate a lacrymis mœroreque cessatio, fodicantibus iis rebus, quas innocenti Filio imminere sentiebat. Non sinebat maternus amor abstrahere mentem ab acerbis cogitationibus, & a tormentorum præmeditatione receptui canere ipsa tormentorum sævitia vetabat. Nihil ergo erat, quod non ejus oculis Christum injuste maximos cruciatus ferentem obiceret, refricaretque illius memoriam temporis, quo magnopere esset defletura præsentia, quæ eventura defleret. Fascias ne tenero Infantis corpori obducebat? veniebant in mentem vincula quibus eum constrictum iri sciebat. Sugendum ne virgineum lac esurienti præbebat? mixtum de Cruce pen-

pendenti cum felle acetum cogitabat. Josephum a fratribus venditum Ægyptiis legebat? (erat enim ejus in Sacris Litteris quotidiana occupatio) In illis Judam execrabatur, in altero Christi vicem deplorabat. In Isaaci sacrificio Filii mortem lugebat; in Saræ afflictione mæstitiam angoremque suum prænuntiatum esse intelligebat. contemplabatur dulcere ridentem puerum: quem hominum formosissimum Propheta præviderat, ipsa videbat. Contemplantis animum ea cura exedebat fore, ut pœnarum diritate ita olim deformaretur, ut nullus in eo esset adspæctus: osculabatur mundi artifices manus, lacrymisque simul rigabat, cum durissimis clavis fodiendas recordaretur. Pupugit memoriam tuam mœstissima Virgo, & voluntatem, & mentem crudeli ictu gladius iste propheticus. Graves enim pœnas graviores reddebat patientis cognitio; supraque hominum consuetudinem, atque adeo vires tibi dolendum esse percipiebat, quæ supra hominum conditionem positum eum esse, pro quo erat dolendum optime noverat: non tantum Filius lugendus erat, Deus erat lugendus in Filio, proque iis omnibus flendus, qui ipsum crucifigentes nihil ingemuerunt. Quod Dei Mater fuit, immensus honor fuit Virginis; quod Filius Deus cruciaretur, immensus dolor fuit Matris. Probe illi perspecta erat & cognita dignitas Christi; Christi dignitate suppliciorum ejus gravitatem, & sui amplitudinem metiebatur doloris. Quid ergo ardentius eam exoptasse putemus, quam ut tantam tormentorum vim talis Filius declinaret? hoc sane erat, quod maternus amor unice cupiebat, & tamen erat hoc, quod ipse velle non poterat; horrebat Mater Christi mortem, ejus recordatione contremiscebatur: Æterni Patris Filii mortem statuentis decreto famula, & Filia subscribebat: durum erat Deum & Hominem tam exquisitis cruciatibus periri; hoc
ta-

tamen pretio hominum salus erat emenda; quod Filius ipse solvendum susceperat; cuius repugnare voluntati Matris religio non poterat. Ita dum ahimum in contraria trahebat hinc amor, hinc obedientia, dolor & ægritudo totum occupaverat. Cuinam ergo dolori dolorem hunc tuum æquiparabimus, aut quem lacrymis tuis ponemus modum, Virgo, filia Sion? Magna est enim, velut mare, contritio tua, in quod intuentes frustra litus, portumque quærimus. Quid illud dicendo augere conamur? Fletu nostro potius augeamus, si tamen aliqua ex parte potest augeri. Lacrymis Matris Filii tormenta deflentis filiorum lacrymas mœrorem Matris deplorantium misceamus; lugeamus cum ipsa, si lugere quantum ipsa non possumus.

Accipe Puerum, & fuge in Ægyptum:

ORATIUNCULA.

Quæ Angelorum consuetudine recreari sapē, & futurorum impendentium Christo malorum imaginem perpetuo inhærentem animo, ex quo illa Simeon prædixerat, temperare suavissimo celestium spirituum colloquio tantisper consueverat, nunc nec opinato ab Angelo quoque solatio pristino in luctum converso, augeri sibi imminentis periculi metu dolorem sentit. Armatos huc & illuc discurrere cum ferro satellites; Herodem infana suspicione furem conquirere ad necem Filium: domum, quam cuique leges voluerunt perfugium esse tutissimum, per sicarios Puero haudquaquam tutam esse; Patriam, quæ omnes omnium charitates una complexa est, certam perniciem minitari; fugiendum illico, migrandum alio, festinanter ab imminente certo mortis discrimine dulcissimum pignus eripiendum. Hoc

K

nem.

nempe deerat Parenti miseræ acerbissima meditatione confectæ, ut e Cælo quoque, unde rerum divinarum significatione mitigabatur aliquando dolor, jam modo terrores demitterentur, atque a bonis, rerumque semper feliciū Nuntiis, ad augendos magis ac magis futurorum malorum cogitatione conceptos jam animo dolores, vulnusque perfricandum novæ res perniciosæ atque funestæ denuntiarentur. Miseret me profecto, tui Mater optima, cui nulla diuturna esse lætitia potest. Et Pastorum, qui paullo ante natum Dominum venerant adoratum, & Angelorum, qui hymnis cælestibus omnipotentis gloriam celebrantes pacem concessam hominibus significarunt, & Regum, qui ab extremis Terræ partibus in obsequiū argumentum regali Puero dona ad solum prostrati jacentesque attulerunt, obversabatur ejus animo per id temporis recordatio, cum omni lætitia repente in mœrorem conversa abundum sibi cum Puero, excedendum, evadendum audit. Quid mentis Mariæ fuisse putetis, cum anxie & sollicitè a Josepho, ipso quoque timore perculso, excitata e somno, non concessio tempore quod satis esset ut se colligeret, & Puero alio deducendo necessaria pararet, intempesta nocte, cum crassis adhuc omnia occultata, & circumfusa tenebris eo magis terrorem incuterent, nec certis ingredi vestigiis fugientem sinerent, lacrymis obortis, complexa ad pectus Puerum, incerta sui, plena metu secessit? Quo abit mœstissima, tristissimaque mulierum? An ad cognatam Elisabeth, ubi quærens consolantem inveniat? aut de terra sua, de cognatione sua, de domo Patris sui egressa, ut Abraham, in terram veniat lacte, & melle fluentem, ubi magnificetur nomen ejus, sitque benedicta? Nihil ego hujusmodi exulī infelicitissimæ denuntiatum audio. At in Egyptum imperatum iter, prope centum, & quinquaginta

ginta paſuum millia remotam terram. Quam porro terram bone Deus! illam ſcilicet, in qua vel maxime vario Idolorum cultu irretiti homines tenentur, barbaries dominatur, & omne in præcipiti vitium ſtat. Nam quid ego illa commemorem, quæ & quanta in itinere paſſa ſit? victus difficultates, tempeſtatis incommoda, longæ viæ tædia, eoque graviora, quod inter Parentum brachia deferendus Puer erat, dulcis animo ſarcina, corpori tamen deſatigatio. Verum quandiu a finibus ſuis aberit? uſque dum dixerit Angelus. Quam grave & acerbum illi eſſe debeat a patria exulare, incertis vagari ſedibus, avulſam eſſe a ſuis, idque ad incertum tempus, ille reputet, quicumque intelligit, quantopere Patria quemque delectet. Quamquam corpore quidem abeſt a Patria, animo præſens eſt: atque utinam animo quoque poſſet abeſſe, quæ minorem caperet propterea dolorem. Sentio me eo Oratione deſapſum, ubi nec animus mihi, nec vires, nec verba ſatis apta ſuppetunt ad exprimendos intimos animi ſenſus, quibus alte conſictabatur, cum Infantium cædem Filii ſui interimendi cauſa factam ex Ægypto mentis oculis proſpiceret. O Rachel plorans filios tuos, non una ploras: non in Ramâ ſolum audita vox eſt, ploratus, & ululatus. Mariam luctus ſociam habes. Ex Ægypto quoque vox erumpit, mœſtæ lamentationes proveniunt, ululatus perſonant. quid enim potius? Cum ipſa licet abſens videret Infantes alios obruncato capite in terram cadentes, alios ipſa incunabula ſanguine iuſcientes, alios inter Parentum manus crudeliſſime enecatos; cum domos cerneret cruore exundantes, ſtratas cadaveribus vias, ubique gladios, ubique cædes; cum Matrum tantam diritatem, tamque inauditam in pærvulos immanitatem intuentium querelas, vociferationes, ejulatus audiret, non poterat quin exclamaret: *quîs dabit capiti meo*

aquam, & oculis meis fontem lacrymarum, & plorabo die ac nocte interfectos filia populi mei? Miseros Filios! miseras Matres! crudelem Herodem! cujus causa Maria cum Filio fugit, quem etfi carnificum ferro subtrahit, tamen quot gladiis innocentes Infantes, propterea quod illa peperit, transfodiuntur, totidem ipsa transverberatur. Heu miseram, heu dolentem exulem! o dirum & inhumanum Herodem tantorum dolorum fontem! Tot vero, ac tam fera exilii adjuncta quis unquam alias auditione accepit? quis nisi humanitatem penitus exuerit, audiat sine lacrymis? quis Herodem diris omnibus non devoteat? Video vos certe cum in Virginem pietate, tum in Herodem indignatione valde commotos. Miseremur, miseremur fugientem Matrem, fugantem Herodem execremur. At si in nobis, quod sperare juvat Christum habitat, nisi alteri renovare dolorem, alterum imitari velimus, ne ullo unquam tempore a nobis oro obtestorque, ne a nobis ullo unquam tempore dolentis Matris Filium exulare per peccata cogamus.

Remansit Puer Jesus in Jerusalem.

Triste dicite Virgines

Carmen, voceque tinnula

Casum collacrymimini,

Et vestro trahat intimo

Dolor pectore questus.

Æterni illa Dei Nurus,

Illam Filiam, Sponsaque

Suum perdidit unicum,

Quem magni peperit Dei

Solo Numine natum.

Huic vos eja agite o bonæ

Obvias date Virgini,

Cor

Corculoque medullitus
Jacenti in gemitu, & gravi
Luctu, ferre levamen.

Qualis Cerva, volatile

Cui præcordia spiculum
Hæret altius, anxia
Si excussisse tenax queat
Ferrum, currit in agros

Euroque, & Zephyro ocyor:
Non illam amplius invia
Montium, obsita vallibus
Non illam amplius unda, non
Illam saxa morantur;

Talis impatiens ruens

Virgo per medias vias,
Quærit, cursitat, it, redit,
Clamat percita pectore,
Vt gliscente doloris.

Circum volvit & huc, & huc
Madefcentia lumina,
Implensque omnia questibus
Amissum super ingemit,
Cara pignora, Natum.

Per! si qua est pietas mei,
O vos, si quis amor tenet
Dolentis, misera anxia
Matris, dicite Virgines,
Qua sit parte puellus.

Ille delictum meum
Sanguis, corculum, ocellulus,
Ille totus amabilis,
Quem mi sustulit invida
Boni dextra, puellus.

O Puella, venustule,
Dulcis, blandula, amabilis,
Non tua amplius osculer

Suaveolentia, dulcia
Mero melle labella?
Ite o; noscitis & labra,
Ille labra corallina,
Aureosque capillulos,
Et duo illa micantia
Dio sidera vultu.
Quæ sint noscitis & manus,
Ille candida, eburnea,
Et leves nitida manus:
Genæ & lacteola, quibus
Mixta purpura ludit.
Ite o, querite Virgines
Unicum mihi gaudium,
Tuque o redde mihi, indica
Blando murmure blandula,
Spirans dulciter Aura.
Fallor? sistite Virgines,
Dulcem ipsa audio voculam,
En mihi ipse venit Puer:
Veni dulcia ad oscula,
Veni, Nate, Parentis.
Vana ah! fallor imagine
Mater tristis, amans, dolens.
Nate o! hinc procul exulas:
Invisus mihi Te sine,
Nate, spiritus auræ.
Ite o, illico Virgines,
Natum querite, ducite,
Et mei miserescite,
Quæ transfixa dolore, non
Ultra languet Mater.

Ecce ascendimus Jerosolymam, & consummabuntur
omnia, quæ dicta sunt per Prophetas de
Filio hominis.

*Unicus ecce tuus, cuncta in quem flumina amoris,
In quem omnes versas Mater amore faces,
Filius ecce tuus, totus tuus, illa decorus,
Prae natis hominum pulchrior, & Superis,
Cujus quantum aetas, tantum sapientia crevit,
Ante oculos hominum, crevit & ante Dei;
Qui, ut tu illum, te sic is amat magis omnibus unam,
Nunc abit; heu! a te nunc abit ille procul.
Æterni facturus abit nunc jussa Parentis.
Omnia nunc Vatum carmina facta manent.
Natus abit, tradendus abit modo Gentibus; illum
Probra manent, spina, sputa, flagella, Cruces.
Heu Matri verbis exaspero vulnera! verbis
Vulnera non possum facta referre meis.*

Cum ducerent eum, sequebatur illum multa turba
populi, & mulierum.

*Infelix Mater nimium ah! miserandaque Mater!
Maternis oculis qua fera scena patet!
Quæ tristis species, visuque indigna, cruentum
Nocturnis Natum cernere vulneribus?
Traditur imposita infami trabe, robore iniquo
Cogitur & mortis scandere triste jugum.
Undique militibus fufis, clamoribus actus
Turba, membra agre languidus ille trahit.
Hac videt, hac audit Mater, mœstissima Mater.
Maternis oculis hac fera scena patet.
Fadatos spectat crines, squalentia spectat
Ora, cruentatum spectat utrumque latus.
Spectat; & ingentes immenso aqualis amori
Udo singultus exprimit ore dolor.*

Ceu quondam deflet teneros acedula fatus,
 Quos nido impluxit agricola eripuit,
 Illa latens caca rapientem ut conspiciit umbra,
 Extemplo densis exilit arboribus;
 Ac modo pervolitans circum, modo proxima ramo
 Subsicens viridi tristitia persequitur
 Flebilibus sua fata notis; at durus Arator
 Ardentes surda negligit aure preces;
 Sic tanto abreptum pœnarum turbine Natum
 Cominus aspiciens assiduo Genitrix
 Irrorat malas, irrorat pectora fletu,
 Pene ipsam effundens ore ab anhelu animam.
 Ille via dudum fessus, longaque dolorum
 Enectus serit, dum reliquum properat
 Pergere iter, fœdi linquens vestigia lapsus,
 Procidit in mediam sanguinolentus humum.
 Procidit: aſt illum nodosis impia truncis
 Agmina protrudunt, ac validos humeris
 Congeminant ictus, queis vulnera latius hiscant,
 Cogitur O patiens tollere corpus humo.
 Hic Natus Matrem, Mater dulcissima Natum
 Conspicit. heu! vultus illico verte Parens.
 Præstat ab adſpectu Nati hoc te longius ire.
 Spectat aterque; heu! quam sauciat alterius
 Cor oculis alter! tristique alimenta dolori
 Mutua suppeditat mutuus ipse dolor.
 Ac velut ardenti calfactum lumine vitrum
 Calfacit elisis oppositum radiis,
 Aſt hoc transmissum reflectens mox jubar, ipsum
 Verberat, alternis percutiens vicibus,
 Haud aliter radii spectantis ab ore Parentis
 Ad Christi humentes adveniunt oculos.
 Hinc mox afflictam totidem simulacra feruntur
 Ad Matrem, ac tristes eliciunt lacrymas.
 Heu lacryma! heu pietas! heu Nate! heu Mater! amoxis
 Ecquod vos subito vis rapit in barathrum?
 Tem-

Tempeſtas animam vehemens demerſit, & alto
Infixam limo grande premit pelagus.
His curarum undis, atque hoc diſtracta doloris
Æſtu, explere gravem fundo animam aggreditur,
At fruſtra aggreditur. Quæ totos fuſa per artus
Vitali ſe ſe circumagat ſpatio
Copia ſpirituum, tutandum protinus, ad cor
Præcipiti ſe nixu undique proripuit,
Obſeſſumque tenet, circum vocemque aboriri
Cogit, & abruptos inde ciet gemitus.
Sic ſævis pectus ſtimulis tranſfixa doloris
Semianimis Natum ſemianimem ſequitur.
Femineo circum colles reboant ululatu;
Turba at in inſontem ſanguinolenta ruit.
Nec breve ſævitie ſpatium datur; impete magno
Urgetur, lentos dum movet ille gradus.
Infandum o ſcelus! & quantam non ultima Thetis,
Non artorum ingens ablueret pelagus.
Qua tibi ſub ſolo mammas Lea præbuit antro,
Aut tumidis aquor fluctibus evomuit,
Talia quæ reddis pro tot Stirps efferæ factis,
Tamque acri inſontem ſupplicio perimis?
At mihi ſub ſolo mammas Lea præbuit antro,
Aut tumidis aquor fluctibus evomuit
Talia narranti, cui non vox faucibus hæret.
Hæreat: & lacrymis Virginis addo meas.

Stabat juxta Crucem Jeſu Maria Mater ejus.
Poſuerunt me in lacu inferiori, &c.

D I A L O G U S

Inter Joannem, & Joſephum ab Arimathæa.

Jo. Quo ferar? aut qua me excipiant ſecreta vagantem
Antra? quibus juſti cauſam narrabo doloris?
Hinc fugere, hinc libet, & deſertas quaerere terras;
Hæc tædet vitam ſclerata vivere terra.

Luge

*Luge igitur miser, & crudeli excedito ab urbe.
O mihi dulcis Amor, scelerato funere adempte,
Eheu! dulcis Amor, blanda suavissima quondam
Lætitia, æterni posthac mihi causa doloris.*

Luge igitur miser, & crudeli excedito ab urbe.

Jos. Heu facinus, dira & memoranda mortis imago!

O una infelix, matrumque miserrima Mater!

Post Nati funus misera quid denique restat?

Heu facinus, dira & memoranda mortis imago!

Jo. Linque mihi questus, & lamentabile carmen:

Hiscæ ego namque oculis hæc ipsa miserrima vidi,

Atque horum pars magna fui, cum funera Nati

Ipse egomet vidi, vidique in funere Matrem.

J. Ast ego confossum telis miserabile corpus

(Triste ministerium) detraxi ex arbore nuper,

Sindoneque involvens mediis procul abstuli ab armis:

Dein hoc ipsa sinu Mater complexa tenebat,

O una infelix, matrumque miserrima Mater!

Jo. Ne mihi plura satis misero, neve adde dolores.

Sat tristes casus, tormenta sat effera vidi.

Deseruere omnes trepide diversa sequentes;

Unus ego, & Mater comites sumus usque secuti,

Vidimus & Nati coram lacrymabile funus.

J. Debuit ergo oculis haurire hæc tristia Mater?

Scilicet hæc etiam tantorum summa malorum

Defuerat misera, Nati ut crudele videret

Lethum, & Maternos sedaret funere vultus?

Cur nemo amovit, matremque moratus euntem

Infanda miseram subtraxit imagine mortis?

Jo. Immemor illa sui, summi immemor illa pericli,

Evolat infelix, turba se perditâ miscet,

Fida comes Nato: per tela iussit, & ignes:

Exanimis miseranda Crucem dein adstitit ante,

Ut Nati, utque suos geminaret concita luctus.

J. At dolor illius quæ verba expressit ab imo

Pectore, cum favos inter gemina arbore stridos

La-

*Latrones, legum quos iusta coercuit ira,
Indigno infelix pendentem e robore Natum
Suspexit, Natum, quem jam mirata sepultos
Conspexit vitæ revocantem ad munia manes,
Sedantemque maris fluctus, siccumque per undas
Progressum, & tenui satiantem pane catervas,
Auditum surdis, reddentem lumina cæcis?*

*Jo. Vidit, ne quæras fuerint quæ verba doloris.
Criminis ille expers, forma spectabilis unus,
Qui modo finitimas signis impleverat Urbes,
Seque Deum haud dubiis, si mens non cæca fuisset,
Undique prodigiis portenderat, ille scelestos,
Ille inter fures moriens extrema gemebat:
Hunc vidit Mater suprema in morte teneri;
Vidit, ne quæras fuerint quæ verba doloris.
Alter in alterius jactabat lumina vultum:
Filius in Matrem languentia, Mater in illum
Lumina defigit; visu dolor angit utrumque
Savior, & gravius crescit sub pectore vulnus.*

*J. Credo equidem Nato fuerit pars summa doloris
Despicere adstantem tanto in discrimine Matrem,
Cui genus infandum mortis, cui tristia fata
Celari optasset, miseramque abscondere cladem.
Certe olim Joseph, qui Christi fertur imago,
Invidia fratrum, atque odio periturus acerbo,
Ah! precor, ah! dixit, lateant hac funera Patrem.
Cura fuit Patris ne acciderent hæc tristia ad aures.
Quis dolor? hic Mater spectaculo interfuit atro.*

*Jo. Vidit amans, & amata nimis crudelia Mater.
Toto sanguinei manabant corpore rivi,
Tergere nec poterat manantes corpore vivos:
Horrebant niveis feralia vulnera membris,
Nec poterat niveis abstergere vulnera membris.
In fessos cervix humeros collapsa cadebat,
Nec poterat cervicem olli fulcire cadentem.*

J. Ecquis tum Matri cernenti talia sensus?

Jo.

- Jo. *In speculo veluti quæ reddita fertur imago
 Exprimit exemplar, & partes exhibet omnes,
 Sic spectans Mater crudelia vulnera Nati,
 Hac eadem passa est, totidemque in pectore sensit.*
- J. *Ergo queis Natum populus mactaverat aris,
 His dolor infando mactavit vulnere Matrem.
 At non hac Patrum fuerant decreta priorum.
 Si tener avulsus patriis ab ovilibus agnus
 Aras imbueret, non aras imbuit ipsas
 Agna parens; sed enim inverso nunc ordine rerum,
 Filius, atque una Mater mactatur ad aras.*
- Jo. *Credo equidem medio voluisset turbine eandem
 Pæna eadem, summo nisi quod servata Parente est.
 Tum vero ingemuit magno externata dolore,
 Cum spectans populus morienti illudere cepit,
 Atque caput risu quassans convicia fudit
 Semianimem in miserum, vomuitque nefaria verba.*
- J. *Nec genus indignum Tellus absumpsit hiatu?
 Nec Pater irato demisit fulmina calo?*
- Jo. *Sic erat in fatis; dura atque asperrima quæque
 Debuit ipse pati, fuit irreparabile lethum.
 Ad Calum tendens ardentia lumina frustra,
 Oravit pacem Genitrix Nato; sed respuit isthæc
 Vota Pater, sola & miserata est funus acerbum,
 Fatalem potuit sed non avertere cladem.*
- J. *Infelix nimium, in nimium servata dolorem!*
- Jo. *Quid referam quali fuerit tunc saucia cura,
 Cum Natum audit donæ hac extrema petentem,
 Clamantem, Sitio: gelidis restringere lymphis
 Illa sitim voluit, sed non restringere lymphis
 Posse datum. Agarris flagranti languidus astu
 Filius arenti jacet Ismaellus arena,
 Et frustra Mater deposcit fluminis haustus.
 Sume animos Agar, jam dulcis rupibus altis
 Fons micat, optatas en elicit singulus undas;
 At Virgo infelix tristi persusa veneno*

Præberi vidit sitienti pocula Nato.

- J. *Gentis Idumæa nimium scelerata propago!*
Hæccine pro meritis reddis fera munera? quondam
Ille tuos inculta inter deserta Parentes
Eductis de caute undis (mirabile visu!)
Potavit, tu sicca acri præcordia felle
Sæva rigas, morientis & ora adspergis aceto?

- Jo. *Quale fuit misere inflictum sub pectore vulnus!*
Cum jam casurus supremo victima Patri,
O Mulier, dixit, nam hæc verba novissima dixit,
Filius ecce tuus; dixitque mihi, en tua Mater.
Ut se materno privari nomine sensit,
Tum visu exanguis mansit, tum pectus honestum
Percussit, voluitque mori, ac se affigere trunco.

- J. *Tam magnæ natus tu ne ergo ferere Parentis?*
Non equidem omnino deserta videre Mater.

- Jo. *Contigit heu misera quam dispar pignus amoris?*

- J. *Ah quæso solare tuam, solare, Parentem.*

- Jo. *Illâ animo infixum gerit immedicabile vulnus.*

- J. *Addi vulneribus sed nondum vulnera cessant.*
Ut lacerum eripui corpus, flens anxia Mater
Accurrit, saxoque sedens complexa cruentum est,
Lustravitque pedes, fixas & cuspide palmas,
Frigida dein mansit, gelidoque simillima saxo.

- Jo. *O Mater, non jam Mater, sed flentis & orbæ*
Infelix simulacrum! at quid mœstissima dixit?

- J. *Multa quidem miscens singultibus omnia, dixit:*
Hunc ego Te aspicio? quantum mutatus ab illo,
Qui mihi Te obtuleras prima florente juventa!
Ni Te sanctam animam fatali linquere trunco
Vidissem notos vix possem noscere vultus.
Non etenim fax illa oculis tranquilla remidet,
Nec tuus ille decor, roseo nec candor in ore.
Hinc tui crines, fuerant qui vincula amoris?
Effuso manant fœdati sanguine crines:
Hæne manus, albis fuerant quæ plene hyacinthis,
Hinc

*Hinc pedes nivei, toties quibus oscula fixi?
 Heu duri plantas clavi fodere, manusque!
 Non hæc facta hominum rabie, sed facta ferarum
 Vulnere, nil sani est, unum sunt omnia vulnus.
 Heu Nate! heu facies! heu lumina cara, manusque!
 Confossa heu telis misere, laniataque membra!
 Ite, & sacrata tumuli requiescite in umbra:
 Una ego sacrata tumuli sed condar in umbra:
 Corpore si vetitum est, animo simul esse juvabit.*

Jo. Virginis heu crudo transfixum vulnere pectus!

*J. Tu, si qua est pietas oro, succurre Parenti;
 Nec blandis pigeat curas avertere dictis.*

*Jo. Ipse meis lacrymis casu percussus acerbo
 Solamen cuperem; nimis alte est vulnus adactum,
 Ut Nati funus vidi, Matremque dolentem.
 Cernat sed tumuli decoratum corpus honore;
 Luctibus in tantis fuerint solatia Matris.*

*J. Exigua ingentis sunt hæc solatia luctus;
 Cura hæc venturos hærebit fixa per annos.*

*Jo. Nostra pii quoties volvent monimenta nepotes,
 Tantorum relegent una monimenta dolorum.*

*J. Ipse etiam tumulo inscribam miserabile carmen;
 Idem fecit amor Nato, Matrique dolores.*

Dialogus alter in idem argumentum, sub iisdem nominibus a duobus aliis Discipulis Academicis alio anno confectus, & habitus.

*Jo. Hucine perveni vivus rerum? hæccine nostris
 Luminibus tandem spectanda horrenda malorum
 Congeries, scelerumque fuit? tantum ne furori,
 Barbarique datum? quanam tam barbara corda?
 Qua tanta in superos animis mortalibus ira?*

*Jos. Hunc ego Te aspicio rerum pulcherrime Jesu?
 Cui de Te tantum licuit? quæ dextera tantum
 Patravit facinus? quæ tanta insania mentis?*

Non

- Non vestri generis non vestri nominis hostem,
 O miseri Isacide, at vestras spes proditis, atque
 In vos, & vestros saviistis eade nepotes.
- Jo. Nam qua me mundi, qua nunc capit ultima tellus,
 Trito ubi nulla hominum pateant vestigia gressu?
 Quæ miserum antra tegunt Phœbææ impervia luei,
 Languida uti longæ per amica silentia noctis
 Elicitant amplum lacrymarum lumina fontem?
 Quid tantum cesso scelerata excedere terra,
 Quam (horrendum facinus!) divino sanguine nuper
 Sacrilegæ sparsere manus? nec inhospita quero
 Litora, ubi rabidis mecum lacrymantibus urfis,
 Tam miseranda querens lacrymarum solvar in imbrem?
- J. Nec quidquam vobis tam duras molliit iras
 Pulchrior humano veniens in corpore forma?
 Non mortale sonans vox, & celestis imago?
 Quin ante adspectum ipsius Genitricis & ora
 Maternos Nati sœdastis funere vultus?
- Jo. Quid Matrem memoras? nimium mihi cruda retractas
 Vulnere, tanta meo ne instaura alimenta dolori.
 Mater, non ultra Mater, mecum ardua montis
 Culmina conscendit, mentemque animumque virilem
 Gestans, cum fugeret sociorum exterrita turba,
 Carpsit iter, medios Natum comitata per hostes;
 Nec dolor, aut pietas materni cordis euntem
 Tardavit, tantum quid enim tardaret amorem?
 Mecum eadem stetit ante Crucem, mecum omnia vidit
 Tormenta, atque animum præsens per singula verit.
 Quanta heu, quotque dedit miserandi signa doloris?
 Funeſtas rupes, funesta & culmina testor,
 Quæ motu insolito indignos miserata dolores
 Contremuere, imæ sonitumque dedere caverna.
- J. At mecum complexa fui miserabile Nati
 Extinctum corpus, lacerosque immaniter artus
 Inspiciens propius, tremebunda lumina dextra
 Condidit, & lacrymis frigentis vulnere lavit,
- Et

*Et numerum mærens iterumque, iterumque recensens
 Plagarum, gelidis crebro dans oscula labris,
 Quanta heu, quotque dedit miserandi signa doloris!
 Vos duri, testor, lapides flevistis iidem,
 Marmoraque insolito inter vos confracta tumultu.*

10. *Vidit divinas lacerari cuspide plantas,
 Atque manus vidit, resonantes audit ictus;
 Haud aliter, quam cum positis incudibus enses
 Impiger incurvat faber, infringi audit ossa:
 Membraque tum vidit misere laniata flagellis
 Nodoso imponi Crucis atque incumbere trunco:
 Heu durum fulcri genus! & sitientia vidit
 Felle, & porrecto torqueri labra veneno.
 Quin eadem (infandum!) quis enim tam barbarus hostis
 Sævit in extinctos? ipsa & post funera vidit
 Transadigi, & lateri infligi nova vulnera aperto.*

11. *Ast cum defunctum trepidis complexa lacertis
 Illacrymans pressit materna ad pectora Natum,
 Non solum vidit crudeli vulnere plantas,
 Atque manus laceras, membra & laniata flagellis,
 Ast vidit, tetigitque simul, digitosque trementes
 Vulneribus, laterique manus immisit aperto.*

10. *Cumque sacro talis manaret corpore sanguis,
 Qualis, ubi, ut dudum sitientes Rusticus herbas
 Irriget, & cæli vitium compenset avari,
 Lenta supercilio clivosi tramitis unda
 Volvitur, exelisque cadens illisa lapillis
 Murmurat, & scatebris arentes temperat hortos;
 Illa ulnis utrisque Crucem complexa cruentam,
 Sanguine rorabat, madidaque in veste fluebat;
 Quo magis & Nati versabant membra cruoris,
 Hoc magis & Matri pondus crescebat amictus.*

11. *At neque tunc Nati tanto respersa cruore est,
 Ut nuper rubei lacrymarum flumine ocelli
 Rorantes, tunicasque omnes, ut ab imbre, gravabant.
 Non secus aquoreas ac si quis naufragus undas*

Effu-

*Effugiat, madidisque fluens in vestibus altum
Occupat adscensu scopulum, retroque frementis
Oceanis rabiem pavidus respectat, & iras.*

*Jo. Tum quoque flevisset; miseris est flere voluptas.
Unica, sed vetuit Nati constantia Matrem
Flere, & tam miseros lacrymis saturare dolores.
Ecce autem in Matrem convertunt lumina Turbae,
Intentisque notant digitis; caput undique circum
Crudeli quassant risu, probrisque lacessunt.
Ecquis erit misera mitis? sed acerbior illi
Pectus cura domat; probris nec plura movetur,
Quam pelagi rupes, rabidos quæ interrita ventos
Mole sua, & circum latrantes sustinet undas,
Cautibus illisa scindunt se in fragmina conchæ,
Hinc atque hinc lateri glomerata refunditur alga.*

*J. Pro! Tu morte tua conjux sanctissime Joseph,
Felix morte tua, neque in hunc servate dolorem!*

*Jo. Unius in Christi se se converterat ora,
Atque oculos, tantum Christo in moriente moratur.
Ille unam in Matrem defigit lumina, Matris
Heret in obtutu mœrens, matrisque dolore
Tantum tristatur moriens, ceu cætera nusquam
Tum tormenta ferat, placidoque sopore quiescat.
Ut speculo oppositum speculum, si quando reflexos
Reflectat radios iterum, atque retorqueat ignes,
Alterum inardescit luce alterius, geminatque
Ardorem æternum, radiorum & duplicat ictus;
Alter ita alterius curas exasperat, atque
Unius alterius crudeſcunt vulnera luctu.*

*J. Ut solet in speculo cerni spectantis imago
Ore, incessu, oculis, habituque simillima vero,
Nec facile a vera fictam internoscere possis;
Haud secus extincti Nati moribunda colores,
Et speciem induerat Genitrix, & lumina, & ora,
Atque docent solæ lacrymæ superesse Parentem.*

Jo. Auribus ipsa suis tandem suprema recepit

L

Man-

*Mandata infelix Mater, quum voce tremente,
 „ O Mulier, dixit, nam hac verba novissima dixit,
 „ Filius ecce tuus, dixitque mihi, en tua Mater.
 Hoc vale extremum Nati morientis ab ore
 Audiit, atque oculos sensim (quis talia fando
 Ifacidum, duri aut similis perjurus Iudæ,
 Temperet a lacrymis?) oculos, sua sidera, vidit
 Sensim deficere, atque instanti in morte natantes
 Extingui tandem, cum jam clamore supremo,
 In dextrum inclinans humerum caput, expiravit.*

*J. Extremos dedit amplexus, extremaque matrens
 Oscula, & extremis surdas clamoribus aures
 Perculit, & tumulo tandem destleta reponens
 Corpora, marmoreo confidit frigida saxo,
 Multaque, sola potest qua Mater dicere, quæsta est.*

*Jo. Ter conata loqui est Nato moriente, ter ora
 Frustrantur, faucesque dolor præcludit hiantes,
 Conceptaque iterum recidere in pectora voces.
 At si sacrato deponens marmore corpus*

*Quæsta est, fave age, quid tandem mæstissima dixit?
 J. Te hunc ego conspicio, hunc Te formosissime rerum?
 Hiccinè priscus honor, color heu! tuus ille, decorque?
 Vosne coruscanti stellarum implexa corona
 Nunc heu vulnificis circumdata tempora spinis?
 Lumina ne hac, hominum quæ corda oblita malorum,
 Turbatosque animos tranquilla pace juvabant,
 Cæca in nocte latent? anne hac, qua vincula amoris
 Casaries fuerat, nunc heu! sædata cruore est?
 Hæne manus, atque hinc pedes, quibus oscula fixi?
 Quis furor atroces egit violentus in iras?
 Anne superstes ego dilecti ut funera Nati
 Cernerem, & usque novo crescat mihi vulnere vulnus?*

*Jo. Quæcumque excipiat regio me & inhospita tellus,
 Et Nati, & Matris tristes narrabo dolores.*

*J. Quo me cumque feret fatorum incognitus ordo,
 Nate tuos, Materque tuos natrabo dolores.*

Jo.

- Jo. *O mihi amara dies, quam posthac semper acerbant
Semper honoratam, quantum aere vescar, habebo.*
J. *Te posthac, Te, sancta dies, dum vita manebit,
Prosequar & luctu, & digno venerabor honore.*
Jo. *O Nate! (J.) o Mater! (Jo.) vos postera noverit atas.*
J. *Ac vestri flebit memoranda exempla doloris.*
Jo. *O quibus infantis tam largo sanguinis haustu
Parta salus, Homines, sceleratis parcite factis,
Parcite lethali rursus suffigere trunco
Dilectum Matris dilectæ pignus amoris.*
J. *Sevitia hac rabidas Tortorum vinceret iras.*
Jo. *Ah Nato (J.) ah Matri (Jo. & J.) neutri renovate dolores.*

Conclusio.

Amantissimæ Matris pro amantissimo Filio susceptas, & a nobis pro ingenii nostri tenuitate commemoratas audistis angustias, quas nec vos audire, nec nos recensere potuissimus, nisi vos pietas, vestra nos in dicendo humanitas confirmasset. Expectatis nunc, opinor, ut, quas par est, gratias vobis animis linguisque adhuc faventibus agamus. Verum hujus luctuosissimi quo de egimus argumenti tractatione tantopere animo affecti sumus, tanta miseratione perturbati, ut ne nostrum quidem satis compotes simus, nedum explendo de officio solliciti. Quare quid ego officiosa verba persequar, in tanta animorum conturbatione? quos dolentis Virginis contemplatio totos sibi vindicavit, & vindicar, atque utinam in posterum perpetuo vindicet. Ergo *fac me Tecum*, ita ego, ita mecum unusquisque vestrum, omisso inter nos officio, conversoque ad Sanctam Matrem studio, *fac me Tecum pie flere, Crucifixæ condolare donec ego vixero.*

Utroque anno non satis certo.

IN LAUDEM
D. PHILIPPI NERII.

O R A T I O.

Vestras animi admirationes, cogitationesque hisce diebus, Auditores, quibus omnia Divini Amoris vocibus circumsonant, & Sancti Spiritus descensu totus Christianus orbis exultat, omnes ac totas ad Jerusalem converfas, inque Apostolis sic alte defixas esse vestra mihi pietas persuadet, ut vix quidquam aliud vobis adhuc occurrisset, nihil autem vos inde abstraxisset facile judicem. Pietatem laudo, idque præsertim hoc tempore æquissimum esse censeo, ut, quoniam beneficiorum, quæ ex divina hac charitate fluxerunt, participes sumus, eo spectemus animo, quo primum illa descendit, & erga eos veneratione afficiamur, per quos divinus ignis, quem *venerat Christus in terram mittere*, hujus alterius ignis ope primum accensus est, & inde per totum terrarum orbem longe lateque diffusus, ac disseminatus. Verumtamen a pia ista grataque meditatione tantisper revocare vos & ad novam Jerusalem, Romam, inquam, deducere mihi in præsens liceat. Quid ni autem liceat, si ea quæ vobis contemplanda proponam paullo ab illis videantur diversa, aut fortasse omnino similia? Adspicitis ibi homines ea una voluptate abreptos, quam ex divino Amore abunde percipiunt; hic Hominem adspicietis cum voluptatum illecebris strenue pugnantem, eodem amore æque vehementer oblectatum. Videtis illic eos, *qui relictis omnibus secuti sunt Jesum*; hic eum videbitis, qui ingentes oblatas divitias contempsit, respuit, amandavit, Dei amorem lucrum omnium maximum

ratus, atque adeo unum. Despecti, neglecti, abjectique propter Deum injurias atque contumelias devorarunt ii, quos hactenus spectastis; magnanimus honorum contemtor, hostisque infensissimus iste est, quem modo spectabitis. Utrobique in Deum amor adscendens, utrobique divinus in homines ignis descendens, utrobique prodigia, utrobique deliciae hominis ex Deo, deliciae Dei ex homine in sui admirationem nostros animos pertrahunt. Quis tandem iste sit, quem nunc vobis adspiciendum, atque adeo suspiciendum obiciam, omnium laudes admirationesque, quantæ possunt esse maximæ, sibi jure optimo vindicantem, jam satis, opinor, ex levi hac quasi adumbratione, vel me tacente, intelligitis. Nimirum ille est, quo Patrono lætamur, quo Duce confidimus, & (si reverentiam atque amorem consideres, ad nostri quoque vere Parentis, Ven. Gregorii Barbadici voluntatem) quo Parente gloriamur, Philippus Nerius, cujus laudes hodierna die breviter, & pro viribus celebraturus nihil aut huic temporis aptius, aut vobis audientibus accommodatius esse video, quam ostendere, quantopere Philippus Deum, quantopere Deus Philipppum amaverit. Et quidem hic mutuus amor illud est quod in Philippo inter cætera est omnium admiratione dignissimum, quo maxime Philippus est nobilitatus, quod omnium maxime Philipppo est proprium, ut diligens, & dilecta ejus anima merito illud Sacrae Sponsæ usurpare potuerit: *Dilectus meus mihi, & ego illi.*

Tot ac tanta sunt quibus homines ad Deum diligendum impelluntur momenta, ut monstro simile videatur posse quempiam existere, qui toto impetu, totaque animi contentione in Deum non feratur. Interim tamen mortalibus hanc vitam viventibus tam magna obiciuntur impedimenta, tam multi-

plices interveniunt curæ, tam variæ occupationes incidunt, ut inter portenta referri possit, quempiam nulla inde ratione disjungi, minima ex parte separari, & ita amare Deum, ut non solum nunquam intermittat, sed ne tantillum quidem remittat. Illa sane, quippe & numero infinita, & nulli non nota, ne abutar tempore, supersedebo recensere. Hæc vero numero fortasse non inferiora prioribus, ne evagemur longius, a Joanne omnia ad tria capita referente petamus. *Omne quod est in mundo*, inquit, *concupiscentia carnis est, concupiscentia oculorum, superbia vitæ*. Hi sunt malorum omnium, quotquot in humanum genus serpunt, & excurrunt sordidi pestiferique fontes: hi sunt tres illi Amores, qui a divino ut abstrahant, hominum voluntates sine ulla intermissione oppugnant, & (quod maximo cum mœrore dico) sapissime, ne dicam semper, expugnant. Oppugnarunt illi Philippum quoque, nunquam expugnarunt. Siquidem ea fuit amoris vis, ea magnitudo charitatis, ut vere ex toto corde, ex tota anima, ex totis viribus, toto vitæ decursu Deum unum amaverit, dilexerit, deperierit, & alii cujusvis generis amor, qui ex Deo non esset, omnem prorsus aditum intercluserit. Tentet iter, per me licet, negata via is amor hostis, ut semper nobiscum est, ita omnium teterrimus, tentet num illum possit a Dei charitate vel latum unguem divellere. Dii male perdant petulantes homines, qui in castissimum adolescentem impetum faciunt: At petulantiam excorior, vim non reformido; satis ille est alio amore munitus, satis tuto circumvallatus: jam vicit, adeoque cumulate vicit, ut in sua castra hostes pertraxerit, & ad longe meliora merenda stipendia deduxerit. Quid diu, noctu, clam, aperte Phrynes impudentissimæ Philippum adoriantur, & ita se ante eum per fraudem sistant, ut vel referre pudore de-

deterrear? Magna sunt hæc hominibus quamvis sanctissimis pericula, & iis etiam istiusmodi pugnarum dubius mars est, & anceps exitus. Sanctissimi sint illi licet, homines tamen sunt, humanæ infirmitatis haudquaquam immunes, ideoque vel ex iis nonnulli (dolet, Auditores, dicere, sed tamen dicam) ejusmodi certamina superare non valuerunt, & quicumque superarunt, ut superarent exquisitis corpus suum cruciatibus confecerunt. Non, ut aliis, est opus Philippo spinis, quibus volutetur, non torrentibus, in quos immergatur, non flammis, quibus circumsepia-
tur. Quamquam flammis, utique flammis ille defenditur, non iis quas homines, sed quas Divinus Amor excitat, non iis quæ corpus, sed quæ spiritum dulcissimo dolore torquent, & urunt, ut ad has, quæ extrinsecus obijciuntur, illecebras, quæque corpori adhiberi possunt blandimenta, nihilo magis quam marmorea statua, si ipsi contenti credimus, deliniatur: & statuam quidem oportuit eum esse, qui nihil ab ea Satanae ministra Phryne commoveretur; eam tamen statuam, ut Seneca vere diceret, quam Virtus, ut ego fortasse ad rem aptius, quam Virgineus in Deum amor, *posuit*. At hujusmodi pugna ipsa sua turpitudine castissimum Dei amatorem deterruit, deterrium removet, remotum avertit, ut proinde in ea victorem extitisse magnopere admirandum non sit. Quid si ei se se offerat honestiore facie, modestiore habitu, incessu decentiore divitiarum cupiditas, non illa quidem fordida & avara, quæ *nummos contem-
platur in arca*, non illa iniqua aut dolosa, aut violenta, cum aliorum detrimento conjuncta, sed quæ sine vitio, sine vi, sine injuria honestos quoque homines minime dedecet. Agite ergo Philippi Parentes, filiolum ad Patruum mittite, qui cum hærede careat, minime dubitandum est, quin humanissimis, & integerrimis Adolescentis moribus captus hæredem

ex affe scribat . *O cacas hominum mentes , o pectora caca !* Ad proximum Cajetæ collem invito vos , quo ille sæpissime divertit , ubi commoratur diutissime , ut in illa sacra cellula , ad ejus collis radices posita Christi e Cruce pendentis imaginem intueatur . O intuitum omnem divitiarum curam expellentem ! Videt ibi Christum Jesum , qui ut harum rerum pauperrimus vixerat , ita spoliatus omnibus Cruci affixus est . Ego ne , inquit , tam pauperis Domini famulus dives ? Magistri paupertatem docentis ego discipulus omnium bonorum copia circumfluam ? Ille , cujus sunt omnia , nihil retinuerit , ego quem carentem omnibus , ut omnes homines , natura constituit , oblata ab aliis accipiam ? Fugiam ergo hinc , si nulla alia ratione licet opes fugere , ut Christum sequar pauper pauperem . Ubi , amabo vos , ille beatus est , qui post aurum non abiit ? en qui etiam post se ipsum veniens aurum fugit . Fugit ille : ne tamen putetis , quia a Parentibus , & consanguineis remotus est , finem impositum esse divitiarum luctæ , quippe repudiatis quam sæpissime ingentibus pecuniis , vel eas negligendo , vel eos , qui offerebant , ut sibi eas haberent exorando , quia aliquando neque precibus , neque doloris sui significatione impetrare potuit , ne viri ditissimi hæres fieret , prodigio se defendit , morientem a Libitinæ , ut ita dicam , faucibus eripuit , & ad pristinam vitæ usuram restituit . Quis tanta molitus est , ut ditesceret , quanta Philippus ut pauper esset ? In tanta animi divitias reiicientis magnitudine minus miror honorum quoque contemptum , quo Ecclesiasticas dignitates , & earum quidem sublimes gradus invicta constantia recusavit . Unde hoc omnium terrenarum rerum odium incessit ? Non inveniebat in iis , quem ipsius anima diligebat . Noverat amantis illud , *Deus meus , & omnia , Amor meus , & omnia* . Desinant ergo hostes
Ne-

Nerium in posterum aggredi, finant amore suo quiete tranquilleque perfrui, nec tentent oblata terrestrium præmiorum specie a divinæ multo largioris cogitatione mercedis abducere. Quid enim proficiant, aut quid aliud consequantur, nisi hoc consequantur, ut quoties congregari velint, toties turpiter victi profligatique recedant? Jam enim ex iis, quæ proponunt, quibus capi cæteri consueverunt, id unum, ut audio, Philippo placet, quod nihil placet. Cælestia desiderat, ad cælestia adspirat, cælestibus acquiescit, totus flagrat divino igni, totus fertur in Deum, totus Deo addictus unum amat, unum expetit, unum quærit. Hinc noctu ad sacras ædes properare, hinc suavi excruciatu ardore vix ullam noctis partem somno tribuere, hinc in subterraneis locis vitam agere. Quid ibi egerit, quæ fuerint ejus cum Deo colloquia, quæ dilectionis tam eximie signa, quæ amantis voces, vos nostis Angeli, vos SS. Martyres, qui ejus suspiria, gemitus, lacrymas præ amore erumpentes & vidistis, & audistis. Ego certe quantopere intus animo afficeretur, quis ardor in precibus, quæ suavitas in contemplatione, non novi, hoc novi quod video, & ex iis quæ video etiam non visa non obscure coniicio. Video eum ambulantiem per vias, neque obvium quemquam salutantiem, video eum resecto pectore media hyeme euntem, ut quibus adurit internus æstus refrigeret, video procumbentiem humi, video ardentem corpore, oculis micantiem video. Quodnam inusitatum charitatis genus istud est, Deus Immortalis! quæ nova amoris vis, atque potestas! Alii solitudine opus habent, ut colligant se, ab hominum communione recedunt, ut populi frequentia, turbis, tumultibus non impediti otiose Deum contemplantur, Nerius inter homines solus est, nisi quod cum uno Deo est: alii flammam requirunt, ut

ac-

accendantur, hic nives ac gelu, ut eas temperet : fatis diligunt ii, qui ex toto corde, ex tota anima diligunt, hic non solum intus sed etiam extra, non solum corde, sed etiam corpore ita exardescit, ut eum exclamantem audiam; *cor meum, & caro mea exultaverunt in Deum vivum*, ut internus ille ignis cum animo præ magnitudine capi non posset, in corpus exundaret. Satis ne magnum, satis ne singularem, mirificum fatis Philippi amorem esse censetis? Jam nunc quidquid agit, amor est, quidquid loquitur amor est, quidquid cogitat amor est. Publica hospitia instituere, quibus excipiantur peregrini, curentur ægroti, eos ipsos adire, iis inservire, iis necessaria ministrare, pupillos alere, puellis in discrimen adductis opitulari, viduas sustentare, egenis pueris litterarum studiosis suppetias ferre, propria veste nudos contegere, parcissimam sibi appositam cœnam laborantibus fame dividere, peccantes ad gratiam revocare, confutare fallacia dogmata disseminantes, in errorum tenebris jacentes ad veritatis lucem adducere, errantibus viam commonstrare, dubios confirmare, solari afflictos, ingenio & voluntati uniuscujusque se accommodare, hæc Philippo ille persuasit amor, cujus caussa Proteo similis vultum pro re nata mutabat, aut, ut aptius dicam, æmulator Apostoli omnibus omnia fieri volebat, ut omnes Christo lucrifaceret, ille, inquam, quo ardentissime in Deum flagrabat, persuasit amor. Ac talis quidem tantusque erat, ut, quo minus ab aliis Deum diligi deprehendebat; eo ipse magis inflammaretur, quo aliorum tenuitatem suæmet charitatis magnitudine compensaret; ita Nilum ajunt, arentibus circum undique fluviis abundantiores in pelagus undas devolvere. Qua alia ratione Seraphim, si humanam carnem indueret, aut qui magis amaret? Non hominis in terra degentis hic amor est, sed ejus,

ejus, qui in cælo Seraphim æmuletur: æmulatur autem ille vim charitatis, qua non potest quin ad Deum adscendere toto animo concupiscat. Quis scilicet Jacob Philippo præstet, ut eo quo avidissime intendit, facillime ejus ope perveniat? Verum non est opus gradibus ei, qui uno saltu, uno volatu erigitur, & ictu oculi, vehementia dilectionis relinquit sensus, & non e terra sua, ut Abraham, sed e suo corpore quodammodo egreditur. Quod si quo abierit me interroges, respondebit Areopagita Dionysius; (*De D. Nom.*) *abii vagus in via cordis sui, extra se in Deum raptus est, nec sua jam vivit, sed vita Dilecti.* En quo spectabat ille cum diceret Deum ab eo non amari, qui Pauli amorem non exæquaret. Spectabat ad illud, *vivo jam non ego, vivit autem in me Christus.* En cur vitam sibi poenam esse profiteretur, & poenam omnium maximam, atque gravissimam: experiebatur in se, quod Areopagita docuerat; *amantem cum amante conjungi desiderare; quippe amorem esse cujusdam virtutis unifica.* En quorsum toties repetebat illud, *cupio*; quod amoris expressum vi ab ore excidebat, cum cætera conticescens, ne animadverteret quispiam, in cor remitteret: dissolvi cupiebat, & ab hujus corporis compage expeditus cum Deo esse. Sed vivat, nec invitus vivat; jam enim secum habet, quem tantopere concupiscit. Quemadmodum enim amor in causa erat cur ille ad Deum adscenderet, ita ut Deus ad illum descenderet perficiebat; & quidem quam magna, quam illustria, quam singularia præsentiae, benevolentiaeque divinæ par pari, si ita loqui fas est, referentis argumenta fuere? An ille a corporis voluptatibus divina charitate plenus abhorruit? Ei Deus lumbos præcinxit, ne sentiret in posterum legem in membris suis repugnantem legi mentis suæ, eaque virtute corpus ipsum donavit, ut divinum nescio quem

quem odorem emitteret ad quoslibet in aliis quodque libidinum tumultus sedandos potentissimum. An divitias recusavit? Illi egenis benefacere, Xenodochia instituire, extruere sacras ædes cupienti, ne petenti quidem, at movente Deo, effuse nummos largiti sunt Viri Principes, atque Cives, & tenuiores etiam, quantum potuere, certatim erogarunt, immo etiam mulierculæ longe prudentius, quam illæ quondam Hebrææ, e digitis avulsos annulos contulerunt. An fugit honores? Apud omnes eum esse in honore Deus voluit, viros nobilissimos permovendo, ut, quæ infimi hominum hominibus excellentioribus solent ministeria, illi Philippo præstarent, &, ut omittam cæteros, eam mentem Summis Pontificibus iniiciendo, ut eo consiliario in rebus gravissimis uterentur, sedentem recto capite adhiberent, & quæ pueros majoribus natu decet, reverentiæ signa osculantes ejus manum exhiberent. Exclamet si quis vult, sic (*Esther.*) *honorabitur quemcumque Rex voluerit honorari*, non alium fortasse invenias, quem sic Deus honorari voluerit præter Philipum. Sed hæc posteriora non postulat, prioribus autem contentus non est: alia Divini Amoris in se argumenta desiderat. Illum ipsum Amorem suum expetit in se ita descendere, ut repleatur totus ipso; transferatur in ipsum, habitet cum ipso, ipsius magnitudinem intra se corde, & anima complectatur. Quid quæris Philippe? quem totus non capit Orbis, intra exiguos cordis & pectoris tui cancellos concludes? An te latet quod Meletius profitetur apud Epiphanium, (*hæres.* 72.) *dilatari oportet cor ejus, qui inhabitantem spiritum recipere velit?* Fac temperes cupiditatem immensam, & ne ultra quam fas est homini consequi requiras. Verum næ ego ineptus, qui quod nulli hominum contigisse noverim, id judicem nec posse Philippo evenire, neque interim reputem Philip-
pum,

pum, esse qui flagitat. Ille flagitat, & ipso Pentecostes die ignei globi forma, cum ejus obsequi voluntati, & amoris respondere vellet, *insiluit super eum Spiritus Domini*. Rapi sentio me iterum eo, unde vos ab initio deduxeram, & ad Apostolos animo, & cogitatione referri. Supervenientes in eos ignitas linguas suspicio, quibus mirum in modum inflammantur; in hunc descendantem ignem admiror, quo magis accenditur. Illi amore ebrii musto madere existimantur; hic præ amore totus concutitur, labat, nusquam potest consistere. Illi inde egressi prodigia innumera, quacumque incedebant, operabantur: hic qua effusis ad Deum precibus, qua Crucis signo, qua manuum tactu, qua imperio vocis, qua vestibus ipsis, & crepidis, tamen multa prodigia patrat, ut inanem operam sumat is, qui velit omnia percensere numerando. Non imminuendi Dei in Apostolos beneficia gratia dicam, at Divino Amori, fatis fuit eorum capiti insidere: in Philippi præcordia delabitur, eum totum pervadit, cor amplificat, pectus extollit, costas perrumpit. Quid tu Meleti, qui cordis amplitudinem postulas, an ejusmodi legem præscripseras apud Epiphanium, ut hac ratione dilataretur cor ejus, qui inhabitantem spiritum vellet excipere? Enimvero tam magna non requisivit, sed fatis fore putavit illam latitudinem cordis, quam Davidi, & Salomoni olim concessam legimus. Inaudita, nova, homini nondum impertita sunt hæc, ut non solum intus in corde augeretur amor, sed cor ipsum amoris sedes extenderetur, ut fatis amplius esset eximiæ, nec aliis communi divinæ charitati locus. Sibi gaudeant quantum libet alii, & jure gaudeant secum amanter benevoleque Deum O. M. egisse. Alii cor divinis petitis jaculis ostendant, alii in ipso divinum nomen divina manu inscriptum efferant, alii insculptum
com-

commonstrent. Magna sane ista sunt, & invidia, si ullum hic habet invidia locum, dignissima; nihilominus tamen moderatio quædam amoris in his apparet, qui sensim se se insinuat, & leviter permeans invitat, blanditur, allicit, & *admissus circum præcordia ludit*; (*Pers.*) nisi Sapiensem audire malis, *magna cum reverentia disponit*, nec in eos ante se se infert, quam ipsimet aperuerint, ex ea per Joannem (*Apoc. 3.*) promulgata lege, *si quis aperuerit mihi, intrabo ad illum, & cænabo cum illo, & ipse mecum*. At in quem violens irruit, cui cor stupente natura amplificavit, cui non expectans ut sibi fores aperirentur, & ultro sibi aditum patefaciens pectus infregit, & perpetuo infractum voluit, quasi perpetuo apertam per illud patentemque viam sibi nulla interposita mora ingredienti munierit? quod si Deo apertum est Philippi cor, quidni Philippo quoque adhuc in terra degenti aperiantur cæli, recludantur Paradisi portæ, cælestes voluptates, gaudia, delicæ vel viventi innotescant? Ita sane: non unus Stephanus vidit, non unus Paulus cognovit, quæ non licet homini loqui. Quin ille semel, & morti proximus vidit; hic semel hanc vitam vivens raptus est in cælum. Quoties Philippo in remota cella sacris operanti illius æternæ felicitatis gaudia Deus ostendit, & quæ parata erant ipsi præmia ob oculos posuit? quis referat quoties illum e terra Deus sustulit, & sursum ad se abripuit? Erat enim hæc virtus eadem amoris, ut & Nerius ad Deum, quasi ignis sursum tendens, impelleretur, & Deus Nerium, quasi magnæ ferrum pertrahens, amplecteretur; quis inquam referat quoties illum e terra sustulit? cum jam inde ab adolescentia, jam tyronem in hac sanctitatis militia prope quotidie usque ad senectutem, immo ad extremum vitæ cursum istiusmodi amoris sui argumentis illum exercuerit; e cæterorum propterea nume-

mero excipiendum, de quibus Bernardus loquitur, cum docet hujusmodi raptus esse *sabbatum mentis*, in quo emeritus (non tyro) in laboribus universis vivit absque labore. Nunc vero Philippum equidem non interrogem, num satis sint hæc amoris divini signa, an postulet majora. Tanta est enim, qua ex S. Spiritus in ipsum ingressu perfunditur suavitas, ut exclamare cogatur, *sat est Domine sat est, contine quæso undas gratiæ tuæ: recede a me, quia non possum sustinere magnitudinem dulcedinis tuæ*. Hæc audienti mihi prope attonito vox deficit, & admirationi potius, quam Orationi locum relinquendum puto. O illustre amantis exemplum! o amplissimam amoris mercedem! Pro virili sequamur exemplum; amemus, ut possumus, quantum possumus, & enitamur, si fieri potest, plus etiam quam possumus. Amemus, & amabimur.

I. Philippus præ amore lacrymatur.

*Imas quæ Nerii sic torquet cura medullas,
Mollibus ut lacrymas exprimat ex oculis?
Obvius occurat si quem malus abstulit error,
Et quem precipitem in fas agit, inque nefas,
Seu quem pœniteat vita olim turpiter actæ,
Et se se Christi proiicit ante pedes,
Non lacrymis metas Nerius, non tempora ponit,
At vena nunquam deficiente cadunt.
Qualis ab aerii decurrens vertice montis
Rivus inexhausto profilit e lapide.
Seu tenebras Vesper, seu lucem portet Eous,
Plorantem veniens Sol videt, atque abiens.
Quid nitidos, quid flendo tuos corrumpis ocellos,
Quæve Neri, pectus, dic age, cura premit?*

Hei

*Hei mihi magna mea sunt vitæ crimina! sunt hæc,
Hæc sunt immensi causa doloris, ait.
Quæ sunt ista tua incorrupta crimina vitæ?
Ecquæ iusta tibi causa doloris inest?
Quidve nocens faceres, si sic sine crimine defles?
Istæ me lacryma, me dolor iste decent.
Ast ejus lacrymas ne quis putet esse doloris:
Hic dolor, hæ lacryma, credite, amanti erant.
Peccas? fixa animo alti injuria Numinis hæret:
Culpa hæc deleta ast? gaudia mentis habet.
Hic hærens animo dolor, atque hæc gaudia mentis
Eliciunt lacrymas, Lacrymæ amoris erant.
Frustra dissimulat, nam Amor illum prodit: obortis,
Sicut apes cytiso, pascitur hic lacrymis.
Quidquid agat, luget, quoquo vestigia torquet,
Lugendi causas mille ministrat Amor.
Fragrantes variis si visat floribus hortos,
Seu te flebilibus scriptum Hyacinthe notis,
Seu te prospiciat, qui Christi immania mæstis
Instrumenta necis exprimis in foliis,
Quem flexo innocui cingunt diademate sentes,
Parvaque stat medio fixa columna sinu,
Tergemina virides quo pendent cuspide clavi,
Suspirans Neriùs, atque ciens lacrymas,
Floscule, qui extincti promissis mihi vulnera Christi,
Cresce meis, inquit, floscule, de lacrymis.
Excipit interea verba intercepta dolore,
Myrtorum & levi in cortice scalpit Amor.
Et sequitur flentem; flens altius suspicit ignes
Sive tuos Deli, Delia sive tuos.
Flens legit Hebræi lugubria carmina Vatis,
Carmina Jordanis cognita litoribus.
Flens stat, flensque sedet, flens ambulat, omnia flendo;
Solvitur, ut gelida Sole calente nives.
Nutrit Amor fletum, sic fletus nutrit Amorem:
O Amor, o fletus, crescite uterque magis.*

Crea

*Crescite in immensum: vasto sed gurgite ab illo
 Rivulus ex oculis defluat inde meis.
 Non fontem mihi pandit Amor; fons iste Philippi est;
 Davidis fontem tu mihi pande dolor.*

II. Deus Philippum exundanti replet gaudio.

*Candida cum se se nubes demittit ab alto,
 Ut maris e vasto gurgite potet aquas,
 Illam ceruleus cupidis amplectitur humor
 Ulnis, ac totam permeat: illa gravis,
 Nec lymphas cohibere potens emergit, & agros
 Fundit in arentes gaudia Ruris, aquas.
 Jamque novis vestitur frondibus arbos,
 Floresque attollunt per nova prata caput.
 Hic spectare juvat nitidas per lilia guttas
 Ludere, & hic rubeas luxuriare rosas.
 Latantur circum montes, campique virentes,
 Excitat Agricolas certa futura seges.
 Haud aliter totum caelesti fonte Philippum
 Fonte voluptatis imbuit ipse Deus.
 Huc si quem tristis fortuna tenaciter urget.
 Letitia exundat Nerius; inde bibas.
 Christo ut Joannes, tu sic incumbe Philippi
 Pectori, & ex illo gaudia fonte bibes.*

I. Philippus præ amore vigilat.

*Sol nostras postquam lustravit lampado terras,
 Occidit: & vulgus, Sol requiescit, ait.
 Verum alias subter radianti lampade lustrat
 Terras, ignivomis irrequietus equis.
 Quisque putat Nerium somno lenire labores,
 Texit ubi placidis omnia nox tenebris.
 Verum sacra jacent qua subterranea busta,
 Huc vigilans intrat, repperit hic quid agat.*

M

Nil

*Nil mirum, si lustrat humum noctesque diesque
 Sol radiis; cursum conficit ille suum.
 Ast homini natura dedit requiescere noctem:
 Cur levat haud somno membra Philippus? amat.
 Ille diu cunctos ad amorem invitat Amoris:
 Noctu quarit, quem diligit ipse sibi.
 Noctu Sponsa vigil sic Tu quoque circumis urbem,
 Sponsa, o amore vigil! Neri, o amore vigil!*

II. Deus Philippum dormire non patitur.

*Quem modo nocturna perpeßum frigora bruma,
 Nunc hac, nunc illac acer agebat Amor,
 Quem vos orantem vidistis sidera nuper
 Templorum ante sacras procubuisse fores;
 Qui ad vos Heroum Cineres per opaca locorum,
 Perque hypogæa pedem nocte tulit vigilans,
 Ut longis fessos curis suffulciat artus,
 Denique in exiguum se tulit ille torum.
 Quisquis adest linguis faveat, languentia claudet
 Vix tandem Neri lumina sera quies.
 Alma quies animi; somne o dulcissime, tandem
 Claude, precor, Neri lumina, somne veni.
 Ille quidem parvo reclinat membra cubili
 Languida; sed claudit lumina nulla quies.
 Ecquis fert madidum lethæo rore papaver,
 Ecquis somniferis tempora spargit aquis?
 Cur non vel flatu Zephyrus, vel murmure rivus,
 Vel blando hic somnium gutture suadet avis?
 Infelix toto fundens suspiria lecto
 Assidue incensum versat amore latus.
 Nunc jacet extrema in sponda, nunc dura relinquit
 Stramina, & in gelida membra reponit humo.
 Audistis? videor mihi certe audire: Philippus
 Nescio quid certe conqueritur vigilans.*

O Deus

*O Deus, alme Deus, flammis tandem addere flammæ
 Parce, precor, nimis æstibus intus agor.
 Uror, ceu stipula flamma crepitante cremantur,
 Horrida cum dumis rusticus arva secat.
 Ah Deus abscedas! sublimi vertitur axe
 Sub tardam Arcturi Parrhasis ursa manum.
 Hinc paululum abscedas; nunquam velabit amictu,
 Donec ades, fusco lumina nostra sopor.
 Quis queat interea divinas dicere voces,
 Cum Deus insomnem detinet alloquio?
 Ille vigil multa consumsit tempora noctis:
 En sopor incertus lumina fessa tegit.
 Ipsa sed in somnis dilecta occurSAT imago,
 ArdenS quæ Nerius vulnus in ossa trahit.
 Hanc ille adspiciens jejunos pascit ocellos,
 Ignes hæc illi suscitât usque novos.
 Suscitât, & nisu trahit ardor in aera; somnus
 Hinc male sopitis decidit ex oculis.
 Ac veluti medio montis quæ clauditur antro,
 Angustis se se proripuisse locis,
 Inque suum ferri rapidissima nititur orbem
 Fusa per aerias ignea flamma vias;
 Haud aliter Nerii casto circum undique fervens
 Erupisse sacer pectore gestit Amor.
 Hinc illum magno trahit ardor in aera nisu.
 Tollitur e lecto, Te sequor, inquit, amans.
 Deque cavis alto prospectans astra fenestris,
 Quæ rutilum spargunt aethere fixa jubar,
 Astra, sinu vestro num tantum clauditur ignis,
 Angusto quantum in pectore alit Nerius?
 Nox fugit interea; prospera o dulcissime somne,
 Tuque Amor a Nerii pectore cede, precor.
 Nunquam ab Diis Amor satur est; nec perpeti amantis
 Exiguo potis est tempore dissidium.
 Felicem o Nerium! & nox o tibi candida! & o tu
 Lectule divinis sacre beate jocis,*

*Longa, Philippe, tibi ne sit mora, nec tibi nocte.
 Ullus sit vigili prateriisse labor,
 Venerit illa dies, qua sublimi altior axe,
 Mortali erumpens carcere ad aetheras
 Spiritus evadet sedes, dulcissimus almo
 Sponsus ubi excipiat, detineatque sinu.
 Hac meta, hac statio; recubantem Numine in ipsa
 Hac aeterna, Neri, Te manet una quies.*

I. Philippus amore insanit.

*O rem ridiculam, oppido, & jocosam!
 Ridete o Pueri, Viri, Senesque:
 Ecce Urbe in media senex Philippus
 Doctrina, studiis, & arte magnus,
 Major moribus, integraque mente,
 Sacro munere maximus sibi ipse,
 Nunc prorsus hominum immemor, suique
 Nugis obsequitur senex facetus:
 Ridete, o Pueri, Viri, Senesque.
 En nunc militis ante templum Divum,
 Attrectat leviter, fricatque barbam;
 Nunc lento graditur levis per Urbem
 Passu, & fasciculum manu e genis
 Expertem retinens odoris omnis
 Crebro naribus admovet decenter.
 O rem ridiculam oppido, & jocosam!
 Quid narrem ut rubei coloris imo
 Indutus tunica regente talos,
 Nec non calceolis revinctus albis,
 Se totum adspiciens, sibi que plaudens,
 Ut Pavo inter aves nitente cauda,
 Apud se lepide excipit potentes
 Viros ridiculus, jocosus hospes?
 Quin coram populo furore captus
 Alterno pede saltat, & choreas*

Solus

*Solus instituit patente luce ;
 Non Arcam ante Dei Propheta ut olim ,
 Ast in quadriviii & angiportis .*
 O rem ridiculam oppido & jocosa !
*Sed quid dissimulo , mororvè ludens ?
 Silete , o Pueri , Viri , Senesque .
 Res mira est nimis , & nihil jocosa :
 Non Philippi agitat furor cerebrum ,
 At mentem aethereus perurit ardor ,
 Nugisque obsequitur Senex facetus ,
 Flammam ut temperet astuantem amoris ;
 Quem tali ille modo ni relaxet ,
 Qui tanto valeat valere ab astu ?*
 Silete , o Pueri , Viri , Senesque :
*Res mira est nimis , & nihil jocosa .
 Nunquam desipuit minus Philippus ,
 Quam cum desipuit flagrans amando .
 Quis prudenter agendo tam sapit quam
 Stulte agendo , at amans sapit Philippus ?*

II. Deus Philippum serio agentem per ludum impedit .
 Ode Sapphica desideratur . Vide Præf.
 ad Lectorem .

Ne vacuus relinquatur locus , habeto iterum

De Philippi Lacrymis .

O qui Supremo Numini ,
 Ministri adestis Angeli ,
 Jam conscii Neri omnium
 Alte abditorum sensuum
 In intimis præcordiis ,
 Adeste formosissimi .
 Vos o , misellum languidum
 Tunsam retunsam , dicite ,
 Quæ cura vexet corculum .

DE D. PHILIPPO

*Videtis? ille amabilis
Vester sodalis Nerijs,
Ille ille purus moribus
Intaminatis Angelus,
Heu! suave largo proluit
Os lacrymarum flumine, &
Longos trahit suspiritus.*

*Heus vos, misellum languidum
Tunsum retunsum, dicite,
Quæ cura vexet corculum;
Non lacrymæ pauxillulum, aut
Suspiritus creberrimi
Sinunt Philippum proloqui.*

*Is præpotentis saucius
Ad intimas medullulas
Divini Amoris spiculo
Luget, liquecit, ingemit,
Illas ocellis exprimit
Divinus ignis lacrymas.*

*O lacrymæ dulcissimæ,
Dulcissimi suspiritus,
Divini Amoris indices.*

*O corculum tenellulum,
Vi lacrymarum jam obrutum,
Totum solutum in lacrymas,
Ut nix micantis solvitur
Solis calente lampade.*

*O ter beate lectule,
O ter beata cellula,
Anhelitum, suspiritum
Testis mihi fidissima,
Quam continenter Nerijs,
Et stans sedensque & ambulans
Quocumque se se verteret,
Suis rigabat lacrymis.*

O vos beati, o hortuli

Quos

Quos sepe¹ adibat Nerius
 Lasso ut gementi languido
 Daret quietem corculo.
 Seu te videret flebili
 Inscripte signo floscule,
 Seu te virenti fronde, qui
 Insculpta Christi barbara
 Sæva arma mortis exprimis;
 Nunc uberes erumpite
 Dulcissima mi lacrymæ,
 Et cara, ait, suspiria.
 O quam libenter intimo
 Vos vos foverem pectore,
 Amabilissima nota
 Dolorum Amoris unici.
 En lacrymarum flosculos
 Imbre irrigat fluentium,
 Et sensuum impos concidit.
 Huc vos adeste o Angeli,
 Et corculo tenellulo
 Præbete præsens pharacum.
 Ah ah parumper sistite
 Vos lacrymæ, vos suspiria;
 Namque hoc tenellum corculum
 In vos solutum lacrymæ
 Totum ex ocellis effluet.
 Quin crescite o suspiria,
 Et crescite o vos lacrymæ:
 Ut lacrymas Amor foveat,
 Alunt Amorem lacrymæ.

I. Philippus amore ægrotat.

O qui jacentes corpore languido
 (Quos dura curru vectat aheneo
 Mors inferas raptura in ades)
 Paonia relevatis arte,

Huc, huc: Philippum fata minudentium
Cingunt ovantes agmine februm
Morbi: arbitram vita, necisque
Mors parat invidiosa falcem.
Heu quassat artus ager anhelitus!
Pallore tincta funereo gena,
Et clausi ocelli, jam imminentem
Interitum referente vultu.
Herbas potentes ferte, salubribus
Et mixta succis pharmaca. pharmaca,
Herbaque nil profunt: stupentes
Igni agedum revocate sensus.
Ast ille quantis aestuat ignibus!
Ferventque magnis ossa caloribus,
Imaque liquantur medulla.
Frigidulas adhibete lymphas.
Sic cum aura circum ludit amabilis,
Rivus jocosus vel pede proluit,
Flores reviviscunt labantes,
Quos rabies perimit Leonis.
Vis nulla lymphis: os nihilo minus,
Et pectus ardet; Parcite pharmacis,
Non illum acribus torquete flammis,
Frigidulas removete lymphas.
Non arte vestra Nerius indiget:
Amore languet. Fulciat, illico
Proh! floribus, proh! stipet illum.
Sponsa suis, sacra Sponsa, malis.

II. Deus Philippo pellendi morbos facultatem dat.

Astra super, solemque super, qua purior aether
Spargitur, & persusa nitent pura omnia luce,
Tollitur Aeterni Regis solium. Omnia quae sunt
Inle creat, legesque Orbi fert aquas, & uno
Astra potens, Terrasque potens, atque aquora nutu
Con-

*Concutit: immotum pedibus substernitur olli
Fatum, Sors, Natura, Locus, quaque ordine certo
Metant diversos labentia tempora motus.*

*Hac de sede Deus, terras unde arduus imas
Despectat, Nerium atque agrum corpus amore
Conspicit, atque infit: Subrectis auribus omnes
Prona bibit voces natura, illasque perenni
Interea Fatum famulans adamante notavit.*

*O nobis dilecte Neri, sua premia habebit,
Qui tibi nunc vires delassat imagine morbi,
Nostri Sanctus amor: fuga morbi premia sunt.
Sit licitum quodcumque voles, Naturaque voci
Pareat usque tua, jubeo, stupidusque Philippi
Ad nutum paria his cernat miracula Tivris,
Qua olim Jordanis, mirataque Bethana vidit.
Scilicet imperio disrumpent aspera lingua
Vincta tuo, discentque loqui; tenebrasque priores
Discutient oculi, & lati nova sidera, lati
Compagem hanc rerum, insperataque lumina Solis,
Teque una adspicient, fontem auctoremque salutis.
Tu morbis labefacta, diuque trementia membra
Stringes, & validas tribues cum robore vires;
Tu ruptis largo manantem fonte cruorem
Pectoribus poteris uno compescere verbo,
Exanguesque artus facies pallentiaque ora
Protinus obstructis calefacta rubescere venis.
Sic volo, sic jubeo. Nerio mutabitur ordo.
Rerum, nec solitas leges Natura tenebit,
Officiumque suum prestabunt cuncta Philippo.
Sive ergo jubeat discedere corpore Febres,
Jussa continuo discedite corpore Febres.
Seu vetet ad charos morbos accedere amicos,
Ad charos jussi ne morbi accedite amicos;
Imperet & morti; desertaque corpora rursus,
Cui magis ille favet, repetat, rursusque revisat
Inconcessum orbem, atque alios revirescat in annos.*

Pro-

*Prodigiosa ita supra homines miracula tollant,
 Supra homines quem tollit amor. Tremuere loquente
 Mundi fundamenta Deo: vocem audiit imis
 Mors latebris, flectitque caput, mandataque adorat,
 Tibi Pater, septemgemina, qui mania Romæ
 Inclyta conspicuis avide complecteris undis,
 Quis stupor Urbis, & Orbis erat, cum luminis usum
 Jam deploratis post tristia funera reddi,
 Atque hilares flentum lacrymas verso ordine matrum
 Adspicerent, passimque agros consurgere stratis,
 Sive illos misero casu juvenilibus annis
 Sive senes morbus stratis affixerat ullus?
 Qalis enim magno miscentes murmure bella
 Hinc Boream, hinc Austrum, tempestatessque sonantes
 Dissipat obtutu Nereus, totumque serenat
 Cælum, & stagna vadis diffusa reponit;
 Aut, qualis nitidi nubes prenuntia Solis,
 Collectas Aurora fugat, spargitque per auras;
 Talis ad imperium Nerii fugit ilicet omnis
 Morborum tremefacta cohors, vocemque potentem
 Mors metuit, legesque suas Natura remittit.
 Dròinum quem Numen amat, sic Numen honorat.
 Non quemvis sic Numen amat, sic Numem honorat.*

I. Philippus amore e vita decedit:

*Qualis ad Eurotam, nitidive ad stagna Caystri
 Expirans querulus dulcia cantat Olor,
 Et quoties patrio visus de fonte dolere est,
 Extremam infelix dum sibi poscit opem,
 Visa illi toties Echo de valle dolere est,
 Cum misero extremam voce remittit opem,
 Adstant arrectis Nereides admirantes
 Auribus, & crebris ora rigant lacrymis;
 Sed quia divinos pudor est aspergere ocellos,
 Tergunt ambabus sæpe genas manibus,*

Dum

Dum miser interea testatur voce dolorem,
 Flebilibus replens prata, nemusque modis,
 Talis ad ornatas cantabat Nerius aras,
 Qua sibi praesentit funus adesse die.
 Responsat circum caelo demissa juventus,
 Sacraeque libanti sustinet illa manus.
 Quin etiam teneris puerorum immixta puellis
 Turba illi intentis adstat hians oculis.
 Dum magis adspiciunt hilarem frontemque, coloremque,
 O ter io! longo tempore noster erit.
 Dicite io! mortis species non ulla, dolorve
 Extinctum nostris subtrahet ex oculis.
 Ter Parca admoto conata abrupte dente
 Stamina, ter vanum dente reliquit opus.
 Hinc frendens tardos ducentes stamina fusos
 Proiecit; et plena stamina longa colo.
 Dicite io! vivet, letantes quotquot adestis
 Plaudite, io! longo tempore noster erit.
 Credula turba sibi confingit talia; Amorque
 Ridet, novit enim vulnus amantis Amor.
 Nam velut armata petiit quem dextra Diana
 Cervus in irrigua dum sibi plaudit aqua,
 Decurrens montis de verticibus praeceptis
 Fertur languidulo nota per arva pede,
 I elix! haeret lateri lethalis arundo,
 Tandemque herbofo concidit in nemore;
 Talis, at haud tali confixus arundine, sed quam
 Promit Amor leva candidus e pharetra,
 Nerius, immensum crescit dum in pectore vulnus,
 Succubuit dulci victus amore neci.
 Ecce jacet placidis ceu quem sopor occupat alis,
 Luminaque ipse suis claudit Amor digitis.
 Lumina claudit Amor, talisque jacentis in ore est,
 Qualis pallidulis est color in violis.
 Quis novus ad nostras questus modo pervenit aures?
 Heu! heu! inverso carmine quisquis ait;
 O Pa-

O Pater, o nostri spes, & solamen Amoris,
 Dum licuit, Te nunquam amplius aspiciam?
 Nunquam Te amplectar posthac, nunquam alloquar? O
 Mors calybe, & scopulis durior Adriacis! (mors!
 Heus cohibe lacrymas: ut mors dilectio fortis:
 Fortior eni Nerium morte peredit Amor.

II. Deus decedentem e vita Philippum potat torrentē
 voluptatis suæ.

Esse quid hoc dicam? Libitina instante, Philippo
 Emicat ore tamen risus amabilior!
 In promptu ratio: justo mors meta malorum est;
 Isthac ad Cælum janua leta patet.
 Navita sic venis multum jactatus & undis,
 Quo magis insanis Adria fervet aquis,
 Ut videt in summa accedentia littora portus
 Puppi, clamat ovans; Portus amicus adest.
 Portus adhuc non prorsus adest; quatit unda carinam:
 Naufragii vacuum nec sinit esse metu.
 At vacuo licet esse metu portum ante Philippo
 Quam tangat, cæli gaudia quem ante beant.
 Exundans veluti torrens e corde voluptas
 Proditur haud dubie gestibus, ore, oculis.
 Quod non humanis concessum est auribus, audit,
 Angelicos moriens percipit aure sonos.
 Quæ non humanis oculis concessa fuere,
 Prævidet is moriens; nam videt ille Deum.
 Sic moritur: quin sic vitam incipit immortalem:
 Hoc vivens retulit præmium amoris Amans.

Conclusio.

O modo Divini nostris gratissima Amoris
 Quæ in Nerio exhibita est inclita imago oculis!
 Assidue Nerius Divinum exquiris Amorem:
 Assidue exercet Dius Amor Nerium.

Cer.

*Certat utorque simul grato certamine: Amantas
Et Deus, & Nerius praelia pulchra cient.
O modo Divini nostris gratissima Amoris,
Quæ in Nerio exhibita est inclyta imago oculis!
Impetus est nobis celeri vestigia gressu
Sectari; at nobis ardua meta nimis.
Tu Pater, e calo nobis modo suffice vires;
Tu in terris, Princeps, sufficies animos,*

Anno non memini quo.



D. PHILIPPUS NERIUS

Activam cum Contemplativa vita conjunxit.

O R A T I O.

SI cui libeat omnes sanctitatis vias investigare, cum diu multumque meditatus deprehenderit innumerabiles eas fuisse; ut appareat Deum admirabilem esse in Sanctis suis; non solum quia sublimes ejus laudis gradus ad admirationem hominum oculis objecerit, sed etiam quia infinita pene genera ad imitationem obtulerit; tandem plane perspiciet omnem sanctimoniam rationem laudemque ad duo summa capita referri; ad vitam, inquam, ut ajunt, Activam, & ad Contemplativam; ita ut alii communi bono procurando se se totos tradiderint, alii a cæterorum societate remoti in summo Bono contemplando vitam traduxerint, laudatissimi utrique, qui utramvis impigre secuti fuerint, integreque ad extremum duxerint. Quæ cum ita sint quibus ego illum Virum Sanctissimum præconiis excipiam, cujus hodierno die solenni ritu memoriam festiva celebritate recolimus, quibus inquam D. Philippum Nerium præconiis excipiam, qui utramque rationem vitæ complexus Liam cum Rachele felicissime confociavit, & utriusque expressam ad vivum imaginem in se retulit? Admiror virtutibus animum quasi uberrimum hortum ita excultum, ut inde prodèuntes flores, fructusque in aliorum commodum distribuantur: hunc eundem repente perspicio, velut Magdalenam, ad contemplanda Dei sui gaudia felicissime raptum, & quamvis hic beatissime conquiescat, imitatus Apostolum; cujus ita totam mentem demerserat, docente Chrysostomo, amor Christi, ut
etiam

etiam hoc, quod ei præ cæteris omnibus amabilissimum erat; esse cum Christo; rursus id ipsum; quod ita placeret Christo; contemneret, ita Nèrius non repugnat e Paradiso voluptatis egredi, si Domini sui gloria postulet; aliena salus efflagitet; in suavissimum iterum Dei sinum opportune rediturus: Ita plane, Auditores: Illud Vir sanctissimus vitæ curriculum instituit; ut hunc quasi circumlunum perpetuo oberraret *Egrediendi* (verbis utar D. Bernardi) (*Ser. 53. de modo bene viv.*) *a secreto contemplationis ad activam vitam, & rursus ab activa vita ad secretum intimæ contemplationis reuertendi*: Vestris itaque animis intuendum obiticio virum hominibus suam operam bene præstantem; Deoque bene vacantem, ut in eo naturam ignis cognoscatis; lucentis quidem; ut expellat aliorum tenebras, ardentis autem, ut ipsemet sibi suas flammæ magis ac magis augeat.

Activam vitam; cuius est, ut D. Gregorius monet; (*Hom. 14. sup. Ezech.*) *panem esurienti tribuere*; verbo *Sapientiæ nescientem docere*, & *qua singulis quibusque expediunt dispensare*, admirabilem fuisse in Philippo credo equidem non esse mihi opus multis ad ostendendum vobis; qui & sæpe alias ex hoc ipso loco audistis, & ipsi satis per vos nostis quanta rerum egenos charitate complexus sit, quam sollicitè eorum miseriis providerit; ut ne expectaret quidem qui ad se confugerent, sed investigaret ipse; qui inopia laborarent; quanta largitate necessaria egentibus suppeditaret; ut non solum quidquid ipse habebat erogaret, sed etiam a Viris ditioribus demisisse peteret; quod ad alienas misérias sublevandas elargiri posset; qui nostis consuetudinem aberrantes in viam revocandi, a vitiis deductos ad amorem virtutum impellendi, resque Fidei rudiores docendi Nerio fuisse perpetuam, ut vel puer, & aliis adhuc in disciplinam traditus, quo tempore discipuli cæ-

teri

teri puerilibus ludis, relaxandisque animis vacabant; ipse imperitis hominibus, quotquot nancisci potuisset, Christiana dogmata traderet: qui nostis tandem nullum charitatis genus omisisse, nullos labores recusasse, quo & omnibus bene faceret, ut in omnibus Divinam gloriam magis ac magis augetet. Quocirca ea, quæ ad actionem pertinent, quippe satis perspecta & cognita indicasse contentus ad illa me longe sublimia, & admiranda interiora spiritus opera exponenda eo libentius transfero, quod hoc ipso ex fonte singularis illa virtus effluxit, per quam in amplificando Divino cultu in salute omnibus afferenda potens Nerijs fuit opere, & sermone. Verum quis mihi Seraphim labia mundet calculo ignito, ne tantæ rei sublimitati divinitatque dicendo aut elevem dignitatem, aut violem sanctitatem? Nerio auspice audere juvat, quoniam progredi necesse est, cum referre pedem amplius non liceat. Non ego interim in solitudine, quam ipsa Contemplationis ratio, ac natura postulare videtur ab hominum communione secretum Philippum quaram, sed, quod prorsus admirabile est, in ipsa hominum societate ac turba profunda defixum contemplatione deprehendo. Quid modo intus agitet animo perspicuæ veritatis jucunda admiratione in Deum suspensus, atque æternæ dulcedinis gaudia degustans, haud equidem video: quam facile tamen, quam sæpe, immo quam aliquando ratione tam sublime ascendat plane video. Inter res creatas positus, cum rebus creatis vitam agens, rebus creatis circumdatus, in iis admiratus innumera & infinita bona, quæ Deus munifice per res creatas diffudit, ab iis illico mente fertur in illum perennem divinæ bonitatis fontem, unde illa manarunt. Itaque admirandum hoc universæ naturæ spectaculum, non dicam gradus ad ascendendum, sed pennas ad volandum in Deum suum Philippo
sup-

sappeditat. In illa enim immensa luce mentis infixis oculis non humano modo a notioribus ad minus nota gradatim progreditur, sed claritate desuper veniente, ictu oculi, simplici que intuitu, Angelorum more divina intuetur. Ille igitur per res creatas non creatas agnoscit, per simulacrum rude, absolutissimum exemplar, & quod ait Augustinus, *pulchritudinem per pulchritudinem*. Neque tamen in rebus natura constantibus ille videndo diutius immoratur, sed repente exurgit in Deum, aut, ut aptius dicam, in rebus factis Divinam potentiam, sapientiam, bonitatem, pulchritudinem immensam unice admiratur; quemadmodum si cui in nitidissimo speculo amata facies obiiciatur, is videt imaginem, ea tamen specie minime detinetur, sed mente animoque in exemplo hæret, quod imaginem exhibet. Ex hac sublimi Divinæ Naturæ cognitione, ex ea superna, & inextincta luce Divinam pulchritudinem patefaciente, equis mihi explicare possit, qualis quantusque ardor Philippi animum incendat? Quis tam bona, tam pulchra videat, quin admiretur? quis admiretur, quin toto amoris impetu ea perditæ prosequatur? Nimirum *amoris ignis* (a Gregorio intelligo) (*in Ezech. Hom. 14.*) *qui hic ardere inchoat*, hoc est, qui ad contemplationem impulerat, *cum ipsum quem amat viderit, in amore ipsius magis ignescit*. Adeste mecum, Auditores, & orantem hominem mentis oculis insequentes, quid externis ejus sensibus accidat diligenter attendite, ut inde quid intus agat liceat quoquo modo conicere. Vides quam diu ita immotus persistit, ut non vivens homo, sed hominis simulacrum videatur? ut surdo loqueris, si cum Philippo loquaris, ut ante cæcum consistis, si ante Philipppum consistas, qui aut clausos habet oculos, aut etiam apertis oculis minime videt? Ecquid isthuc sit non obscure equidem intelligo. Cum enim in-

N

terio-

triores sensus, & animæ facultates insolita luce, & amabili suavitate, qua se Deus illis intime repræsentat, repente perfusæ ad eundem, officiorum quæque suorum veluti oblitz, se se libentissime celerissimeque convertant (quo fere pacto oves, ut a Terelia doceor, ad Pastoris sibilum sine mora moventur, eumque circumstant, aut velut acus, ut Salesius docet, ad magnetem in medio positum cuspides vertunt) externi quoque corporis sensus redundanti dulcedine allekti interiorum societatem appetunt, eoque quasi in centrum tendunt, ut interiore illo recessu cum Deo jucunde & ipsi detineantur. Videtis ut ille arrectus hæret audientis instar, & avidissime audientis? Quamquam nihil loquentem audio, audire mihi videor dicentem: *audiam quid loquatur in me Dominus Deus, quoniam loquetur pacem*. Verba pacis, quietis, tranquillitatis inenarrabili cum delectatione intime Philippus percipit, in eam modo solitudinem ductus in qua Osee promiserat contemplanti Deum locuturum ad cor ejus. Divina Sponsa, quæ in ea solitudine jucundissimam, immo vero beatissimam vitam traducis, en modo socium habes, qui tuo & ipse gaudio exultans, tecum concinit: *sub umbra illius, quem desideraveram sedi, & fructus ejus dulcis gutturi meo*. Ecquis nunc Philippum in tanta voluptate conquiescentem interpellare audeat, & a Dilekti dulcissimo amplexu amantem divellere? Atqui ille, nescio num revocatus ab ullo, an aliquo motu intimo impulsus, ab illa beatissima quiete recedit, & prout res postulat, aut necessitas flagitat, cum hominibus agit. An ideo putatis a familiari cum Deo consuetudine recedere, intimisque deliciis suis interim carere? Minime vero gentium. Voluntas enim Deo perpetuo adhærens eadem cum Deo perseveranter fruitur tranquillitate, eo ipso tempore, quo intelligentia, & corporis tum interni;

tum

tum externi sensus in Dei honorem; hominumque utilitatem occupantur; tantumque abest ut ullam jacturam faciant, aut ab arcta Dei conjunctione disjungantur, ut immo ad exequendum munus ex hoc aptiores fiant; & alacriores. En si unquam alias, quod ante dixeram, Lia cum Rachele conjuncta. Neque id mirum aut incredibile videatur; intelligentiam; & παντοιαν posse divinis, & humanis rebus inter se diversis eodem tempore vacare, easque simul cognoscere; propterea quod istæ ab illis pendent; ab iis profectæ ad easdem referuntur; ut opus ab arte distinguitur, utrumque tamen artifex simul vult, simul utrumque cognoscit. Ita Nerius potuit in Sapientiæ spectaculis cum admiratione & gaudio defigi; & eodem tempore res in Dei gloriam faciendas cognoscere, & corporis sensibus, ut eas facerent, imperare; ex quo & perfectiora hominis sanctissimi fuerunt opera; & illa amoris puri *prima*, uti vocant, *scintilla* excusa est; quæ dein aucta in ardentes adeo charitatis flammæ evaluit, ut occulta intus contineri non potuerit, quin foris præ magnitudine vehementer erumperet, hominemque quasi ebrium agitarer, ebrium, inquam, prudentissima amoris ebrietate. Ex illo enim amore (Doctorem Seraphicum Magiltrum sequor,) *quasi ex vini fortitudine fervor Spiritus S. sic hilarescit, ut se intra se cohibere non possit*. Nonne cum hujus ebrietatis effectus S. Doctor describeret; per quam *gaudium repente infusum totum cor concutit ex sui vehementia, quosdam tremores commovet; & delectabiliter cruciat sed ex impetu fortitudinis corpus debilitatur, & aliquando per quosdam gestus & clamores quasi evaporando erumpit*, nonne inquam videtur multis ante sæculis plane Nerium effinxisse, qui præ fervida charitate identidem velut ebrius sapienter despiebat, & gloriose delirabat? Irrideant per me licet, inusitados

Philippi gestus, immodicos impetus, saltus vel ineptos illi irrideant, aut admirentur, qui, quantum amoris ebrietas possit, ignorant: quos interim iis socios adjungo, qui Apostolos multo madere deputabant, quos spiritus repleverat: illum vero non minus quam Apostolos iis addo, quibus blandissima invitatione Sponsus ait, *bibite amici, & inebriamini carissimi*. Sed quoniam tanta hominis commotio, tam vehemens corporis agitatio, nec perpetua, immo nec diuturna esse potest, natura ipsa laborem & requiem alternis vicibus postulante, par tandem est Philippum requiescere. Quiescit ille, & in amabili Dei sui sinu sopitus obdormit, eo nimirum somno, de quo Ricchardus a S. Victore, *somno interioris hominis, per quem soporantur omnes sensus mentis: simul enim absorbet cogitationem, imaginationem, rationem, memoriam, intelligentiam, ut quod Apostolus scribit, exuberet omnem sensum*. Hujusmodi somnum anima inter veri Sponsi amplexus capit, cum in ejus sinu requiescit. Nolite putare quam somni corporis videtis esse naturam, qui corpus ipsum otiosum efficit, atque iners, eandem esse somni spiritus. Nam ego dormio, Nerius ait, æque vere atque Sponsa, sed æque vere atque Sponsa etiam ait, *cor meum vigilat*. Ille Deus qui Philippi animam amoris ebrietate æstuantem fecit, idem amoris somno reddidit conquiescentem. Recumbente Nerio in Sponsi sinu, ah! ne sit ita crudelis ullus, qui suscitet & evigilare faciat dilectam animam, quoadusque ipsa velit, nisi si ad populi salutem Sponsi gloria idipsum requirit. Alacrior enim promptiorque excitabitur ex hoc spiritus somno ad ferenda magna, & agenda, cum id efficiat somnus spiritus, quod somnus corporis, qui reficit instauroque vires, aptiusque reddit corpus ad labores. Fateor equidem me penitissimas cordis latebras in Philippo intueri nitentem deficere, mentemque tanta luce

tuæ percussam mihi tenebricosa nocte operiri. Ecquid ego sciam in hac amandi arte ignorantissimus unus; si Teresa; quæ Deum ipsum Magistrum habuit, easque delicias toties experta est, tamen quid anima Deo conjuncta eo in statu ageret ignorabat? & mediis fidiis verba, quibus quid sibi fieri intus sentit exprimat, Nerius ipse non habet. Nihilo tamen secius cum sensus externos omni facultate exercendi munia quosque sua destitutos inspicio, ita ut neque oculi quamvis viva luce perfusi quidquam videant, neque aures vel magno strepitu percussæ quidquam audiant, neque odore ullo vellicentur nares, neque palatum sapore afficiatur, nec tactus in toto corpore æquabiliter fusus aut ferri vulnera; aut ignis appulsus sentiat, nec ullum vitæ ulla in parte corporis vel minimum argumentum appareat, quid nisi extra se raptum suaviter & in Deum, ut ajunt, transformatum amabiliter credam? Pronuntiare id ex me non auderem, nisi ducem mihi se cum multis Ricchardus offerret, cum ait; *in hoc statu dum mens a se ipsa alienatur; dum in illud divini arcani secretarium rapitur, dum ab illo divini amoris incendio undique circumdatur, intime penetratur, undequaque inflammatur, se ipsam penitus exiit..... & inspectæ pulchritudini configurata in illum quem diligit tota liquefeit.* Sentio me in res supra me immensum positas audacius progressum, & quamvis usque mihi duces satis tuti præsto fuerint, libentissime abrupto Orationis filo, ex hoc loco descenderem, mihi Nerius corpore ipso e terra sublatus, in sublimi suspensus, immotus, lucidissimisque circumdatus radiis repente obiceretur. Ecquid hoc? Num Angeli ministri supremi Numinis, ut homini corporis vincula dissolvere, quo ad Deum avolet, concupiscenti aliqua ratione morem gerant, quoniam corpus relinquere adhuc non licet, illud saltem cælum versus

extollunt? an vero anhelante in Deum Philippi spiritu, velociterque in eum volante, præ contentionis vehementia corpus ipse animus impetu secum attrahit? An tandem quia corpus ipsum (quoniam contemplatio illius æternæ beatitudinis principium quoddam est, quæ in cælis aliquando aperto divinæ bonitatis intuitu perficietur) num quia corpus quoque illarum facultatum incipiat esse particeps, quibus suo tempore Beatorum corpora dotata erunt? Quidquid sit, certe se ne Philippus quidem scit, & usurpare potest, quod Apostolus, *sive in corpore, sive extra corpus nescio, Deus scit; vivo ego, jam non ego... quoniam qui adheret Deo unus spiritus est.* En votorum summa; versanti in terris homini ulterius progredi non licet. Pervenit Philippi anima ad cælestes nuptias. Ibi insedit... eloquar, an fileam? at si Christus ipse in Joanne promisit, *si quis diligit me... ad eum veniemus, & mansionem apud eum faciemus*, ecquid verear quod sanæ doctrinæ congruit fidenter dicere? in Philippo insedit (nomen augustum mecum, Auditores, veneraminor) Trias sanctissima in Philippo insedit. O Philippe, o beata Anima in cujus centro sedem posuit Deus Trinus & Unus! ibique ceu Sol medium cæli locum obtinens Lunæ, Stellis, rebusque infra positis lumen impertitur omnesque suo splendore collustrat, ita Deus omnes tuas animi corporisque facultates superna luce perfundit, quo quid ad ejus augendum cultum, & hominum salutem procurandam conferat, probe videas, facileque perficias. Hinc ille Divini honoris ardentissimus amor, ut cum Paulo complaceat sibi *in infirmitatibus, in contumeliis, in angustiis* pro Christo. Hinc vehemens illa alienæ salutis cupiditas, ut optet cum eodem Apostolo, *anathema esse a Christo, pro fratribus suis.* Dixi pro re pauca, pro tempore satis multa, ut intelligatis Viri hujus sanctissimi

mix.

mixtum fuisse ex actione, & contemplatione vitæ genus. Nobile, sublime, admirandum ostendi vobis adhuc ædificium; quibus extructum fundamentis fuerit non ostendi. Arborem adspectu pulcherrimam, fructu uberrimam per me vidistis, radices unde incrementum habuerit non vidistis. Radices optimæ, fundamenta firmissima fuere charismata Sancti Spiritus, quæ nostri ita dividunt, ut aliæ *Gratias* alia *Dona* vocent, & illas ad Activam vitam, ista ad Contemplativam referant. Hunc vobis socii Academici relinquo campum, magis profecto amplum, quam ut possitis totum percurrere. Quam tamen potestis partem percurrite. Optabilius fuerit Auditores cum desiderio, quam cum satietate dimittere.

I. In Philippo fuit Discretio Spirituum.

*Quem fugis ah demens? non te pulcherrima flectit,
 Quæ charitum suavi nectare sparsa nitet,
 Et quam Divinus mage pulchram reddidit ignis,
 Non isthæc facies te allicit? hanc ne fugis?
 Quem fugis ah demens? fugis illum, e pectore cujus
 Calicus expirat Virginitatis odor.
 Te pudet, ah video, impuri quod cordis opaca
 Noscet, & insolita corrigit arte scelus.
 Ne fugito: accipitrem fugit inviolata columba,
 Et fugit impastum mollior agna lupum.
 Ad Nerium propera; fies intacta columba,
 Quique lupus fueras, protinu. agnus eris.*

II. Donum Scientiæ.

*Quilibet longos sibi opes benigna
 Sorte congestas habeat per annos;
 Jamdiu has nostrum refugit nocentes
 Pectus, & odit,*

*Qua levi & certa fugiunt ruina .
Diruat sortis rota si maligna ,
Jactor incertus veluti frementis
Cymbula ponto .*

*Non ego fastu decorata quaram
Tecta Tyrrheno , Parioque cultu
Inclytas ades ; avido ore tempus
Omnia pascet .*

*Gloria postes rutilantis altos
Non ego intrabo , neque grandiorum
Limina invisam , tenuem aucupatus
Flaminis auram .*

*Instar hac sumi tenuis per auras ,
Quem fremens saxo Boreas furore
Huc modo atque illuc rapidum repellit ,
Cuncta feruntur .*

*Ac velut multo gravidas vapore
Sol pater nubes Oriens abegit ,
Ex nova Calum radio serenans
Luce renidet ;*

*Haud secus vero radiante Sole
Cuncta vanescunt tenues in auras ,
Ac nitent frustra bona prapotentis
Victa nitore .*

*Hac ait prudens Nerijs ; supernis
Lamen infundens Paracletus oris ,
Donat ardentem aethereo igne rerum
Noscere inane .*

*Instruit late populos caduca
Cuncta sub calo ; nihil esse longum
Dulce mortali , sed ad alta , clamat ,
Tendite votis .*

*Hic salus nobis stabilisque portus :
Quisquis huc actam referat carinam ,
Nec maris saxam rabiem , grademque
Sentiet austrum .*

I. Pro-

I. Prophetia.

Favete linguis, cernite, Nerii
 Vultus favillas eicit igneas.
 favete linguis: fata plenus
 Numine vaticino ore pandit.
 Ah! flecte cursum: prospice, jam impete
 Magno feruntur turbida in aquora,
 Nimbos agentes, & procellas,
 Carcere ab Æolio Notusque,
 Eurusque, & unus savior omnibus
 Crebris modo altas tollere fluctibus,
 Et nunc in imas Auster undas
 Mergere vorticibus carinas.
 En en coruscis emicat ignibus
 Æther, furentesque evocat intimis
 Antris procellas: flecte puppim,
 Flecte tuam, periture, puppim.
 In saxa magno jam miser irruis
 Ictu, profundis heu! latet (effuge)
 Charybdis undis, omnibusque
 Scylla vorax metuenda Nautis.
 Ecquid sereno Nerius enitet
 Repente vultu? quis residet novus
 In ore risus, pacis alma
 Lætitiaque comes? Philippus
 Jam lata lato carmine pracinat.
 Favete linguis. Qui latitas diu
 Ignote, virtutum tamen quem
 Magna cohors comitatur, exi,
 Exi tenebris. En tibi Purpura
 Longo paratur splendida Syrmate:
 Sume eja, virtus quod paravit
 Grande tibi, pietasque munus.

Ma.

*Majora sed Te fata manent : eris
 Princeps Sacerdos : nec mora nobile ,
 Sanctumque adi Regnum , & decorum
 Cinge caput triplici corona .
 Da jura Terra , da maris incolis
 Princeps ; Averna Te metuunt domus ,
 Tuumque Caelestes ab alto
 Imperium venerantur axe .
 Quam saepe formis versicoloribus
 Vates resulget ! lumina fulgurant ,
 A summo ad imum contremiscit ,
 Et nova fata aperit . favete
 Linguis . in altum jam feror athera
 Evectus inter Calicolas , Choris
 Jungor beatis , jamque pasco ,
 In Te avidos , Pater alme , visus .
 Jam lata felix , jam properat dies ,
 Extollat aras qua mihi : ab exteris
 Accedet oris , debitosque
 Gens referet mihi grata honores .
 Jam dona pendent mille precantium ,
 Votique nostro munere compotum ,
 Jam nostra sacratiss resulget
 Effigies , coliturque Templis .
 Usquè huc Philippus ; me sacer arripit
 Pro quantus horror ! multa deosculans ,
 Jacensque humi Vatem silenti
 Attonitus venerabor ore .*

II. Donum Intelligentiæ .

*Quis novus aetherea circum de sede coruscans
 Emicat , & Nerium splendor ubique tegit ?
 Quæ totum vestit lux candida , ut aureus omnem
 Exorians rutilo lumine Phœbus humum ?*

Men

Membraque pervadens nitidissima, sensibus imis
 Illapsa introrsum mentem avimamque rigat?
 Infandas disiecto oculi mortalis amictu
 Immensi dotes prospicit ille Dei:
 Prospicit, atque illuc avide connititur; optat,
 Nec datur optatum corripuisse jubar.
 Ceu qui flagranti velocem servidus aestu
 Insequitur montis per juga celsa seram,
 Defixa obtutu tenet ora immotus in illa,
 Magno & pone sequens impete carpit iter
 Saxa per, & scopulos cursu sectatur inani,
 Nam praeceps celeri diffugit illa pede.
 Haud secus optatum quarit, sectatur, anhelat,
 Flagranti Nerius tactus amore Deum.
 Quarit, anhelat, amat; quem quarit, anhelat, amatque,
 Non illum assequitur. hic dolor ecquis erit?
 Sponsa refer, nam sola potes, quod vulnus Amanti est
 Adspicere, adspecto & stare ab amore procul:
 Quarere, & optatum nusquam reperire morantem,
 Plus anima quem tu diligis, atque oculis,
 Cum platani marens viridi prostrata sub umbra,
 Huc o! clamabas, candida Sponse, veni;
 Te tua Sponsa unum, Sponsum tua Te petit unum;
 Blande veni, in nostros, Sponse, recurre sinus.
 Dilacerare potest lethale hoc vulnus amoris,
 Hocce potest castam dilacerare animam.
 Omnigenos viridi ferte huc e cespite flores,
 Mixtus & e variis floribus halet odor.
 Malaque ferte citi, malis stipate Philippum;
 Emoriens nimio tactus amore perit.
 Ex longo rabie ceu qui vexatus edendi
 Incassum appositas prospicit ante dapes,
 Naribus atque avidis exhalantem haurit odorem,
 Porrectosque inhians tentat adire cibos,
 Impatiensque mora demens furit, acrior urget
 Languida, nam vetitum tangere, membra fames.
 Nul-

*Nulla quies Nerio, crescit ferventior ardor ;
 Fortis inextinctis urit Amor facibus .
 Anxiaque ex imo ducit suspiria corde ;
 Tristiaque effusis ora rigat lacrymis .
 Uritur ille magis quo plus intelligit , acri
 Alta supervectus sidera mente Deum .
 O rerum ante omnes quot sunt pulcherrime formas ,
 Quo melior nullus ; nullus amabilior ,
 Eja o ! sollicitis iterabat saepe querelis ,
 Despice caelesti me , Pater alme , polo .
 Me super astra voca ; ceco si corpore elauso
 Te mihi nunc rerum noscere , Summe , datur ,
 Abruptis liber vinculis , caloque potitus
 Effice Te vita liberiore fruar .
 Unum inhians Deum , ubique Deum unum quatit , unum
 Et cupit , O vocat , unum ardet , amatque Deum .
 Deficit , O corpus persusum frigore lethi est ,
 Cui nullus sensus , nec color unus inest .
 En redit ad sensus ; dat se se Amor ipse videndum :
 Eheu ! dicto oculis ocyus eripitur .
 Sic Sponsus saepe hac optatam querit , O illac
 Infelix Sponsam deficiente anima ,
 Illa repente procul se se pulcherrima prodit ,
 Purpureoque nitens lumine tota micat ,
 Sponsus gaudet evans , O palmas tendit utrasque ,
 Proh dolor ! en celeri diffugit illa pede .
 Deficit hic iterum Nerius , ceu victima Amoris ,
 Crudesciente nimis vulnere Amoris amans .
 Alme Deus ser opem misero , concede fruendum .
 Te Nerio ; miser ah ! corruit examinis .
 Aut da Te Nerio , aut radiantem subtrahere lucem ,
 Que tantum exusto in pectore vulnus alit .
 Quid loquor ah demens ? mihi Amor male cognitur : angit
 Illum vulnus atrox , languet amans , moritur .
 Verum dulcis amor , dulcis languorque , dolorque ,
 Dulce pati , tali funere dulce mori .*

I. Ope-

Sulcasse Ionium mare,
 Fraudes mente agitans, & tacitos dolos;
 Stragemque & fera funera;
 Arreptamque ratem; & perdomitos viros?
 Perge, o; irruere; Barbare.
 Navis scissa labat; fluctibus obrutos
 Atra mortis habet pavor.
 At frustra rapidi ira aestuat aquoris;
 Jam imo ab littore supplices,
 Clamantesque viros audiit, audiit
 Semoto Nerius polo;
 Accurrensque piis vocibus aquori; &
 Decertantibus imperat
 Ventis; incolumes tutaque ad ostia
 Deducit Nerii manus,
 Et portare Notos spes jubet irritas.
 Natum quid quereris parens,
 Contundens manibus pectora, quem cito
 Insana abstulit Atropos,
 Crudelis nimium; & durior Atropos?
 Fortunata Parens; genas
 Terge, & luctificis parce doloribus.
 Gliscentem aspice filium;
 Gaude, euge, & Nerio munera reddito.
 Jam dulces pueri undique
 Vagitus resonant, & querimonia.
 Quid Te, Sancte, canam? tuo
 Parent imperio mixti Aquilonibus
 Imbres; Te resonantia
 Ponti vasta tremunt, ipsaque aeneis
 Horrens falcibus Atropos,
 Nigrantisque pavent limina Tartari.
 Hanc auram ergo; superstitute
 Audetis Nerio; visere, & invehì
 Terras has super, improbi,
 Vexantes hominum corpora Demones?

An

*An non cognita Nerii
 Virtus? quo fugitis? jamque volantis
 Vertunt terga fuga, & nigro
 Se se abdunt barathro; jam fera sibila
 Late per loca consonant,
 Et nomen Nerii pertrepidi pavent.
 Ceu cum obstantia nubila
 Findit terrificus fulminis impetus,
 Stant primum pavida, hinc cito
 Se se præcipiti proripiunt gradu
 Celsis verticibus fera,
 Speluncasque petunt, lustraque inhospita.*

II. Donum Sapientiæ.

*Quæ liquidi astra super flammanti in luce resurgens
 Numinis aterna, maxima, mente sedes,
 Cui se se obscura sub nocte natantia pandunt
 Nubila, celesti, Diva age, ab axe veni,
 Sola decus Mundi, Cæli, Sapientia, munus,
 Et propius puro lumine, sancta, nite.
 Tu mihi nunc animos Nerii sub pectore versa,
 Flentis, amantis adhuc gaudia parta refer.
 Namque ubi Dilectus, depulsis nubibus, hausit
 Immortale tui luminis, alma, jubar,
 Arcani eni olli scisso velamine summi
 En decora Artificis protinus alta patent.
 Hac mens, hac inhians arte complectitur ultro,
 Atque Dei plene cogitat inde decus,
 Lingua hominum fileant, teneantque silentia cætus
 Angelici; tanta expromere nemo potest,
 Quanta tuæ pelago lucis Sapientia monstras;
 O Lux pervadens deliciis animam!
 Ecce, Neri, tibi Numen adest, tua sola voluptas,
 Tandem exoptato nunc requiesce sinu.*

Ab

Ah! precor, ah! Nerio ne quis sua gaudia rumpat!

Celesti liceat lacte levare sitim.

Fortunate Neri! summi Ragnator Olympi

Deliciis superum dat tibi posse frui.

Jamquē animi sensus mira dulcedine captus

Vix credit, Numen sentit inesse sibi.

Spiritus ille Dei tua per tota intima fusus

Corda tibi atherio melle Philippe rigat.

Jamque voluptatis perfusus nectare dia

Ultra nil animus quod sibi poscat, habet.

Quenam deliciae, quae tam divina voluptas?

Si licet experta dicite vos Anima.

Fonte voluptatis non deficiente Philippus

Angustum spatium heu nimis! intus habet.

Quis credat sed vera tamen miracula Amoris?

Unda voluptatis crescit, & ampla magis

Facta anima est Nerio, fitque amplior, unda ubi crescit

Amplius, & sensim dulcius unda rigat.

Marmoreo lymphas surgentes aspice labro,

Surgentes nitido e fonte perennis aquae:

Margine & exsuperans humor sitientibus herbis

Circum dat vitam, & floribus aridulis.

Haud aliter puri surgentes atheris haustus,

Et sensus Nerii, & pectora adusta rigant.

Hac blande ludunt, hac luto flumine serpunt,

Hac secunda novis fontibus unda micat.

Fallor: fac crescat labrum crescentibus undis,

Augescente undas contineatque sinu.

Hac erit, hac anima Nerii verissima imago;

Cresce Anima, atherii crescite fontis aquae.

At quis odor subito exhilarans suavissimus halat,

Undique celesti dulcior ambrosia?

Totum corpus olens divinum spirat odorem.

Quod portentum hoc? quae causa? quid intus erit?

Scilicet atherias sumens Sapientia flammās,

Jucunde Nerii corda perusta replet:

*In flammæ large redolentia cinnama fundit,
 Non quæ Panchæus, summus at axis habet.
 In flammæ large redolentia balsama miscet,
 Non quæ Judeus, summus at axis habet.
 Pectoris e flammis suffitus tollitur ille
 Ignotus, qui hominis sensum animumque beat.
 Fallor? an & dios concentus excipis alma
 Mente, Neri, & Superum combibis harmoniam?
 Nempe tibi id rerum præstat pulcherrimus ordo,
 Quarum quæque suum sedula munus obit.
 Celi flammantes orbes, astra ignea, fulgor
 Lampadis ignifera, qua sola vasta nitent,
 Omniparens tellus, pelagi liquida arva, profunda
 Conualles, colles, flumina, stagna, lacus,
 Unanimi tibi voce, Neri, simul Omnipotentis
 Immensas dotes, atque opera alta canunt.
 Dulces o voces, nostris haud auribus apte!
 Vos animo Nerius percipit, aut Nerius,
 Cælestes cives, se se vos intulit inter,
 Aut stabilis Neri in pectore vestra mora est.*

Conclusio.

*Quid non aura potens, divini Numinis aura,
 Cogis Amor, dulci simul ac præcordia flamma,
 Exurens placida irroras dulcedine pectus,
 Vimque tuam, qua mens se supra tollitur acta,
 Inferis, & blando cor vulnere figis Amantis?
 Tu cælestis Amor, divina nectare tinctis
 Percussum telis, & flammis dulcibus ardens
 Cor Neri, sancto cali succendis amore,
 Humana assidua dum consulit arte salutis.
 Ingenita veluti saxum gravitate quiescens
 Perpetuo ad centrum conatur pergere nisu,
 Si vero externo compellitur impete, eodem
 Tempore diversos motus habet, inde duabus*

O

Viri-

*Viribus hinc atque hinc trahitur; namque altera certum
 Optat, ad impressum sed dirigit altera motum.
 Quod si, cum terris vitam mortalis agebas,
 Mens tua limitibus, Neri, indignata teneri
 Corporis, optabat quam primum erumpere vinculis
 Irrequieta, suo ut conjungi posset Amori,
 Et sitiens bibere aetherios dulcedinis haustus,
 Ille tuus nostris se se ossibus implicet ignis,
 Et dulcis nostras exurat flamma medullas.
 Et quoniam vivens tristes expellere morbos
 Voce tua poteras, Erebi quam regna timebant,
 Tu Patre a nostro, precor o! a Principe nostro
 Qualemcumque fuga morbum, terrisque relinque
 Incolumem, dulci regat ut moderamine fidas
 Pastor oves, illas & dulci gramine pascat;
 Æternum & sero felix Tecum exigit ævum.*

Anno 1763.



UTRUM

UTRUM

INGENIUM JUDICIO,

An Judicium Ingenio præstet

PRÆFATIO.

33 **Q**UI velit ingenio cedere rarus erit. (*Mart.*)
 Tanta est ingenii præstantis æstimatio, &
 existimatio, tamque ardens in ejus affecta-
 tione cujusque *φιλαυρία*, ut nemo unus (de Littera-
 tis Viris loquor, ac præcipue earum studiosis ar-
 tium, quæ ab humanitate sibi nomen vindicant)
 ut nemo unus nolit ingenii laudē vel per fucum e-
 minere; quisque autem, aut fere quisque cæteras
 dotes facilius aliis, quam hanc laudem concedat,
 præpositurus, opinor, minima cum dubitatione hanc
 ingenii opinionem vel ipsius opinioni virtutis. Præ-
 posterum judicium hoc quorundam magnorum, ut
 ipsi sibi videntur, & ut superstitiosi sibi persuadent
 illorum amatores, servum pecus, horum, inquam,
 magnorum admirandorum ingeniorum libris occulta
 peste conscriptis præposterum judicium hoc acceptum
 referre oportet; quorum Auctores cum acumen in
 excogitando, celeritatem in discurrendo, ubertatem
 in explicando ostendent, magnum doctrinæ, sapien-
 tiæque lumen præ se ferunt, quo legentium animos,
 tanquam oculos crebra ac subita fulgura, percel-
 lunt & obruunt, tum in summam opinionum per-
 versitatem incautos ac leves facile pertrahunt. No-
 bis ne confutatione quidem digni videntur, qui in-
 genii gloriam avidius expetunt, quam virtutis. Sed
 contentione hac omnino prætermissa, quoniam tantū
 fieri ab unoquoque ingenium solet, tantumque sibi

vindicat admirationis, investigare libet inter ipsas animi vires ac facultates, ulla ne sit, quæ possit ingenii vi comparari, magis expeti, præstantior haberi. Nobis id quærentibus Judicium, quod ingenii speculum non inepte dixeris, veluti resultante proximæ chordæ sono, se se obtulit, quod in contentionem venire cum Ingenio de laude possit. Aliud enim nos Ingenium facimus, aliud Judicium, & aliud nobiscum facit quilibet, qui *sapit*, & *Jove judicat æquo*. (Hor.) Ingenio valere illum dicimus, qui celeri animi motu colligere plures rerum imagines potest, easque ex remotis, diversisque desumptas simul mira varietate colligare, similitudines in dissimilibus invenire. Pollere autem Judicio eum affirmamus, qui novit eas inter se conferre, aliam ab alia secernere, recteque ponderare discrimen, ne specie quadam affinitatis deceptus adulterinas pro genuinis accipiat. Tametsi virtus utraque in eodem litterato homine sæpe conjungitur, non minus tamen sæpe alterutra deficit, cum verissime proverbio circumferatur illud, *judicii plerumque egeni sunt, ingenio qui valent*; ut minime vana futura sit quæstio, Utrum in re Litteraria Ingenium judicio, an Judicium ingenio præstet. Præclare nobiscum agitur disputaturis apud vos, Aud. Litteratissimi; quos cum & mirificum ingenium exorner, & præstans judicium commendet, benevole litteræque audituros singuli speramus. Etsi enim pugnabimus inter nos, omnes tamen res vestras laudibus persequemur.

INGENIUM JUDICIO PRÆSTAT.

I. ORATIUNCULA.

Ingenium laudo ingenio præditus perexiguo; haud eos equidem imitatus Professores Artium, qui alias elevant deprimuntque, ut eo magis atque magis in cælum extollant suam, sed eorum potius secutus morem agricolarum, qui alienam messem sua abundantiorē, alienas vites suis sæcundiores arbitrantur, & omnino illos, qui ea faciunt pluris, ad quæ pervenire ipsi non possunt. In hac igitur ingenii, judiciiue contentione illud quod mihi deest admiror, atque suspicio, hoc quamquam non multum arrogo, tamen tantum inesse video, ut sine invidia aliorum facultati quod suum est concedam, h. e. ingenium judicio anteponam. Quid enim potius, & aliter sentire quis audeat, si quanta sit humani ingenii vis paullo interius inspiciat? Hæc nimirum animi vis, quam ingenium dicimus, intima rerum penetralia rimatur, eruit ignota, nova excudit, mira ob oculos ponit, & veritatem in Democritico pluteo latentem aut nulla res, aut illa una in apricum profert, quo dicendi, scribendive segetem & admirabilem novitatem, & jucundissimam intelligentiam rerum ignotarum subiiciat. Quin sententias ipsas vulgares, communes, & cuiusvis obvias ingenium ita vestit, eo adspectu decorat, ea imbuat nova formâ, ut nostratia, pene dixerim, pro peregrinis habeantur. Quid sibi de hisce laudibus iudicium vindicet, tu videris. Ego enim cum concessero facultatem, quam laudes, habere locum una cum ingenio in ratione ordinis, atque distributionis, ab hac laude inventionis prorsus exclusam intelligo, quam ingenium totam ducit suam. Immo huius perspicacitati, at

que excogitationi referenda est omnium inventio Disciplinarum, & Artium, quarum qui Deos immortales inventores constituerunt, divinitatem quamdam ingenio inesse significarunt. Luserit per me licet poetica libertate Claudianus, inducens apud superos ridentem Jovem *in parvo cum cerneret aethera vitro*, dummodo admiretur eo mortalis curæ progressam potentiam, ut *inclusus variis samuletur spiritus astris, atque suam volvens audax industria mundum, audeat humana sidera mente regi*. Ex quo tu, velim, intelligas quanta sit humani ingenii præstantia, quod possit Cæli conditionem, opus divinorum maximum, sua machinatione imitari. Atqui remis adhuc mihi videor in freto navigare, cum plenissimis velis liceat in altum provehi. Hoc enimvero admirandum maxime est, & me quidem præ stupore prope attonitum reddit, quod ea, quam laudo, animi facultas rerum universitatem sibi subiectam habet, totam percurrit atque comprehendit, cumque infinita sit rerum varietas, immensumque discrimen, in dissimilibus similitudines deprehendit, longinqua consociat, & ad Orationem, Scriptionemve suam omnia vel diversissima, vel remotissima tanquam lineas ad centrum deducit. Est enim rerum in tota natura etsi tam multiplicium, tam disparium, & partim etiam tam contrariarum, tamen admirabilis in unum consensus, inter se concordia, concentus, proportio, & (ut græco utar vocabulo) *ἀναλογία*. Quocirca ingenium præstans comparisonem detegit inter fulmen & hominem, inter scopulum & mulierem, inter Solem & rationem, inter undas & populum, ut eo modo placidis coire immitia possint, *serpentes avibus geminari, tigribus agni*. (Hor.) Nimirum quemadmodum plurima, eademque magna varietate distincta oculis uno tempore circumspicimus, & inde formis quasi per lineas ad feriendam videndi vim fluentibus

tibus omnium imagines simul haurimus, ita mentis oculi longe multumque liberius per omnem rerum diversitatem vagantur, quæque est in ipsis dissimilibus rebus convenientia colligatioque perspiciunt. Hac instructa mens supellectile similitudines colligit, amplificationes ducit, exempla defumit, digressus arripit, argumenta eruit, & translationes, ornamenta Scriptionis potissima mutuatur. Neque solam quæ sunt res secum comparatas in suum penum ingenium transfert, sed unius rei intuitus, tanquam percussus silex ignem, aliarum imaginum lumen repente excitat, atque ita objecta menti aliqua specie, eaque celeriter arrepta ingenium longe progreditur, & ab una ictu oculi pervolans ad aliam, infinitam prope rerum varietatem complectitur. Quid ex ea facultate mentis, quam judicium vocamus, amabo te, quid elicis, quod tam magnis, tamque amplis ingenii viribus opponas, atque adeo, ut contendis, anteponas? cum ea facultas nihil in excogitatione rerum abditarum, nihil in consociatione dissimilium deprehendenda, nihil in conjunctione remotarum cognoscenda valeat. Video quid dicturus sis, judicio rectore opus esse, ut lasciviens ingenium coerceatur, contineaturque intra fines, quos *ultra citraque nequit consistere rectum.* (Hor.) At quorsum tibi judicium, ingenio si careas? Vera a falsis dignoscas aliena cum legis, quid sit decorum in rebus, quid personæ cuique conveniat, quid in sensibus probandum, quid in verbis, ubi copia laudanda, ubi modus, probe noscas, cum tamen nihil in tuo thesauro suppetat, unde sententias rectas verasque depromas, & quod rebus, quod personis congruum est tribuas, videberis mihi ab illo οἰκονομικῆς peritissimo non absimilis, qui de re familiari optime disputat, quod autem administret, nihil habeat. Audio multos de imaginibus, deque signis non inepte loquentes, & ut vir-

tutes, ita & vitia recte dijudicantes, nequaquam tamen recte, immo ineptissime feceris, si hos, qui neque pictam, neque fictam, neque cælatam imaginem suo ex artificio, quod nullum habent, prodere valeant, ipsis Artificibus præferas. Nimirum tanti judicium est ingenio carenti, quanti putandi scientia colono arbores non habenti. Vela contrahere admo-
neor angustiiis temporis, & cum amplissimum adhuc conficiendum spatium mihi pateat (occurrunt enim innumera ad dicendum) quoniam appellere ad portum non licet, necesse est ad litus divertere. Paucis finem facio. Judicium probo, vehementer probo; ingenium tamen naturæ viribus libere excurrens judicio certis legum præceptorumque cancellis circumscripto præopto, quemadmodum magis Homerum, ac Platonem in Poesi, & Eloquentia admiror, quam Aristotelem in suis utriusque Artis documentis, & ut malim Tullii Oratoriam facultatem, quam Fabii Oratorias institutiones referre.

JUDICIUM PRÆSTAT INGENIO.

II. ORATIUNCULA.

Utrum in Adversario, Adversario tamen amicissimo, admirer magis ingenium, quod initio statim sibi detractum voluit, an judicium, quod minime jactavit, sed paullulum sibi assumpsit, anceps equidem hæreo. Si ad artem, ac prope dixerim calliditatem specto, quæ levia argumentorum momenta, quasi gravissima, protulit, ut fucum faceret, judicium hercle non minimum, sed eximium agnosco. Si concinnatam rerum materiam, quasque centones fartos perpendo, ingenium quidem in inventione dicentis suspicio, in disputatione veritatem desidero. Vera sint quæ dixeris, admirabilem esse humani ingenii

genii vim, habere sibi subiectam totam rerum universitatem, artes omnes invenisse, cæteræque, quas ingenio tribuisti laudes, veræ sint: at non vere propterea collegisti, ingenium esse judicio præferendum. Nam ad artes quidem quod attinet, nisi judicium accessisset, quo ipsarum Auctores *μὴ δόδω* servarent, & ordinem, quid nobis utilitatis afferrent, qui posset non opprimi animus, non confundi memoria, non omnis denique fructus penitus tolli, cum rerum & partium distributione sublata, inutile atque caliginosum chaos tradidissent? Quo mihi trabes, æres, cæmenta, rudus novum, calcem, arenam, ferrique copiam ad extruendam domum afferas, nisi Architectus suo quæque loco artificiose distribuat? Quare cum ingenio inventionis laudem dederò, judicio dispositionis, eam dederò, quæ ex una parte debetur materiem suppeditanti, ex altera materiem ad opus redigenti. Uter autem pluris faciendus sit in opere extruendo, nullum judicem volo, nisi te ipsum: juvat enim properare me ad illas ingenii admirandas vires, quibus subjecisti rerum universitatem, remotissimarum consociationem, similium in dissimilibus comprehensionem. Hic dum tibi videris, postquam in freto remis navigasti, plenissimis velis in altum provehi, hic enimvero in scopulum impegisti. Hæc est enim inter cæteras validissima ratio, quamobrem causam meam tua superiorem esse contendam. Hac enim tanta, atque adeo immensa celerrime per omnem naturam sine duce, at impetu suo vagandi libertate, omnia arripit animus sine discrimine, &, ut segetes fecundæ & uberes, nisi coloni accedat industria, non solum fruges, verum herbas etiam effundunt inimicissimas frugibus, sic ille levia, aliena, non utilia, falsa, indecora, monstrosa carpit, nisi delectus magnus prudentia habeatur. Opus infinitum esset exempla vobis subiicere:

gere : sunt enim nimis multa , eadem tamen quia unicuique notissima , minime necessaria , omiffaque omnium memoria temporum , fatis est præteritæ ætatis recordari , ætatis feraciffimæ ingeniorum , prorfus inopis iudiciorum . Nimirum ingenium ſibi relictum equus eſt cæcus & effrænatus , quem neceſſe eſt in præceps ruere , niſi moderatore regatur . Sedet in lucidiſſima mentis parte tanquam Rector , qui frænos adhibeat , Iudicium , ne aut progrediaris ultra quam oporteat , aut ne ruas temere , ac præcipitanter in id quod fugere prorfus oporteat . Quamobrem re bona , ſine præſidio noſtro , male utaris , cum re noſtra male uti ipſi noſmet ne poſſimus quidem , quippe unius iudicii eſt rebus bene & convenienter uti . Adeſdum mecum paucis , ut quantum in cauſa vincamus , ſenſim intelligas . Aptæ ad perſuadendum dicere , (quoniam humanioribus præcipue ſtudiis propoſitis ingreſſi ſumus ad diſputandum) præterire ſilentio , quæ aut nocent ; aut minime juvant , quid locus , quid tempus , quid cauſa poſtulet , quæ ſit Auditorum , quæ Adverſariorum , quæ Iudicum habenda ratio cognoscere (*non enim omnis fortuna* , ita me docet Magiſter ſummus M. Tullius , (*Or. 71.*) „ non omnis honos , non omnis auctoritas , non „ omnis ætas , nec vero locus , aut tempus , aut „ auditor omnis eodem aut verborum genere tra- „ ctandus eſt , aut ſententiarum , ſemperque in omni „ parte Orationis , ut vitæ , quid deceat , eſt confi- „ derandum , quod & in re , de quâ agitur , poſi- „ tum eſt , & in perſonis , & eorum qui dicunt , & „ eorum qui audiunt .) hæc præſtare magna ſapientia eſt ; & hæc præſtare omnia ejus , quam laudo , animi facultatis eſt . Quæ ab Oratore requiro , hæc a Poeta , hæc ab Hiſtorico , prout res tulerit , poſtulabo . Dic ſodes , in his quam tibi ingenioſorum hominum Patrone partem vindices ? Nonne petas
a no-

a nostris omnia? At & partes ipsas vestras recte explere, ut dicebam, sine ope nostra minime potestis. Judicii enim est ingenium regere, ne incompositis, incredibilibus, aut nimis longe petitis rerum forinis adhærescat, ne in omni sententia acumen, in omni verbo translationem, aut hyperbolem quærat, sed ut ubique auream mediocritatem, naturam, convenientiam, veritatem, aut veritatis similitudinem confectetur. Dum enim impotens illa tua animi vis admirabilitatem semper affectat, plerumque incidit in falsitatem. Illud tamen, in quo sæpius peccant Clientes tui, est floridum & ornatum dicendi genus, qui boni specie decepti, non sentiunt quid sit satis, atque ita onerantes dictionem nimia copia, & concinnitate sententiarum, ubertateque verborum delectationem quærunt, satietatem afferunt; ut qui in convivio cibos non præbent nisi delicatos, atque dulcissimos. Clientes nostri admonebunt cum M. Tullio in omnibus rebus videndum esse quatenus: magis enim, offendere nimium, quam parum; in quo Apelles Pictores quoque eos peccare dicebat, qui non sentirent quid esset satis. Auscultandum est nostris, qui docent uti varietate, miscere obvias ac vulgares cum sententiis novis ac figuratis, verba communia cum immutatis, ut hac ratione distincta Oratio eum concentum gratissimum efficiat, quem in musicis acuta gravioribus temperata, modorum flexionibus & falsis voculis certæ severæque interruptæ. Deducunt æqui homines eo vos, ubi sæpe versari magna cum voluptate soletis, unde poeticos spiritus sumitis, & plus æquo vobis indulgetis, in amœnissima viridaria traducunt vos, ibique Custodis artificium patefacient, qui non omnem locum voluit esse floribus consitum, sed qua herbulis, qua pomis vel nostris vel peregrinis, qua plantis, qua sepibus, qua silvulis, qua rivulis, qua semitis, & anfractibus distin-

stinctum ; tum docebunt his similia facere , appo-
sita dicendi segete, iudicium. Sed nullum finem fa-
ciam, si persequar ea, quæ nostræ causæ sint fatis, &
necesse erit dicere huic tempori longe plura quam
fatis. Ego vero, quia malo aliquid a me deside-
rari a clientibus meis, quam Auditores, qui offi-
cii, & honoris causa huc convenerunt, delassari,
Oratiunculæ finem pono Horatii auctoritate : *Scri-
bendi recte, sapere est & principium, & fons.*

I. Mente vigenti avia Pieridum peragro loca. *Lucr. l. 1.*

*Pone & Cimmerio in specu
Me, longas ubi nox duplicat horrida
Umbras multipotentium
Alarum piceo tegmine, nec Virtum
Ulla jam species queant
Mi oblectare animum, nec rota lucidi
Cerni Solis; & insuper
Mundanam ex oculis eripe machinam.
At mecum Sapientiæ
Fontem largifluum, & mentis amabilem
Thesaurum, nitidum fero
Præfulgens speculum, quod simul in modum
Ardentis roto turbinis,
Quo me cumque loco clausuris, ilicet
Sistunt innumera mihi
Se rerum effigies: ilicet aureo
Certant lumine mergier.
Apparent virides tunc Heliconidum
Saltus, & sacra flumina,
Pulchris qua resonant lene sub arbutis.
Tunc pendentia de cavis
Specto hic pumicibus cymbala, tibias,
Hic plectra, hic teneras fides.
Dirceus faber incude adamantina*

In

Instat dicere nobiles
 Hymnos, & solida flammea gloria
 Hæsuræ in latere invido
 Demittit lacubus tela perennibus.
 Hic hic dulce canentium
 Cycnorum ad strepitum lilia candida,
 Et mixtas violis rosas
 Nata Mnemosynes ungue avido legunt,
 Textentes venerabili
 Heroum capiti ferta micantia.
 At si mellis Hymetii
 Interdum satias me tenet, & mea
 Angustis ævet e locis
 Fervi mens alio; quaque Aquila ocyor
 Multo, & velivola rate,
 Dorso in pegaseo templa per atheris
 Terrarum peragro sola,
 Camposque undisonos, regnaque, & insulas.
 Quæ tum quantaque prob mei
 Fructus ingenii, gaudia colligo!
 Clausus prata virentia,
 Clausus nectareas fontium origines,
 Collesque, & nemora avia
 Prospecto, alituum frondiferas domos.
 Rident ante oculos mihi
 Picti purpureis floribus hortuli,
 Et circum nivei obstrepunt
 Blanditum Zephyri, & gutture lugubri
 Mæsturnæ Daulias eliquat,
 Dira absumpti Ityli fata gemens, melos.
 Hoc antro astriferum polum
 Mi fingo, hoc roseum mundi oculum, hoc tuos
 Arcus, nuncia candidæ
 Junonis variis Iri coloribus.
 Ah! quid, quid mage fervido
 Mentis floræ hominis dulcius est datum?
Quid

*Quid si haud praetrepidans meum
 Fatorum tacitis condam adytis caput?
 Ultra ne vaga tende, ne
 Fias omnituens, mens mea, Jupiter,*

II. Rîsus, tenuissîmus ingenii fructus.
Cic. or. 2. n. 247.

*Ingeniosus homo vult Gargilianus haberi.
 Expiit hinc lepidos, ut putat, ore jocos.
 In buccam quidquid seges apta jocis, modo risum
 Excitet, & vitium carpit, & ingenuas
 Securus mores, ipsis neque parcat amicis,
 Mordax pro vitiis saepe homines lacerat.
 Deficit apta seges? nugas, gerasque sicanas
 Ructat, queis risum non movet, at stomachum.
 Ut risum moveat, gestus, vocemque imitatur
 Mimorum. haud placeas, Gargiliane, tibi.
 Dicuntur lepidos generare Venusque, Leposque:
 Non Venus, atque Lepos, simia te genuit.*

I. Pictoribus, atque Poetis quidlibet audendi semper
 fuit æqua potestas. *Hor. A. P.*

*Patria Terra vale; tota est mihi Patria Tellus:
 Vilis Terra mihi est: pulchrior Orbis adest.
 Incolere Orbem alium Phœbus dat lumine mentis
 Ætherio; intus vis ignea pectus agit.
 Pectus agit, pingitque nova sub imagine Mundum,
 Quin & natura nobile vincit opus:
 Quis novus hic subito rerum mihi nascitur ordo?
 Errat & ante oculos quæ nova scena meos?
 Aspice splendidius cælum, distinctius astris,
 Equora vasta magis, & mage Terra patens,
 Pomorum, florumque ferax optantibus offert,
 Uberiusque solum, floridiusque nemus.*

Fors

*Formosa est oculis depicto germine tellus,
 Cum ver puniceo Chloridas e gremio
 Extollit caput, & circum plaudentibus alis
 Nascentes frondes frigidula aura quatit.
 Formosa est oculis & cum ver proterit aestas,
 Lenaeusque placet, cum colit arva, Pater.
 At natura suos alterno tempore constans
 Educit fructus: hac mihi lenta fluunt.
 Phœbe Pater, tardos aliis tu confice cursus,
 Et grata alternis tempora da vicibus.
 Post varios orbes nivei stellantia Tauri,
 Narcisso, & multa cornua cinge rosa.
 Post varios orbes Nemeæ intexæ Leonis
 Spicis horrendas colla per hirta jubeas.
 Nil moror, æternis rident mihi floribus arva,
 Æternisque simul frugibus arva nitent.
 Post alias, alias quas totus parturit annus,
 Totas cogo uno tempore divitias:
 Quin rapida ignivomus pertingat Apollo quadriga,
 Quæ micat aurato vellere in axe pecus,
 Quæ gemini lucent caelestia sidera fratres,
 Libra diem nocti qua facit aqua parem;
 Ceu cum Parrhasia depingens arte tabellas,
 Unius ipse potens viribus ingenii,
 Quæ totum naturæ dedit spectanda per orbem,
 Et quæ non uno tempore terra parit,
 Montesque & colles, & fontes pingit & amnes,
 Undique & omnigenas quas habet hortus opes.
 Provida non omnis tellus fert omnia; certis
 Quæque suis tribuit munera certa locis.
 Atticus haud redolens profudit Hymettus amomum;
 Nunquam mellis ager fertilis Assyrius.
 Ast ubi mi sedes, omnis fert omnia Tellus;
 Omnia fert Vati hac Terra beata mihi.
 Jam licet & molles jactent sua thura Sabæi,
 Et Panchæa licet cinnama Terra ferat.*

Me

*Me cogente dabunt senta sata florida silva,
 Mella dabunt quercus, flumina lacte fluent.
 Vate jubente atri ponent fera nubila venti,
 Pellet & undivagas blandior aura rates.
 Quis novus attonitas sonitus mihi perculit aures?
 Eheu quam sevo murmure silva fremit!
 Ite, jubet Vates, rabidi procul ite Leones,
 Et quaecumque tenent horrida lustra fera.
 Iucundis posthac resonet concentibus aether,
 Hic latae segetes, hic nova crescat humus.
 Respice, nativam posuere horrentia formam,
 Gratanturque novum jam sibi lustra decus.
 Silva tacet, cessere fera, tremulis modo pennis
 Argutis Zephyrus lusitat in foliis.
 Insoliti surgunt colles, & roscida circum
 Depicta insolito flore superbit humus.
 Jam mea sectantur virides vestigia cedri,
 Grataque odoratis decidit umbra comis:
 Quacumque ingredior, micat illico lucidulus fons
 Garrulus, & sacris oscula dat pedibus.
 Audin' ? arguti geminant suavissima Cycni
 Carmina, & alterna dulce loquuntur aves;
 Meque suum Regem mellita voce salutant,
 Scilicet hac uni subdita regna mihi,
 Gemmatas alij cingant diademate crines,
 Altaque subjectis jura ferant populis,
 Hac tu regna tuo donasti maxima Vati;
 Hac serva afflatu tu mihi, Phœbe, tuo.
 Hic regnator ego populos, terrasque jacentes
 Calcabo, atque animo sceptrum minora mea.*

II. Bullatis ne mihi nugis pagina turgescat.

Perf. sat. 5.

*Ergo ego nil didici? nil me Hermogenis, Venusini,
 Divinique Stagyrita, nil Quintiliani
 Præceptis studuisse juvat, studuisse tot annos?
 Aut nihil, aut modicum. nam cur compescere venas
 Ingenii rapidas, certis vincere catenis,
 Quem natura rapit veloci fervida cursu
 Per terras, tractusque maris, calumque profundum
 Expatiari ipsa sola duce, lege solutum?
 Mira mihi narraſque nova. Et nova miraque pangit,
 Quem trahit ingenii sublimis gloria, Vates.
 Cedo exempla mihi, docilis mira & nova discam.
 Sit tibi longinquas Heros ducendus in oras.
 Cantatos hortos, cantata palatia cernat,
 Insolitasque plagas, monſtroſas cernat & Urbes.
 Illic naſcantur voce, & ratione potentes
 Quadrupedes, homines ſed terram pectore verrant.
 Gens colat hic omnis digito non altior, illic
 Immanes homines Cælo capita alta ferentes,
 Quantus Eryx aut quantus Athos, aut ipſe nivali
 Vertice ſe attollens pater arduus Apenninus:
 Dein regio ſurgat Phœbæo toſta calore;
 At glacie adſtriçti fontes ſint, arva pruiniſ:
 Hic modo cernantur præſtanti corpore Nympha
 Concinerè, & quercus Nympharum ad pleçtra choreas
 Dueere; nunc ſubito Nympha cum quercubus una
 Mutatæ in corvos, miſvosque per æthera ferri,
 Inque angues ſubito mutatæ ſerpere terra.
 Tum finges ſonitu fremituque dehifcere terras,
 Et vomere horrendos Genios, Manesque coruſcis
 Armatoſ facibuſ, Centauroſ inde bimembreſ,
 Centipedeſque ſeraſ complere ululatibuſ auras,
 Et manibuſ geſtare caput Lamiaſque Magoſque,*

P

Ca-

Casum quosque suis. Primos me reddis ad annos:

Monstra mihi hac puero nutrix narrare solebat.

*Si canis heroum rutilantia versibus arma,
Tum sic assurges. auratam caperat hastam,
Hastam bellatores flictu provolventem,
Cantatumque enssem, qui ferrum, marior, & aurum,
Ferratosque humeros cataphraكتورumque lacertos
Transadigit; tum altam galeam, clypeumque nitentem,
Cujus in obtutu victa cecidere puella,
Termodontææ victa cecidere puella.*

*Dein furis ocreas posuit, cornuque recurvo
Tartaream intendit vocem: gemit excita tellus,
Diffugiunt omnes horrendo murmure passim,
Exiliitque suis specubus celer horrida altum
Voce boans Leo; spelæis, cryptisque tremisæit
Serpens, & quercus tremuerunt montibus altæ.*

Mira quidem hæc, ridenda tamen deliria mentis.

*Carmine vin' pulchrum blando describere fontem?
Sic aude: gratum nemorosa in valle susurrans
Fons erat; in ripis edunt miracula planta:
Non frondes profert, at serica stamina pinus,
Miraturque suis foliis pendere rubentes
Fasciolas cornus; collucet populus auro,
Chrysolitho exsuperat buxus, cerasusque smaragdis;
Gemma dat taxus, rutilantes myrrha pyropos,
Et viridi pendet corylo gangetica bacca.*

Hercle hæc ora foret nostris sat grata puellis.

*Propter aqua ripam viridi procumbit in herba
Delphinus, per prata salit gens muta natantum;
At subter lympham pullus, gallina, palumbes
Saltitat; aurea rostra ollis, argentei & ungues.
Intus sternuntur tonsis mantilia villis,
Atque super mensas epulæ, cyathique frequentes,
Accumbunt equites, pueri, juvenesque puella,
Lychni & pendentes lucent laquearibus aureis.*

*Hæc Dæmon faciat, mihi nil cum Dæmone. Sed me
Per*

*Per superas oras divīna insania raptat.
 Ausculta; incipio. Saltu pulcherrimus heros
 Aligerum conscendit equum, illum & calce fatigat.
 Hic se sustulerat rapidus stridentibus alis,
 Astra petit, spatiat per cava lumina Luna,
 Obturatorum series hic ampullarum;
 Intus mens hominum deperdita clausa tenetur.
 Nempe etiam hic ampulla tua est: nam quantula restat
 Pars tibi judicii? res prodigialiter ornas,
 Et vanas species, velut agri somnia fingis.
 Dii dent olfacere ampullam tibi, judiciumque
 Naribus haurire: at mihi sano in corpore mentem.*

Dialogus in rem propositam, inter Pyrinum,
 & Criterum.

*P. Rara avis ingenium: non atas amplius illa est,
 Qua dexter placido nascentes lumine Phœbus
 Viderat, & Pallas cupidis exceperat ulnis,
 Qui nido audebant agiles extendere pennas,
 Magnaque & alta sequi, qui liberiore volatu
 Sublimes rapti calo capita alta ferebant.
 Ab perier' homines! ex quo cecidere magistri
 E calo rigidi, queis est laus cernere acutum,
 Et trutina librare nova, qua parturit ingens
 Ingenium: jacet hoc servili compede vinctum, &
 Reptat humi, destens, quas nuper perdidit, alas.*

*C. Quid quereris veluti nostros inimica Minerva
 Oderit, & tellus nunc reddat nil nisi fungos,
 Nil nisi buccones, & bardos? tolle querelas;
 Egregiis etenim florent cultoribus artes.
 Atto ego ne invideam sæclo? circumspice qualis
 Nunc seges alta virum maturo vertice nutat,
 Et quales spondet fructus seges altera in herba.
 Norunt quin nostri quid distent ara lupinis.*

P. Quis nunc alarum sciat, ovorumque figuram

*Verſibus exprimere? aut gemina de parte bipennem,
Aut altare Deum, aut teretes imitetur avenas?*

C. Quae mihi ſuccinis ova, bipennem, altaria, avenas?

*P. Illi, quæ pueris pappam inferuere Camæna
(Inferuere olim) hæc oſtentauere ſtupenti
Orbi, hæc portenta ingenii. Tibi nota figura
Ovi eſt: nimirum diuina poemata tali
Ordine diſpoſito norant inſcribere, ut ovi
Obiicerent oculis veram putamque figuram.*

*C. Nunc memini factum id Leda pariente; at in auras
Luminis ut ſimilis venit cum Caſtore Pollux,
Rupto ovo periere ovata hæc carmina, opinor.*

*P. Ovatum tibi forte caput, qui talia rides.
An parui pendas tenui deducere filo
Carmen, ut exhibeat quam dant Altaria formam?*

*C. Agnovi; Herculeo de ſtipite Troilus ille
Tale habuit levi conſcriptum carmen in urna;
Dente vorax ætas carmenque comēſit, & urnam.
Exinde has ſtruere aras dediticere Poeta.*

*P. Ut lubet irride, (C.) periit celebrata bipennis,
Magnus ubi ad Troja muros fabricator Epeus
Inſtar montis equum conſtruxit; deſiit ille;
Ex hoc iſta laetæ Xanthi, aut Simoentis in unda.*

P. Comicaris: ſed quid corniceris in Ala?

*C. Hæc quoque deſiit, irriſa eſt cornicula poſtquam
Furtivis nudata coioribus. (P.) illa tuliffent
Fata utinam divini carmina Triphiodori!*

*C. Mi loqueris lapides. (P.) diſcrimina Ulyſſis, & omne
Scripſit iter rotidem libris, quot ſcripſit Homerus.
Littera quemquem librum ſignat, ſed littera ab illo
Quæ deeſt: ſic primum notat Alpha, ita Beta ſecundum.
Nullum habet Alpha liber primus, nec Beta ſecundus.*

*C. A luce ut lucus quia luce caret, ſic & mons
Quo caret a motu. proh fatum triſte, malignum
Tantum ſivit opus tenebris involvier avi!
Jam vilis piperi, ſcumbriſque daretur Homerus.*

P. Ter-

P. Terra malos homines nunc educat, atque pusillos.
Unum non produunt hac sacula Triphiodorum.

C. Portenta ingenii & nunc qua admiremur, habemus.
Sunt qui mille Acrostica, mille Anagrammata scribant,
Ingressuque pares versus, pariterque cadentes:
Cetera de genere hoc certam referentia palmam.

P. Hoc quoque non parvum est eadem convertere mille
Verba modis, varioque eadem disponere sensu.
Dignum laude sua ignotam reperisse fodinam,
Unde novas semper possis educere gazas,
Et ditare novis solertia opuscula gemmis.

C. At pro thesauris rudis, indigestaque sæpe
Materies foditur, lusus nec sæpe placebunt
Verborum. Sic fac veritas anagrammate corpus.
Fiet spurcum animal. (P.) videt hac, prævisaque vitat
Ingenium. (C.) mirum! hac priscis ignota Poetis.
Prisca Leoninos nec versus extulit atas:
Nempe hac arte nova juvenes cecinere Camæne

P. Falleris; at nostris Veteres exempla dedere.
„ Carbasia velatarum obvertimus antennarum.
„ Vir precor uxori, frater succurre sorori,
„ Et, tibi factorum pœnas instare tuorum.
Hac Italos similes casus docuere Poetas.

C. Mutem cum Thersite caput, si lusibus illis,
Verborumque sono studuit quidquam Maro, & ullus
Judicio huic similis; produxit talia casus.
In claustrum at fugiens non casu protulit ille.

„ Linquo coæx ranis, cras corvis, vanaque vanis.

P. Mel hoc hyblaum est, sapidum sal. ingeniorum.
Portenta ostendere olim translata, figuraque.
Attamen Antithesis magis inter schemata lucet,
Ut picta in tabula propter lux eminent umbram,
Ut placet in cantu concors discordia vocum.

C. Hoc valuit Pedius: doctus posuisse figuras,
Ridiculus Pedius librabat crimina rasis
Semper in antithetis. (P.) quid Hyperbola? denotat illud

Nonne lacertosi praegrandia membra Cyclopis?

„ *Tum vero arrepto fremebundus vertice montis*

„ *Longo ictu Cyclops in navim jecit Ulyssis;*

„ *Horrida concussi vibrarunt sibila venti;*

„ *Interea capreae pascabant gramina Saxi.*

*C. Credam si ante Cyclops dudum capreas docuit se
Pondere quamque suo librare per aera. (P.) crede hoc.*

„ *Illā vel intacta segetis per summa volaret*

„ *Gramina, nec teneras cursu lasisset aristas.*

„ *Vel mare per medium fluctu suspensa iumentis*

„ *Ferret iter, celeres nec tingeret aquore plantas.*

*C. Hæ bona verba: haud ingenium, verum intus ille
Sensus agit, qui multiplici phantasmate fervet:
Credam aut Mercurium alas concessisse Camilla.*

P. Proh quantum translata placent! ut; brachia longo.

„ *Marginē terrarum porrexerat Amphitrite.*

„ *Aut; Costam longo subduximus Apennino,*

C. Costam? ergo vel homo, vel bellua hic Apenninus.

P. „ Jupiter hybernas cana nive conspuis Alpes.

C. Ergo immensa Jovis fuerit satis alba salvia.

Inscriptum anne placet, legitur quod carmen in Aula?

„ *Tela Giganteos debellatura furores?*

P. Dant marem & ista sonum, sed cedro dignius illud;

„ *Gallorum Regi structurus ad astra Colossos*

Sudet in ara focus: „ quæ præmia rettulit Auctor!

C. Omnia jam fient, fieri quæ posse negabam.

Si sit in igne humor; quid ni flammæ dabit unda?

P. Et dabit, ingenium si jusserit: ampla potestas.

C. Quandoquidem tanti tibi sunt translata saporis,

Et subtile dedit cerebrum natura, feraxque,

Da speciem. (P.) verbum propone. (C.) columba coruscis

Irradians pennis. (P.) animatam dixeris Irim.

C. Iris. (P.) ridentis Cæli lacrymæ. (C.) enge Poeta.

Formosæ lacrymas si quis proponat Amicæ?

P. & luminis argentum liquidum ej, vel gemmeus imber,

Aut ros. (C.) & ros matutino in gramine? (P.) sudor

An-

Aurora. (C.) *nebulæ?* (P.) *dic turgida lintea navis*

Hujus mundanæ. (C.) *finge tonitrua; quid tum?*

P. *Cardine stridenti versatur janua Olympi.*

Vel: prægrandia provolvuntur Dolia Cæli.

C. *Fulmina?* (P.) *sunt totidem ictus Cælestis Catapultæ.*

C. *Motu Terra tremit.* (P.) *paralytica concutit artus.*

C. *Pectus amans.* (P.) *flammis bullit torrentibus Ætna.*

C. *Ingenium felix! at quid Rosa?* (P.) *Veris ocellus:*

Vel, pupilla Cupidinis, aut dic; Chloridos almae

Dulce fragrans Cyathus; Venerisve infecta cruore

Purpura pratorum. (C.) *qui cauda Pavo superbit?*

P. *Pratum plumarum, confixa at sidera plumis.*

C. *Luscinia?* (P.) *sine cannis organa.* (C.) *Et organa?*

(P.) *nudæ*

Luscinia pennis. (C.) *quid nix?* (P.) *discussa farina*

Ex alto; Alpini vel frigida lilia montis;

Vel mage si placeat (C.) *placet hoc sat. Lilia, fodes;*

P. *Illæ: nives animatae hortorum.* (C.) *ridiculum pol!*

Sidera (P.) *æperta Argi Cælestis lumina: sive*

Ferales faculae succensæ in funere Solis,

Lucidave ætherei convexa foramina cribri.

C. *Ingenium laudo, Latio donas Italum illud,*

Del celeste crivel bucci lucenti.

P. *Sed me percellit Phæbus.* (C.) *nil amplius opto.*

P. *Impos men'is agor.* (C.) *credo hercle* (P.) *nascitur infans:*

Fasciolas puero Junonia purpuret Iris.

C. *Pulchre, nil melius; sed ego nil amplius opto.*

P. *Pomifero exsuget charitum de pectore nectar.*

C. *Hoc quoque bellum est, dulce est; sed nil amplius opto.*

P. *Verque genas niveas, minioque & floribus ornet.*

C. *Hoc satis est, inquam, satis est; nihil amplius opto.*

P. *Ad cunas cytharam pulsans cantillet Apollo.*

C. *Anne loquor surdo? heus, heus, Pyrine, desine nugas.*

P. *Aeris & pestem puero, flatusque nocentes*

Arceat Arcitenens telis Cythereia proles.

C. *Maja Nate, aut fuste hunc, aut compeſce catena.*

Decisio.

Si quidpiam est, in quod apte & congruenter Horatianum illud cadere videatur, *Alterius altera possit opem res, & conjurat amice*, præsens profecto negotium est, in quo ingenium cum judicio, judicium cum ingenio in contentionem vocavimus, cum & illud sine hujus regimine nisi præcipitiis possit insistere, & hoc sine illo inane sit, ac nullius prope utilitatis. Verumtamen quia id est rem incertam incertiore facere, cum meæ partes sint illæ, ut aliquid in argumento proposito definiam, vos Auditores ornatiss. de opinione mea minime celabo. Miseror equidem viros præstantissimo ingenio præditos, qui sine certo duce, naturali tantum impetu se rapi sinunt, quamobrem in errores & decumâ nos quidem abripiantur: eos autem emunctæ naris homines, qui aliena recte dignoscunt, conari similia minime possunt, tanti facio, quanti eos, qui in transfretando mari tempestatum, ventorum, prædonum, locorum rationem ad revehendas tuto merces callent, ad coemendas nihil habent. Quare cum ingenium a natura omnino sit, judicium fere ab arte, cumque natura corrigi ab arte possit, ars, quod naturale non habet, afferre non possit, ingenium equidem judicio præoptaverim. De quaestione proposita habetis quid sentiam. Postremum superest, ut, quoniam nulla habita ratione incommodi hujusce temporis conatus qualescumque nostros ornaturi huc frequentes convenistis, tanta humanitate tenuitatem nostram sublevastis, referamus gratias pro beneficio vestro singulari. At quanta ubertate ingenii opus est, ut huic explendo muneri satisfaciamus? ea certe quam nobis deesse ingenue fatemur. quod si ad id nobis esset ingenii satis, prudenter tamen
ex-

expendendum esset, qua id foret ratione præstandum. Cum enim merita vestra sine vestris laudibus commemorari non possint, laudes autem abhorreat modestia vestra, ac tua potissimum P. E. cui nullum acroama ingratus, longe aliter atque Græco illi Themistocli, accidere potest, quam quo virtutes tuæ prædicentur, præ nobis ingenium sine judicio ferremus. Ne igitur in eo, quod reprehendimus, deprehendamus, conticescimus.

An. 1757. Mense Aug.



UTRUM

UTRUM HOMINI MAGIS
U S U I S E N S U S S I T,
A N I N T E L L I G E N T I A .

P R Æ F A T I O .

Admirandum spectaculum Natura universa, tum forma Cæli innumerabilibus undique ornata sideribus, immutabili spatio, mirabilique celeritate ab Ortus ad Occasum, & vicissim commeantibus, & in infimo orbe radiis Solis accensa Luna, ejusque annuos cursus spatiis mensuris consecuta, accretione, & diminutione luminis quasi fastorum notans, significansque dies, ipse autem obtinens subter mediam fere planetarum regionem Sol, Dux, & Princeps, & moderator luminum reliquorum, tanta magnitudine, ut cuncta sua luce lustret, & compleat; tum locata in media Mundi sede undique ipsa in se se nutibus suis conglobata Terra, mater omnium, obducta fructibus, vestita floribus, herbis, arboribus, distincta vallibus, montibusque, hæc omnia, & quæ prætermitto infinita, cum unius Hominis sint causa facta, satis ostendunt, Hominem esse natum ad contemplandum. Cum vero in rerum natura constantium, omnium mehercule admirandarum infinita serie, atque copia, Hominis natura longe superet universas, atque adeo eximias singularum dotes complectatur, omnium nobilissima est ipsius Hominis contemplatio, atque cognitio. Una humani corporis fabricatio, figura, perfectio, & aptissima partium coagmentatio miraculum quoddam est, & Sapientiæ opus; quod cum eximie Anatomici laudent, non satis pro dignitate laudant, nec laudare possunt.

Quid

Quid Animus? qui viget, qui sentit, qui meminit, qui prævidet, & moderatur, movetque id corpus, cui præpositus est, a Mente Divina profectus cum alio nullo, nisi cum ipso Deo, immensa quidem dissimilitudine, cum similitudine tamen aliqua (si hoc quoque fas est dictu) comparari potest. At cum res modo natura similes conjungi possint, consociarique, portentoso simile est hæc animi, corporisque rerum ita dissimilium, ut nihil magis, in unum archissima consociatio. Quamquam est quod admirer magis. Ea est agendi vis hominis ex corpore animoque compositi; vis, inquam, duplex, sentiens, & intelligens. Eo delapsus dicendo sum, quo præsens tota spectat disceptatio. In corpore insunt sentiendi instrumenta, per quæ objectis præsentibus, sensus in capite tanquam in arce mirifice ad usus necessarios facti collocatique proprio singuli funguntur munere. Iis regendis insidet in animo Intelligentia, sive mens, cui tota hominis natura paret, & cui totius hominis regnum a natura tributum est; ita tamen ut & mente sensus, & sensu vicissim, mens ad humanos usus prorsus indigeat. Nihilo tamen secius, quia non una eademque est ista sentiendi, intelligendique facultas, sed quanto differunt inter se corpus, animusque tanto inter se discrepant sensus, & ratio, placet in præsens disquirere, utrum Homini magis usui sit Sensus, an Intelligentia. Digna visa est eruditæ auribus vestris Aud. ornatiss. disputatio, digna Illustriss. ac Reverendiss. Antistes, tua sapientia, tuo judicio, tuis auspiciis, cujus præsentia tametsi jamdudum Musæ nostræ honestantur, honoranturque tamen nunc primum in Te uno & spe, & ratione studiorum nostrorum posita, auspiciis nunc vere tuis consecrantur,

HOMINI SENSUS EST, QUAM INTELLIGENTIA.

I. ORATIUNCULA.

Præjudicata causa video me in arenam descendere, iussum apud Viros intelligentiæ laude præstantissimos Sensui præ Intelligentia primas tribuere; atque adeo tanquam desperata causa initio statim de re tota concederem, nisi ea me recrearet cogitatio, quod seposita utriusque nobilitate, neque in contentionem vocata actionum utrinque dignitate, ii præfiniti sunt, constitutique disputationis limites, ut in humanis usibus ac ministeriis tota versetur contentio. Id si agimus (neque vero aliud agimus) scilicet qui recte intelligunt, in eadem mecum spero sententia futuros, quanto mens sensui sublimitate præstat, tanto menti sensum commoditate antecellere, ac propterea hunc magis Homini, quam illam usui esse. Nam, ut illud omittam, a primis annis donatum esse Hominem sentiendi facultate, cognoscendi prohibitum, etsi arctissima inter utramque societas est, ut, si hominem quærimus, & non aut belluam, aut spiritum utrimque sejunctum, altera separari ab altera nequaquam possit, tamen multa video posse confici per sensum sine intelligentia, per intelligentiam autem sine sensu perfici posse nihil video. Non te latet, opinor sensuum duplex esse genus, externorum, & internorum, qui ita in suis obeundis partibus sunt conjuncti, ut nullo modo agere divisim possint: & externi quidem dati homini sunt, quædam quasi viæ ad introducenda interius obje-

objecta, quibus arreptis, sine ulla mentis ope, communis sensus (quippe omnes hic unus complectitur) una & cum oculis videt, & cum auribus audit, & cum naribus odoratur, & cum reliquis id genus sensibus, quod singulorum proprium est, percipit. Ecquid adjumenti amabo te, ad id affert intelligentia? prorsus nihil: quippe & videre, & olfacere, & audire, & gustare, & tangere, munia necessaria propriaque sunt animantis, nullo, ut cuique facile patet, mentis exercita interventu. Ex motionibus autem singulorum sensuum ad arcem cerebri progredientibus oritur isthæc internorum sensuum perceptio, motionibus nimirum illis ab uno tantummodo rerum objectu per intervallum aptum deducto, excitatis. Planius, si libet, disputemus. Ignoras (quamquam tu quidem minime ignoras) fac tamen te ignorare unde sit, ut cibus, potusque alius dulcedinem contineat, alius amaritiam: tibi non constat, qui vapores, & unde graveolentiam, aut suavitatem odorum afferant; sonorum discrimina ex varia aeris commotione fieri non cognoscis, nec radiorum ferientium oculos naturam assequeris: mentis ista cognitio, non sensus est. Num propterea minus tibi sensus dulce, & amarum indicat, minus odorum foeditatem, aut jucunditatem distinguit, minus per multiplices aurium flexus, acutos, graves, tristes hilaresve sonos insinuat, minus aerem cum lucidum tum tenebricosum, minus sua simul rebus singulis inhærentia pigmenta tibi ad oculos sensus adducit? Quotus quisque est qui noverit, quæ in pulsu sensuum fiant nervorum, cerebrique affectiones; quid insit in rebus idoneum ad impellendos sensus, qua methodo, via, ratione, species per interpositum spatium ad sensus perveniant? & tamen nemo unus est, cujus sensus præsentibus rebus non pro habitu suo afficiantur, eo plane modo, quo Artifices instrumenta ad id,

id, quod intendunt aptissima sine errore conficiunt, tametsi neque instrumentorum vim, neque in conficiendi ratione causam agnoscunt. Neque putes me adhuc cum munia sensuum persequor, ratione intelligentiaque silente, purum putumque *αὐτὸ μόνον* descripsisse. Nam res varias pro sensuum varietate ipsis subjectas communis sensus per se distinguit, cognoscitque & si mens suum habet thesaurum memoriarum ad retinenda, quæ intelligentia comprehendit, si a notis ad similia colligenda progressum facit, & ignota prius deprehendit, tum vero de quaque re iudicium fert, non caret suo memoriarum thesauro illa, quæ a Græcis dicitur *φαντασία*, ad receptas species custodiendas, ab illisque desumit, unde imagines similes efficiat, immo & novas pariat; ut cum palatia crystallina, lacteos fontes, montes aureos, & id genus, quæ nusquam gentium invenire liceat, sibi repræsentat, consociatis in unum imaginibus illarum rerum, quas antea seorsim arripuerat; ac tandem si abutar vocabulo, re non abutar, suam iudicandi, sive æstimandi quid sit aptum sibi, quid non, communis sensus habet facultatem. Fertur enim secundum iudicium hoc quodcumque in sensu natura collocavit, ad ea, quæ sibi congruunt, refugitque contraria. Audisti ex me pauca illa quidem ob angustias temporis, ex immensis quæ dici possunt, ea tamen satis ad probandum sensum sæpissime apte suas partes sine ope mentis explere. Audire velim ex te, quid agat, aut agere possit sine ope sensus intelligentia; equidem de homine loquor: non hominem quæris, at spiritum vacantem corpore, si quæras illum, cuius actiones in una intelligendi vi contineantur. Si de homine tu quoque disseris, pernecessarii omnino sunt cognoscentes sensus, qui in cerebro sedem habent, ut gignantur rerum imagines, & ut Græci dicunt *φαντασµατα* quorum mini-

ministerio mens in rerum cognitionem deveniat, quibus remotis, nihil prorsus intelligas. Enitere quantum vis, ut a sensibus mentem sevoces; quo magis sevocabis, eo minus poteris id, quod volueris, mente comprehendere. Tritum est illud, *nihil in intellectu quin prius fuerit in sensu*; & verissime affirmat ille inter Oratores Philosophus egregius, inter Philosophos Orator præstantissimus M. Tullius, nullam speciem cogitari posse, nisi pulsû imaginum. Quid ni? Scitum est animum hominis infundi in corpus ceu nudam ac lævigatam tabulam, in qua nihil insculptum, nihil depictum sit: tum vero progressu temporis aliis atque aliis rerum notionibus imbui ratione hac una, ut exteriores sensus rerum species obiciant, objectas *φαντασία* excipiat, exceptæ se in *φαντάσματι* induant, tandem una cum istis animus contempletur, & ratiocinatione ad alia cognoscenda, & rursus alia ductu imaginum progrediat. Sic & per sensus res discas oportet, & si libeat quæ didiceris aliis communicare, per sensus, quæ cogitaveris, & collegeris, oportet effundas. Equidem quoties totis viribus enitor in materiam sine ulla specie, & carentem omni sensili qualitate mentem intendere, ubi insistam non invenio: hæreo suspensus, incertus, vagus, tanquam in aere volitans ac nusquam insidens avis, ac tandem cogor in caliginosum chaos delapsam mentem omnium ignaram, ac tantum non suimet ipsius nesciam relinquere. Quid tu? intelligis ne, aut intelligendas subicies carentes corpore res, ut Virtutes, Deos, Deasque & ejusmodi alia, nisi ad *φαντασίαν* confugas, qua vel hominis, vel aliarum rerum formas tibi effingas? formas, inquam, magis ad id necessarias, quam aut aquas, aut nubeculas, ut earum ope oculorum aciem in Solem intendas. Quod si in id incurras, cujus imaginem, per hunc, de quo loquimur, intimus

sen-

sensum efficere tibi nullam possis, cujusmodi est, *æternitas*, nihil prorsus poteris intelligentia complecti, aut si *παυσίας* sedes læsa sit amentia, vel perturbata phrenesi, vel somno occupata, doce me (scire enim aveo) quid possit Ratio, mens, intelligentia perficere. Vivida sit, libera, experrecta *παυσία* oportet, & ad efficiendas rerum formas apta atque expedita, ut ad munia sua intelligendi facultas promptissima sit. Quid apertius afferam ad evincendum sine sensu Rationem nihil agere, cum hæc ab illo ita pendeat, ut agendi vel facultatem, vel impedimentum ab eodem prorsus accipiat? Video quid objecturus sis. Sensus esse fallaces. Paucis me expediam: Exhausta enim, ad me quod attinet, clepsydra est, & aliis oportet locum dicendi facere. Patere admoneri te erroris, qui incautos passim & incuriosos invasit; sensuum fallax esse iudicium. Omnis error a mente est, a sensu nequaquam est. Sensus enim quoties integer est, & objecta sensus apto sunt loco posita, nec ullum in interjecto necessario spatium impedimentum intervenit, semper uno eodemque modo fungitur officio suo, neque unquam in errorem inducit. Mentis est cognoscere sensilis *ὁπρᾶν* (oportet enim uti græco vocabulo) qualitatem, objecti affectionem, spatii mensuram; in quibus examinandis si mens improvide occupatur, ipsa decipitur. Jam modo tibi per me patet ad dicendum locus. In intelligentia contra sensum laudanda jacta te quantum vis: cave tamen ne, quem admodum illi, facias, qui, ut Terentius ait, faciunt intelligendo, ut nihil intelligant.

INTELLIGENTIA MAGIS

QUAM SENSUS USUI HOMINI EST.

II. ORATIUNCULA.

Si præjudicata causa sensuum iste laudator, quem modo audistis, veritus est ne in arenam descenderet, ego quoque ad præjudicatam causam me accedere probe intelligo: hoc tamen discrimine, quod illum præjudicium vestrum NN. detertere debuerat, quibus datum est non minimum supra belluas sapere, quas propemodum Adversarius visus est hominibus anteferre, aut saltem comparare, cum sensum menti præferret: me vero præjudicium vestrum excitare maxime, & confirmare debet, quibus minime Oratione mea opus est, ut ipsi vobis persuadeatis, magis, immo longe magis quam sensum, usui Homini esse Intelligentiam. Illud potius vereor, cum aggrediar sententiam jam ante hominum communi judicio probatam probare, ne videar rem certam dubiam facere defendendi sollicitudine. Quocirca confutabo potius, quæ magno conatu, & minimo eventui protulisti argumenta, ad infirmandam sententiam tuam, quam nova afferam ad confirmandam meam. Animadverti duo potissimum fuisse momenta Orationis tuæ, Sensum agere sine Intelligentia multa posse, Intelligentiam sine sensu nihil posse. Obeunt, inquis, sua munia sæpe sensus sine Intelligentia. Ita sane: at ad animantia bruta illum abiicis, cui in muneribus obeundis mentem excludis. Lingua certe maxime præstamus feris, qua colloquimur inter nos, & sensa dicendo exprimimus: at si tibi sermonem conferenti non mens tanquam dux adsit, non illa argumenta suppeditet, non simili-

Q

mili.

multitudines subiiciat, quæ res demonstrent, & sententias illustrent, te inter & psittacum quid intererit? Quid mihi oculi vel ad legendum, vel ad spectandum obcæcata intelligendi vi? Homo sopita ratione, mea sententia, a talpa non differt, quæ habet oculos, & minime videt. Quoties evenit, ut animo in alicujus rei contemplatione defixo præsentia corpora non videantur, nec voces audiantur, nec impulsus sentiantur? quotidiana experientia notius id est, quam ut necesse sit Trismegistum, Socratem, Platonem, Archimedem testes appellare. Quid mihi garris pulchri adspectu lætari oculos tuos, cantibus aures oblectari, cæterosque sensus jucundis rebus gaudere, tristari adversis? Non sensuum iudicium hoc est, verum mentis, quæ motiones sensuum promptissime secuta iis se se immiscet, in iisque primas agit: quod quia celerrime fit, non facile deprehenditur, sed cognosces facile, si animadverteris & pictura, & sonis (idem dictum sit de cæteris) alios magis, alios minus delectari, prout magis, vel minus eas artes intelligunt. Mens itaque sensuum fons est, & facultatem habet, vel ipsa potius facultas est rerum formas excipiendi, & effingendi, ut verissime dixerit Tullius, nos non oculis cernere ea, quæ videmus: neque enim ullum sensum in corpore, sed vias quasi quasdam ad oculos, ad aures, ad nares a sede animi perforatas. Itaque sæpe aut cogitatione, aut aliqua vi morbi impediti apertis atque integris & oculis, & auribus nec videmus, nec audimus; ut facile intelligi possit, animum & videre, & audire, non eas partes, quæ quasi fenestræ sunt animi. Neque vero quidquam moveor tuo illo communi sensu, cui tantum defers, ut unus omnium sensuum vice fungatur, varietatemque objectorum pro varietate sensuum distinguat: quantumvis ille polleat, ullumne colloca-
 bir

bit supra belluam, nisi Intelligenti facultas accedat? Non inficior lumen quoddam insidere cerebro, quod apte cum Græcis vocas *φαντασία*: at illud ex se, & per se, remoto mentis lumine, quanti putas? Equidem tanti, quanti ad excitandum incendium inertes, & in aere discurrentes ignes, qui fatui ab ipsa sua imbecillitate appellantur. Opitulatum veniat mens necesse est, ac tanquam faces accendat, ne interius visum imaginibus illudum in errorem inducat. Igitur de brutis animantibus loqueris, dum contendis sine intelligentiæ adjumento sensus agere. At in homine & præsidet sensibus, & sensuum affectiones, actionesque omnes dirigit Ratio. In præceptis enim ferrentur sensus, si ipsi sui duces essent, & non Ratio domina iis regendis assideret. Jam quod ais humanam mentem sine ministerio sensuum nihil exequi, in re verissima (pace tua dixerim) disputas ineptissime. Quid enim conficeres affirmando Artifices nullum opus confecturos sine instrumentis artium singularum propriis, sine calamo virum litteratum non scribere, sine gladio non decertare militem? an calamum, gladiumque calamo, gladioque utentibus præferas? Ego vero cum sensibus instrumentorum partem concessero, Menti artificis, & agentis laudem reservabo. Congrediamur cominus: quantum isthuc est adjumenti, quod Rationi sensus suppeditat? Non potest quidem Intelligentia vim suam exerere, suam facultatem exercere, quin phantasmata excitatum veniant. Verum excitant illa, & nihil amplius, tantumque conferunt ad actus mentis, quantum ad incendium silvæ excusa filicis scintilla. Descendit, ut ita dicam, ab alta sede parvi hujus mundi, quem Hominem dicunt, Regina mens, resque corporeas per formas attingit, vixque contactis illis, non secus atque lusoria pila, vi in terram trusa, assurgit illico ad aliarum rerum, at-

que aliarum longe diffimillimarum contemplationem. Neque enim illa quidquam altum, ac sublime cognosceret, si alligata formis adhæreret. Non est igitur quod in sensibus magnopere commendes, quasi sint intelligendi efficientes causæ, cum ad intelligendum viam tantummodo muniant. Ad *φαντασίαν* confugit mens, inquis, ut res vacantes corpore intelligat. Hic enim vero imprudens prolapsus es. Non vides hac ratione menti te primas tribuere? Unde enim huiusmodi species affiguntur rebus materia destitutis, nisi a mente? Mens igitur species parit, alias cum aliis conjungit, itaque tanquam causa effectum *φαντασίαν* secum confociatam pertrahit, & cum hac focia corpus rebus vacantibus corpore tribuit, ac statim spoliatur res easdem induinentis non suis, eumque errorem emendat: quippe relinquens imagines ad alia sensibus minime subiecta ratione progreditur, quemadmodum coniectis oculis in pictas Heroum tabulas mens imagines prætergressa ad præclara illorum antiqua facta transcendit, quæ nostris sensibus nunquam subiecta fuerunt: & cum in illis ipsis tabulis nihil aliud oculi spectent, nisi colorem, mens aptam, vel ineptam oris, manuum, totiusque corporis conformationem cognoscit, atque potest ex cognitione operis Pictorem ipsum longissime vel loco, vel tempore absentem deprehendere. Mens igitur in cognoscendo a sensu non pendet, sed ipsum sensum ipsamet sæpe excitat, sociumque sibi adsciscit, non tanquam adiutorem, sed quodammodo affectum, quasque testem. Quamquam quid affectum, quid testem dico, quem vix dum socium adscivit, dicto citius dimittit; ut pila iacta, quod antea dicebam, terram deserit in aerem se citissime attollens, & silva correpta flammis silicem, quo excitata scintilla fuerat, obliviscitur. Nimirum illa per sensus quasi per fenestras rerum admonita erigitur

gitur ipsa per se, & in se perspicit naturam rerum & ordinem, ipsa sibi artem, methodum, & principia ponit, quibus res nobilissimas, easque occultas sensibus intelligit, itaque occultas, ut infinito quodam spatio illi & istæ inter se distent, nullo unquam modo istæ illis confociandæ. Quid cum mens ab iis ipsis rebus, quas sensus objecerat, ita digreditur, ut speculandi exitus longe ab alio, quam a quo exorta illa fuerat, fluxisse videatur? Appello te. Unquam ne tibi contigit, ut dicentem aliquem audiens a re proposita alio mente avolares, & ut qui lepores venatum se conferunt, aliquando non quæsitæ feras inveniunt, sic tu alia atque alia ad rem præsentem minime facientia cogitatione progrediendo comprehenderes? quoties legenti evenit, ut incursu unius verbi lux mentis vastissimum sibi aperiat campum, ad excurrendum, videndasque res innumeras, ab illo tenui principio quam maxime alienas? Et ita mentem a sensu pendere contendas, ut illa sine isto intelligere nihil valeat, ex quo concludas majorem Homini sensus usum esse, quam Intelligentiæ? Ut vere dicam, tacita cum indignatione te tamdiu secutus sum humi serpentem. Erige animum tuum, & cognosce te; scito te natum esse ad cognoscendas res, ad agendum secundum rationem, ad judicandum de rebus, non ut occurrunt sensibus, sed ut natura constant, ut intima rerum introspicias, ad secernendum a falso verum, ad contemplandum rerum Opificem, & res divinas investigandas. Id est hominem esse; id est secundum hominem agere; neque sensuum istiusmodi actus sunt, sed unius Rationis. Peregrinam certe doctrinam facturus finem dicendi nobis obtrudisti, non sensuum fallax esse judicium. Adesdum, amabo te; ipse enim subjecisti, quo te convincam. Nimirum quia sensus lædi potest, & ab interpositi spatii adjunctis

pendet, mens autem sola veritate movetur, qua tenebris occultata, aut sua luce progreditur, si discuti tenebrae possunt, aut subsistit suspensio iudicio, si minus possunt. Hæc scilicet ratio est, cur in iudicando sensus fallatur, intelligentia non fallatur. Probe intelligo me ad rem non dixisse satis, ad tempus tamen, & ad propositum confutandi satis, ad Auditorum acumen, & perspicientiam plus quam satis. Quamquam ne te quidem arbitror ita iudicii inopern, ut ex animi tui sententia disputaveris, sed mihi unus visus es ex illis, qui, cum versipelles, & callidissimi sint, inepti & fatui partes in scena lepidissime agunt.

I. Valetudini perniciofa mentis occupatio.

*Exigua inclusus cella, omni teste remoto,
Perpetuo unus, rerum abdita mente agitans,
Ingenium torquet Fronto; impallescere chartis
Delicias unas dum facit esse suas.
Enektus macie totus, vix ossibus hæret
Dura cutis, stat pro ventre locus, tenuis
Nasus & oblongus, diductusque oris hiatus;
Arida labra velut glutine juncta scabris
Dentibus, interius depressi luminis orbes;
Occupat hirsutas concava fossa genas.
Quid te, Fronto, necas? meditandi tanta libido est?
Te excaca; fies illico Democritus,*

II. In Garrulos.

*Semper ego auditor tantum, nunquamque repono,
Aut raro. docuit natura haud esse loquacem,
Cum mihi linguam unam tribuit, binas dedit aures.
Defectus Phœbi varios, Lunæque labores,
Qui tremere, & concussa queat discedere Tellus
Sub*

Sub pedibus, latam quid concitet Amphitritem,
 Aut gravidis largos demittat nubibus imbres,
 Philosophas narrat? porrectis auribus adsto.
 At quam corrupto est hominum pars magna cerebro!
 Ad potum calidæ jam Sole cadente tabernam
 Ingredior: Dii triste mihi depellite satum.
 Gerris oppressus blateronum spiritus alget:
 Innitor tacitus cubito ad tabulam; unus & Aulus
 Inter præsentem rem miram, sic putat ipse,
 Enarrat. Qualis stabulet mihi nostis, opinor,
 Pulcher equus, cervice micans, prævertere ventos
 Cursu aptus; nunc nescio quo morbo mihi languet
 Invalidus, mala quæ mea sors, nil cura, quiesque,
 Emissusve cruor juvit, medicata nec ulla
 Potio; quique vorax fuerat, nunc respuit omnes
 Quæsitæ escas: atqui affluit omnibus; ervi
 Bis septem modios, totidamque res ante paravi,
 Sex lecti farris, siliquarum quinque medimnos:
 Hordei acervus, fœnum, triticum, avena, legumen,
 Multaque de genere hoc frustra seposita supersunt.
 Hæc sed ego paucis refero, quæ plurima dixit
 Garrulus, insulsus, blatero, importunus, ineptus.
 Fabula equi necdum finita; absorbit horam
 Postquam causa gravis morbi, ratioque medendi,
 Aulus nostra inter rabiosa silentia pergit,
 Emerit unde, & cur, narrare, diemque, locumque,
 Quo pretio, quot testibus, & qua conditione,
 Quid siluit? Natalitiumque fideliter ille
 Narrat equi; Cæli quæ pars emerit ab ortu
 Et quo conspiceres nascentem Horoscope vultu.
 Ipse fremo interea tacitus, frontisque fluentem
 Sudorem sicco. Natales Aulus equinos,
 Quo genitore satum, quæ matre, & nomina avorum,
 Non secus atque initurus prælium Homericus heros,
 Atque decus sobolis censet longo ordine equinæ.
 Garrula si est Mulier, patior; laudare puelli

Risus, purpureasque genas, flavosque capillos
Matri impune licet, balbasque in gutture voces.
Tania, vel strophium multas docet esse disertas,
Multum etiam vocis poscit sibi fimbria palla,
Et speculum, & crinis: nam lingua volubilis illis
Acrior aut agitat nervos lingua atque meatus
Nescio quis succus, fibra aut subtilior istis
Mobiliorque est, quam maribus; vel lingua torosum
Quid muliebris habet; vel certe incognita virtus
Est capiti, venisque calet ferventior ignis,
Et subito & citius moveantur ut organa vocis.
Tanta quis ferat Aulum garrulitate potentem?
Hæc ego dum mecum, interea dat inania verba,
Datque alios sine mente sonos: sartago loquendi
In buccas hæc unde venit? certe arbitror ambas
Fluxisse in linguam Aulo aures. subducere conor
Nugarum nimbis me, verborumque procellis.
Ille manu arripiens, remane, dulcissime, mecum,
Hic mihi discumbas propior; te diligo: tum mi
Detrectare nefas; sedeo; sub pectore bilis
At mihi turgescit. rursus sic incipit ille:
Ad cithara sonitum hesternæ dum nocte Fabullus
Occinit, hunc pleno rutilans Latonia cornu
Delassat, tunditque caput. contra accidit Iro,
Dum noctem vino madidus traduxit eandem
Insomnis, rauca hunc tussis, capitisque gravedo
Occupat. Helvidii plantis male calceus hærens
Confregit digitos; hinc pustula turget, & acer
In cor subrepat dolor. hujus fursuris addit
Plurima, nec modus est: lassus cito proripio me,
Inque salutatum linquo. quo pergis abire?
Urbanus parum homo esse videris. at urgeor ire:
Vrve, vale. Oro, mane: non possum, vrve, Dii dent
Quantum verborum est tibi, tantumdem esse cerebri.

I. Objecta Sensuum, pabulum jucundissimum.

Qua libem patera Deis
 Qui jucunda Homini tot dederunt bona,
 Et mi tam proprie frui?
 Est vis, qua teneris molliculi thori
 Fultus gaudeo plumulis,
 Riparumque adeo strata virentia
 Spisso in gramine sentio,
 Et capto Zephyri mitia frigora.
 Est vis, qua mea judicat
 Blandum de omnigenis lingua saporibus,
 Nec diam ambrosiam Patri,
 Aut succos liquidi nectaris invidet.
 Qualis copia narium!
 Fragens qualis odor delicias facit!
 O thura! o bona dulcium
 Tellus Arabia mater aromatum!
 O vox blanda, suaviter
 Pertentans animos! o tenera alites,
 Arguto date gutture
 Cantus. vestram avidis auribus haurio
 Optatam harmoniam libens.
 O si Threicia me cithara fides,
 Aut vocalia mulceant
 Plectra, aut suaviloqua flamina tibia!
 At vos quid mage juverit
 Ardentes oculi? num viridantia
 Pratorum æquora longius
 Porrecta? an roseis floribus hortuli?
 Aut gemmantia vallium
 Cali rotifero nectare gramina,
 Turritis an in Urbibus
 Tempa angusta Deum, & pulchra palatia,
 Qua

Qua circum undique cernitis
 Late conspicuum tollere verticem?
 Quantum (Jupiter!) aurea
 Spargit scena jubar! tollite, tollite
 Aulcum. Lapis indicus
 Quam multus rutilat! o variis decens
 Aurum vestibis illitum!
 Fulgor quantus inest! nil tamen aethere
 Sudo pulchrius aspici,
 Nil majus roseo lumine Apollinis
 Spectari queat, igneum
 Sive os aquoreis exerat e vadis
 Fulva conspicuus coma,
 Sive ille Hesperio in litore fulgidas
 Passim mille coloribus
 Inducat species. Cernitis ilicet
 Ut molli haec fugiunt pede?
 Ut surgunt rutilo corpore sidera,
 Totumque irradiant polum,
 Et Terrae patulas dulce fluentibus
 Humentant radiis plagas?
 Et Te, Diva potens, cerno ego lucidis
 Phæbe argentea cornibus;
 Te, Saturne Pater. redite lurida
 Jam cura: rigat ebrium
 Me fons lætitiæ. Jupiter, obrae
 Lethæo mala gurgite, &
 Adde æterna meis tempora gaudiis.

II. Mundus, menti Speculum.

O qui flammantis radiata volumina celi,
 Stellarumque ignes conspicis & numeros;
 Lætæa quem Divum delectant limina, & alæ
 Fulgida conspicuo Luna nitore trahit;

Lam-

Lampadæque in magni usque aciem protendere solis
 Errantique orbes prospicere axe juvat;
 Cui mundi surgit sublimi splendida lux
 Machina, & altisoni regna opulenta maris;
 Fontesque atque lacus, qua leniter unda susurrans
 Labitur arguto læta per arva pede;
 Quem tangunt gelidis inductæ vallibus umbra,
 Dulcis ubi irriguis frondibus aura cadit;
 Halanti & mulcent ridentes palmitæ flores,
 Stellatos pingit queis sibi terra sinus,
 Huc ades, ipse animo mecum majora revolvens;
 Sublimes quando sunt tibi mentis opes.
 Cedite jam sensus errorum in nocte natantes;
 Suffusa en veri mens mea luce nitet.
 Jam cerno: magno miscens se corpore molem
 Spiritus æternis viribus intus alit.
 Hoc quodcumque vago metiris lumine, id omne
 Templum est, mens implet lumine dia suo.
 Illa jubet: prisca intereunt expertia formæ
 Gratanturque novum semina sparsa decus.
 Si mihi stirpe novæ incipiunt succrescere pinus,
 Ramus & incultam multus opacat humum,
 Cecropiæ aut volucris si parvis sedula natis
 Stramineas mira construit arte domos,
 Sive Apis halantes mellito nectare cellas
 Obstruit, & flavum ædædala fingit opus;
 Si mare, si terras, si lucida sidera lustro
 Convalles, montes, flumina, stagna, lacus,
 Structurasque operum, & discretas ordine moles
 Queis mundi late machina vasta viget,
 Impavidis animus rapiens liquidum æra pennis
 Artificis sanctos procidit ante pedes.
 Subjecto qualis speculo se prodit imago,
 Aut fontis puro sol micat e latice,
 Illum se talem spatioso prodere in Orbe,
 Et regere æterna mens mea cernit ope.

Cum

Cum vernis gemmant persusa roribus herba,
 Chloris & afflatu molliter arva rigat,
 Et dulcis Zephyri genitabilis aura susurrat,
 Et fundit picta Ver nova serta manu,
 En Divina mihi tua se pulcherrima forma,
 Explicat, atque Opifex, Oris imago tui.
 Horrida rugitu flagrans Leo terga retorquet?
 Educta æstivis solibus alma caput
 Attollit, latis ridens sæcunda colonis,
 Partiturque lubens spicea dona Ceres?
 Aspicio; Diæ se magna potentia Mentis
 Obiicit, atque animo mi mage clara micat.
 Currite, nutanti Autumnus vos vertice Nympha
 Allicit, en pleno mitia poma sinu
 Elicet, en dulces pendent e vitibus uvæ,
 Aurea maturis frugibus arva nitent;
 Currite: at æterni interea Clementia vultus
 Divitiis Ruris se mihi prodit amans.
 Atque ora, atque oculos pervolventi omnia circum
 Enitet æthereus pulchrior inde decor,
 Non ego fallaci perstringor imagine; dias
 Hinc formas, dias mens sibi quærit opes.
 Subjēctas species namque impigra transvolat, & quæ
 Effugiunt sensus, illico lata capit.
 Pulcher uti vitreas Narcissus fontis ad undas
 Olim cum picto luderet ore puer,
 Non puerum tenuis percussit imago, sed imo
 Contemplata novum mens sua fonte decus.
 Imbelles alios cithara, & solatia cantus,
 Cinnamaque atque epuli splendida pompa juvent;
 Mentis ego puro spectabo lumine mundum:
 Hic mihi jucundus sat Liber unus erit,

Dialogus inter Poetam , & Philosophum .

P. Fallor? an arma sonant? non fallimur, arma sonabant .

Ph. Falleris, hic nulla arma sonant, nulla arma sonabant .

P. En tuba terribili sonitu taratantara dixit .

Ph. Nil minus: hic agimus tranquilla silentia (P.) ferrum
Ferte citi; namque arma sonant, litui, atque saxum
Obstrepuere, crepant rauco cava tympana pulsu;
Mars venit; ardentem oculos, ensesque micantem
Aspicio, & clypeum, & vorantes sanguine currus .

Ph. Huic lesa & commota homini sunt organa sensus .
Non audita audire putat, non visa videre .

P. En mihi jam paries subita vertigine circum
Voluitur, en multa passim fulsere lucerna .

Ph. Atqui fontis aquam dat Vatibus Hippocrene .
Fumosusque rotat cerebrum vertigine Bacchus .

P. Patria terra vale; date vela, impellite remos
Torquentes sub aqua: sed praestat ponere remos;
Aspice, sponte sua terraeque urbesque recedunt .

Ph. Navigat Anticyram caput insanabile, rerum
Ignarus terras decedere crelit, & urbes,
Et validos liquidis remos curvarier undis .

P. Aethere purpureo auratis inuenta quadrigis
En Venus, en junctae niveo candore palumbes,
Quae, veluti pictis distincta coloribus Iris,
Mille trahunt varios collo gemmante smaragdos .

Ph. Proteus es; tot te in facies, tot vertis in ora .

P. Versor ego in Pindo. an dulcis me insania ludit?

Ph. Praecipitem, haud dubito, te e mente insania turbat .

P. Haud equidem, ut credis, deliro, sed mihi consto .
Egregius namque & fecunda mente Poeta
Ludit imaginibus, dulcique abreptus ab aestro
Evolat, ut patulas praepes volat ales in auras .
Sic, vivit nullo periturus tempore vates .

Ph. Sensibus illusus turbaris inanibus umbris .

Te

Te quoque Fata manent. (P.) *nulla ratione probabis.*

Ph. *In prompta sexcenta mihi argumenta* (P.) *ser unum.*

Ph. *Frustra est; non mente assequeris.*

(P.) *fare, euge sophista.*

Ph. *Fabor: Philosophi abscedant: adverteito Vates.*

*Vesceris alitibusque, & pisce, & carne ferina,
Hæc alimenta, quibus pro dulci vesceris esca,
Mortua sunt; alimenta ferunt sed mortua mortem,
Ergo immortalī nequaquam tempore vives.*

P. *Ast ego, & ambrosia immortalī, & nectare vescor,
Quod mihi craterē aurato dat pulcher Apollo,
Ergo & ego æternis cum Diis sæcla omnia vivam.*

Ph. *At nec Di sunt æterni.* (P.) *miracula narras!*

Ph. *Hoc probo. Quodcumque æternum tu dixeris, omni
Principio caret.* (P.) *hoc equidem do* (Ph.) *quod caret omni
Principio est infinitum,* (P.) *non ista negabo:*

Ph. *Quodque iafinitum est certa haud statione locatur;*

P. *Perge age.* (Ph.) *quod nulla certa statione locatur,
Non est omnino.* (P.) *his ambagibus ergo quid inferis?*

Ph. *Quod tu ais æternum, omnino non esse.* (P.) *quid ergo?*

Ph. *Ergo cum Di sint, æternos esse negandum est.*

P. *Tu laqueos tendis frustra: mihi sentio molles
Jam nunc a tergo tractim succrescere plumas,
Paullatimque humeris geminas assurgere in alas:
Longius en collum fit, cruribus aspera pellis
Nascitur en albus toto sum corpore Cycnus.*

Ph. *O præstans vere ac cælo demissa Poesis,
Quæ nos ex hominum facie (mirabile dictu),
Induit in vultus, pennataque terga volucrum!*

P. *Quo me pernices rapiunt per inania penna?
Quo feror & ventis, & fulminis ocyor alis?*

Ph. *At nos Philosophi gradimur testudinis instar.*

P. *Nempe humi uti quadrupes serpis tu, ego subvolo ut ales.*

Ph. *Quid si te motu lento testudinis instar
Tardigrada ferri doceam?* P. *qui quæso, docebis?*

Ph. *Tu Cycnus levibus pennis cava nubila trans;*
Sed

*Sed Cycnus motu, & testudo fertur eodem,
Ergo tardigrade ritu testudinis ibis.*

*P. Juro per lauros victricis pramia frontis,
Perque arcum, poterit nec Apollo probare minorem.*

*Ph. per crepidas juro, per barbam Philosophorum,
Id, quod Apollo probare nequit tuus, ipse probabo.*

P. Maeste esto virtute; & eris mihi major Apollo.

*Ph. Ex individuis punctis tempus, spatiumque
Constat, quod notum est. Sed puncto temporis una
Non nisi punctum unum spatii percurritur; ergo
Æquali motu velox volat aere cycnus,
Progrediturque solo testudo cum pede tardo.*

*P. Nux hæ sunt. ego præpetibus per nubila pennis
Ante Notum, Zephyrumque volo, terrasque jacentes
Linquo, lucentemque polum & voga sidera tango.*

*Ph. Tu quoniam hinc pennis ablatas sidera tangis,
Quam sunt magna? (P.) velut nux.*

(Ph.) quam sunt lucida? (P.) uti fax.

*Ph. Hercle & Aristotele es tu doctior, atque Platone,
Anne etiam Lunam cum Cali sidera adires,
Vidisti propius? (P.) Lunam quoque in æthere vidi.*

Ph. Eja age de Luna quid sit, pauca ordine narra.

*P. Est Dea stellatis tacita qua in nocte quadrigis
Æthereis fertur spatiis, peploque resulget
Sideribus rutilis picto, capitisque corusco
Vertice bina gerit curvata cornua lucis;
Hinc jubar auratum Terris, radiique rubentes
Mittuntur, noctem obscuram qui lumine vincunt.*

*Ph. Quæ te sopitum, sodes, mala somnia ludunt?
Hæcine Luna est, umbrosa quam nocte videmus?*

*Eja age, quid sit ego expediam, tu mente repone.
Luna, ut Pythagore magno visum, altera terra est,
Quam circum, late in gyrum spirabilis aer
Funditur, immensisque mare undique fluctibus ambit.
In Luna & montes summi, vallesque profonde,
Et silvæ, & planta virides, & floræ præta,*

Et

*Et pecudes passim errantes, pictæque volucres,
Atque homines, alto qui calum vertice pulsant,
Qui geminis possunt metiri passibus omnem
Circuitu Lunam: tam vasta mole moventur.*

P. Anne venis modo tu e Luna, qui talia narras?

Ph. Quin de Sole ipso.

*(P.) en! quid id est? Calum, aspice, Calum:
En geminum Solem, & duplices se ostendere Thebas
Cerno! (Ph.) novi ego me Patavi nunc esse, nec unas
Thebas aspicio; innumeros quamquam athere Soles
Hac, illac radiis video splendere coruscis:
Quin etiam ipsa die nox clarior athere lucet.*

*P. Alma dies, rutilis calo ridente quadrigis
Vesta jubar cui circum oculos, nitidissima & ora
Volpitur immortale micans, roseisque capilli
Texuntur radiis, it vesti tortilis aurea
Splendor, præfulgensque coruscat sub pedibus Sol,
Tene igitur sic lucentem nox lumine vincet,
Nox, quam caligo, pallecentesque tenebræ,
Atque horror circumvolitat, erebique profundis
Faucibus egressa pennis nigricantibus umbra?*

*Ph. Sed vel sic obscura diem nox lumine vincit.
Namque dies ideo clara est, quia Solo nitescit;
Atqui, ut Cartesii fertur sententia magni,
Quæ Cælo immenso resplendent sidera noctu,
Sunt totidem Soles; constant nam primi Elementi
Particulis, ut Sol; ergo cum sidera vasto
Innumera eniteant Cælo, innumeri quoque lucent
Una Soles nocte: die nox clarior ergo est.*

*P. Eheu, quot mihi, nunc excacant lumina Soles!
Heu nimium astuo! cuncta mihi calor ossa perurit:
Ah Phaeton, Phaeton! rutilis sic ignibus ipse
Urebat olim, tonitru, flammaque trifulca
In præceptis Phæbi ignivomo defectus ab axe.*

*Ph. O quam vana Poetarum, quam mobilis est mens!
Stare loco nescit, nunc huc, nunc devolat illuc,*

Si

*Sicut aquæ tremulum labris ubi lumen ahenis
Sole percussum sursum salit atque deorsum,
Parietibusque celer dextra, lævaque coruscat.*

*P. Sed quid ego hic moror? (Ph.) audaci quo tendere cursu
Nunc properas? (P.) Cæli præter convexa volare
Mens gessit, Mundus quo pulchrior enitet alter.*

Ph. At mundum hunc extra nihil est, quo pergere possis.

P. Pegaseo en residens dorso super athera tollor.

Ph. Ito bonis avibus cognata ad concava Luna.

Decisio.

Etsi ut Anima Corpusque, ita mens atque sensus
duæ sunt Hominis partes inter se longe dissimiles,
ac porro diversæ, & illa quidem pro sua dignitate
instar spiritus agit, quæcumque agit, iste vero se
gerit demissius, bellæ ritu, suæ scilicet naturæ
congruenter, tamen nec omnino naturam corporis
consequuntur sensuum actus, nec omnino mentis
actus naturam spiritus, sed ex utraque dissimili parte
simul ducto agendi principio, & ex sensu humilitatem
quamdam contrahit agens Intelligentia, & Sensus agens
quamdam ex Intelligentia nobilitatem. Quæ cum ita
sint, quoniam non partium dignitas, verum usus in
contentionem venit, nec vero actio animi ab actio-
ne corporis, nec actio corporis ab actione animi
sejugata esse ullo modo potest, fidenter pronuntio,
ad usum Hominis quod attinet, hæc tam diver-
sas partes esse pares: quippe sejunctæ utriusque partis
operationes aut spiritus sunt, aut corporis sunt, ho-
minis nequaquam sunt, dum tamen meminerimus al-
terius esse partis obtemperare, alterius vero imperio
regere, ut parvus iste mundus, quem Hominem dicunt,
parendi rite, & recte imperandi concordia rectissi-
me gubernetur. Hæc scilicet inter subiectos ac do-
minantes conspiratio, atque consensus communes res

R

om-

omnes arctissime continet, felicissime gerit, & feceris malis cumulatam bonorum complexionem inducit, id est quantam Homini habere licet, beatitatem. Felicitas hæc, quoniam isthuc Oratio sua sponte procurrit, tenui isti Reipublicæ nostræ hoc maxime tempore obvenit, cui regendæ cum scientissimi quidem semper præfuerint, tamen sine invidia, & sine adulandi suspitione affirmare possumus, quod omnes intelligunt & fatentur, Te Præsul Amplissime, bonos Superos singulari nostro bono concessisse. Nos igitur, quoniam nunc primum licuit in hoc tuo gradu Tecum publice loqui, damus ipsi nosmet ac dicamus ad nutum obtemperaturos tibi, Teque colimus, atque venerabimur, tanquam omnium nostrum mentem, rationem, intelligentiam.

An. 1759. mens. Aug.



A D

SANCTEM VERONESIUM

EPISCOPUM PATAVINUM

Sacri Theologorum Collegii nomine

GRATULATIO.

QUI alibi Gentium publice sæpe dixi; in Patria nondum manifeste dixi; perpetuo etiam in posterum per me quoad licuisset; silentio usus; nunc demum sapientissimorum Patrum consensu; ac voluntate primum jubeor dicere; gratulandi causa pro more institutoque Majorum Tibi; Illustris: ac Rev. Antistes; susceptam Patavinæ Ecclesiæ administrationem; objectis mihi rerum miris eventibus; ac prorsus novis; tanto majora ab Oratore postulanti-
bus, quanto ipsi præteritorum temporum exempla superant; & ab usitata tam illustris demandandæ Provinciæ consuetudine magis recedunt. Non hospes nobis atque peregrinus advenit RR. EE. Patres; qui ex remotis terris per eximias virtutes; & egregia facinora auditione a nobis accepta ad hanc sedem longe nobilissimam aditum sibi patefecerit; eamque dignitatem; postquam per multos gradus sibi viam munierit; tanquam honorum fastigium consecutus sit; cujus simul atque nuntius pervenerit; inquiremus nomen; ingenium; virtutem; decus; meritum; solliciti qualis futurus sit; quæ ejus voluntas; qui ferunt ordo; quæ nostra fors; quæ spes; a quo profecturam felicitatem nostram votis prosequamur; & cogitando tantummodo coniicimus. Noster es; quem modo Patronum; & Sacrorum moderatorem suspi-
R 2 ci.

cimus, ac veneramur: novimus indolis suavitatem,
 morum integritatem, sapientiæ præstantiam, ut pro-
 speritatem nostram jam nobis repræsentemus, explo-
 raramque habeamus. In hoc solo tua crevit virtus,
 & fruges, fructusque edidit saluberrimos: hic orta,
 alta, aucta, amplificata merita tua usque eo, ut non
 per usitatos honorum gradus adscenderes, sed repente
 summum conscenderes, primum meritorum præmium
 consecutus illud, quod aliis consuevit esse supremum.
 Novum hoc, & admirandum, non tamen unum il-
 lud. Superiore tempore Episcopos excepimus luben-
 tes, nec invitos, suæque dignitatis insignibus præ-
 fulgentes: nunc Te Episcopum pro tua modestia
 reluctantem, & pro Summi Pontificis in nos cha-
 ritate, vere compulsum, atque hic, ob oculos no-
 stros, quod jucundissimum spectaculum antehac non
 meminimus, sacris vestibus, ornamentisque magna
 cum celebritate, ac splendore decoratum. Alias ere-
 pto pro naturæ lege nobis Antistite alium ita susce-
 pimus, ut a funesto casu ad lætitiā, a funebri per-
 soluto officio ad plausus, a luctu ad hilaritatem tra-
 duceremur. Nunc primum ad totius Ecclesiæ guber-
 nacula Præfule nostro summa Dei providentia, im-
 mortali Ecclesiæ nostræ ornamento, communi om-
 nium, & exultanti lætitiā sublato, ita Te suffectum
 habemus, ut festivis vocibus, faustis ominibus, gra-
 tulationibus, aliis super alios nihil intermittentibus,
 semperque novis gaudii, hilaritatis, lætitiæ fontibus
 perfundamur. Num quia nova accidere debuerant
 omnia, illud quoque accidit, ut novus quodammo-
 do Orator, novo certe modo eligeretur, deposcenti-
 bus viva voce me unum Patribus, cum semper antea
 pluribus propositis, iniri suffragia consueverint, ut
 maximis eventis etiam minima convenirent? Cum
 hæc a dicente magna postulent, a tenuitate certe
 mea non expectanda, quid unquam jussistis Patres,
 & quem

& quem ejus Viri, ipfomet præfente præconem eife voluiftis, de quo vere qui velit dicere, non poteft nifi magna dicere, ipfe autem de fe non poteft audire quidquam magnifice? In gravi lufta, magnaue animi fluctuatione verfor, Aud. veritus ex una parte ne illi molefta accidat Oratio mea, cui debet eife inftituta, coactus ex altera neceffarium præftare officium, alæ, fi unquam alias, nunc certe pleniffimum. Hanc enim facri muneris procuracionem ineuntibus femper antea confpiciis quidem illis, & præftantibus viris, novis tamen huic Patriæ, atque ignotis, quæ ab Oratoribus commemorantur, fatisfaciunt Audientibus, qui cum ignorent, fi qua omiffa fuerint, non poffunt nec tacite Oratorem redarguere. Hoc tempore me apud eos dicere intelligo, qui rerum jam ante per multos adhuc annos utiliter nobis ac divinitus geftarum testes, fpectatoresque cum fuerint, immo æftimatores etiam sæpe atque exornatores, fi minus perfequar quæcumque norunt, postulabunt fidem meam, & fi concefferint in tanta rerum dicendarum ubertate neceffario plurima prætermitti oportere, cum quifque judicet pro modo fuo, & audire quifque velit, quæ ipfe diceret, nec in delectu habendo ego unus in fingulorum judicium incidere ullo modo poffim, qui omnium ad unum defiderio fatisfaciam, omnium ad unum reprehentionem effugiam? At fi vobis licuit Patres RR. EE. eligere dicentem quem velletis, æqua ratio poftulat, ut huic ea liceat feligere ad dicendum, quæ ipfe velit. Ego vero innumerabilia æternis digniffima laudibus, quæ incredibilem admirationem excitarent, fi explicari, dilatarique poffent, una brevique Oratione complectenda naftus, multa ftrictim attingam, multa proponam, non exponam, multa fignificabo verius, quam oftendam, multa jam cognofcentibus cogitanda relinquam: Pictorem imitatus, qui in

exigua Tabella aggressus magnam hominum multitudinem effingere, aliorum tantummodo vultum exprimit, aliorum dimidii oris lineamenta obijcit, aliorum summa capita ostendit, reliquum corpus missum facit, quasi in umbris delitescens, mentis oculis conspiciendum.

Quemcumque missum nobis ad hujus Ecclesiæ regimen admovendum Præsulem accepissemus, propterea quod dubitari non posset, quin divinitus nobis datus esset, Divinoque Numini maxime placeret is, quem, qui in Terris vices gerit Supremi Numinis, delegisset, libentes illum profecto, & gratulabundi accepissemus. Sed quantum interest inter præterita & futura, quanto explorata & experientia comperta majorem, quam sperata & expectata lætitiâ in animis hominum commovent, tanto plus fidei habere debet ea gratulatio, quæ Tibi fit, Præsul Amplius, jamdudum gubernanti, quam ea, quæ gubernationem ineunti habeatur; de quo qui pronunciare velit futurum talem, qualem Te longum tempus habuimus, is debeat ad conjecturas, quasque auguria confugere; & si illa jucundissima accidunt, quæ quis aliquando præferat, ecquâ putes nostrorum esse alacritatem animorum, cum videamus Te nobis concessum, quem simul atque pernicipibus alis investita Fama detulit Rectorem nostrum, Pastorem, Parentem, cujus memoria semper dulcissima nobis erit, Carolum Rezzonico ad Summi Pontificatus apicem evectum esse, jam tum præfagivit animus in ejus locum susceptum iri? Et si magnopere delectat, quæ quis judicaverat, ab aliis etiam ita judicari, quam iusta ratio suppetit cur immortaliter gaudeamus, vehementer lætemur, nobismet ipsi summopere placeamus, dum Te videmus Divino quoque judicio probatum, quem semper hæc fæde dignissimum judicavimus? Patere exprobrati animi

mi voces, quæ comprimi sine veritatis injuria non
 possunt. Tu unus inter multos dignos dignissimus,
 cui summa rerum nostrarum potissimum concedere-
 tur. Fidenter loquor; minime veritus ne quis exi-
 stimet, me ex veteri & usitato laudandi more ad
 tempus loqui, audientibus sententiæ meæ judici-
 bus, iisdemque testibus. Quotus enim quisque no-
 strum est, quem lateat per viginti, immo amplius
 annos Te in hac amplissima administranda provin-
 cia talem adiutorem atque socium præstitisse, ut
 tuo præsidio maxime niteretur sacra universa res?
 præsidio inquam singularium virtutum tuarum; co-
 mitatis in excitandis magis, atque magis ad lau-
 dabiliora hominibus probis, conjunctæ in corrigen-
 dis peccantibus cum clementia severitatis, pruden-
 tiæ, quam nihil falleret, justitiæ, quam nihil infle-
 cteret, fidei, & constantiæ, quam nihil imminue-
 ret, vigilantæ, quam nullus labor frangeret, in su-
 scipiendis rebus providentiæ, in agendis solertiæ,
 in perficiendis diligentæ simul, & gravitatis, ut eas
 res nec festinatio præcipites ageret, neque cuncta-
 tio inutili mora corrumpere, præsidio tandem
 virtutum, quæ in Te congestæ sunt; quæ cum
 sint omnes, ita singulæ eminent, ut quoties pro re
 nata uteris hac vel illa, toties ea nimirum excelle-
 re videaris. Floret vinea nostrâ cultissima qua fur-
 culis succrescentibus, quâ grandioribus plantis, quâ
 maturatis, rebus autem omnibus suo loco, & ordi-
 ne collocatis, loquamur apertius: viger Ecclesiasti-
 ca disciplina per gradus in iis, qui Divino manci-
 pati sunt ministerio, ubique positi sunt idonei apti-
 quæ ministri, optimis institutionibus sacra peragun-
 tur, sanctissimis præceptionibus universus Patavinus
 populus continetur, Religio, Pietas, Fides, Divinus
 cultus regnat ac dominatur, imperio quidem Anti-
 stitum, quis neget? tuo tamen consilio, quis non

fateatur? Parietes medius fidius Episcopaliū istarum ædium conscii sunt, intra quos diutissime versabar, quanta Sapientiæ tum ab illo Divino, tum ab illo altero Ecclesiastico fonte haustæ argumenta dederis, quam apte consultus responderis, quam caste integrèque sponte suggereris, quam animose & constanter vera, rectaque tuereris, ut nihil deliberaretur, decerneretur, perficeretur nisi monitore, hortatore, auctore, parum abest quin dicam moderatore Te, cui deerat Episcopi nomen, inerat auctoritas, qui onus sustinebas, de honore minime cogitabas, cui non in sermone tantum, sed in vultu ipso, ac nutu Episcopalis emicuit semper gravitas, qui verbo, exemplo, factis eras Episcopus, antequam esses. Tanta incrementa virtutum, tam eximiam rerum gerendarum scientiam, tam magnum cumulum, excelsamque molem rerum pulcherrimarum non magnopere miretur, qui jacta a Te jampridem fundamenta cognoscat. Ecquid aliud expectari ab eo poterat, qui annos natus XV. in Patria de rebus Physicis ingenti plausu publice disputavit, ibique rude donatus Romæ trienio vix elapso de rebus Theologicis, de Pontificio jure, de Historia Ecclesiastica publicum certamen habuit, quo omnes in sui admirationem Adolescentulus pertraxit, multorum benevolentiam sibi conciliavit, Virorum principum gratiam iniit; ab eo, cujus vel pueri animo collecto fere semper intentoque studiis, & æbus honestis innascebantur illa virtutum semina, quæ in dies adolescentia brevi in admirabiles fruges erumperent; ab eo, quem Adolescentem eam ob causam acceptissimum carissimumque habuere S.R.E. Cardinales, quod plane prospicerent & probitatis, & scientiæ ornamento non æqualibus suis solum antefendum, sed cum majoribus natu comparandum. Jamque ille se se e vestigio parabat ad ingenii doctrinæque

que experimentum longe majus, nostri vocant, *Actum magnum*, cum domestica lætitia domum revocatus, fausta Genti suæ, sibi prope infausta, illud curriculum interrupit, in quo magnis gressibus ad gloriam, dignitatemque properabat.

Quamquam quis Divinæ Bonitatis semitas persequi possit? Ad nostram felicitatem divinitus designato facta est illi ad nos via, & in nobilissimum Virorum cœtum, qui in nostra hac civitate supra cæteros tum ecclesiastico, tum nativo splendore eminet, cooptato oblata est facultas exercendæ pietatis pro flagrantissima sua cupiditate, agenda majore vitæ parte in sacris ædibus, qua divinis laudibus concinendis, qua tacitis precibus effundendis, qua sacris faciendis, quanta religione, quam pio cultu, quam præclaro exemplo, vobis ne ego referam, quorum in oculis tanta virtus perpetuo versata est? Sed cum intelligeret humanum animum ad illud, ex quo ductus est Divinitatis exemplar non satis accedere contemplatione earum rerum, quæ uni cognoscenti prodesse, nisi in iis quoque studium collocetur, ex quibus quam maximus fructus ad quam plurimos perveniret, persolutis Divino Numini officiis, in earum Artium cultura occupabatur, quæ procurandis hominum commodis inservirent. Hoc exacto Tyrocinio in partem Episcopalis oneris vocatus est, in quo sustinendo semper æquabile, semper laudabile sui specimen ita dedit, ut cum semper repererint boni quod admirarentur, nihil minus æqui reperire potuerint, quod calumniarentur; adeo nihil unquam in vita expetendum putavit, nisi quod esset cum laude & cum dignitate conjunctum. Per hoc laudis ac laboris plenum iter ea virtus Præsul Ampl. quæ Te a puero suscepit, cum ætate adolevit, serius quidem quam merita tua postulare, in isto tamen excelsa Pontificiæ dignitatis gra-

gradu suis tandem ipsamet manibus collocavit . Et Tu tantis onustus meritis , tantis ornatus virtutibus , tantis munitus præsidis , qui acerrima vi ingenii , optimarum Artium exercitatione , assiduis rerum experimentis talem Te nobis exhibuisti , qualem præclarum Antistitem esse decet , qui eam vitæ rationem constanter secutus es , ut Sanctissimi Episcopi imaginem vere exprimeres , Tu æquis auribus excipe querelas nostras ; Nos , si optio facta fuisset eligendi quem vellemus , non alium postulassetemus , si fingere & adumbrare liceret hominem ad voluntatem , non alium instituere libuisset , quo meliorem , & accommodatiorem nec optare possumus , neque cogitando informare ; Tu , inquam , (quæso iterum da veniam conquerentibus) Patavinam Cathedram recusabas ? In quo dudum huc usque evigilaverunt curæ , & cogitationes tuæ , nisi ut nobis ad recte , beateque vivendum Dux , & Magister esses , rebusque nostris pro Pastoralis munere provideres ? Licuerit pudori tuo , ne cum imperio ad Tarvisinam Diocesim te conferres , tergiversari , subterfugere , declinare tanta dexteritate , ut Benedictus XIV. tandem Te excusatum habuerit . Sentio Auditores , in medio querelarum cursu Orationis mea vela sua sponte contrahi , & alio aperto mari aliorum pandi . Quam parum usitata isthæc virtus est , & ab Ecclesiasticis tantum Annalibus repetenda , tamen in iis ipsis non frequentissime reperienda , quempiam esse gloriæ , cujus studium naturaliter insitum cuique est , quæ est præmium virtutis amplissimum , esse quempiam ita contemptorem , ut illa demandata ultro officia repudiet , ex quibus ingens decus , honor , dignitas , claritas , amplitudo , gloria redundet ! Exemplis enim vero Historia nostra non caret . At cum Deus O. M. pro Sapientissimo consilio suo ad hominum utilitatem dona largiatur , quia

quia Sanctimonia magis ei utilis est in quo inest ,
 doctrina vero magis in aliorum bonum diffunditur ,
 propterea perpauca legentibus occurrunt Sanctitate
 excellentium virorum exempla , qui in Artibus ho-
 minum generi fructuosis exercitatissimi illa respue-
 rent munera , quæ istarum præsertim Artium co-
 gnitionem requirerent . Ab Oratione mea Præsul
 Ampl. pudentissimus animus tuus ne refugiat . Non
 Te comparo cum aliis . At quoties in Te mira
 commemoro , Tibi gratulor ; in Te principem
 Deum honorum omnium auctorem , largitoremque
 suspicio . Cum vero innumera bona in Te Deus
 munifica manu contulerit , quamobrem jamdudum
 dignus habitus es , qui Sacrorum non adjutor mo-
 do , sed Princeps esses , fugiendo honores , qui te
 sectabantur , fecisti rem non frequentissime , & nisi
 a Viris Sanctissimis usurpatam , rem non solum
 nostrorum hominum prædicatione celebrandam , sed
 etiam posterorum admiratione in omne tempus ex-
 cipiendam . Licuerit tamen , (ut eo redeam , unde
 discesseram) licuerit virtuti tuæ ad cæteras tuas
 summas laudes hanc etiam addere , ut sublimes di-
 gnitates promerereris , non autem consequereris ,
 uno tuo prohibente , & advesante pudore . Non iis
 tamen cum Tarvilio populo officiorum vinculis
 obstringebaris , quæ Te magnopere cum Patavino
 conjuxerant , qui Te ita sibi proprium vendicat ,
 ut possessionis jure retineat . Factum bene ! quod
 Clemens XIII. in honore deferendo constantior fuit
 Benedicto XIV. suæque deferendi constantia tuam vi-
 cit recusandi . Noverat satis & ille alter probe no-
 verat cessuram rem in magnam ejus Gregis utilita-
 tem , cui Te Pastorem dedisset , & adeo noverat ,
 quæ in optimo requiruntur Pastore in Te esse , ut
 creatum Antistitem Patavinum Carolum Rezzonico
 hæsitantem , dubitantem , onus ingens extimescen-
 tem

tem ea ratione confirmarit, quod Te consiliarium, adiutoremque habiturus esset. Attamen ille Te per interpretes, & internuncios cognitum habuerat. At vero opera tua per quindecim annos Clemens usus est; quæ magna de Te audiverat, contra illud, *minuit præsentia famam*, majora fuisset oculis conspicatus est, nactusque est Te factum secundum cor suum h. e. numeris omnibus absolutum. Quapropter cum paterno nos adhuc amore amet, tametsi summa Te, ac singulari benevolentia complectatur, quia tamen intelligit virtutem tantam otio, præ nimia verecundia non obrui oportere, maluit bono nostro consulere, quam plus æquo tuæ morem gerere voluntati. Summam hoc beneficio, Pater Sanctissime, explesti tuorum immortalium in nos meritum, qui æterno Dei decreto discedere hinc coactus, inter maximas universi Christiani Orbis curas hanc præcipue suscepisti, ut nobis relinqueres, qui Te referret, quo præsentem Te abesse vix sentiremus. Ita sospitet, fortunetque Te ad annos Petri, &, si licet, ultra, propitius Deus, ut gratissimo animo sumus ad hunc tuorum innumerabilium beneficiorum cumulum, pignus amoris in nos tui certissimum, monumentum luculentissimum. En patent Divina Consilia. Divina Te nobis Præful Ampl. Providentia servavit, nobis Te Divina Pietas tanto ante non ad tempus dederat, ut aliis Gentibus aliquando præfesset, totum tuæ vitæ curriculum nobis addiderat. Quocirca idem summus rerum moderator Deus (neque enim alius) Clementi XII. cogitanti Te inficium, & inconsultum a Vicaria Patavinæ Diœcesis ad Episcopalem Torcellanæ gubernationem transferre, nescio quod impedimentum intulit, quo retardatus Summus Pontifex Te nec opinantem insigni alio dignitatis titulo liberalissime decoravit, & quanti Te faceret jam tum ab illo omnium celsissimo

So-

Solio omnibus patefecit. Quamquam, Auditores, utrum illustrius suæ de tanto Viro existimationis argumentum dederit præmio afficiendo, an negotio, cujus causa præmio afficiendum censuit, demandando equidem non dijudicaverim. Exortis enim inter Religiosos nescio cujus Familiæ homines alioquin in omni Virtutum genere laudatissimos, prout in multitudine omnia incommoda vitari non possunt, exortis, inquam, asperrimis rebus, implicatis, difficillimis, quibus componendis frustra Viri probatissimi enixi fuerant, tametsi illorum, qui summæ ipsorum rei præerant, accessisset imperium, tandem ad supremum Vaticani Oraculum delatis, ei res commissa est, quem modo Superis bene juvantibus Antistitem veneramus. Negotium suscepit Obsequens, concilio interfuit humaniter, cognovit sapienter, ambages atque nosos expeditivt solerter, difficultates facile sustulit, sententiam ex omnium voto dixit, maximo cum plausu, communi voluptate, mira felicitate pacem, concordiam, tranquillitatemque restituit. En quam alte repetenda, quamque late disseminata fama, & opinio consilii sapientiæque ejus hominis, qui nihil antiquius semper habuit, quam sua involutus virtute delitescere, thesaurosque suos ab oculis hominum remove. Lucem vero præcipue ingentem quis occultare possit, ac tenebris circumfundere? Ex eo tempore si quod gravius, & implicatius negotium apud nos emerfit ei Romana auctoritas delegavit. Romana autem? Summum illud Consilium, ille Ordo Amplissimus, qui non Italiæ marisque partem regere, sed universum Terrarum Orbem divina, qua præditus est, mente possit, Venetus, dico, Senatus controversiam inter Ecclesiasticos Urbanarum Curiarum Rectores, & Sacras Laicorum Sodalitates longe acerbissimam apud Magistratus sæpe agitatam, tandem huic tradidit (tan-

(tanta fuit unius hominis existimatio) provocatione
 sublata dirimendam. Tantam virtutem, tantamque
 prudentiam, tam incredibilem admirabilemque Sa-
 pientiam hic pene natam, certe altam educatamque
 alio transferri noluit benignus Deus. Nostri erat
 bonum hoc, in nostram utilitatem perpetuo reti-
 nendum: & si fas est sine invidiæ nota vera dice-
 re, non satis exæquabant eximia merita tua; An-
 tistes sapientissime, cæteræ sedes, et si omnes peril-
 lustres. Unum Patavinum Pontificium Imperium
 Te decebat. Non ego Urbis nostræ decora ab ulti-
 ma antiquitate, ab hac Cæli clementia, ab elegan-
 tia Civium, ab ingeniorum fertilitate, aliisve id
 genus rebus, quibus vel florentissimis Civitatibus in-
 vidiæ esse possit, longe plurimis ego repetam; sed
 multa ornamenta hæc Tibi ex merito concredita
 Civitas habet, quæ aliæ non habent, quæque com-
 munia cum aliis habet, in iis ipsis alias non me-
 diocriter antecellit. Collegia Excellentissimorum ho-
 minum ab Artibus nobilissimis sibi nomen vindican-
 tium, Philosophorum Jureperitorum, Theologo-
 rum, Gymnasium toto Terrarum Orbe celeberrimum,
 omni ætate Viris abundans litteratissimis; omnibus
 ingenuis Artibus instructum, (ut mittam alia) hunc
 Antistitem Capiti suo splendorem addunt, quem in
 aliis Civitatibus Præfules frustra requirant. Et si
 nulla Episcopalis Diocesis est, quæ Canoniorum
 Consilio non exornetur, sacris ministris non mu-
 niatur, iisque aliis in aliorum locum opportune
 sufficiens Seminarium non habeat, ecquis alius
 Canoniorum cœtus cum hoc nostro Patavino de di-
 gnitate contendat? De quo quia non vacat satis dice-
 re, satius ducō nihil, quam pauca dicere. Dicam
 vero, & rem manifestam dicam, Ministrorum sa-
 crorum & copia, & scientia, & omnibus, quæ
 hos homines decent, prædiis nos (præfiscine dixe-
 rim)

rim) cæteros populos (loquor autem de nostris) facile superare. Seminario equidem magis debeo (etenim me totum debeo) quam ut possim libere ad veritatem loqui ego; cujus charitas in Loci laudatione suspecta esse possit & φιλαυτία ibidem Docentis notari. Quocirca Seminario Patavino aliud si quis vult; anteponat, id ego præteriens ad propositam dicendi metam contendo. Hæc sedes, Antistes dignissime; singularibus decorata ornamentis, adjumentis amplioribus firmata, solidioribus pro supplemento ministrorum scribendo fundamentis nixa; hæc sedes, quam Barbadici, Cornelii, magna nomina; sanctissima nomina, semperque viri Romanæ Curia: Primarii, Reip. Venetæ Principes tenuerunt; hæc una Te digna visa est; tua merita hoc præmio erant compensanda; Tibi ab hoc dignitatis gradu exordiendum. Importunus mihi scopolus modestia tua est. Ne succenseas, oro, vera & manifesta de Te prædicanti, aut si animus tuus in audiendis singularibus præconiis acquiescere nequaquam potest, absis parumper auribus, dum; ne officio desim, neque quod res est ingrato silentio prætermittam; paucis Audientes volo. Hæc celsissima Sedes dignitatis, atque honoris; hæc ingens Patavinæ Ecclesiæ amplitudo; hæc Pontificia majestas; digna paullo ante eo ipso qui summum in Terris; & uno Cælo inferius honorum fastigium adscendit; huic ipsi summo Principi, quem cum in cæteris rebus rara quædam; & exquisita sagacitas; tum acerrimum in expendendis cujusque recte factis judicium commendat; huic; inquam æquissimo rerum æstimatori visa est non digna fatis Episcopi nostri meritis; nisi eam quodammodo magis honestatam traderet; aliis super alios honoribus adiiciendis; illo præsertim (alios consulto præ-

prætereo , quia præterire consultum est) illo igitur dicam præsertim , quo ei stemma suum cum Pontificio conjungere non petenti concessit , quod permittitur nemini nisi petenti , nec licet petere nisi Viris Eminentissimis . Quid hoc factum admo-
neat intelligit fatis , qui quidquam intelligit . Ego interea , cui secretiora adyta penetrare nefas est , ut in præsentī nostro , ac prope nativo bono subsistam , quibus gratulationis vocibus compellabo Te , Præsul Amplif. aut qua gaudii significatione omnium nostrum lætitiā expromam , quæ ex omnium Ordinum studio , officio , benevolentiaque erumpit , omnium linguas intendit , atque allicit tuis pangendis præconiis , tuis laudibus concelebrandis ? Haudquaquam verear nomine hujus Sacri Theologorum Collegii , quod omnes Ecclesiasticorum ordines complectitur , ad quos præcipua pertinet tantæ lætitiæ pars , sacris quoque vocibus acclamare : *Tu gloria Jerusalem , Tu lætitia Israel , Tu honorificentia populi nostri* Tu , quod portento simile est , *Propheta in Patria* , Tu paullo ante Ovis ex Grege , ejusdem Gregis (adeo tua Te extulit eximia virtus) Pastor effectus . Te notum Pastorem per tua vestigia gradientem Oves notæ per eadem vestigia sequemur , cujus vocem suavissimam , plenissimam amoris , studii , charitatis jam modo aperte , & propalam exaudivimus , Quid mihi Sirenas , quarum cantandi suavitatem capti qui prætervehantur , ad earum saxa discendi cupiditate adhærescerent ? Quid sapientem atque flexanimam Ulyssis eloquentiam ? quid melle dulciorem ex ore Nestoris fluentem Orationem ? Mel scilicet Claravalensis Cœnobitæ in tuis litteris degustamus , Chrysostomi aurum colligimus , Divinique Spiritus dulcedine atque sapore intimis sensibus toti perfundimur . Dabit (ne dubites) dabit Deus vocī tuæ

„ vocem virtutis ; ut futura sint tua verba ad nos
 „ non in sermone tantum , sed & in virtute , in
 „ Spiritu Sancto , in plenitudine multa : quippe
 „ verbis tuis firmata exemplis pondus addit aucto-
 „ ritas .

Ad exemplar tuum , quantum licuerit , nosmet
 componemus , quem , quales nos esse hortaris ,
 plane talem esse scimus , ut , quemadmodum ip-
 se feceris , & nos faciamus , „ quo incensum no-
 „ strum acceptabile sit Domino . Ingreдемur fe-
 „ mitam per Te nobis apertam , per quam pate-
 „ re possit adscensus ad montem Domini : enite-
 „ mur tota animi cogitatione , totisque viribus , ut
 simus , quemadmodum mones , *Christi bonus odor* .

In odorem nimirum currentes unguentorum tuorum .
 Quid ego modo nosmet commendem tibi , cujus
 charitas jamdudum nobis cognita , atque perspecta
 nunc vero per tuas paternas litteras expressioribus
 notis insigniter prior ipsa se se prodidit ? Nihilo
 tamen secius etsi semper omnes tua isthæc pater-
 na charitas complexa , & complexura est , nullus
 dubito , quin peculiare quodammodo futuri Tibi
 illi sint , qui eas disciplinas profitentur , quæ E-
 piscopis maximo adjumento sunt . Inter quas cer-
 te principem locum obtinet vitæ dux , morum
 magistra , virtutum parens , vitiorum expultrix ,
 errorum hostis , veritatis vindex , Fidei propugna-
 culum , Religionis , Divinique cultus incremen-
 tum , Theologia . Horum ego nomine , qui divina
 ab Arte hac appellantur , Tibi polliceor summam
 fidem , summam observantiam , summam in iis ,
 quæ jusseris libentissime obeundis voluntatem . Co-
 sent Te Parentem amantissimum , sequentur Du-
 cem certissimum , & in hac tua pretiosissimis onu-
 sta mercibus navi gubernanda Te Navarchum

S

pe-

peritissimum tamen pro viribus adjuvabunt , quo
tandem illa fluctus , & scopulos tua prudentia
prætervecta optatissimum immortalis vitæ portum
tuo ductu felicissime teneat . Faxit bonus Deus ,
bonique Cælites omnes , atque in primis hujus Ec-
clesiæ Præsides , ut , quod fecisti , quod facis , quam
diutissime facias . Dixi .

Anno 1758. Mense Novembri.



D E

L I N G U A G R Æ C A

Ad Studia instauranda

O R A T I O .

AD solennem Studiorum instaurationem in hanc publicam arenam honestatis plenissimam & amplitudinis, in qua se se tanta cum eloquentiæ laude semper antea ingenia præclarissima exercuerunt, quantum ipsorum Oratoria monumenta publici facta juris declarant, Ego hoc anno, cum rebar me jam rude donandum, quasi armis Musarum ad postem fixis, non quidem ut languori ac desidiæ, me dederem, sed ut alia via Adolescentum rationibus studerem, si minus docendo litteras, at mores informando, attamen hoc auspicio Litterariæ Rei nostræ certamine prodire iussus Principis Eminentissimi auctoritate, atque imperio, cujus imperio atque auctoritate nostra omnium studia diriguntur, nostræ omnium res administrantur, ut huic Juventuti in magnam spem altæ educatæque, ab recenti nostri quasi Musarum exercitus lustratione alterum studiorum curriculum jam ingredienti proluderem; adjeci statim animum, ut Principis auspiciis dignum, Audientium doctrinæ consentaneum, Juvenum institutioni opportunum aliquod argumentum proponerem. In ea mihi cogitatione defixo occurrebant tractanda sane plurima, quæ ad eas artes honestissimas pertinerent, ad quas ut instituantur, fidei nostræ concrediti Adolescentes sunt; ea tamen omnia, in quibus cum alii copiosius, atque ornatus, quam ego possem, versati sint, intelligebam nulla posse me di-

S 2

CEN

cendarum rerum novitate vestros animos detinere .
 Suspenfum itaque animum meum , & refugientem
 recoctam crambem apponere excitavit quodammodo ,
 & quid potissimum dicerem admonuit ejus Viri me-
 moria , qui , ut de universa Civitate fileam , hoc in
 loco sedem Virtutis , Litterarum domicilium , præ-
 stantium hominum quasi Prytanæum collocavit , me-
 moria inquam Gregorii , quem obsequii & pietatis
 causa nomino , Barbadici . Is , ut ex probatis ipsi Sa-
 cræ Rituum Congregationi testibus , id est probatissi-
 mis compertum habeo , & a nostris fidei certissimæ
 hominibus intelligo , Græcam Linguam in primis
 commendatam voluit , suumque ejus conservandæ ,
 atque in perpetuum colendæ desiderium & viva vo-
 ce quali prælagiens in posterum , cum inter mortā-
 les ageret , hilari vultu significavit , & re luculentissi-
 mæ ostendit , cum cæterarum quidem liberalium
 Artium alias ab aliis pro cujusque indole ac volun-
 tate colendas statuit , Græcarum litterarum cognitio-
 nem communem omnibus esse sanxit . Ecquid igitur
 aut huic tempori , aut omnino meo muneri facere con-
 venientius possum , quam si ea de re dicam , quam si
 optimus Legislator adesset , libenter audiret , ea de re ,
 quam antehac ex hoc loco tractavit nemo , ea de
 re , cujus studium futurum est ad omnem pulcherri-
 marum rerum cognitionem contendentibus fructuosissi-
 mum ? Hominis sanctiss , auctoritas tuam mihi P.
 E. pollicetur in audiendo facilitatem , argumenti no-
 vitas vestram , Aud. benevolentiam , vestram autem
 attentionem ipsamet vestra utilitas , Adolescentes .

Laudes Græcæ Linguae aggredienti dicere tanta
 mihi oboritur hoc in argumento fecundissimum dis-
 putandi seges , tum nobilissimarum rerum varia-
 te , tum doctrinarum omnium supellectile , tum in-
 geniorum in omni Artium genere excellentia , quæ
 Græcis maxime litteris continetur , ut Orationis , in
 qua

Quâ profecto non tam copia, quam dicendi modus quærendus est, difficilius sit exitum, quam principium invenire. Percurrat si quis vult universum litterarium regnum, omnes litteratorum ordines invadat, monumenta, quotquot injuriam temporum effugerunt, examinet, tum judicet num rem litterariam omnium maxime Græci ditaverint, num principem locum & tenuerint omni ætate sine controversia, & hac etiam nostra cum gloria teneant; num, quod de Homeri carminibus solebat dicere, Plinio teste, (a) Alexander Magnus, omnia illorum hominum scripta pretiosissima humani animi opera dici possint. Certe eam gloriam Græcis nemo unquam detraxit, ut Gentibus omnibus scriptorum nobilitate & copia, & ingenio præstiterint. Ignota sint multis eorum scripta, iis, dico, qui ipforum familiaritate neglecta in litterariam Remp. tam parvum æs afferre possunt, ut vix capite censi habendi sint; ignota tamen nullo modo esse possunt Platonis, Aristotelis, Homeri, Demosthenis, (ne singulos nominem, innumeri enim sunt) tam grandia nomina ne pueris quidem ignota esse possunt. Neque illud ignorari potest in omnibus & gravioribus, & humanioribus disciplinis ita excelluisse, ut palmam posteris omnibus præripuerint; nisi si quis ignoret Horatianum illud tritum jam ac pervulgatum (b) *Gratiis ingenium, Gratiis dedit ore rotundo Musa loqui*; aut ignoret, quod testatur M. Tullius (c) extulisse ætates singulas singula prope genera dicendi; quod non tam facile in Latinis hominibus licet judicare, quia scripta, ex quibus judicium fieri posset, non multa reliquerunt, quam in Græcis; ex quorum scriptis cujusque ætatis quæ dicendi ratio voluntas-

S 3

que

(a) *Hist. Nat. l. 7. c. 29.* (b) *A. P. ver. 324.*(c) *de Orat. l. 2. c. 22.*

que fuerit, intelligi potest, & tamen æmulus Cicerō Græcorum gloriæ sæpe minus, quam par est, laudis iis tribuit, sæpe suis plus æquo concedit; a quibus cum Poema Dithyrambicum magis esse tractatum (a) scripserit, nodum difficillimum ad eruditos posteros transmisit, &, nisi aliter legant, non expediendum: ut is communi sensu careat necesse sit, qui non sentiat hoc esse commune iudicium, Græcos & præstitisse cæteris ingenio, & eximia supra cæteros ingenii monumenta prodidisse. Quæ cum ita sint quisquam ad Litterarum gloriam adspiret, quin ardentissima cupiditate inflammetur eos homines audiendi, & intelligendi, eorum sententias doctrinasque investigandi, eorum consuetudine, & familiaritate utendi? Platonis Philosophiam, quasi hæreditatem ita Speusippo Scroris filio relictam putet, ut nihil ad se velit pertinere, & æquo animo furdus sit ad ea, quæ in veteris Academiæ spatiis ille Philosophorum Deus de Ideis, de Conditione Mundi, de Immortalitate Animorum, de Bonorum post mortem Tranquillitate, de Impiorum poenis divinitus differuit, & arceatur quisquam libens a Cupressetis Gnossiorum, (b) ubi cum Clinia, & Lacedæmonio Megillo de institutis Rerumpublicarum ac de optimis Legibus immortalitate dignas disputationes habuit? Peripatū perambulet docens alios quocumque præter te nec nolentem, singulari ille vir ingenio ac pene divino, Aristoteles, inquam, qui acie mentis omnium rerum vim, naturasque pervidit; immo fortasse scitula quadam levitate eum audeas carpere, quem non magis intelligas, quam ego aut Garamantum, aut Indum? In Euclidis Geometria desudes, ipso Euclide tibi loquente lapides, aut etiam monstra? Epictetus, Lucianus, Athenæus,

Plu-

(a) *De opt. gen. Or. princip.* (b) *Cic. l. i. de Leg. 15.*

Plutarchus cum cæteris id genus hominibus eruditissimis & sapientissimis jaceant per te tinearum pabula, per te, inquam, qui magnarum rerum cognitionem desideras? Quod si ab iis Artibus, quæ severiores habentur, & cujusdam veluti gravioris supercilii ad litteras politiores, & suaviorem humanitatem divertere tibi in animo sit, miror qui alios potius adeas, quam Xenophontem, Herodianum, Lyfiam, Isocratem, Euripidem, Theocritum, Aristophanem, & illud Musarum viretum Anthologiam! Atqui omnium semper Græcia magistra fuit. Ab illa tanquam ab immenso mari copiosissima doctrinarum flumina, & purissimi Hippocrenæi latices in terras omnes exundarunt. Si qua Gens polita fuit & exculta litteris ea Romana fuit, quæ cum imperium omnium Gentium armis acquisierit, retinere, non potuit nisi Litteris. At illa rudis primum ac truculenta, quippe colendis agris, tractandisque armis tantum dedita, cum ad Græcorum amicitiam se se contulit, cum ab illis animi ornamenta accepit, cum illorum doctrinis instituta est, ex eorum Scholis egressa ab agresti jam & effera vita ad civilem humanioremque cultum traducta eos progressus in bonis Artibus ac laudabilibus disciplinis fecit, ut prope Magistrorum gloriam æquaverit. Amisisti infelix Græcia omnia antiqua decora, quæ tibi Miltiades, Themistocles, Epaminondas, alique innumeri strenui Duces rebus præclare gestis, nobilissimisque tropæis ad hæc usque tempora celebrandis olim peperere, quibus eras hostibus formidanda, amicis observanda, Gentibus omnibus admiranda: hæc amittere potuisti; & rursus longe post occasum Romanæ Reip. cum iterum aliquando erexisses caput, & imperium tuum obtineres, potuerunt Barbari, ita ferentibus rerum humanarum vicibus, infinita armatorum multitudine ingruente, te in longe ca-

lamitosiorem servitutem redigere : at nulla temporum series, nulla rerum humanarum vicissitudo, nulla vis, non ferrum, non ignis eam tibi laudem eripere potuit, ut ne omnium magistra semper existeres. Nam cum bellica virtute Romani Græcos superarunt, sibi in Græciam aditum patefecerunt, eo tanquam ad mercaturam bonarum Artium liberos mittere, inde doctos homines Romam accersere, eorum vero scripta omnia evolvere, & diligentissime scrutari cœperunt; & quamvis contenderent velis, ut dicitur, remisque ut litterarum quoque decus Græcis auferrent, consecuti quidem sunt, ut illud cum illis secum communicatum haberent, nunquam tamen ut victos in aliis rebus, in hac quoque vincerent: & si Latini quoque præclaris voluminibus Linguam suam ita extulerunt, ut ipsa quoque dominetur apud omnes Gentes cum dignitate & gratia, habent quo se jure gloriantur, dummodo eam gloriam Magistris, hoc est Græcis acceptam referant. Concedamus Cæsari affirmanti Ciceronem (a) eloquentia sua benemeritum esse de Populi R. nomine & dignitate; credamus tamen Quinciliano (b) fatenti eum quantus est a Demosthene factum: præterquam quod & admodum adolescens se Græcis in disciplinam tradidit, & cum jam clarum meruisset inter Patronos, qui tum erant, nomen, illis eloquentiæ ac sapientiæ Magistris (c) se rursus formandum, ac velut recoquendum dedit. Auditis in theatro Virgilii versibus præ admiratione affurgat universus populus cum plausu & clamore, eumque præsentem ac spectantem veneretur sic quasi Augustum, (d) sed Parthenio Niceno, Pisandro Caniniæ, Heliodo, Theocrito, & supra cæteros Ho-

(a) Brut. n. 254. (b) l. 10. c. 1. (c) Apollonia Niceni. Quint. l. 12. c. 6. (d) Tacit. Dial. de Or.

mero liceat superbire discipuli gloria: ipse vero inter cæteras eximias laudes, quibus omni ætate cumulatus est, sibi ea maxime placeat, qua teste Afro Domitio (a) secundus est ab Homero, propior tamen primo, quam tertio, & qua Juvenali teste dicitur condidisse (b) *dubiam facientia carmina palmam*. Adeo Græci semper omnium magistri fuere, ut, cum erumpentibus Barbaris ab Italia Græca lingua exulare coacta est, tum litterariam quoque Rempublicam barbaries invaserit, ac tabo, labe, ac peste perniciosissima infecerit. Quandonam illa ignorantiae lues grassari desiit, ac tota Litteraria res profligata deserta misera ad pristinum decus revocata est? Nimirum cum Emanuel Chrysoloras in Italiam venit, & Linguam Græcam a 700. annis neglectam una cum Latina restituit Venetiis, Florentiæ, Romæ, Ticini, & illustres Auditores reliquit Philelphum, Gregorium Tiphernatem, Leonardum Aretinum, Poggiū, aliosque plures, qui ignorantiae indicto bello immortalī iniecerunt spem fore, ut omnis incititia Græcorum ope exterminaretur & quidem spem non sefellit eventus. Nam per ea tempora Argyropylus, Chalcondilas, Gaza, Georgius Trapezuntius, & quotquot in imperio Græco litterarum laude florebant, Barbaris ejus Imperii ruinæ impendentibus ad nos confugerunt, hospitium remunerantes pretiosissimo munere, omni scientia litterarum allata. Hanc alteram Græciæ calamitatem non possum non supra alteram miserari, & quamvis fortasse aliquis id ex merito contigisse contendat, tamen ecquis habeat sensum humanitatis, qui non miseretur? Verum si, a debuit esse causa litteraturæ in antiquam possessionem restituendæ, & eluendæ a nostris animis maculæ, quam per tot annos ignorantia, & vis Barbarorum attu-

S 3

le-

(a) *Quintil. l. 10. c. 1.* (b) *Sat. 11.*

lerat, bona cum venia dictum esto, fero animo non iniquo. Quare grati sumus Græcis hominibus tam bene de nobis, totaque Italia meritis. De Italia dico? Imo de Gentibus omnibus, quæcumque litteras colunt, & vitam paullo politiore[m] vivunt. Nam ab Italia Græca eruditio Parisios citato gradu contendit, hinc ad Belgas convolvit, mox Germanos, Anglos, Hispanos, aliosque populos citissime pervasit, penes quos stat honos litteris. Gloriantur igitur & jacent cum vetera, tum recentia decora meritaque Græci homines, a quibus cæteri didicerunt; &, quoniam sine græca litteratura, nemo vere literatus esse potest, accedant ad tibias atque lyras excitante Plutarcho non Poetæ solum, sed ejus Gentis Scriptores omnes, canantque jure quodam suo:

(a) *ἄφικμὲν ἅδ', καὶ ἰσχυροὶ τοῖς ἡμετέροις, ὅς τις ἀπείρος ποιῶνδ' λόγον, ἢ γλῶσση μὴ καθαρεύει, ἢ γενναίων ὄργια μυσῶν μὴτε ᾄσει, μὴτε ἰχέρεσσι.* Favete linguis (libet, opinor, Plutarchum audire latine) favete linguis, cedite nostris; si quis imperitus horum sermonum, aut linguam non callet puram, aut nobilium orgia Musarum non cecinit, neque choris ducendis interfuit. Cupientibus enim in Musarum penetralia pedem inferre, aut penitus interclusus aditus est rerum græcarum rudibus, aut facientibus gradum nulla a Græcis accepta luce omnia occurrent obscuritatis plenissima, & tenebrarum caligine circumfusa; aut si quis irato Apolline, Musisque invitis litterarium cursum consecerit, quin in Græciam navigaverit, fero sapiet aliquando, ut ille Cato, qui Græcas litteras senex didicit, ac tanquam Pélías recoquendus, retrorsum ad Græcos migrabit, aut intelliget se vix ullum in Litterario Regno futurum. Nimis calamitoso

(a) *Comment. Bellore, an Sapientia clariores Athenienses fuerint.*

toſo fato experientia, ut dicebamus, ſatis ſapè docuit, ſublato Græcæ Linguae ſtudio homines in magna rerum ignoratione verſatos eſſe, ac tum demum Viros magni nominis extitiſſe, cum Græcis ſtudere aut potuerunt, aut voluerunt. Ignoscamus Accuſatio brevibus notis Jus civile illuſtranti, ſed cum græcas voces offendit, *hoc græcum eſt*, clamanti, *nec legi poteſt, nec intelligi*, ignoſcamus, inquam, ſi græcæ linguae ignarus (a) in errores incidit vix pueris condonandos; quemadmodum ea de cauſa Gratianus in compilando Jure Canonico alicujus Concilii, aut S. Patris græci ſententiam non aſſequitur, aut etiam falſam apponit. Ignoscamus quidem hominibus bene de jure meritis; quod non iſtis culpæ vertendum eſt, ſed iis temporibus vitio dandum, quibus græcarum litterarum imperitia omnes oppleverat. Verum ne longiſſima ac propterea moleſtiſſima enumeratione recenſeam aut eorum exempla, qui Græcæ Linguae ſtudio deſtituti nullam, vel exiguam nominis famam adepti ſunt, aut eorum, quorum nomen græca eruditio immortalī laude donavit, quæ tandem Ars plene cumulateque addiſci poteſt ſublato hoc, de quo loquimur, adjumento? An illa ſcientiarum Princeps Theologia? cujus amplæ pretioſæque divitiæ magna ex parte græcis litteris concredita ſunt. Nam, ut nihil dicam de voluminum copia, SS. quidem Patrum Græcorum nomina tot ſunt, ut Nicephorus Calliſtus catalogum conſciendum putarit. Sacrarum aurem Scripturarum certe Novi Teſtamenti exemplum certius & caſtigatius græcum eſt: at quot Concilia græcè ſcripta fuerint Sozomeno recenſendi curam relinquo. O te præclarum Theologum! ſi diſcrimen ignores inter Θεῶν υἱός, (Dei Filia.) & Θεοτόκος, (Dei Mater) quo tota vertitur pro Anaſtaſio

S 6

pres-

(a) *Incert. Scienc. p. 246.*

presbytero & Dorotheo Episcopo, impietate, & impudentia paribus, hæresis Nestoriana. O te in Theologicis concertationibus primo subsellio dignum! si nescias quæ subjecta sit notio τῆς προσκυῶν, (venerari.) quæ τῆς λατρεῖν, (cum tremore & Religionis servitute colere.) quorum verborum infcitia tot tantisque turbas in Concilio Francofurtensi (a) inter Gallos, & Germanos Episcopos excitavit, contententes de cultu Imaginum decreto in Concilio Nicæno secundo. Quo te veritas, ubi disputandum sit de Rom. Pontificis auctoritate, si illa non intelligas, quæ habentur in Concilio Florentino (b) pro Ecclesiæ Græcæ cum Latina conjunctione? καὶ ὅν τεύπον..... sed ingressus sum in immensum mare sine spe ad litus appellendi, aggressus singillatim ostendere in quot scopulos impacturus sit ille, qui se Theologiæ studio committat, græcæ Linguae studio prætermisso. Quocirca retraham me ab incæpto cursu, & hoc statuum, quod mentis compos quisque mihi concefferit, hujusmodi Theologum non vitaturum errata, quæ pro vestra eruditione nostis non paucos, qui Theologi nomen usurpabant, sed eosdem minime φιλέλλους (Græcarum rerum studiosos) offendisse: nimirum, ut non raro a Græcorum Patrum sententia longe aberraverint. Quod si Theologiam, quæ nostra est, sine græcarum rerum intelligentia nemo plene didicerit, quid dicendum putes de Mathesi, Philosophia, Historia, & Arte Medica, quæ totæ e fundo græco sunt, ibi ortæ, ibi altæ, ibi perfectæ, inde omni ætate petitæ, inde in omne ævum petendæ? Eloquentia vero, ac Poësis opulentissimum est Græciæ patrimonium: & quamvis Latini græcæ doctrinæ, & humanitatis hæ-

re-

(a) *Lab. Conc. Tom. 7. p. 1057.*

(b) *Inscr. Scienze p. 328.*

sedes jure dici possunt, tamen acriter constanterque defendam sine Lingua Græca Latinam mancā ac mutilam esse, nec satis uberes ex ea fructus percipi posse. Nam, cum omnia Latini a Græcis hauserint, cum sæpiissime quæ dicunt ad Græcos referant, & sæpe quæ dicunt græca sint latinitate donata, atque adeo nonnunquam græcis vocibus tanquam opere vermiculato suos libros exornent, cum hac una ratione nobilitata sit Romana & Poesis & Eloquentia, quia suavitatem ab Isocrate, subtilitatem a Lyfia, lenitatem ab Æschine, vim a Demosthene Latini didicerunt; quia consuluerunt Menandrum Poetæ Comici, Sophoclem Tragici, Pindarum Lyrici, & quia, cum singulorum, in quibus eminent, virtutes exprefferint, universas Poeticæ virtutis partes ab Homero effinxerunt, te Latinorum Scriptorum vestigia detesturum, & virtutes intellecturum confidas iis neglectis fontibus, unde Latini biberunt? Ut minora missa faciam, Profodiam, Orthographiam, Ethymologiam, Grammaticam, quæ ipsa græca nomina satis indicant quantum lucis Latino Sermoni Græci cognitio afferat, ipsa Nummorum, ac Lapidum notitia, quæ tantopere eruditos homines occupavit, tantumque Historiæ lumen attulit, quæ, sodes, præsidia a græca lingua non postulat modo, sed etiam flagitat, cum Inscriptiones magna ex parte græcis characteribus exprimantur? Quare ita græcæ Litteræ per totum, ut sic dixerim, scientiarum & Artium corpus diffusæ sunt, ut sine græco spiritu necesse sit omnem facultatem languescere, & sine græca luce quemvis Artium studiosum in magna rerum obscuritate versari. Dissimulavi, ut verum fatear, diutius, quod obiici mihi potest: nimirum necessariam aliquando græci sermonis cognitionem fuisse, nunc vero per homines laboriosos Græcorum scriptis alio sermone redditis, compendiarium factam esse viam, faci-

facilem minime molestam iis, qui frui doctissimis Græcorum inventis concupiscant. Equidem Interpretum studium laudo: hac enim ratione sibi maxime profuerunt: id enim sunt consecuti, ut Græcæ Linguae peritissimi evaderent, ut sine difficultate Provinciam Græcam percurrerent, & ad *κοινωνία παιδείας* (Disciplinarum orbem) sibi aditum aperirent: profuerunt, inquam, sibi; at, si recte judicare velis, non aliis. Neque ego hic censorem agam in eos homines, quos valde suspicio, quos præcedentes longissimo intervallo sequor; non illorum interpretationes ad trutinam revocabo, ut errores defegam, quibus confarcinandis non est cur abutar patientia vestra. Nam, ita me Dii ament, ut, si liberet, horum errorum volumen conficerem, præsertim si typorum quoque errores adjungerem. Sed fac omnia castigata esse, & Archetypo exemplum respondere. An perinde putas Interpretes, atque Auctores ipsos audire? Deposito pallio prodeat Græcus aliquis quivis togatus: hoc peregrino vestitu mihi Græcus non est: barbarus videtur loqui: abest illa nativa *διδόσκει*, (vis) quæ in græcis vocabulis inest, languet *φράσις*, (dictio.) friget *γνώμη*, (sententia.) totus denique spoliatus ille ornamentis suis, non aliud sui spectaculum facit, quam si phœnicopterus, aut pſittacus detractis propriis atque nativis plumis alieno & mutuato colore exhibeatur. Omnes quippe Linguae habent quid peculiare, atque ita suum, ut commune aliis esse non possit, quarum Scriptores, nisi quo scribere sermone legantur, neque gratiam eandem retineant, neque parem potestatem, & plurimum elegantiae atque nitoris in optimis ac venustissimis translatis amittant. Ut Nationis, sic etiam Linguae cujusque suus inimicibilis, ut sic dixerim, genius est, ut licet ab

In

Interprete reddantur eadem, aliam tamen speciem obiciant: eam scilicet, quam averſa exhibent peripetaſmata, in quibus figuræ quidem eadem, ſed informes apparent, quæ in adverſis ſe ſe offerunt elegantiffimæ. Utinam duorum ex Atticis eloquentiſſimorum nobiliſſimæ Orationes inter ſe contrariæ Æſchinis, Demoſteniſque quas Tullius convertit, exiſterent, quas convertit non ut Interpres, ſed ut Orator, ſententiis iſdem, & earum formis, tanquam figuris, verbis ad romanam conſuetudinem aptis, in quibus non verbum pro verbo necesse habuit reddere, ſed genus omnium verborum, vimque fervavit; (a) non enim ea ſe annumerare Lectori putavit oportere, ſed tanquam appendere! Optimum, quod minime dubito, convertendi exemplar haberemus; non ſic tamen, ut Orationem pro Milone non legere malim. At ſi a noſtris in iis, quæ converſa ſunt de Græcis ſplendorem Ciceronianum petas, aquam a pumice petas; & tamen quovis pignore certem, neminem, qui græce ſciat, ſibi perſuaſurum, huius de quo loquimur ſermonis candorem, urbanitatem, ſaporem, ſinceritatem, lepores, veneres, uno verbo, quidquid atticum dicitur, vel Ciceronem expreſſurum unquam fuiſſe. Ad illud jam devenimus, Adoleſcentes, quod ſtudia veſtra accendere ſummopere & inflammare debet; eo vos adduco, unde pura fluunt hymettia mella, ubi cum Suada habitant Muſæ, Chariteſque: facile eſt Græcæ Linguae elegantiam & venuſtatem exponere, ſed græce neſcienti non facile perſuadere: Nihilo tamen ſecius cum audiat quis a Cicerone, Jovem, ſi loqui vellet, non aliter quam Platonis lingua locuturum, ejus, inquam,

Pla-

(a) *De opt. gen. Or. n. 14.*

Platonis, cui parvulo apes in labellis confedisſe dicuntur; cum intelligat a Dionyſio Halicarnafſeo eam eſſe Xenophontis jucunditatem inaffectatam, ut ipſæ ſermonem Gratiae finxiſſe videantur; ſi Laertio fidem habeat affirmanti, Dialecticæ ſi uſus eſſet apud Deos non futuram aliam, quam Chryſippeam; ſi ad fabulas non amandet, quod de Theophrasto dicitur, & D. Chryſoſtomo, quorum alter divinitate dicendi, alter aurea eloquentia nomen invenit; ſi auſcultet Quinſtiliano concedenti ſermonem ipſum Romanum (atqui ille & eſt, & habetur elegantiffimus) non recipere illam ſolum conceſſam Atticis venerem; ſi noverit atticam munditiem, atticos ſales, atticæ ironias, Floræ attica vireta, verbo, illum tantopere celebratum Atticiſmum paſſim a Latinis nominari, quoties aliquid efferre cogitant, quod nil venuſtius, nil elegantius intelligi velint; hæc & alia multa de Græca Lingua quæ auditione acceperit, tametſi ejus ſuavitatem non guſtarit, tamen non poteſt non magnum aliquid de ejusdem venuſta nitida caſta incorrupta dulciſſima ſimplicitate ſibi animo fingere. Certe Attici nescio quo ſapore vernaculo quaſi thymum redolente reliquos Græcos ſuperabant, quorum aures ſic teretes erant ac religioſæ, ut ille ipſe Teophrastus, quem ſuperius tanquam diſertiffimum laudavimus, cum ætatem ageret Athenis, optimeque diceret, apud Anum Aſticam loquens (a) ſpeciem hoſpitis non effugerit: & ut paucis multa dicam, *bene dicere*, Tullio (b) teſte, id erat, *atticæ dicere*. Verumtamen nolite putare Dialectos cæteras inurbanas & inficetas fuiſſe; quemadmodum cum Hetruſca Lingua apud nos atticum ſapere dici poſſit, in multis Italiæ Ur-

(a) *Brut. n. 172. & Quinſt. 8. 1.*

(b) *De Opt. gen. Or. 13.*

Urbibus sermo absonus est, agrestis, inconditus, rudis, sed Græcorum dialecti omnes elegantes erant, venustæ, & peculiarem gratiam habebant. Quid elegantius Anacreonte? Et tamen omnia scripsit lingua Ionica. Quid Theocrito suavius? ei tamen lingua Dorica familiaris est. Pindarus tandem, Aristophanes, Euripides, Sophocles, & supra cæteros Homerus varias cujusque græci idiomatis notas commiscent; ex qua varietate, quæ unius græcæ linguæ propria est, oritur in Orationis numero, vel rythmo modo evidentia, modo majestas, modo jucunditas. Hæc Dialectorum & castigatorum quidem omnium varietas facile ostendit Græcam Linguam inter cæteras verborum fœcunditate pollere; præsertim cum derivatio & compositio vocum varietatem infinite multiplicet. Quid sermonem Romanum tantopere jactas M. Tulli? Si Brutus ille tuus excellens omni genere laudis sic Philosophiam (a) latinis litteris persecutus est, nihil ut iisdem de rebus græca desideranda sint, tamen repugnare possim, non repugno. Verum te ita sentire, & sæpe dissuuisse Latinam Linguam non modo non inopem, (b) ut vulgo putarent, sed locupletiozem etiam esse quam Græcam, & venditare (c) alibi Latinos non modo non vinci a Græcis verborum copia, sed esse in ea etiam superiores, eo quasi firmissimo argumento, quod laborem & dolorem Græci uno nomine appellant πόνος, tum vero irriforia exclamatione exultare, (d) o verborum inops interdum, quibus abundare te semper putas Græcia: aliud est dolere, aliud laborare; hæc te dicere, qui novisse debueras, Græcos aliud nomen habere, quo dolorem significant, λύπῃ, aliud quo laborem, πόνον, enim

(a) Acad. 2. (b) de Fin. l. 1. n. 10.

(c) de Fin. l. 3. n. 5. (d) Tuscul. 2. n. 35.